

A/3

II. 5
322

Qoals.

ax

101/233

Vega

1st French edn.

115

G. Y. B. H. 91

7 26

2 vol.

1st French
edition


30801

presdes
amsterdam

350v-

HRGMP

8



LE
COMMENTAIRE

322.

ROYAL,

OV

L'HISTOIRE DES YNCAS,

ROYS DV PERU;


Contenant leur origine , depuis le premier *Ynca Manco Capac*, leur Etablissement, leur Idolatrie, leurs Sacrifices, leurs Vies, leurs Loix, leur Gouvernement en Paix & en Guerre, leurs Conquestes ; les merueilles du Temple du Soleil ; ses incroyables richesses, & tout l'Estat de ce grand Empire , auant que les Espagnols s'en fissent maistres , au temps de *Huascar*, & d'*Atahualpa*.

Ensemble vne description particuliere des Animaux , des Fruicts , des Mineraux, des Plantes, & des singularitez du Pais.

Oeuure curieuse , & tout à fait necessaire à l'intelligence de l'Histoire des Indes.

Escrite en langue Peruuienne , par l'Ynca Garcillasso de la Vega , natif de Cozco ; & fidellement traduite sur la version Espagnolle, par I. BAUDOUIN.

Avec deux Tables fort amples, l'vne des Chapitres, & l'autre des principales Matieres.



A P A R I S,

Chez AUGUSTIN COVRBE', Libraire & Imprimeur de Monseigneur Frere du Roy, au Palais, dans la petite Salle, à la Palme.

M. DC. XXXIII.

AVEC PRIVILEGE DV ROT.



COMMEMORATIVE


ROYAUME

HISTOIRE DES YNCAS

ROIS DV PERU

Contenant leur origine, depuis le premier Incas, jusqu'à
 l'abolition de leur Empire, leur Gouvernement, leur Religion,
 leurs Loix, leurs Conquêtes, les révolutions du Temple du
 Soleil, les incursions des Espagnols, &c. leur Empire étoit
 grand Empire, & étoit divisé en plusieurs Provinces, &c.
 l'Empire étoit divisé en plusieurs Provinces, &c. l'Empire étoit
 divisé en plusieurs Provinces, &c. l'Empire étoit divisé en
 plusieurs Provinces, &c. l'Empire étoit divisé en plusieurs
 Provinces, &c. l'Empire étoit divisé en plusieurs Provinces,
 &c. l'Empire étoit divisé en plusieurs Provinces, &c.

Écrit par l'abbé de la Vigne, &c. l'abbé de la Vigne, &c.
 l'abbé de la Vigne, &c. l'abbé de la Vigne, &c. l'abbé de la
 Vigne, &c. l'abbé de la Vigne, &c. l'abbé de la Vigne, &c.



A PARIS

chez la Citoyenne, &c. l'abbé de la Vigne, &c. l'abbé de la
 Vigne, &c. l'abbé de la Vigne, &c. l'abbé de la Vigne, &c.

M D C C X X I I

chez la Citoyenne, &c. l'abbé de la Vigne, &c.





A
TRES-HAVT,
E T
TRES-EXCELLENT
PRINCE,
MONSEIGNEVR
LOVYS DE BOVRBON,
COMTE DE SOISSONS, &c.



MONSEIGNEVR;

*La naissance des Princes,
qui est un Chef-d'œuvre de la
Nature, differe beaucoup de celle des autres*

E P I S T R E.

Personnes. Pour les rendre tels qu'ils doivent estre , il faut plus d'un iour , comme pour engendrer Hercule , il fallut plus d'une nuit. Aussi est-ce pour cela que les Poëtes les appellent des H E R O S , c'est à dire des hommes extraordinaires , dans le sang desquels est meslé ie ne sçay quoy de diuin. Mais comme le Soleil agissant à la generation de l'or , le produict assez souvent imparfaict ; Eux de mesme ne peuuent pas naistre tousiours accomplis , ny sous vn Astre si fauorable, que n'y laissant rien à desirer, il leur communique tout ce qu'il a de Vertus , & de bonnes influences. L'Histoire remarque cette verité en la personne d'Alexandre, de Iules Cesar, d'Auguste , & de leurs semblables. Je veux croire qu'il n'est pas possible d'examiner séparément les grandes choses qu'ils ont faites, sans les appeller immortelles , puis que la memoire en est aujourd'huy viuante : Mais il me faut aduoüer aussi que leurs vices ne sont pas encore morts , & qu'à bien considerer toute leur vie ; on la trouuera composée d'un confus meslange de qualitez, bonnes & mauuaises. Il n'en est pas ainsi de la vostre , M O N S E I G N E V R ; Et peut-on bien dire d'elle, que la source en est si pure, qu'on ne la sçauroit iamais troubler. Vos actions ne sont pas moins fleurissantes que vos années , qui portent desia des fructs tous meurs en leur pre-

EPISTRE.

miere verdure. En l'âge où vous estes, vostre conduite peut servir d'imitation à ceux-là mesme qui ont vieilly dans les affaires publiques, & il ne vous reste presque rien à souhaitter icy bas, possédant, comme vous faites, dans une pleine tranquillité, les biens du Corps, de l'Âme, & de la Fortune. Ceux qui ont l'honneur de vous voir faire les exercices dignes d'un Prince, en sont ravis de merueille; & parmy tant de disposition, & de grace qu'ils y remarquent, ne peuvent assez louer cette taille aduantageuse, ce visage heroïque, ce maintien majestueux, & ces autres ornemens extérieurs, dont le Ciel vous a doiué. Par de si doux charmes, vous attirez puissamment les cœurs; Et c'est par eux encore que les volontés de tous vous sont acquises, mieux que ne le furent iadis celles des Romains à l'Empereur Titus, que l'on surnomma Les Delices du monde, pour des qualitez inférieures aux vostres. Mais bien qu'on ne puisse nier à celles-cy le titre d'Illustres, si est-ce qu'elles ne semblent estre que la monstre, & l'eschantillon des autres, qui vous sont essentielles. Vous avez, MONSIEUR, en la plus belle partie de vous-mesme une PIÉTÉ sans fard, qui à l'exemple du grand S. LOUIS, de qui vous estes sorty, vous fait aymer Dieu avecque zele, autant que vous haysez les ennemis de son Nom, & particu-

EPISTRE.

lierement les Blasphémateurs, & les Libertins.
 Vous avez une Foy inuiolable au service de no-
 stre ROY, une Franchise, qui ne se lasse iamais
 d'obliger, une Prudence admirable, un Jugement
 profond, un Esprit capable des grands emplois,
 et un courage inuincible dans les dangers. Tes-
 moing le siege de la Rochelle, où faisant haster le
 trauail du fort Louys, par l'ordre exprés que vous
 en eustes de sa Majesté; Il n'y eust celuy qui ne
 prit garde, qu'à trauers la poudre & la fumée du
 canon, d'où l'on auoit de la peine à vous faire
 retirer, vostre Valeur sembloit deffier la mort,
 & se fortifier par la tendresse de vos années.
 Vous avez en un mot toutes les Vertus les plus
 souhaittables en un Prince de vostre naissance,
 en qui se trouue parfaitement iointe la sciëce de con-
 noistre les hommes, d'en faire eslection par le me-
 rite, de n'approuuer que leurs bonnes actions, &
 de leur apprendre à ne point violer l'obeissance, &
 le respect qui se doiuent aux Souuerains. A ces
 biens du Corps & de l'Esprit, qui forment assen-
 rement une excellente harmonie dans les suieçts
 où ils se rencontrent; il faut adiouster pour com-
 ble ceux de la Fortune. Quelque criminelle que
 la fassent les Poëtes, quand ils disent qu'elle les
 donne d'une main, & les oste de l'autre; Il me
 semble, MONSEIGNEVR, qu'elle a rai-
 son d'employer toutes les deux à vous les distri-
 buer,

EPISTRE.

buer, puis qu'avec la mesme largesse que vous les receuez d'elle, vous en usez generalement pour le commun bien des honnestes gens que vous en estimez dignes. Elle ne peut donc pecher par exceſ en ce partage de ses faueurs; qui sera tousiours au deſſous de vostre Generosite, quand mesme elle vous le feroit aussi grand qu'à tous ces riches Roys du Peru, qu'elle accabloit de thresors inestimables, & qui leur seruoient pluſtoſt pour le plaisir de la veüe, que pour l'usage de la vie, comme il se remarque en diuers endroicts de cette Histoire. Estant escrite par vn de leurs Princesses, sous le tiltre de Commentaire Royal; elle ne peut, MONSEIGNEVR, estre plus legitimement dediee, qu'à vn Prince tel que vous, de qui les Vertus sont toutes Royales. Si la Version que i'en ay faite merite l'honneur de vous entretenir à vostre loisir; possible qu'en cette diuersité de choses estranges & inouïes, il y en aura quelques-unes qui vous seront agreables. Vous y verrez avec ordre, la Religion, les mœurs, les Couſtumes, les Loix, les Guerres, les Conquestes, & le Gouvernement de ces Indiens; qui dans le Pays de l'or, où ils estoient naiz, passoient innocemment leur vie, comme on faisoit au ſiecle doré. Vous y verrez vn prodigieux travail de chemins publics, de Ponts, de Chaussées, & d'Aqueducs, avec des richesses incroyables,

EPISTRE.

employées à l'embellissement, plustost qu'à la structure d'un assez bon nombre de Forteresses, de Magazins, de Temples, & de Palais, où l'excellence de l'Art estoit moins considerable que celle de la matiere. Vous y verrez finalement la decadence d'un grand Empire, aduenüe par la tyrannie d'un Vsurpateur; & remarquerez en luy tant d'iniustices, dont vous estes ennemy mortel, qu'il est à craindre que l'horreur du crime ne vous en rende suspecte la verité. Mais quoy qu'il en soit, par l'Ouurage de celuy qui vous en offre les Relations traduites en nostre langue; vous serez asseuré de la sincerité de son intention, & de l'extrême desir qu'il a d'estre aduoué,

MONSEIGNEVR,

Vostre tres-humble, & tres-obeissant
Seruiteur, I. BAYDOIN.



AV LECTEV.



E ne pensois à rien moins qu'à la version de ce liure, lors qu'un excellent Esprit me conseilla de l'entreprendre, & me fist la faueur de m'en donner la copie. Il m'en racconta de si belles choses, & si dignes de la curiosité des honnestes gens, que j'aurois creu faillir contre le deuoir, si apres son iugement j'eusse consulté le mien, & differé plus long temps à mettre la main à l'oeuvre. Je commençay doncques d'y trauailler; Et peu s'en falût, à dire le vray, qu'en ayant trouué d'abord l'Ouurage assez espineux, ie ne le quitasse, bien qu'à regret, pour la iuste desiance que j'ay tousiours eüe de moy-mesme, & particulierement en matiere de productions de l'esprit, qui ont d'ordinaire peu d'aprobateurs, & beaucoup de Iuges. Mais enfin, apres que ie me fus proposé la dignité du sujet, & la honte que ce me seroit de m'arrester en si beau chemin, puis que, comme dit le Poëte,

A V L E C T E V R.

Vn bon commencement est la moitié de l'œuvre; cette considération, & les persuasions de mes Amis, m'obligerent à passer outre dans la Traduction de ce Volume. Il vous esclaircira de beaucoup de choses, que les autres Historiens n'ont qu'obscurément traittées, & que celuy-cy corrige en diuers endroiçts de son Commentaire. Il a moyen de le faire, comme natif du Peru, & parfaitement instruiçt en la langue de la Cour, qui se parloit de son temps a Cozco, où il a passé la meilleure partie de son aage. D'ailleurs il a cela de recommandable, que dans les matieres douteuses, il n'asseure iamais rien, qu'il ne le fortifie aussi tost des tesmoignages de ceux qui en ont escrit; & qui pour n'auoir entendu, ny sceu prononcer la pluspart des mots Peruuïens, contenus aux Relations qu'on leur a données, en ont peruertey le sens; à quoy nostre Autheur supplée, quand il le trouue defectueux. De vous dire au reste quel fruit l'on peut recueillir de cette lecture, cela seroit superflu, puis qu'à bien considerer la façon de viure des plus civilisez d'entre ces Peuples, il paroist assez que les connoissances naturelles leur ont appris à joindre ensemble celles de la Politique, & de la Morale. En quoy certes leurs Roys, qu'ils appelloient *Incas*, ont tellement excellé, qu'en

A V L E C T E U R.

La vraye institution des Loix & des Coustumes de leur Empire , il se treuve que leur Genie admirable s'est rencontré avec celuy de Platon , pour former d'idée d'un parfaict Gouvernement , & mettre à son plus haut point la tranquillité publique. Avec tout cela neantmoins , ie ne doute pas que plusieurs ne s'esfayent de veritez de ce Liure , de ses noms estranges , & des grandes choses que son titre leur promet , y croyant treuver possible les *Adventures de Fernand MendeZ* , qui pour leur estre suspectes de mensonge, ne laissent pas toutesfois de paroistre agreables , & diuertissantes. Mais quoy qu'il en soit , si leur incredulité leur faict chocquer cet Ouvrage , ie seray bien aise qu'ils sçachent mon intention. Elle n'a jamais esté que de le traduire en faueur des hommes raisonnables, & non pas de leurs contraires, qui pour auoir ouy dire que Paris est vn Monde, s'imaginent qu'il n'y en a point d'autre, ny point de Mer que la Seine ; & que les Cartes Geographiques sont seulement des payfages faicts à plairir , qui ne seruent qu'à l'entretien de la veuë. Pour moy, de quelque façon que ie considere cette Histoire , elle me semble tres-veritable , s'il en faut croire l'apparence, & le bon sens de celuy qui l'a escrite. Vous l'apprendrez par les raisons qu'il en rend luy-

A V L E C T E U R.

mesme au commencement de cette premiere Partie. Je vous la donne, Lecteur, en attendant la seconde, où vous verrez l'establissement des Espagnols en cette contrée des Indes, que nous descriuons icy ; Avec vne ample relation d'un nombre presque infiny de partialitez, de diuisions, & de guerres, aduenues en ce Pais-là, par l'ambition de ces Conquerans insatiables. Que si la Naissance & la Vertu sont de puissans charmes, pour faire estimer l'Autheur d'un Ouurage ; en voicy vn, qui vous sera, ie m'asseure, en vne consideration tres-particuliere, & pour sa qualité de Prince, & pour son propre merite.

*Vn de mes amis m'a donné les Vers suivans, que j'ay
mis icy, plustost pour luy complaire, & remplir
le blanc qui restoit, que pour me laisser
chatoïiller de vaines loüanges.*



SVR LE SVIET DE CE LIVRE, STANSES.



*VOUS de qui l'Esprit se pourmene
Dans ce Pais delicieux;
Où le Valeureux Fils d'Alcmene,
Soustint la Machine des Cieux;
Sans faire de plus long voyage,
Arrestez-vous à lire cét Ouvrage,*

*Vous y verrez de puissans Rois
Faire des conquestes plus hautes,
Que celle qui fist autrefois
Courir les Mers aux Argonautes,
Et trouuerez que leur toison
A plus valu que celle de Iason.*

*Leurs memorables Aduantures,
Pleines de Prodiges charmans,
Sont des Veritez toutes pures,
Non pas de fabuleux Romans,*

*Et si l'on s'adonne à les lire,
Il ne se peut que l'on ne les admire.*

*Pluton en leur Païs natàl
Ouvre à la terre ses entrailles,
Pour leur donner ce cher Metal,
Dont ils lambrissent les murailles,
Qui dans le Temple du Soleil,
Brillent sans art d'un esclat nompareil.*

*Ils le possèdent sans enuie,
Pour en embellir les Autels,
Non pour l'usage de la vie,
Comme la pluspart des Mortels,
Qui par un excez d'avarice
Adorent l'Or; Idole de leur Vice.*

*Toy de qui l'Esprit nous départ
Tant de nouveaux fructs de tes veilles,
Continuë à nous faire part
De la suite de ces Merueilles,
Qui nous obligent d'aduoïer,
Qu'on ne sçauroit assez bien te louer.*

DE BEAV-CLAIR.

P R E F A C E


DE L'AVTHEVR.

IE sçay qu'il y a plusieurs Historiens Espagnols, qui pour satisfaire à leur curiosité particuliere, & à celle du public, ont escrit assez au long des Royaumes du nouveau Monde; comme de la Mexique, du Peru, & ainsi des autres; Mais ils ne l'ont pas faict avecque la relation entiere qui s'en pouuoit donner, comme ie l'ay remarqué particulièrement dans les choses qu'ils ont dittes du Peru; dont ie puis asseurer sans vanité, qu'estant natif de la ville de Cozco, qui fut comme vne seconde Rome dans ce grand Empire, i'en dois auoir vne connoissance plus ample, & plus claire que n'est celle qu'il nous en ont donnée. Ce n'est pas pourtant que ie ne veuille bien admirer qu'ils disent beaucoup de choses de la grandeur & des merueilles de cet Empire. Mais le mal-heur est, qu'ils les descriuent si succinctement, que de la façon qu'ils en parlent, i'ay bien de la peine à comprendre ce qu'il y a de plus intelligible dans leurs escrits. Cette consideration iointe à l'amour naturelle que i'ay pour les choses de mon Pays, m'a faict resoudre à mettre en lumiere ces Commentaires, où vous verrez, ie m'assure, assez distinctement, quelle estoit la Religion de ces peuples, quelle leur façon de viure, & quel le Gouvernement de leurs Roys en paix & en guerre, auant que les Espagnols entrassent dans le Peru. Vous y verrez,

PREFACE DE L'AUTHEVR.

dis-je , tout ce que la curiosité vous sçauroit faire souhaiter touchant les mœurs de ces Indiens , depuis les moindres exercices des suiects , iusques à la plus haute grandeur de leurs Roys. Je n'ay seulement escrit que de l'Empire des Yncas , sans m'engager dans les autres Monarchies , pour n'auoir eu connoissance que de celle-cy. Que si ie n'apporte à cette Histoire toutes les graces requises , ie suis bien assure du moins de ne rien dire qui ne soit vray , ny de ne mettre en auant aucune chose , qui semble incroyable d'abbord , qu'en mesme temps ie ne l'autorise par le tesmoignage des Historiens Espagnols qui en ont escrit , ou entierement , ou en partie. Aussi n'est-ce pas mon intention de les contredire , mais bien plustost de commenter leurs escrits , & de leur seruir de truchement sur plusieurs mots Indiens , qu'ils ont fort mal expliquez , pour n'auoir sceu cette langue. Vous en apprendrez la verité par la lecture de cette Histoire , que i'ay composee avecque soing , non pas pour mes interests particuliers , mais pour seruir generalement la Republique Chrestienne. Car ie m'assure , que les plus curieux qui prendront la peine de la bien considerer , rendront en mesme temps graces à Dieu , de ce qu'il luy a plû tirer tant de grandes Nations du profond abyssme de l'Idolatrie , pour les reduire au giron de l'Eglise comme ie le souhaite de toute mon ame. Je m'ose promettre au reue , que ma bonne volonte pourra suppleer aux deffauts de mon ouurage ; Et que vous le receurez avecque la mesme sincerité que ie vous le presente ; en attendant qu'en suite de ce Volume ie vous puisse donner l'autre , où il sera traitté des choses plus memorables que les Espagnols ont faites dans mon Pays , iusques à l'an 1560. qui fut le temps auquel i'en sortis.

RÉMARQUES TOUCHANT LA LANGVE GENERALE DES Indiens du Peru.

 FIN de mieux faire entendre ; ce que moyennant la grace diuine ie me suis proposé d'escrire dans cette Histoire ; pource qu'il y doit estre parlé de plusieurs noms touchant la langue generale des Indiens du Peru, ie m'assure qu'il ne sera pas hors de propos que ie fasse là dessus quelques remarques particulieres.

La premiere est, Qu'il y a trois diuerses manieres de prononcer quelques syllabes de cette langue, bien differente de l'Espagnole, & en la prononciation de laquelle consistent les diuerses significations d'un mesme mot, y ayant des syllabes qui se prononcent les vnes entre les deux levres, les autres en retirant la langue vers le palais, & les autres du fonds du gosier, comme il sera monstré plus au long par les exemples que nous en donnerons cy-aprés.

La seconde, Que les mots n'ont iamais d'accent en la derniere syllabe, mais presque tousiours en

REMARQUES SVR LA LANGVE

la penultiesme, & fort peu souuent en celle qui la precede ; Ce que i'ose bien affirmer contre l'opinion de plusieurs, qui pour ne sçauoir ces langues estrangeres, s'opiniaistrent à soustenir que l'accent de leurs dictions doit estre en la derniere syllabe.

La troisieme, Que la langue generale de Cozco, de laquelle c'est mon dessein de parler, & non pas des autres particulieres de châque Prouince, dont le nombre est infiny, manque des lettres suiuanes, B. D. F. G. I. Iota, & L. simple ; Car il n'y en a point que de doubles ; comme au contraire l'R. double ne se prononce iamais, ny au commencement, ny au milieu de la diction. A quoy i'adiouste que la lettre X. n'est point en vusage en cette langue, non plus que ces autres dont ie viens de parler, & qu'ainsi il y a six lettres dans l'Alphabet Espagnol qui manquent au Peruuien, voire mesme huit, si l'on en retrenche l'L. simple, & l'R. double ; par où l'on peut voir que les Espagnols qui les y adioustent, ne le peuuent faire sans alterer & corrompre ce langage ; D'où il s'ensuit aussi, qu'à faute de ces mesmes lettres, les Indiens, qui n'en sçauent pas l'usage, prononcent fort mal les dictions Espagnoles. Puis qu'il est donc raisonnable qu'estant du pais, ie m'efforce d'empescher, s'il est possible, que ma langue naturelle ne soit corrompue ; l'on ne doit pas trouuer mauuais, qu'en cette Histoire i'escriue comme Indien ; c'est à dire que ie me serue des mesmes

DES INDIENS DV PERV.

lettres dont il faut former les mots que l'on escrit; à quoy ie ne pense pas que le Lecteur se doieue opposer legitiment, ny trouuer estrange cette nouueauté, puis que ie l'ay introduitte contre le mauuais vsage; Au contraire il me semble qu'à la considerer comme il faut, il aura bien plus de plaisir à lire ces mots en leur pureté naturelle, qu'à voir leur source troublée. Or pource qu'ayant à prouuer les choses que ie diray, il faudra que i'en allegue plusieurs tirées des Espagnols, & que ie le feray mot à mot, sans aucune corruption, & de la façon qu'ils les ont escrites; vous m'obligerez de ne croire pas que ie me contredise, lors qu'aux endroiçts que i'allegueray, ie me seruiray des mesmes lettres, que i'ay dit n'estre point dans l'vsage de cette langue, mon intention en cela n'estant autre, que d'en vser ainsi, pour rapporter fidellement les authoritez des Espagnols, qui me seruent de preuues.

La quatriefme remarque est, Qu'en cette langue generale, il n'y a point de pluriel; Il est vray qu'ils se seruent de particules qui le denotent, & de singulier en tous les deux nombres; de maniere, que si i'ay mis au pluriel en certains endroiçts quelque nom Indien, ie ne l'ay fait que par vne maniere de corruption Espagnole, ou pour m'accommoder aux Adiectifs; Car ie ne voy pas que i'aye pû raisonnablement mettre au singulier les mots Indiens, ny au pluriel les Adie-

REMARQUES SVR LA LANGVE

Etifs, ou les Relatifs Espagnols. l'obmets quantité d'autres choses qu'on peut remarquer en cette langue, qui est grandement differente de l'Espagnole, de l'Italienne, & de la Latine; A quoy les *Mestiz*, & les *Criollos*, qui auront tant soit peu de curiosité, prendront soigneusement garde, s'ils le trouuent bon; Pour moy ie pense faire beaucoup pour eux, de leur monstrier, comme avecque le doigt, de la Cour d'Espagne, où ie suis à present, les principes de leur langue, afin qu'ils se la conseruent toute pure; Car pour en dire le vray, c'est vn grand dommage, de voir se corrompre ainsi, & s'alterer peu à peu vne langue si gentille, & si profitable à ceux qui la sçauent. Tesmoins les Peres Iesuites, & plusieurs autres bons Religieux, qui pour l'auoir estudiee avecque soing, l'ont vtilement employée au salut des Indiens, qu'ils ont instruits en la doctrine Chrestienne.

La cinquiesme, Que le mot *d'habitant* se doit entendre des Espagnols establis dans le Peru, & c'est en ce mesme sens que nous auons accoustumé d'en vser.

La sixiesme, Que durant tout le temps que ie fus aux Indes, à sçauoir iusques à l'an mil cinq cens soixante; ny de vingt ans apres, il n'y eut en tout mon païs, ny or, ny argent monnoyé. Car les Espagnols qui vouloient vendre ou acheter quelque chose, souloient peser ces deux me-

DES INDIENS DV PERU.

taux par marcs, & par onces ; & comme en Espagne on dit ordinairement des ducats, ainsi au Peru l'on disoit des Castillans, ou des poids ; chacun desquels, ou d'or, ou d'argent valoit quatre cens cinquante marauedis, de maniere que cinq de ces poids valoient six ducats ; Ce que nous auons bien voulu rapporter icy, afin qu'en la lecture de cette Histoire, l'on ne confonde point l'un avecque l'autre. Le poids de l'argent differoit beaucoup en quantité de celuy de l'or ; mais quant au prix c'estoit vne mesme chose. Que s'ils vouloient changer l'un pour l'autre, ils scauoient en tel cas combien ils deuoient donner pour cent, & en faisoient de mesme du fin argent, quand ils le changeoient avecque celuy, qu'ils appelloient *courant*, qui n'auoit pas encore passé par l'espreuue.

La septiesme, Que le mot *Galpon*, qui estoit comme vne maniere de *hale*, n'est point de la langue generale du Peru, mais plustost des Isles de *Barlaento*. Par ce mot, que les Espagnols ont introduict en leur langue, comme plusieurs autres, dont il est parlé en nostre Histoire, se doit entendre vne salle spatieuse & fort longue. Car les Roys *Yncas* en auoient de si grandes, qu'ils s'en seruoient comme de places publiques pour s'y resiouir, & y celebrer leurs Festes solennelles en temps de pluye. Cela se remarque en quantité d'endroiets de ce Liure, où

REMARQUES SVR LA LANGVE, &c.
se rencontrent à tout propos d'assez belles descriptions des assemblées qui se faisoient en tels lieux, que l'on pouuoit nommer à bon droit des Theatres destinez aux diuertissemens du peuple. Voyla quant aux principales remarques de ce Volume, qu'il suffira d'auoir icy rapportées.

TABLE



T A B L E
DES CHAPITRES
CONTENVS EN
CE VOLUME.

LIVRE PREMIER.

- S** I L y a plusieurs Mondes ? & des cinq Zones. Chapit. I. fol. 1.
S'il y a des Antipodes? Chap. II. fol. 7.
De la descouuerte du nouveau monde. Chap. III. fol. 9.
La deduction du nom Peru. Chap. IV. fol. 15.
Authoritez pour vne confirmation plus ample du nom Peru. Chap. V. fol. 20.
Tesmoignage d'un autre Auteur touchant le nom Peru. Chap. VI. fol. 25.
Deduction de quelques autres noms nouueaux. Chap. VII. fol. 29.
Description du Peru. Chap. VIII. fol. 34.
De l'Idolatrie de ceux du Peru, & des Dieux qu'ils adoroient

TABLE DES CHAPITRES.

- Avant qu'estre gouvernez par les Yncas. Chap. IX. fol. 44.
 De diuers autres Dieux qu'ils eurent. Chap. X. fol. 47.
 Des Sacrifices qu'ils souloient faire. Chap. XI. fol. 50.
 De la maniere de viure de ces anciens Gentils, ensemble de leur
 gouvernement. Chap. XII. fol. 53.
 De leur maniere de s'habiller. Chap. XIII. fol. 61.
 De la diuersité de leurs mariages, & de leurs langues, ensemble
 de leur abominable coustume d'vser de poison, & de sortilege.
 Chap. XIV. fol. 64.
 De l'origine des Yncas, Roys du Peru. Chap. XV. fol. 68.
 De la fondation de la ville Imperiale de Cozco. Chap. XVI.
 fol. 75.
 Des conquestes du premier Ynca Manco Capac. Cb. XVII.
 fol. 80.
 Des fables Historiques touchant l'origine des Yncas.
 Chap. XVIII. fol. 84.
 Protestation de l'Authheur touchant ceste Histoire. Chap. XIX.
 fol. 90.
 Des Bourgs, & des Villes, que le premier Ynca enuoya peupler.
 Chap. XX. fol. 96.
 De l'instructiõ que l'Ynca souloit donner à ses suieets. Cb. XXI.
 fol. 99.
 Des marques d'honneur, & autres enseignes fauorables que
 l'Ynca donna à ses suieets. Chap. XXII. fol. 103.
 De quelques autres enseignes plus fauorables, & du nom Ynca.
 Chap. XXIII. fol. 107.
 Des noms, & des surnoms que les Indiens donnerent à leur Roy
 Chap. XXIV. fol. 113.
 Le testament, & la mort de l'Ynca Manco Capac.
 Chap. XXV. fol. 115.

TABLE DES CHAPITRES.

Des noms appelez Royaux, & de leur signification. Chap. XXVI.
fol. 120.

LIVRE SECOND.



Idolatrie du second âge, & son origine. Chapitre I.

fol. 126.

Les Yncas ont figuré le vray Dieu. Chap. II. fol. 133.

D'une Croix qu'avoient les Yncas en vn lieu sacré. Chap. III.

fol. 140.

De plusieurs Dieux, que les Historiens Espagnols ont attribuez
improprement aux Indiens. Chap. IV. fol. 145.

De plusieurs autres significations du mot Huaca. Chap. V.

fol. 154.

Tesmoignage d'un Auteur touchant les Dieux qu'ils avoient.

Chap. VI. fol. 159.

Qu'ils ont creu l'immortalité de l'ame, & la resurrection uniuerselle.

Chap. VII. fol. 165.

Des choses qu'ils sacrifioient au Soleil. Chap. VIII. fol. 170.

Qu'ils attribuoient au premier Ynca l'institutio de leurs Prestres,
de leurs coustumes, de leurs ceremonies, & de leurs Loix.

Chap. IX. fol. 175.

L'Auteur preuue ce qu'il a dit cy deuant, par les tesmoignages
des Historiens Espagnols.

Chap. X. fol. 178.

Les Yncas diuisoient leur Empire en quatre parties, & tenoient
vn Roole de leurs suiects.

Chap. XI. fol. 186.

De l'Office des Decurions.

Chap. XII. fol. 189.

De quelques Loix qu'eurent les Yncas dans l'estendue de leur
Empire.

Chap. XIII. fol. 192.

TABLE DES CHAPITRES.

Que les Decurions deuoient rendre compte de ceux qui naissoient,
 & qui mourroient. Chap. XIV. fol. 200.

Opinion des Indiens touchant les Yncas du sang Royal, qu'ils di-
 sent n'auoir iamais commis aucune faute. Chap. XV.
 fol. 205.

La vie & les faits de Sinchi Roca, second Roy d'entre les Yn-
 cas Chap. XVI. fol. 210.

Du troisieme Roy Lloque Yupanqui, & de la signification de
 son nom. Chap. XVII. fol. 216.

Des conquestes que fit l'Ynca Lloque Yupanqui. Chap. XVIII.
 fol. 218.

De la conqueste de Hatun Colla & des plaisans côtes que font
 les Collas touchant leur Genealogie. Chap. XIX. fol. 223.

Le grand Pays de Chuquitu se soubmet paisiblement à l'Empire
 de l'Ynca, & plusieurs Prouinces en font de mesme.
 Chap. XX. fol. 228.

Des sciences que les Yncas ont eues, & premierement de l'A-
 strologie. Chap. XXI. fol. 235.

De leur façon de compter l'année, & comment ils connoissoient
 les Solstices, & les Equinoxes. Chap. XXII. fol. 239.

De ce qu'ils croyoient des Eclipses du Soleil, & de la Lune.
 Chap. XXIII. fol. 246.

De la connoissance qu'ils auoient de la medecine, & de la metho-
 de par eux obseruée en la guerison de leurs maladies.
 Chap. XXIV. fol. 251.

De la connoissance qu'ils auoient des plantes medecinales.
 Chap. XXV. fol. 254.

De ce qu'ils sçauoient de Geometrie, de Geographie, d'Arieth-
 metique, & de Musique. Chap. XXVI. fol. 258.

De la Poësie des Yncas Amantas, qui sont leurs Philosophes, &

TABLE DES CHAPITRES.

des Harauicus, ou de leurs Poëtes. Chap. XXVII.
fol. 264.

Du peu d'outils qu'auoient les artisans Indiens.
Chap. XXVIII. fol. 274.

LIVRE TROISIEME.



Eux de Tiahuanacu se rendent à Mayta Capac, quatriesme Ynca, & des bastimens qu'il trouua dans le Pays.
Chapitre I. fol. 283.

De la reduction de Hatumpacaga, ensemble de la conqueste de Caciauiri.
Chap. II. fol. 289.

Du pardon oëtroiyé aux Collas, par l'Ynca Mayta Capac, avec l'explication de la fable, cy deuant rapportée. Cb. III.
fol. 294.

Trois Prouinces se rendent à l'Ynca ; Il en conqueste d'autres, fait des Colonies, & chastie certains peuples, qui souloient vser de poison.
Chap. IV. fol. 297.

L'Ynca gaigne trois Prouinces, & vne bataille sanglante.
Chap. V. fol. 304.

Ceux de Huaichu se rendent à L'Ynca, qui leur pardonne.
Chap. VI. fol. 308.

De la reduction de plusieurs villes à l'obeissance de l'Ynca, & du premier pont qu'il fit faire.
Chap. VII. fol. 311.

Aubruict de ce pont, plusieurs Nations se reduisent, & se rangent volontairement sous l'obeissance de l'Ynca.
Chap. VIII. fol. 316.

L'Ynca gaigne plusieurs autres Prouinces, & meurt paisible dans son Royaume.
Chap. IX. fol. 320.

TABLE DES CHAPITRES.

- Capac Yupanqui cinquième Roy, gaigne plusieurs Prouinces,
 & se les assuiettit à Cuntisuyu. Chap. X. fol. 324.
- L'Ynca subiugue les Aymarac, pardonne aux Curacas, & met
 des bornes à leurs frontieres. Chap. XI. fol. 329.
- L'Ynca enuoye à la conqueste des Quechuas, qui se reduisent vo-
 lontairement. Chap. XII. fol. 335.
- Les Capitaines de l'Ynca gaignent vn grand Pays, qui est dans
 vn fonds le long de la coste de cette mer, & de la punition par
 eux faite des Sodomites. Chap. XIII. fol. 339.
- Deux grands Curacas se rendent tributaires de l'Ynca, apres l'a-
 uoir fait Arbitre de leurs differents. Chap. XIV. fol. 344.
- L'Ynca faict faire vn pont de chaume, & de jone sur le canal
 du lac de Titicaca, & rend tributaires les Indiens de
 Chaianta. Chap. XV. fol. 353.
- De l'industrie qu'auoient les Indiens à passer les riuieres, & à
 faire leurs pesches. Chap. XVI. fol. 360.
- De la reduction de cinq grandes Prouinces, sans y comprendre les
 autres moindres. Chap. XVII. fol. 368.
- Le Prince Ynca Roca reduit à son obeissance plusieurs grandes
 Prouinces, Mediterranées & maritimes. Chap. XVIII.
 fol. 372.
- Des Colonies enuoyez dans le Pays, & de la mort de l'Ynca
 Capac Yupanqui. Chap. XIX. fol. 376.
- Description du Temple du Soleil, & de ses grandes richesses.
 Chap. XX. fol. 378.
- Du cloistre du Temple, & des logemens particuliers consacrez
 à la Lune, aux Estoilles, au Tonnerre à l'Esclair, & à
 l'Arc-en Ciel. Chap. XXI. fol. 383.
- Du nom du grand Prestre, & des autres endroiets de la maison
 du Soleil. Chap. XXII. fol. 388.

TABLE DES CHAPITRES.

- Des lieux destinez à faire leurs Sacrifices , & où il falloit qu'ils se missent pied nud , avec vne description de leurs fontaines.* Chap. XXIII fol. 391.
- Du iardin d'or, & des autres richesses du Temple , à l'imitation desquelles il y auoit plusieurs grands thresors dans cet Empire* Chap. XXIV. fol. 395.
- Du fameux Temple de Titicaca , & de quelques contes fabuleux de ces Indiens.* Chap. XXV. fol. 400.
-

LIVRE QUATRIESME.

- D**E la maison des Religieuses , ou des Vierges dediées au Soleil. Chapitre I. fol. 407.
- Des statuts des Vierges esleuës , & de leurs exercices.* Chap. II. fol. 411.
- Du religieux respect qu'ils portoient aux choses que les Vierges esleuës auoient faites , & de la punition de celles qui pechoient contre leur honneur.* Chap. III. fol. 415.
- Qu'il y auoit plusieurs autres maisons de Vierges esleuës avec vne preuue particuliere de la Loy contre les Religieuses debauchées.* Chap. IV. fol. 419.
- Du service, & des ornemens des Vierges esleuës, qui n'estoient données pour femmes à personne.* Chap. V. fol. 423.
- Des femmes , dont l'Yncasouloit gratifier les Curacas , & les autres grands Seigneurs.* Chap. VI. fol. 426.
- De quelques autres femmes , qui ne se marioient iamais , & particulièrement des veufues.* Chap. VII. fol. 428.
- De leur mariage , ensemble de leur mesnage.* Chap. VIII. fol. 430.

TABLE DES CHAPITRES:

- Des raisons pour lesquelles ils marioient à sa propre sœur le Prince heritier de la couronne.* Chap. IX. fol. 433.
- Des différentes manieres d'heriter du Royaume.* Chap. X. fol. 436.
- Des ceremonies qu'ils obseruoient à sevrer les enfans, à leur couper les cheueux, & à leur donner vn nom.* Chap. XI. fol. 441.
- De l'austerité, avec laquelle ils esleuoient leurs enfans.* Chap. XII. fol. 445.
- De la maniere de viure, & de l'exercice des femmes mariées.* Chap. XIII. fol. 449.
- Des visites des Indiennes; De quelle façon elles refaisoient leurs habillemens, & comment on souffroit les femmes publiques.* Chap. XIV. fol. 452.
- L'Ynca Roca conqveste plusieurs nations, dont les plus remarquables estoient les Chancas, & la Prouince de Hancu-Huallu.* Chap. XV. fol. 455.
- Du Prince Yahuarhuacac, & l'explication de son nom.* Chap. XVI. fol. 463.
- Des Idoles des peuples appelez Antis, & de la conqveste des Charcas.* Chap. XVII. fol. 468.
- Remonstrance des vieillards aux ieunes, qu'ils font resoudre à recevoir l'Ynca.* Chap. XVIII. fol. 471.
- De quelques Loix qu'establit le Roy Ynca Roca; des Escholes par luy fondées dans Cozco, & de ses dicts memorables.* Chap. XIX. fol. 476.
- De l'Ynca surnommé Pleure-sang, septiesme Roy du Peru, avec vn recit de ses deffiances, de ses conqvestes, & de la disgrâce du Prince.* Chap. XX. fol. 478.
- De l'apparition d'un Fantosme au ieune Prince, & d'un aduis qu'il*

TABLE DES CHAPITRES.

qu'il luy donna pour en aduertir son pere. Chap. XXI.
fol. 483.

Conseil des Yncas touchant l'apparition, & l'aduis donné de la
part de ce Fantosme. Chap. XXII. fol. 487.

De la rebellion des Chancas, & de leurs anciennes promesses
Chap. XXIII. fol. 490.

L'Ynca sort de la ville de Cozco, qui est secouruë par le Prince.
Chap. XXIV. fol. 494.

LIVRE CINQVIESME.

DE l'accroissement que les Yncas faisoient des terres,
& de quelle façon ils les souloient partager à leurs
suiets. Chapitre I. fol. 500.

De l'ordre qu'ils obseruoient à cultiuer leurs terres, & de leur
commune resioissance, quand ils labouroient celles de
l'Ynca, & du Soleil. Chap. II. fol. 504.

Du partage des terres fait aux Indiens, & de la methode qu'ils
obseruoient à les engresser. Chap. III. fol. 509.

Du partage qu'ils faisoient de l'eau pour arroser les terres, &
de la punition des feneants, & des paresseux. Chap. IV.
fol. 515.

Du tribut qu'ils faisoient donner à l'Ynca, & du soing qu'ils
auoient de leurs greniers. Chap. V. fol. 516.

Des habillemens, des armes, & de la chaussure qu'ils souloient
faire pour les gens de guerre. Chap. VI. fol. 520.

Que l'or, l'argent, la pierrerie & telles autres choses de prix, te-
noient lieu de present parmi eux, & non pas de tribut.
Chap. VII. fol. 526.

TABLE DES CHAPITRES.

- Comment ils gardoient les prouisions , & à quoy ils les em-
ployoient. Chap. VIII. fol. 530.
- Qu'il n'y auoit entre eux aucuns mendiâs , & qu'ils donnoient aux
suiets de quoy s'habiller. Chap. IX. fol. 534.
- La diuision , & l'ordre de leur bestail , & des autres animaux
qu'ils nourrissoient. Chap. X. fol. 540.
- Des Loix , & des Ordonnances faites par les Yncas , pour le
commun bien de leurs suiets Chap. XI. fol. 543.
- De quelle façon ils se comportoient enuers leurs nouueaux suiets,
apres les auoir conquis. Chap. XII. fol. 549.
- De la methode qu'on obseruoit à pouruoir aux charges , & à
toute sorte d'Officiers. Chap. XIII. fol. 555.
- De l'ordre , & des reiglemens de l'Ynca touchant les biens du pu-
blic , & des particuliers. Chap. XIV. fol. 561.
- Des formalitez , & des Loix qu'ils obseruoient au payement du
tribut. Chap. XV. fol. 565.
- De l'ordre obserué au tribut , & de la generosité du L'Ynca , qui
donnoit aux Curacas la plus part des choses qui luy estoient
presentées. Chap. XVI. fol. 571.
- L'Ynca Viracocha est aduerty , que les ennemis s'approchent,
& il luy vient vn secours de vingt mille hommes.
Chap. XVII. fol. 575.
- De la sanglante bataille qui fut donnée par l'Ynca Viracocha,
& de la deffaite des Chancas Chap. XVIII. fol. 580.
- Des actions genereuses que fit le Prince Ynca Viracocha apres
qu'il eut gagné la bataille. Chap. XIX. fol. 587.
- Retour du Prince en la ville de Cozco , & son entre-ueüe avec-
que son pere, auquel il ostel l'Empire. Chap. XX. fol. 590.
- Du nom Viracocha , & pourquoy les Indiens le donnerent aux
Espagnols. Chap. XXI. fol. 598.

TABLE DES CHAPITRES.

L'Ynca Viracocha faict bastir vn Temple à la memoire du fantosme, qui s'estoit apparu à luy, & qui se disoit son oncle.

Chap. XXII. fol. 604.

D'un plaisant ouurage que fit faire l'Ynca Viracocha, & des recompenses par luy données à ceux qui l'auoient secouru

Chap. XXIII. fol. 609.

L'Ynca conqueste d'autres Prouinces, & faict faire vn canal pour arrouser les pasturages.

Chap. XXIV. fol. 613.

L'Ynca visite son Empire, & reçoit des Ambassadeurs, qui luy font hommage de la part de quelques peuples.

Chap. XXV. fol. 619.

La fuite du courageux Hanco-Huallu hors de l'Empire des Yncas.

Chap. XXVI. fol. 625.

L'Ynca Viracocha enuoye des Colonies au Pays de Hanco Huallu, & embellit la vallée d'Yucay de plusieurs bastimens.

Chap. XXVII. fol. 630.

L'Ynca Viracocha donne vn nom à son fils aîné, & predit l'arriuée des Espagnols.

Chap. XXVIII. fol. 634.

La mort de l'Ynca Viracocha; le corps duquel fut veu par l'Auteur.

Chap. XXIX. fol. 638.

LIVRE SIXIESME.



V bastiment des maisons Royales, & de leurs ornemens.

Chapitre I. fol. 646.

Ils contrefaisoient d'or & d'argent quantité de plantes & d'animaux, pour l'ornement des maisons Royales.

Chap. II. fol. 650.

TABLE DES CHAPITRES.

Des Officiers de la maison du Roy , & de ceux qui portoient sa
chair à bras. Chap. III. fol. 657.

Des sales qui seruoient de places publiques , & de plusieurs au-
tres choses remarquables dans les maisons Royales.

Chap. IV. fol. 661.

De la pompe funebre de leurs Roys , & du deuil qu'ils en por-
toient, qui duroit vn an. Chap. V. fol. 665.

De la chasse generale, & solennelle que faisoient leurs Roys par
tout le Royaume. Chap. VI. fol. 670.

De leurs Courriers , & de leur diligence merueilleuse.

Chap. VII. fol. 676.

De leurs comptes par neuds, & par filers, & de la grande fidelité
de ceux qu'ils faisoient. Chap. VIII. fol. 680.

Du contenu de leurs comptes, & de leurs rooles, & comment
cela s'entendoit. Chap. IX. fol. 684.

L'Ynca Pachacutec fait la visite de son Empire , & y soubmet
la Nation des Huancas. Chap. X. fol. 689.

Des autres Prouinces , qui furent conquises par l'Ynca; De la
maniere de viure des habitans , & de la punition qu'il fit
faire des Sodomites. Chap. XI. fol. 694.

Des bastimens , des Loix , & des nouvelles conquestes de l'Ynca
Pachacutec. Chap. XII. fol. 698.

L'Ynca gaigne par famine, & par ruse de guerre, les Prouinces
rebelles à son Empire. Chap. XIII. fol. 702.

Du bon Curaca Huamachucu , & comment il se soubmit de
son bon gré à l'Empire de l'Ynca. Chap. XIV.
fol. 706.

De la resistance de ceux de Casamarca , & comment ils se ren-
dirent. Chap. XV. fol. 710.

De la conqueste du Pays de Yauyu , & du triomphe qui fut

TABLE DES CHAPITRES.

- faiēt aux deux Yncas à leur retour en la ville de Cozco
Chap. XVI. fol. 715.
- De la reduction de ceux des vallées d'Yca, & de Pisco, & de
l'audacieuse responce des Chinchas. Chap. XVII.
fol. 721.
- De l'observation des Chinchas, & comment ils furent con-
traints de se rendre. Chap. XVIII. fol. 727.
- Des anciennes conquestes des Chinchas, & de la crainte qu'ils se
donnoient faussement. Chap. XIX. fol. 734.
- De la principale feste du Soleil, & des choses qui s'y passoient.
Chap. XX. fol. 737.
- De l'adoration qu'ils faisoient au Soleil, en la maison duquel ils
s'en alloient, & luy sacrifioient vn aigneau. Chap. XIX.
fol. 743.
- Des presages qu'ils tiroient de leurs Sacrifices, & du feu dont
ils vsoient à les faire. Chap. XXII. fol. 747.
- De leurs festins, & de l'ordre qu'ils obseruoient à boire les vns
aux autres. Chap. XXIII. fol. 753.
- Des ceremonies qu'ils obseruoient à faire les Yncas Cheualiers,
& quel en estoit l'examen. Chap. XXIV. fol. 758.
- Qu'ils deuoient sçauoir faire leurs armes & leur chaussure.
Chap. XXV. fol. 762.
- Ils receuoient le Prince à faire l'espreuue de Cheualier, & le
traittoient avec plus de rigueur que les autres.
Chap. XXVI. fol. 767.
- L'Ynca donnoit les principales marques d'honneur aux nouueaux
Cheualiers, qui recenoient les autres de quelqu'un de ses
parens. Chap. XXVII. fol. 770.
- Des marques d'honneur des Roys, & des autres Yncas.
Chap. XXVIII. fol. 778.

TABLE DES CHAPITRES.

- De la réduction de Chuquimancu, Seigneur de quatre Vallées.
Chap. xxix. fol. 779.
- Des Vallées de Pachacamac, & de Rimac, avec la description
de leurs Idoles. Chap. xxx. fol. 786.
- De la réponse que fit le Roy Cuysmancu aux Ambassadeurs de
l'Ynca Chap. xxxi. fol. 790.
- De la conquête que firent les gens de l'Ynca des terres du grand
Chymu, & de la cruelle guerre qu'ils eurent ensemble.
Chap. xxxii. fol. 798.
- De l'estrange obstination du grand Chimu, & comment il se
rendit à la fin au Prince Ynca Yupanqui. Chap. xxxiii.
fol. 804.
- De ce que fit l'Ynca iusques à sa mort, pour le commun bien de
ses suiects, & pour l'embellissement de son Empire.
Chap. xxxiv. fol. 811.
- De l'augmentation qui fut faite de plusieurs Escholes, par
l'Ynca Pachacutec, & des Loix qu'il establit pour
le bon gouuernement de ses Estats. Chap. xxxv.
fol. 815.
- De plusieurs autres Loix, que fit l'Ynca Pachacutec, &
de ses dicts sententieux. Chap. xxxvi. fol. 820.

LIVRE SEPTIESME.



Es Colonies que faisoient les Yncas, & de deux
sortes de langues, qu'ils auoient entre eux.

Chapitre I fol. 828.

Raison pour lesquelles, l'on esleuoit à la Cour les he-
ritiers des Seigneurs du Pays. Chap. II. fol. 835.

TABLE DES CHAPITRES.

- De la langue de la Cour. Chap. III. fol. 839.
- De l'utilité de la langue generale Chap. IV. fol. 846.
- De la troisieme feste solemnelle qu'ils faisoient à l'honneur du
Soleil. Chap. V. fol. 852.
- De leur quatrieme feste accompagnée de ieusnes, & comment
ils se purifioient de leurs maux. Chap. VI. fol. 854.
- De la feste qu'ils souloient faire de nuit, pour chasser bien loing
les maux de la ville. Chap. VII. fol. 859.
- Description de la ville Imperiale de Cozco. Chap. VIII.
fol. 863.
- La ville de Cozco contenoit vne description de tout cet Empire.
Chap. IX. fol. 873.
- Des Escholes de Cozco, des trois maisons Royales, & de celle des
Vierges esleuës. Chap. X. fol. 880.
- Des ruës, & des maisons qui sont au Ponent de la riuiere.
Chap. XI. fol. 885.
- Des aumosnes de la ville, qui furent employées en œuures pieuses.
Chap. XII. fol. 892.
- De la nouuelle conqueste qu'entreprit de faire le Roy Yncaynu-
panqui. Chap. XIII. fol. 898.
- Du succez de l'entreprise de Muzu. Chap. XIV. fol. 901.
- Des marques qui sont restées de la conqueste, que les gens de
l'Ynca firent des Muzus. Chap. XV. fol. 907.
- De quelques autres euenemens infortunez, qui se passerent en
cette mesme Prouince. Chap. XVI. fol. 911.
- Des peuples appelez Chirihuanas, & de leur maniere de viure.
Chap. XVII. fol. 917.
- Des preparatifs que fit l'Ynca pour la conqueste de Chili.
Chap. XVIII. fol. 922.

TABLE DES CHAPITRES.

- De la conqueste que firent les Yncas, iusques à la vallée de Chili,
 & des affaires qu'ils eurent à desmesler avec quelques au-
 tres Nations. Chap. XIX. fol. 927.
- De la cruelle bataille qui fut donnée entre les Yncas, & plusieurs
 autres Nations diuerses, & du premier Espagnol qui des-
 couvrit le Royaume de Chili. Chap. XX. fol. 931.
- De la rebellion de ceux de Chili contre le Gouverneur Valdiuia.
 Chap. XXI. fol. 935.
- Les Indiens combattent les Espagnols avec vn nouuel ordre, sous
 la conduite d'un vieil Capitaine extremement aguerry.
 Chap. XXII. fol. 940.
- Les Espagnols perdent la bataille par la trahison d'un Indien.
 Chap. XXIII. fol. 944.
- Diuerfes opinions touchant la mort de Valdiuia. Chap. XXIV.
 fol. 947.
- Nouveaux malheurs arrivez dans le Royaume de Chili.
 Chap. XXV. fol. 951.
- De ce que fit le Roy Ynca Yupanqui iusques à sa mort.
 Chap. XXVI. fol. 960.
- De la forteresse de Cozco, & de la prodigieuse grandeur de ses
 pierres. Chap. XXVII. fol. 963.
- D'une triple closture de murailles, principale merueille de la for-
 teresse. Chap. XXVIII. fol. 968.
- Des trois grosses Tours, de la forteresse de ses quatre princi-
 paux ouuriers de la pierre lasee, & pourquoy ils l'appel-
 loient ainsi. Chap. XXIX. fol. 973.

TABLE DES CHAPITRES.

LIVRE HVICTIESME.

- D**E la conqueſte que fit l'Ynca Tupac d'une grande Prouince, appellée Huacrachucu. Chapitre I. fol. 984.
- De la conqueſte des premieres villes de la Prouince de Chachapuya. Chap. II. fol. 1000.
- De la conqueſte de pluſieurs autres villes, & de quelques Nations barbares. Chap. III. fol. 1004.
- De la conqueſte de trois belles Prouinces fort aguerries, & grandement obſtinées. Chap. IV. fol. 1009.
- La conqueſte de la Prouince des Canarins, avecque la deſcription de ſes richesses, & de ſon Temple. Chap. V. fol. 1016.
- De pluſieurs autres Prouinces fort grandes, qui furent conquiſes par l'Ynca, iuſques à la frontiere de Quitu. Chap. VI. fol. 1023.
- De la conqueſte de Quitu, où ſe trouua le Prince Huayna Capac. Chap. VII. fol. 1027.
- Des trois mariages de Huayna Capac, de la mort du Roy ſon pere, & de ſes dicts memorables. Chap. VIII. fol. 1035.
- Du Mayz, ou de leur bled, de leur ris, & de leurs autres ſemences. Chap. IX. fol. 1041.
- Des Legumes qui ſ'engendrent dans la terre. Chap. X. fol. 1046.
- De quelques autres fruicts plus remarquables. Chap. XI. fol. 1049.
- De l'arbre appellé Mulli, & du poiure. Chap. XII. fol. 1052.

TABLE DES CHAPITRES.

- De l'arbre appellé Maguay, & du proffit qu'on en tire.
Chap. XIII. fol. 1056.
- Du plane, du pin, & de quelques autres arbres. Chap. XIV.
fol. 1060.
- De la precieuse feüille appellée Caca, & du Tabac. Chap. XV.
fol. 1063.
- Du bestail que nourrissent ceux du Peru. Chap. XVI.
fol. 1070.
- De plusieurs sortes d'animaux sauvages. Chap. XVII.
fol. 1080.
- Des Lions, des Ours, des Tygres, des Singes, & des Guenons.
Chap. XVIII. fol. 1084.
- Des oyseaux terrestres, & aquatiques. Chap. XIX. fol. 1089.
- De leurs Perdrix, & de leurs Pigeons, avec vne description des
moindres oyseaux qu'ils ont. Chap. XX. fol. 1094.
- De diuerses sortes de Perroquets, & de l'instinct naturel qu'ils
ont à parler. Chap. XXI. fol. 1099.
- Des quatre plus celebres riuieres du Peru, & du poisson qui s'y
pesche. Chap. XXII. fol. 1102.
- Des Esmeraudes, des Turquoises, & des Perles.
Chap. XXIII. fol. 1109.
- De l'or, & de l'argent. Chap. XXIV. fol. 1118.
- De l'argent vis, & comment ils souloient fondre les me-
taux auant que l'auoir desconuert. Chap. XXV.
fol. 1123.

LIVRE NEVFIESME.



Elagrande Chaisne d'or que fit faire le Roy Huayna Capac, & quel en fut le suiet. Chapitre I. fol. 1132.

Les habitans des dix Vallées de la coste se rendent à l'Ynca de leur bon gré, & ceux de Tumpis en font de mesme. Chap. II. fol. 1139.

Du chastiment de ceux qui furent conuaincus d'auoir tué les Officiers de Tupac Ynca Yupāqui. Chap. III. fol. 1142.

L'Ynca visite son Empire, consulte les Oracles, & gaigne l'Isle de Guna. Chap. IV. fol. 1146.

Ceux de l'Isle de Puna tuent les Capitaines de Huayna Capac. Chap. V. fol. 1153.

Du chastiment qui fut fait des rebelles. Chap. VI. fol. 1156.

Mutinerie des Chachapuyas, & grande generosité de Huayna Capac. Chap. VII. fol. 1159.

Des Dieux de la Nation, appelée Manta, & de la maniere de viure de ces peuples, que l'Ynca reduict à son Empire, avec plusieurs autres Nations barbares. Chap. VIII. fol. 1167.

Des Geants qui vindrent en ce Pays là, & de leur mort miraculeusement aduenüe. Chap. IX. fol. 1173.

Dece que dit Huayna Capac touchant le Soleil. Chap. X. fol. 1178.

Rebellion des Caranques & leur chastiment. Chap. XI. fol. 1182.

Huayna Capac fait Roy de Quitu son fils Atahuallpa. Chap. XII. fol. 1186.

Des deux grands chemins qui furent faits dans le Peru, avec

TABLE DES CHAPITRES.

| | |
|---|--------------------------|
| <i>Vn art merueilleux</i> | Chap. XIII. fol. 1190. |
| <i>Huayna Capac est aduertý de l'arrinée des Eſpagnols en la coſte du Peru</i> | Chap. XIV. fol. 1197. |
| <i>Le teſtament de Huayna Capac, ſa mort, & la prediſtion de l'arrinée des Eſpagnols.</i> | Chap. XV. fol. 1205. |
| <i>Des lumens, & des Cheuaux qui furent tranſportez au Peru, de quelle ſorte on les nourrit au commencement, & combien grand en eſtoit le prix.</i> | Chap. XVI. fol. 1212. |
| <i>Des vaches & des bœufs qui furent veus les premiers dans le Peru, & quel en eſtoit le prix.</i> | Chap. XVII. fol. 1220. |
| <i>Des Chameaux, des aſnes, des cheures, & de leur prix.</i> | Chap. XVIII. fol. 1225. |
| <i>Des truyes, & de leur grande ſecondité.</i> | Chap. XIX. fol. 1227. |
| <i>Des brebis, & des chats domeſtiques.</i> | Chap. XX. fol. 1229. |
| <i>Des lapins, & des chiens.</i> | Chap. XXI. fol. 1231. |
| <i>Du grand nombre de rats qu'il y a dans le Peru.</i> | Chap. XXII. fol. 1234. |
| <i>De la volaille, & des pigeons.</i> | Chap. XXIII. fol. 1238. |
| <i>Du bled.</i> | Chap. XXIV. fol. 1246. |
| <i>De la vigne, & du premier qui apporta des raiſins dans Cozco.</i> | Chap. XXV. fol. 1248. |
| <i>Du vin, & du premier qui en fit à Cozco.</i> | Chap. XXVI. fol. 1251. |
| <i>Des olines, & du premier qui en apporta, pour en planter dans le Peru.</i> | Chap. XXVII. fol. 1256. |
| <i>Des fruiſts d'Eſpagne, & des Cannes de ſuccre.</i> | Chap. XXVIII. fol. 1258. |
| <i>De diuerſes ſortes d'herbages, & de leur merueilleux accroiſſement.</i> | Chap. XXIX. fol. 1262. |
| <i>Du lin, des aſperges, des carottes, & de l'anis.</i> | Ch. XXX. fol. 1271. |

TABLE DES CHAPITRES.

De plusieurs noms tous nouveaux, dont on vse pour denoter di-
uerfes races. Chap. xxxi. fol. 1274.

Huascar Ynca faict demander à son frere Atahuallpa le droict
d'hommage, & qu'il ayt à le reconnoistre pour Seigneur.
Chap. xxxii. fol. 1277.

Ruses d'Atahuallpa pour amuser son frere Huascar.
Chap. xxxiii. fol. 1282.

Huascar entre en deffiance de son frere sur les aduis qu'on luy
donne, & faict lever des gens de guerre. Chap. xxxiv.
fol. 1285.

Du combat que se donnerent les Yncas, où Atahuallpa demoura
victorieux, & de ses estranges cruantez. Chap. xxxv
fol. 1288.

Causes de la cruauté d'Atahuallpa, & leurs estranges effects.
Chap. xxxvi. fol. 1292.

La cruauté d'Atahuallpa passe iusques aux enfans, & aux
femmes de sang Royal. Chap. XXXVII. fol. 1297.

De quelques Yncas du sang Royal, qui s'eschapperent de la per-
secution d'Atahuallpa. Chap. XXXVIII. fol. 1303.

Suite des cruantez d'Atahuallpa, exercées contre les Officiers
de la Maison Royale. Chap. XXXIX. fol. 1308.

Des familles qui sont restées du sang Royal des Yncas.
Chap. XL. fol. 1314.

Fin de la Table des Chapitres.

PRIVILEGE DV ROY.



LOUIS PAR LA GRACE
DE DIEV ROY DE FRAN-
CE ET DE NAVARRE:
A nos amez & feaux Conseillers
les gens tenans nos Cours de Par-
lement, Maistres des Requestes
ordinaires de nostre Hostel, Bail-
lifs, Seneschaux, Preuosts, leurs Lieutenans, & autres
de nos Iuges qu'il appartiendra, Salut. Nostre cher
& bien-aymé AUGUSTIN COVRBE', Marchand
Libraire en nostre Ville de Paris; Nous a faict re-
monstrer, qu'il desireroit faire imprimer vn Liure in-
titulé, *Le Commentaire Royal, contenant l'origine des yn-
cas, Roys du Peru, &c. Escrit en Espagnol par l'ynca Gar-
cillasso de la Vega, natif de Cozco; Et mis en nostre langue,
par I. BAYDOIN; S'il vous plaisoit luy accorder
nos Lettres de Permission sur ce necessaires. A CES
CAUSES, desirant gratifier ledit exposant, & luy
donner le moyen de retirer les grands frais qu'il luy
conuient faire, tant pour la traduction, que pour
l'impression dudit Liure: Et en consideration de l'v-
tilité que le public en pourra receuoir; NOUS L'Y
AVONS PERMIS, & permettons par ces presentes,
d'imprimer ou faire imprimer, vendre & distribuer
en tous les lieux & terres de nostre obeissance, iceluy
Liure, en vn, ou plusieurs volumes, autant de fois,*

& en telles marges que bon luy semblera , durant l'espace de fix ans , à compter du iour que chèque volume sera acheué d'imprimer pour la premiere fois ; Et faisons tres-expresses inhibitions & deffences à toutes personnes , de quelque qualité & condition qu'elles soient , d'imprimer , ou faire imprimer , vendre & debiter en aucun lieu de nos Royaumes , ledit Liure , d'autre traduction que celle dudit B A V D O I N , imprimée par ledit C O V R B E , ou ceux qui seront aduoué de luy , sous pretexte d'augmentation , correction , changement , ou en quelque autre sorte & maniere que ce soit , à peine de trois millieres d'amende , applicables , vn tiers à Nous , vn tiers à l'Hostel Dieu de Paris , & l'autre tiers audit exposant , de confiscation de tous les exemplaires contrefaits , & de tous despens , dommages & intersts ; *A condition qu'iceluy exposant mettra deux exemplaires en blanc dudit Liure en nostre Bibliotech publique avant que de les exposer en vente : & moyennant ce ,* Nous vous mandons , que vous le faciez iouir , & vser pleinement & paisiblement du contenu au present Priuilege , sans qu'il luy soit donné aucun trouble ny empeschement ; Voulons aussi qu'en mettant au commencement ou à la fin dudit Liure vn bref extraict des presentes , elles soient tenuës pour deuëment signifiées. ET MANDONS au premier nostre Huissier ou Sergent sur ce requis , de faire pour l'execution d'icelles tous exploits necessaires , sans demander autre permission , nonobstant clameur de Haro , Chartre

Normande, & autres Lettres à ce contraires.
CAR TEL EST NOSTRE PLAISIR. Donné à
Ruel, le dixhuietième iour d'Auril, l'an de grace
mil six cens trente-deux : Et de nostre Regne le
vingtième.

PAR LE ROY EN SON CONSEIL.

CONRART.

*Acheué d'imprimer le quatriesme iour de Novembre,
mil six cens trente-deux.*



LE
COMMENTAIRE
R O Y A L
 DES YNCAS.

L I V R E I.

*Contenant la descouuerte du nouveau Monde,
 la deduction du nom Peru ; l'Idolatrie de cet-
 te Nation, & sa maniere de viure, auant
 qu'estre gouvernée par ses Rois appelez Yncas;
 leur origine; la vie du premier Tnca; ses con-
 questes; ses deportemens enuers ses sujets, &
 l'explication des Noms qu'ils luy donnerent.*

S'il y a plusieurs Mondes? Et des cinq Zones.

C H A P I T R E I.



Yant à traiter du nouveau Monde, &
 de sa meilleure & principale partie, à
 sçauoir des Royaumes, & des Prouinces
 de l'Empire appellé Peru, de l'antiqui-
 té duquel, & de l'origine de ses Rois, ie me suis pro-

2 LE COMMENTAIRE ROYAL,
posé de parler, il me semble raisonnable de m'accommoder à la façon d'écrire de ceux qui ont accoustumé d'esclaircir telles matieres. Je rechercheray donc avec eux au commencement de cet ouvrage, s'il y a plusieurs mondes, ou s'il n'y en a qu'un seul? Si luy & le Ciel sont ronds, ou estendus comme vne raze campagne? Si toute la terre est habitable, ou s'il n'y a que les Zones qu'on appelle temperées, qui soient destinées à la demeure des Creatures vivantes? Si l'on peut passer d'une Zone temperée à l'autre? S'il y a des Antipodes? Quels ils sont, & ainsi de plusieurs autres choses semblables, que les Anciens Philosophes ont amplement, & curieusement examinées, & dont les Modernes traitent encore, chacun d'eux s'accommodant à l'opinion qui luy est la plus agreable. Toutesfois d'autant que ce n'est pas là mon principal dessein, & que les forces d'un Indien tel que ie suis ne peuvent aller si haut, ioint que depuis qu'on a descouvert un nouveau Monde, l'experience a desabusé les hommes de la pluspart de ces doutes, ie les esclairciray succinctement, & passeray outre à la principale partie, que ie me dois proposer pour but, où j'ay belle peur de ne pouvoir arriuer, si ce n'est par vne particuliere assistance de la misericorde diuine.

Pour commencer donc par la premiere proposition, ie dis qu'on peut soustenir legitiment qu'il n'y a qu'un Monde. Car de ce qu'on dit qu'ils s'en est descouvert un tout nouveau pour nostre commun vsage, il ne s'ensuit pas qu'il y en ait deux, veu qu'on

ne met cette distinction que pour en monstrier la grande estendue. Que s'il est ainsi qu'il se trouue des hommes si peu raisonnables, que de s'imaginer qu'il y ait plusieurs Mondes, ie n'ay point d'autre responce à leur faire, sinon qu'ils ont beau persister en leur créace erronee, s'ils attédent d'en estre desabusez ailleurs qu'en Enfer. Quant à ces autres qui se mettent en peine de rechercher si le Monde est rond, ou s'il est vny comme vne plaine, ie les renuoye pour leur satisfaction au tesmoignage de ces hazardeux Nauigateurs qui en ont fait tout le tour, ou du moins la plus grande partie, comme ceux du vaisseau nommé *la Victoire*, & quelques autres qui ont depuis suiuy leur route, & fait le mesme circuit. Pour ce qui est du Ciel, si les plus curieux me demandent s'il est plain ou rond, ie me seruiray pour leur respondre de ces paroles de Dauid *Extendens calum sicut pellem*; Par où sans doute, il nous a voulu monstrier la forme, & la façon de ce grád ouurage, lors qu'il a vsé de cette comparaisn, comme s'il eust dit; Vous auez Seigneur estendu le Ciel de mesme que vous auez accoustumé d'estendre vne peau, c'est à dire que vous vous estes seruy du Ciel à couvrir en rond ce grand corps des quatre Elemens, tout ainsi que vous couurez d'une peau iusques aux moindres parties du corps d'un animal.

Le viens maintenant à ceux qui des cinq parties du Monde qu'on appelle *Zones*, veulent qu'il n'y en ayt d'habitables que les deux temperées; Que celles du milieu, & des deux extremittez ne le puis-

4 L'E COMMENTAIRE ROYAL,
sent estre, à cause du violent excez de la chaleur, &
du froid; Et que d'une Zone habitable, il n'y ayt pas
moyen de passer à l'autre, pource qu'il s'y rencontre
vn bien dangereux obstacle, à sçauoir la chaleur
démefuree qui est au milieu. Mais qu'ils en ayent
tel sentiment qu'ils voudront: Pour moy ie me puis
vanter d'estre plus sçauant qu'eux en cette matiere.
Car avec ce que ie suis nay à Cozco, qui est en la Zone
torride, où i'ay passé iusques à vingt ans de mon âge,
i'ay esté en la Zone temperee, de l'autre costé du
Tropique du Capricorne, tirant vers le Sud, aux der-
niers confins des Charcas, qui sont les Chichas. Or
est-il que pour aller à cette autre Zone tempérée,
qui est du costé du Nord, où i'ay escrit cette Histo-
re, il m'a fallu passer necessairement par la Zone tor-
ride: Ce que i'ay fait, & l'ay trauerfée toute, si bien
que ie me suis veu trois iours entiers sous la ligne
Equinoctiale, où est le Cap de Passau. De toutes les-
quelles choses, ie puis à bon droit conclure par l'es-
preuve que i'en ay faite, que la Zone torride est ha-
bitable, de mesme que celles qu'on appelle tempe-
rées. Quant aux Zones froides, ie voudrois vous en
pouvoir rendre raison aussi bien que des autres trois.
Mais d'autant que ie ne le puis, pour n'y auoir pas
esté, ie m'en remets au dire de ceux qui en sçauent
plus que moy. S'il s'en treuve neantmoins qu'elles
tiennent inhabitables à cause de leur froideur exces-
sive, i'oseray bien leur respondre avec ceux qui sont
d'opinion contraire, qu'il n'y a pas moins d'appa-
rence qu'elles soient habitées que les autres. Canà.

le bien confiderer, ce feroit folie de s'imaginer, tant
 s'en faut qu'on le doive croire, que Dieu ayt fait les
 parties du monde fi grandes, pour les laiffer inuti-
 les, veu qu'on ſçait bien qu'il a creé ce vaſte Vniuers
 pour la demeure des hommes. D'où il faut conclu-
 re, que les Anciens ne ſe ſont pas moins trompez
 en l'opinion qu'ils ont eüe des Zones froides, qu'en
 ce qu'ils ont dit de la torride, lors qu'ils nous l'ont
 faite inhabitable pour la violence de la chaleur. Au
 contraire il eſt bien pluſtoſt à croire que le ſouuerain
 Seigneur de toutes choſes, comme Pere ſage &
 puiffant, & la Nature comme Mere pitoyable & vni-
 uerſelle, ont mis ordre aux inconueniens du froid
 par vn temperament de chaleur, comme par meſme
 moyen ils ont pourueu aux grandes incommoditez
 que pouuoient receuoir ceux de la Zone torride. Car
 ils en ont amoindry la chaleur par la grande abon-
 dance des neiges, des lacs, des fontaines & des ri-
 uieres qui ſ'y trouuent en pluſieurs endroits, & par-
 ticulierement au Peru; ce qui ſert ſans doute pour
 en temperer l'ardeur. D'où il ne ſ'enſuit pas que les
 degrez de chaleur ne ſoient differens ſelon la ſitua-
 tion des lieux, eſtant certain qu'il y en a de ſi bas,
 qu'à cauſe du grand chaud qu'il y fait, ils ſont preſ-
 que inhabitables. Comme au contraire il ſ'y en voit
 de ſi hauts, qu'on n'y ſçauroit demeurer, pour eſtre
 touſiours couuerts de glace & de neige. Ce qui
 monſtre aſſez qu'il y a des endroits en la Zone torri-
 de, qui ſont plus ou moins ſuſceptibles du froid,
 contre l'opinion des Philoſphes, qui n'ont peuia-

mais s'imaginer qu'il y deust auoir de la neige, bien qu'il y en ayt en tout tēps sous la mesme ligne Equinoctiale, & particulierelement en cette grande estendue de montaignes qui sont comme enchainées ensemble, si ce n'est en ses emboucheures ou en ses ports. Or ce qu'il y a de remarquable icy, c'est qu'en cet endroit du Peru qui est en la Zone torride, il ne faut pas tirer consequence ny de la chaleur ny du froid par la distance des contrées, c'est à dire de ce qu'elles sont ou plus proches, ou plus esloignées de la ligne, mais bien de ce qu'elles se trouuent, ou plus hautes ou plus basses en vn mesme climat, & en fort petite distance de terre, cōme il sera demonstré plus amplement cy-apres. Tellement que pour la mesme raison il n'est pas incompatible que les Zones froides ne soient tempérées, & par consequent habitables, comme le tiennent plusieurs Autheurs dignes de foy, biē que ce ne soit ny pour l'auoir veu, ny pour aucune espreuue qu'ils en ayent faite. Cela se confirme encore par l'expresse parole de Dieu mesme, lequel ayant créé nos premiers parens: *Croissez, leur dit-il, & multipliez; remplissez la terre, & vous la rendez suiette.* D'où il faut conclure necessairement qu'elle est habitable, & que si cela n'estoit l'on ne pourroit ny se l'assuiettir, ny la posseder, & la peupler d'habitans. Mais comme ces secrets vont par dessus l'esprit humain, i'espere que ce mesme Dieu tout puissant, qui nous a descouuert le nouveau Monde, les descouurira de mesme, quand il en sera temps. Ce qui tournera sans doute à la confu-

sion & à la honte de ces temeraires & mal-aduisez, qui par leur Philosophie naturelle s'imaginent folement que la Puissance diuine ne va point plus auant que les bornes de l'esprit humain, sans considerer que d'une science à l'autre il n'y a pas moins d'inegalité que du finy à l'infiny.

S'il y a des Antipodes?

CHAP. II.



Presupposé que le Monde soit rond, comme il n'en faut pas douter, si l'on demande s'il y a des Antipodes, l'on peut asseurement respondre qu'ouï. Toutesfois d'autant que ce Monde inferieur n'est pas du tout descouvert, ie tiens pour moy qu'il est impossible de sçauoir au vray quelles Prouinces sont Antipodes des autres, comme quelques-vns l'affirment. Que si par demóstration l'on en peut tirer des preuues certaines, c'est plustost à l'esgard du Ciel, que de la Terre; comme par exemple des Poles, qui sont Antipodes l'un de l'autre, & del'Orient qui l'est du Ponent. Or de sçauoir maintenant par où peuuent auoir passé tous ces peuples du nouueau Monde, qui sont en si grand nombre, & si differens de mœurs & de langue, c'est ce qui est impossible encore. Que si l'on m'allegue qu'il faut qu'ils ayent trauerfé la mer dans des nauires, la raison en destruira l'apparence

8 LE COMMENTAIRE ROYAL,

à cause des animaux qui s'y trouuent. Car on pourroit demander à bon droit, comment ou à quel propos les auroit on embarquez, puis qu'il y en a la plupart qui sont beaucoup plus nuisibles que profitables? Que si l'on me dit qu'ils ont pû s'y en aller par terre, vne consequence encore pire s'en ensuiura. La raison est, pource qu'on pourra demander, d'où vient que s'ils ont transporté les animaux qu'ils auoient là domestiques, ils n'en ont fait de mesme de ceux qui sont demeurez par deçà, ou qu'on y a depuis amenez? Que si l'on respond qu'ils n'en ont peu transporter vn si grand nombre, comment n'en est il demeuré parmy nous quelques vns de l'engence de ceux qu'ils ont enleuez? Où il est à remarquer qu'on en peut dire de mesme des grains, des legumes, & des fruits de leur pays; qui en produit de si differents des nostres, que ce n'est pas sans raison qu'on l'appelle nouveau Monde. Car soit que l'on considere les animaux ou sauuages, ou appruiuisez, ou les alimens de toutes les sortes, ou les hommes mesmes de ces lointaines cōtrées qui ont peu de poil & point de barbe, tout cela sans doute passera chez no⁹ & pour merueille & pour nouveauté. Mais d'autāt que ie tiens pour perdue la peine que l'on employe à vouloir apprendre des choses si peu certaines, & que i'estime tout autre esprit plus capable que le mien de les rechercher; Je laisseray aux plus curieux à resoudre toutes ces doutes, & ces vaines piccoteries. Pour moy, il me suffira de traiter du seul suiet que ie me suis proposé pour but, à sçauoir de l'origine des Rois

Yncas,

Yncas, de leur succession, de leurs conquestes, de leurs loix, & de leur gouvernement en temps de paix & de guerre. Mais auant qu'en venir-là, il ne fera pas hors de propos ce me semble, que nous disions comment se descouurit ce nouveau Monde; puis nous traiterons particulièrement du Peru.

De la descouuerte du nouveau Monde.

C H A P. III.



Nuiron l'an 1484. Alonfo Sanchez de Huelua, fameux pilote (ainfi surnommé pource qu'il estoit natif du mesme lieu de Huelua, qui est au Comté de Niebla) traficquoit ordinairement sur la mer avec vn petit Nauire, dans lequel il enleuoit d'Espagne des marchandises qu'il transportoit aux Canaries, où il les vendoit fort bien. Pour y mieux trouuer son compte, il y chargeoit son vaisseau des fruits du pays, qu'il alloit vendre en l'Isle de Madere, d'où ils s'en retournoit en Espagne chargé de Conserues & de sucres. En cette route triangulaire, comme il traicttoit des Canaries à Madere, il fut battu d'une si grande tempeste, que n'y pouuant resister, il fut contraint de caler voile, & d'abandonner son Nauire à la violence de la tourmente. Elle fut si impetueuse qu'elle le fit courir vingt neuf iours, sans sçauoir où il estoit, ny quelle route il deuoit tenir,

pour ce qu'en tout ce temps-là il luy fut impossible de prendre les eleuations ny par le Soleil, ny par le Nord. Cependant il n'est pas à croire, en quelles extremitez se virent reduits ceux de son vaisseau, par vne tempeste si estrange qu'elle les empeschoit de manger & de dormir. Mais en fin s'estant calmee par le changement du vent, ils se trouuerent auprès d'une Isle, de laquelle on ne scauoit pas bien le nom: neantmoins l'apparence a fait croire depuis que c'estoit celle qu'on nomme à present *de Saint Domini-que*. En quoy certes ce qu'il y a de remarquable, c'est que ceste Isle estant au Ponent des Canaries, il falloit de necessité que le vent qui emporta ce Nauire fust le Solan, ou Lest qui en cette nauigation calme plustost la tourmente qu'il ne l'irrite. Quoy qu'il en soit, ie trouue pour moy que ce fut vn particulier effet de la puissance de Dieu, qui par sa misericorde infinie tire des causes contraires les choses les plus mysterieuses, & necessaires, comme d'un rocher il en tira iadis des sources d'eau viue; & de la bouë, des lumieres miraculeuses pour faire voir vn Aueugle. Toutes ces choses, côme i'ay dit, sont des effets de sa Clemence & de sa Bonté dont il luy plût vser encore, quand il trouua bon d'enuoyer son Euangile, & la lumiere de la Foy à tous les peuples du nouveau Monde. Dequoy l'on ne peut douter qu'ils n'eussent vn extreme besoin, puis qu'ils viuoient, ou pour mieux dire ils mouroient dans les tenebres de la Gentilité, & d'une Idolatrie barbare & brutale, comme nous verrons plus au long par la suite de cette Histoire.

Le Pilote abbordé à terre prit aussi-tost les Eleuations, & ne manqua pas de faire de bós memoires de routes les aduétures qu'il auoit couruës sur cette mer, ensemble des choses qu'il auoit veuës; & s'en retournant il en fit vn autre de celles qui luy arriuerent depuis. Là dessus ayant fait aiguade, & prouision de bois, il se remit à la voile, sans sçauoir à son retour non plus qu'à son abord quelle route il deuoit prendre. D'où il s'ensuiuit que pour auoir esté plus longtemps qu'il ne falloit en cette nauigation, l'eau & les prouisions luy manquerét, & queces nouvelles mises iointes aux autres incommoditez que tous ceux de son Nauire auoient souffertes allant & venant, en firent depuis tomber malades plusieurs, dont il en mourut la meilleure partie : car de dixsept hommes qui estoient sortis d'Espagne, il n'en arriua que cinq en la Tercere, du nombre desquels estoit le Pilote Alonso Sanchez de Huelva. A leur abbord en cette Isle, ils s'en allerent loger en la maison du fameux Christophle Colomb Geneuois, pour auoir appris que c'estoit vn grand Pilote, & qui faisoit des Cartes pour nauiguer. Cét excellent homme les receut avec de grandes demonstrations d'amitié, & leur fit tout le bon accueil qui luy fut possible, afin de s'instruire d'eux touchant les choses qu'ils disoient leur estre arriuees en vn si long & si estrange naufrage. Mais quelque bon traitement qu'il leur sceut faire, pour les remettre en santé, il n'en pût venir à bout; de maniere qu'estants affoiblis par tant de maux qu'ils auoient soufferts, ils furent contraints

de ceder à leur dernière violence, & moururent tous en sa maison. Les traux qui auoient esté cause de leur mort, furent tout l'heritage qu'ils laisserent au grand Colomb, qui les accepta avec tant de resolution, & de courage; qu'oubliant ceux du passé, bien qu'ils fussent en plus grand nombre, & qu'ils eussent duré plus long-temps, il entreprit deslors de donner à l'Espagne les prodigieuses richesses du nouveau Monde. Comme en effet il en vint à bout heureusement, & le tesmoigna depuis par ces mots qu'il prit pour deuse de ses armes.

A Castilla y a Leon:

Nüeno mundo diò Colon.

Qui signifient; *Colomb a donné vn nouveau Monde aux Royaumes de Castille & de Leon.* Que si quelqu'un desire voir plus au long les immortelles actions de cét Heros, il n'a qu'à lire l'Histoire generale des Indes, escrite par Francisco Lopez de Gomara, qui toutesfois n'en a fait que l'abbregé. Il est vray qu'un homme de si haute reputation s'est plus acquis de lauriers & de loüanges luy-mesme en cette descouuerte du nouveau Monde, qu'on ne luy en scauroit donner d'as l'Histoire. I'y adiousteray neantmoins vne chose, pour suppleer au deffaut de la Relation de cét Ancien Historien. C'est, qu'ayant composé son oeuvre loin du lieu où se passoient ces euenemens, & sur les memoires qu'il en auoit des Nauigateurs, il fut impossible qu'il ne laissast imparfaites plusieurs choses qu'on ne luy racontoit qu'à de-

my. Mais pour moy i'en puis parler plus sçauamment, pour les auoir oüy dire dans mon pays à mon pere mesme, & à ceux de son téps, lesquels côme en la conuersation qu'ils auoient ensemble ils s'entretenoient ordinairement des plus valeureuses & plus remarquables actions aduenües durant ces conquestes; il me souuient de leur auoir oüy rapporter les choses que nous auons dittes, & celles que nous dirons cy apres. Dequoy certes il est à croire qu'ils auoient eu vne pleine & entiere Relation de ceux qui les premiers de tous auoiét descouuert & cõquis le nouueau Monde. De moy n'estant alors qu'un ieune garçon, il faut que i'aduouë qu'en les oyant raconter comme i'ay dit, ie les escoutois avecque peu d'attention. Ce qui me fait croire que si ie me fusse rendu plus soigneux que ie n'ay esté de les retenir, ie pourrois escrire maintenant beaucoup d'autres choses du tout merueilleuses, & qu'il seroit necessaire de rapporter en cét ouurage. Je ne laisseray pas toutesfois de parler icy de celles dont ie me pourray souuenir, avec vn extreme regret des autres dont i'ay perdu la memoire.

Le Reuerend Pere Ioseph Acosta fait aussi mention de la descouuerte du nouueau Monde, avec vn grand desplaisir de n'en pouuoir descrire l'histoire entiere, n'y de quelques autres conquestes plus nouuelles, pour n'en auoir eu que des memoires imparfaits; pour ce qu'à son arriüée en ces contrées, il trouua que les Anciens conquerans estoient morts; Ce qu'il semble vouloir donner à entendre par ces

14 LE COMMENTAIRE ROYAL,
paroles expressees du dixiesme Chapitre de son Liure
dixhuitiesme. *Après auoir monstré cy-deuant qu'il n'y a
pas d'apparence que ceux qui ont les premiers habité les Indes
se soient embarquez expressement, avec dessein de s'y en aller,
il s'ensuit à mon aduis que s'ils y ont esté par mer, ça esté for-
tuitement & par la violence de la tempeste qui les y a iettez.
Ce qui n'est pas incroyable, quelque grande que soit l'estenduë
del'Ocean; Car nous sçauons assez que le mesme arriua en la
descouuerte qui se fit de nostre temps, lors qu'un Marinier
dont nous ignorons le nom, afin de n'attribuer qu'à Dieu seu-
lement une affaire de si haute consequence, ayant recogneu le
nouueau Monde par un effet extraordinaire d'une impor-
tune tourmente, laissa à Christophle Colomb la connoissance
d'une si grande chose, pour recompense du traitement qu'il
auoit receu au logis d'un si bon hôte. Pour cette mesme
raison il se peut faire qu'il y ayt des peuples, &c. Ce sont les
paroles du R. P. Acosta qui montrent assez qu'estant
au Peru, il y trouua, sinon toute cette relation, du
moins la plus essentielle partie de la nostre. Voila
quelle fut l'origine, & quel le principe de la descou-
uerte du nouueau Monde, & de sa grande estenduë.
Dequoy se peut venter à bon droit le petit Bourg de
Huelua, pour auoir donné naissance à Alonso San-
chez. Car ce fut sur la relation de ce Pilote, & sur
l'assurance qu'eut de luy Christophle Colomb, qu'il
persista si long-temps en sa demande, promettant
des choses qu'on n'auoit iamais ny veuës ny ouïes.
Cependant comme bien auisé qu'il estoit, il s'en re-
serua long-temps le secret, iusqu'à ce qu'enfin il le
descouurit à quelques personnes de grâde autorité,*

qui luy donnerent dequoy venir à bout de son entreprise, en l'assistant de leurs faueurs enuers les Rois Catholiques, dont ils approchoient de près la personne. Que si de hazard Alonfo Sanchez de Huelua ny luy eust donné cognoissance de si grandes choses, il n'eust peu sans doute par vne simple imagination de Cosmographie, ny promettre de si hautes merueilles auectant d'asseurance, ny terminer si promptement cette descouuerte du nouveau Monde: Car s'il en faut croire à cét Autheur, Colomb ne mit pas dauantage de soixante huiët iours en tout son voyage iusques en l'Isle Guanatianico, ioint qu'il seiourna quelque temps en la Gomere pour s'y fournir de rafreschissemens. D'où il faut conclure qu'il n'eust peu autrement que par vn bien grand miracle aller si loing en si peu de temps, si par le rapport d'Alonfo Sanchez, il n'eust appris quels Rombes il deuoit prendre en vne mer de si large estendue.

La deduction du nom Peru.

CHAP. IV.

Puisque nous auons à traiter du Peru, il ne fera pas hors de propos que nous rapportions icy l'origine de ce nom, qui n'a rien de commun avec le langage des Indtens. Pour cét effet, il faut sçauoir, qu'en l'an 1513. la mer du Sud ayant esté descouuerte par vn

Gentil-homme qu'on appelloit Vasco Nunnez de Balboa, natif de Xerez de Badaioz, qui fut le premier Espagnol qui la trauersa; les Rois Catholiques l'honorèrent du tiltre d'Admiral de la mesme mer, & luy donnerent en outre la conqueste & le gouuernement de tous les Royaumes qu'il pourroit descouurir en certe nauigation. Mais le malheur voulut pour luy qu'il ne iouïst pas long-temps de cette bonne fortune, pource que le Gouverneur Pedro Arias d'Auila son propre beau-pere, pour recompense des grandes choses qu'il auoit faites, & des biens dont sa valeur le rendoit digne, luy fit indignement trancher la teste. Il faut remarquer icy qu'auant que mourir, ce grand Capitaine fit tout son possible pour descouurir & sçauoir, comment s'appelloit tout ce pays, qui depuis Panama s'estend iusques vers le Sud. Pour cela mesme il mit trois ou quatre vaisseaux sur mer, qu'il enuoyoit l'un apres l'autre en diuerses saisons de l'année à la descouuerte de cette coste; & luy cependant donnoit ordre aux choses qui luy sembloient necessaires à la conqueste de ces contrées. Comme donc ceux des nauires faisoient toute sorte de diligences pour s'acquitter de leur charge, ils ne venoient iamais d'aucun voyage sans apporter quelque nouuelle relation des terres qu'ils auoient descouuertes en grand nombre le long de cette riuiera. Voila cependant qu'un de ces nauires qui alla plus auant que les autres, & passa la ligne Equinoctiale du costé du Sud, continuant sa route le long de cette coste avec les soins & precautions dont on vsoit

on vsoit d'ordinaire en ce voyage, apperceut fortuitemment vn Indien, qui s'en alloit peschant à l'emboucheure d'une rivièrre, de celles qui sont en grand nombre en tout le pays. Ceux qui estoient dans la vaisseau s'estonnerent de cette rencontre; Et à l'heure mesme le plus accortement qu'il leur fut possible, ils mirent à terre assez loing du lieu où estoit cét Indien, quatre Espagnols, non moins habiles à la course qu'à la nage, pour empescher qu'on ne les peust attrapper ny par terre ny par eau. Apres avoir mis cét ordre, ils passerent deuant l'Indien dans leur navire, se doutant bien que cét homme s'amuseroit à les regarder attentiuement, & que cela l'empescherait de prendre garde à ceux qu'on auoit mis en embusche, & en armes derriere luy. Comme en effet l'Indien ne se trouua iamais si estonné qu'il le fut alors, de voir sur la mer vne chose qu'on n'y auoit point encore veüe, à sçauoir vn navire qui voguoit à pleines voiles. Comme il estoit donc tout desperdu, & hors de soy-mesme, ne pouuant s'imaginer quelle machine c'estoit, il s'attacha si fort à cette pensée, qu'auant qu'il eust moyen de se donner garde des Soldats qui le guettoient, il sentit qu'ils se ietterent sur luy, & le menerent au navire, bien aises de l'auoir ainsi surpris. L'ayant mis dedans, tous les Espagnols leurs compagnons, le caresserent le mieux qu'ils peurent, pour luy faire perdre la crainte qu'il auoit desia de voir des gens d'une autre mine que luy, & qui auoient de la barbe. En suite dequoy ils luy demanderent & par signes, & par paroles quel estoit

ce pays là, & comment il s'appelloit ? Cependant l'Indien, qui par les grimasses & les signes qu'ils luy faisoient comme à vn muet, & du visage, & des mains, iugeoit bien qu'ils luy demandoient quelque chose, mais qui ne sçauoit ce que c'estoit, pour preuenir le mal qu'il s'imaginoit qu'on luy deust faire, ne leur fit point d'autre responce, sinon qu'il leur dit à la haste son propre nom, à sçauoir *Beru*, & y adiousta en mesme temps le mot de *Pelu*; Ce qu'il fit apparemment, comme s'il eust voulu dire; Si vous me demandez mon nom, sçachez que ie m'appelle *Beru* ou bien, si vous voulez que ie vous die, où ie m'arrestoys n'aguere, ie vous aduise que i'estois sur le bord de la riuiera. Car il faut sçauoir qu'en la langue de cette Prouince le mot *Pelu* est vn appellatif qui signifie riuiera, comme nous le prouuerons ailleurs, par le tesmoignage d'un Auteur digne de foy. Voila quelle fut la responce de cét homme, qui eust quelque chose de semblable à celle d'un autre Indien, dont il est fait mention en nostre Histoire de la Floride, liure sixiesme, Chapitre quinziesme, lors qu'entendant parler de son Maistre, il vsa des mots *Bregos*, & *Bredos*.

Or pour reuenir à nostre prisonnier, les Espagnols du nauire, s'imaginant qu'il les auoit entenduz, & que sa responce estoit conforme à leur dessein, comme s'ils luy eussent parlé Espagnol, prirent cela comme on dit pour argent content, si bien que depuis ce temps là, qui fut enuiron l'an mil cinq cens seize, ils appellerent Peru ce grand & riche Royau-

me. Par où l'on peut voir qu'ils corrompirent les deux mots que l'Indien leur auoit dits, comme c'est la coustume des Espagnols de corrompre presque toutes les paroles qu'ils empruntent du langage des Indiens de cette contrée. Ce qu'ils firent assez paroistre, lors qu'en ce nom de l'Indien Beru ils changerent le B. en P. & en celuy de Pelu qui signifie riuere, ils prirent l'L. pour vne R. Si bien que d'une d'autre façon ils dirent Peru. A quoy i'adiouste qu'il y en a mesme quelques-vns, à sçauoir ceux d'entre les Modernes qui se picquent le plus de politesse qui corrompent les deux lettres, & disent *Piru* dans les ouvrages qu'ils en escriuent. Mais c'est à quoy l'on ne doit pas s'arrester, puisque les plus anciens Historiens, tels que sont, Pedro de Cieça de Leon, Augustin de çaraté, Francisco Lopez de Gomara, Diego Fernandez natif de Palence, & le R. P. F. Ierosme Roman, tous d'un mesme accord appellent ce grand Empire Peru, & non pas Piru. Ord'autant qu'il se trouua que le Parage où telle chose arriua, estoit comme vne frontiere du pays, que les Rois Yncas auoient conquis de ce costé-là, & assuiettis à leur Estat; ils appellerent deslors du nom de Peru tout ce qu'il y a d'estenduë depuis cette contrée, qui est le Parage de Quito, iusques aux Charcas; car ce fut le principal pays de leur conqueste, qui a sept cens lieuës de largeur; ce qui n'empesche pas, que leur Empire ne s'estendit à cinq cens lieuës par delà, à sçauoir iusques à Chile, qui est vn autre Royaume grandement riche, & fertile.

*Authoritez pour une confirmation plus ample
du nom PERU.*

CHAP. V.



Oila quelle fut l'origine du mot Peru, qui est vn nom si renommé par le Monde. Aussi à dire le vray ce n'est pas sans raison qu'il est si fort en estime, puis qu'il a remply d'or, de perles & de pierrerie toute la terre habitable. Or bien qu'il y ayt 72. ans qu'on a conquis ce pays, si est-ce que pour auoir esté ainsi fortuitement appelé, les Indiens natifs du Peru, n'vsent point de ce nom, comme s'ils ne l'auoient iamais imposé. Et quoy que par la communication qu'ils ont auecque les Espagnols ils entendent assez ce qu'il signifie, ils ne s'en seruent pas toutesfois. Car en leur langage, ils n'ont point de mot general pour nommer tout à la fois les Prouinces & les Royaumes que leurs Rois legitimes ont subiuguez, comme qui diroit, la France, l'Italie, l'Espagne, & ainsi des autres Estats qui contiennent plusieurs Prouinces. Comme il'est donc tres-certain que pour designer châce Prouince ils auoient vn nom particulier, ainsi que nous le verrons bien amplement en la suite de cette Histoire; il est veritable aussi, qu'ils n'en auoient point de propre qui signifiait vn Royaume entier. Par exemple, quand ils vouloient denoter le Monde, ils ysoient du mot,

Tauantinsuys, qui signifie les quatre parties ensemble. Toutes ces raisons sont à mon aduis d'assez fortes coniectures, pour monstrier, comme nous auons desia veu, que le mot *Beru* estoit le nom propre d'un Indien; où est il à considerer encore, que de semblables noms vsoient ordinairement entre les *Yncas* Indiens ceux du plat pays, & des Costes de ceste Mer, & non pas ceux des montaignes, qui ne se seruiôient non plus du general langage des autres. Et côme en Espagne il y a des nōs significatifs d'une Prouince, & qui luy sont particulierement affectez, il y en auoit de mesme entre les Indiens du Peru. Que si pour monstrier comme quoy ce nom a esté premierement imposé par les Espagnols, & qu'il n'a iamais esté receu dans la langue vulgaire des Indiens, il n'est question que d'en confirmer la verité par autoritez expresses; En voicy trois remarquables que j'ay tirées de *Pedro de Cieça de Leon*. La premiere est au troisieme Chapitre de son liure, où parlant de l'Isle appelée *la Gorgone*; Là dit-il, *se trouua le Marquis Dom Francisco Pizarro*, avec treize Chrestiens Espagnols de nation, & ses compagnons, qui auoient descouuert la contree que nous appellons le Peru &c. La seconde au Chapitre treiziesme, où il en parle ainsi. Il faut donc bien necessairement que depuis *Quito*, qui est asseurement l'endroit par où l'on commence d'entrer au Peru, &c. Et la troisieme au dixhuitiesme; où repetant le mesme nom; Asseurement adiouste-t'il, des relations que nous font les Indiens de *Cuzco*, il faut inferer qu'il y a eu autresfois de grandes guerres en toutes les Prouinces de ce Royaume que nous appellōs Peru, &c.

Ce qui fait voir clairement qu'il n'yseroit pas si souvent qu'il fait du terme ou du mot de Peru, n'estoit qu'il veut donner à entendre que les Espagnols ont les premiers imposé ce nom, & que les Indiens n'en ont iamais eu de tel en leur langue generale, ce que ie certifie moy-mesme, qui suis Ynca du pays. Le R. P. Acofta esclaircit encore plus amplement cette verité, au premier liure de son Histoire naturelle des Indes, Chapitre treisiesme, où discourant sur ce mesme sujet; *Il est certain, dit-il, que ceux qui ont descouvert le nouveau Monde ont tourné en coustume de donner aux ports & aux autres lieux qu'ils ont conquis, des noms conformes aux occasions qu'ils en ont eues, comme il se peut remarquer par le nom Piru, qu'on a imposé à ce Royaume. Car c'est l'opinion commune, que les Espagnols qui firent ceste descouverte, appellerent tout le pays Piru, du nom d'un fleuve où ils aborderent premierement. A quoy sert de preuve bien euidente l'autorité des Indiens natifs du Piru, parmy lesquels ce mot n'est point en usage, si bien qu'il n'est pas à croire qu'ils ayent iamais ainsi nommé leurs pays. Voilà le tesmoignage qu'en rend cét Autheur digne de foy, qui doit suffire, ce me semble, pour confondre toutes les nouveautez qu'on a depuis inuentées sur ce nom-là; comme nous le monstrerons cy-apres, lors que nous en toucherons plus particulièrement quelques-vnes. Or d'autant que la riuere que les Espagnols nomment Peru est en ce mesme Parage, & fort proche de la ligne Equinoctiale, j'oseray bien affirmer que ce fut là mesme, où les Espagnols se faisirent de l'Indien qu'ils amenerent en leur vais-*

seau, si bien que depuis & la riuere & le reste du pays furent appelez du nom propre de l'Indien Beru. A quoy i'adiouste que le nom appellatif Pelu estant auparauant commun à toutes les riuieres en general, fut depuis fait vn nom propre par les Espagnols, qui le donnerent particulièrement à cette riuere, qu'ils appellerent Peru.

Francisco Lopez de Gomara, parlant de la descouuerte de Yucatan dans son Histoire generale des Indes, Chapitre cinquante deux, met deux deductions de noms, fort semblables à celles que nous auons données du Peru; Ce qui m'oblige à les rapporter icy pour leur grande conformité. *Vn peu apres, dit-il, partit Francisco Hernandez de Cordoia; Et soit que le temps ne luy permist pas de faire voile en vn autre Cap, ou qu'il eust dessein d'aller descouurir quelque nouveau pays, tant y a que les vents le ietterent en vne terre inconnüe aux nostres. Là près de quelque salines, il descouurit vne pointe, qu'il appella de las Mugerres, ou, la pointe des femmes, pour y auoir remarqué certaines tours de pierre amoncelées, avec quelques Chapelles couuertes de bois & de chaume, où se voyoient rangées en bel ordre, plusieurs Idoles, qui sembloient estre des femmes. Les Espagnols, qui iusques alors n'auoient apperceu en ce lieu là aucun bastiment de pierre, s'estonnerent fort d'y en remarquer, & de voir les habitans silestes, & si richement vestus. Car ils auoient des Camisoles, & des Mantes de Coton blanc, & d'autres couleurs, comme pareillement de belles plumes des pendans d'oreille, & des ioyaux d'or & d'argent; ioint qu'ils prirent garde que les femmes auoient la teste couuerte, & la gorge aussi.*

De ce lieu là il prit sa route vers vne autre pointe, qu'il appella Cotoché, pource qu'il s'y trouua des pescheurs, qui de crainte ou d'estonnement gaignerent la terre, & se mirent à crier en s'en allant cotohé, cotohé, c'est à dire Maison, Maison, pource qu'ils s'imaginerent que ceux du nauire leur demandoient quelque lieu pour s'y en aller; à cause dequoy cette pointe de terre fut tousiours depuis nommée le Cap de Cotoché. En suite de cette aduventure ils en eurent vne autre bien-tost apres. Car vn peu plus auant ils firent rencontre de certains hommes, lesquels interrogez comment se nommoit vn grand Bourg qui estoit là tout contre; leur respondirent Tectetan, Tectetan, qui signifie ie ne t'entends point. Ce qui fut cause que les Espagnols, qui s'imaginerent que ce lieu s'appelloit ainsi, luy imposèrent par corruption le nom de Lucatan, qui luy pourra bien demeurer tousiours. Ces deux dernieres authoritez sont tirées mot à mot de Francisco Lopez de Gomara. Par où l'on peut voir, qu'en plusieurs autres contrées des Indes, aussi bien qu'en celle du Peru, il arriuoit assez souuent que ceux qui les descouuroient, les appelloient du premier nom qu'ils oyoient dire aux Indiens, ausquels ils demandoient quelque chose, s'imaginans que ces gens là leur respondissent à propos sur ce qu'ils vouloient sçauoir, comme si les vns & les autres n'eussent parlé qu'une mesme langue. Ce qui fut sans doute vne faute que l'on commit en plusieurs euenemens qui se passerent au nouueau Monde, & particulierement en nostre Empire du Peru, comme il sera facile de remarquer en diuers passages de l'Histoire.

Tesmoignage

*Tesmoignage d'un autre Autheur touchant le
nom Peru.*

CHAP. VI.



Vx autoritez de Pedro de Cieça, du R. P. Ioseph Acoſta, & de Gomara, qui ont rapporté ſur le mot Peru les choſes que j'en ay dites, ie puis adiouſter le teſmoignage d'un autre excellent Autheur, à ſçauoir du R. P. Blas Valera, Religieux de la compagnie de Ieſus. Le public luy a cette obligation entre les autres d'auoir fait l'Histoire de cét Empire en fort beau Latin, auſſi bien qu'il l'eust peu eſcrire en pluſieurs langues, pour y eſtre extrêmement bien verſé. Mais il arriua par malheur au grand dommage de mon pays, que ce Royaume ne merita pas d'auoir ſon Histoire eſcrite d'une ſi bonne main, à cauſe que ſes papiers furent perdus au ſac, que les Anglois firent de Calez, l'an 1596. qui fut le temps enuiron lequell il mourut, ou vn peu apres. Je recouray neantmoins ce qui reſta de ſes memoires, & qui fut ſauué d'une ſi deplorable ruïne. Mais ce ne fut pas ſans vn extreme regret de n'en auoir que des fragmens, où il manquoit le meilleur. J'en ay l'obligation au R. P. Pierre Maldonat de Saaucedra natif de Seuille, & de la meſme Compagnie, qui me les donna l'an 1600. auquel temps il faiſoit le-

çon de Theologie en cette ville de Cordouë. Mais pour reuenir à la denomination du nom Peru, ie rapporteray celle qu'en donne le Pere Valera en son Histoire Latine, dont voicy les paroles, que moy-mesme qui suis Indien, ay traduittes en nostre vulgaire. Le Peru, qui est vn Royaume grandement illustre, fort fameux, & de grande estenduë, abonde si fort en or, en argent, & en autres riches metaux, que cette prodigieuse abondance a fait passer en proverbe cette commune façon de parler; Qu'un homme possède le Peru quand il est comblé des biens de fortune. Ce nom fut imposé fortuitement par les Espagnols à cet Empire des Yncas: Car il est certain que ce n'est pas vn nom propre; Aussi tant s'en faut que les Indiens l'approuuent, qu'au contraire ils le tiennent pour barbare, & l'ont si fort en horreur, que pas vn d'eux ne le veut proferer; tellement qu'il n'y a que les Espagnols qui en vsent. Il ne signifie, ny richesses, ny autre chose de grande importance; & peut-on bien dire, que comme l'imposition du mot se trouua nouuelle, la signification des richesses le fut aussi, pource qu'elles procederent purement du bon-heur de leur conqueste. Quant au mot Pelu, c'est vn nom appellatif, qui signifie riuere en la langue de ces Barbares, qui habitent entre Panama & Huaya, si ce n'est qu'on veuille dire que c'est aussi le nom propre d'une certaine Isle, appelée Pelua, ou Peru. Comme il aduint donc que les premiers Conquerans de ces terres, qui estoient Espagnols de nation, nauiguant depuis Panama, furent jettez en cette Coste premier qu'en autre lieu, le mot de Peru ou de Pelua leur plût si fort, que comme s'il eust signifié quelque grande chose, ils s'en seruirent depuis à denoter tous les autres lieux qu'ils descouvrirent, tellement qu'à la fin il se trouua qu'ils appellerent Peru tout l'Empire des Yncas. Quelques-vns


neantmoins ne trouuant pas à leur gré ce nom, n'en voulurent point vsfer, & appellerent ces terres la nouuelle Castille. Toutes-fois le general l'emporta sur le particulier, si bien que depuis on imposa ces deux noms à ce grand Royaume, iusques-là mesme, que les Notaires tant Ecclesiastiques que Royaux, ont accoumé d'en vsfer encore pour le iourd'huy, bien que toutesfois en l'Europe & aux autres Royaumes il soit plus ordinaire que celui de Pelua. Quant à son Etymologie, il y en a plusieurs qui la tirent du nom Pirua, qui est vn mot des Quechuas, du pays de Cozco, par où est signifiée vne maniere de Closture en forme de palissade, où ceux du pays ont accoustumé de serrer les biens de la terre. Et certes à le bien considerer l'opinion de ceux-cy n'est pas beaucoup esloignée de la vray-semblance, estant certain qu'en ce Royaume les Indiens ont quantité de telles Clostures en forme de granges, pour y mettre leur recolte : à cause dequoy il n'est pas incompatible que les Espagnols n'ayent emprunté ce nom estrange, & dit Piru en ostant la derniere voyelle, pour mettre l'accent, & la derniere syllable aussi. S'il est donc vray que ce nom dont se seruirent les premiers Conquerans de ces terres, comme d'un nom propre, pour denoter tout l'Empire, est doublement appellatif, ie ne feray point difficulté de m'en seruir, & de dire indifferemment Peru & Piru. Or l'introduction de ce nouveau nom ne se doit point reietter, comme vsurpé fausement & à la volée, y ayant de l'apparence que les Espagnols n'en treuuerent point de general ny de plus propre que celui-cy, pour estre imposé à cette contrée. Car auant le regne des Yncas, chèque Prouince auoit son nom propre, comme Charca, Colla, Cosco, Rimac, Quitha, & ainsi de leurs semblables, sans auoir esgard aux autres pays. Mais depuis que les Yncas assuiettirent tout ce Royaume, ils le nommerent conformement à l'ordre de leurs conquestes, &

des peuples qu'ils firent leurs tributaires, comme par exemple pour denoter les quatre parties du Royaume, ils dirent Tahuantin Suiu, & appellerent les vassaux de l'Ynca, O Yncap-runam. Ce qui fut cause que les Espagnols, qui remarquerent la confusion & la diuersité de ces noms, donnerent fort prudemment celuy de Peru à ces terres par eux descouuertes. Celuy de Peru ou de nouuelle Castille, &c. Voila les paroles du R. P. Blas Valera, où il ne s'esloigne aucunement de l'opinion du P. Acosta, qui preuue, comme nous l'auons monstre, que ce nom fut premierement imposé par les Espagnols à tout ce pays-là, & qu' auparauant leur arriuéee, les Indiens n'en auoient iamais vsé en leur langage. Mais pour moy, sans m'arrester tout à fait à ce qu'en dit le P. Blas Valera, il me semble qu'il y a plus d'apparence de croire que l'imposition du nom Peru prit son origine du nom propre Beru, ou de l'appellatif Pelu, qui signifie riuere en la langue de cette Prouince, plustost que de Pirua, qui est le mesme que Gabion, ou closture. Car, comme i'ay dit cy-deuant, ceux qui l'imposerent les premiers furent les gens de Vasco Nunnez de Balboa, qui n'estoient pas encore entrez si auant dans le pays, qu'ils peussent sçauoir ce que signifioit le mot Pirua. A quoy i'adiouste que ce ne furent non plus les Conquerans du Peru, d'autant que 15 ans auât qu'on fust allé à cette conqueste, les Espagnols qui viuoient dans Panama appelloient Peru tout le pays, qui depuis la ligne Equinoctiale s'estend iusques au Midy. Ce que certifie encore. Francisco Lopez de Gomara en son Histoire des

In des Chapitre cent dixiesme, où il parle ainsi. Il y en a qui disent que par vne particuliere Relation qui fut faite à Balboa, il sceut qu'au Peru il y auoit de l'or & des Esmeraudes. Mais soit qu'il le faille croire ou non, tant y a qu'il est certain qu'il se parloit desia du Peru dans Panama, au temps que Pizarro, & Almagro armerent pour s'y en aller, iusques-là mesme qu'on en disoit de fort grandes choses. Voila qu'elles sont les paroles de Gomara, qui font voir assez clairement, que le nom Peru estoit desia en vſage, long-temps auparavant le voyage de ceux qui s'y en allerent pour le conquerir, & qu'il le conquerent en effect.

*Deductions de quelques autres noms
nouueaux.*

CHAP. VII.

 Fin que la deduction du nom Peru ne soit pas seule, il me semble n'estre pas hors de propos, d'en rapporter d'autres semblables, qui se firent auant & apres celle-cy. Car il n'y aura point de mal que nous les anticipions, pource que cela nous espargnera la peine d'en parler quand il en sera temps. Nous commencerons donc par celle de *Puerto Viejo* ou du *vicieux port*, pource qu'elle se fit tout auprés du lieu où arriua celle du Peru. Mais auparavant il sera bon de ſçauoir que de Panama iusques à la ville Royale on nauigue avec beaucoup de peine, à cause des grands

courans de la mer, & du vent de Sud, qui est ordinaire en cette Coste. Pour éviter donc les inconueniens qui en pouuoient arriuer, ceux qui s'en alloient à ce voyage, estoient contraints au sortir du port de bordejer avec leurs vaisseaux à trente, ou quarante lieues de mer, si bien que de cette sorte ils gaignoient le haut de la coste, nauiguant tousiours à la Boline; D'où il sensuiuoit bien souuent, que lors qu'il se rencontroit que le nauire n'estoit pas bon de voile du costé de la Boline, il estoit ietté plus loing que le lieu d'où il estoit party. Mais enfin depuis que François Drac Anglois eut passé le destroit de Magellan, ce qu'il fit en l'an 1579. il descouurit vne meilleure methode de nauiguer, qui fut de bordejer à deux ou trois cens lieues dans la mer, ce que les Pilotes n'auoient encore osé faire. Car ils entroient en apprehension, sans sçauoir autrement de quoy ny de qui, si ce n'est qu'en leur imagination ils se persuadoient qu'ils ne seroient pas plustost à cent lieues de terre, qu'ils se perdroyent dans la mer, à cause de ses grands calmes, de sorte que pour ne tomber en cét inconuenient, ils n'osoient s'y enfoncer bien auant. En effect pour cette mesme crainte, peu s'en fallut que nostre nauire ne se perdit lors que ie pris la route d'Espagne, & qu'il fut ietté en l'Isle Gorgone, où nous eufmes bien de la peine à nous tirer d'un si mauuais Golphe. Comme donc au commencement de la conqueste du Peru, vn de ces nauires qui nauiguoit de la façon que nous auons ditte, se fut mis à bordejer six ou sept fois au sortir du mesme port,

où il retournoit tousiours, ne pouuant venir à bout de cette nauigation; il arriua qu'un de la troupe ennuyé de ce qu'on ne pouuoit passer outre, se mit à dire ces mots. *Ce port est viel pour nous autres*: Si bien que depuis, il a tousiours esté nommé *Puerto Viejo*. Et d'autant que le iour de Sainte Heleine ils descouurirent près du mesme port vne langue de terre assez remarquable, ils la nommerent pour cét effect *la pointe de Sainte Heleine*. Mais long-temps auant l'imposition de ces noms, il y en eut vne autre semblable, & qui merite bien d'estre remarquee. Car en l'an 1500. vn certain vaisseau s'estant mis sur mer, sans qu'on sceust au vray si c'estoit celui de Vincent Yennez Pinçon, ou de Iean de Solis, Capitaine de marine, fort hazardeux à descouurir de nouuelles terres, comme il s'en alloit en queste & s'enqueroit du pays, car c'estoit alors tout l'exercice des Espagnols, avec vn desir extreme de trouuer la terre ferme, pource qu'on n'auoit encore descouuert que des Isles, à sçauoir toutes celles qu'on nomme auourd'huy *de Barlouento*, vn marinier qui estoit à la hune descouurit de bonne fortune le lieu qu'on appelle *Caprira*, qui est au dessus la ville de *nombre de Dios*; & en mesme temps inuitant ceux du nauire à se resiouyr; Or çà compagnons, leur dit-il, *en nombre de Dios sea*, comme s'il eust voulu dire: loüé soit dieu messieurs, ie voy la terre ferme. De maniere que depuis on a tousiours appellé *Nombre de Dios*, la ville qu'on y bastit, & Terre ferme cette seule Coste; bien qu'il y en ait d'autres que celle-là. Dix ans apres,

32 / LE COMMENTAIRE ROYAL,
ils appellerét encore cette Prouince *la Castille d'or*, pour
la grande quantité qu'ils y treuuerét de ce metal, &
à cause d'un fort que Diego de Nicuesa y fit bastir en
l'an mil cinq cens dix. L'Isle qu'on nomme *la Trinidad*,
qui est en la Mer douce, fut nommée comme cela,
pour auoir esté descouuerte le iour de la tres-saincte
Trinité: A quoy i'adiouste que la ville de Cartagene
s'appella ainsi, à cause de son port, qui pour estre
semblable à celui de Cartagene en Espagne, donna
sujet aux premiers qui le virent de s'escrier *ce Haure*
n'est pas moins bon que le port de Cartagene. Pour cette mes-
me raison l'Isle *Serrane*, que l'on trouue vers la Haua-
na, au voyage de Cartagene, fut ainsi ditte du nom
de Pedro Serrano Espagnol de nation. Car son na-
uire s'estant perdu non loing de-là, luy seul se sauua
à la nage, & fut jetté en cette Isle, qu'il trouua deser-
te, & où il n'y auoit ny bois, ny eau douce: Et tou-
tesfois faisant de necessité vertu, il y vescu sept ans
durant par son industrie, comme il sera dit plus au-
long au Chapitre suiuant, pource que c'est vne Hi-
stoire qui n'est pas moins remarquable que digne
d'admiratiō; Or il n'y a point de doute que pour me-
moire de son nom & de cet euenement, on appella
cette Isle *Serrana*, & *Serranilla*, celle qui est auprès,
pour mettre vne difference entre l'une & l'autre.
Ainsi la ville de Santo Domingo, ou de Sainct Do-
minique, & toute son Isle ont tiré leur nom des eue-
nemens qui en ont donné sujet, comme le remarque
Gomara au Chapitre trentecinquesme, d'où i'ay tiré
ces paroles mot à mot. *La plus fameuse ville de cette Coste*
est celle

est celle de saint Dominique, les fondemens de laquelle furent iettez par Barthelemy Colomb sur le bord de la riuere d'Ozama. Il l'appella ainsi, pour ce qu'il arriva en ce lieu vn dimanche iour de saint Dominique qui estoit le nom de son pere, tellement qu'il y eut trois causes qui contribuerent à vn mesme effect, &c. Voila ce qu'en dit Gomara. De cette mesme façon, ont esté imposez tous les autres noms des plus beaux ports, des grandes riuieres, & pareillement des Provinces & des Royaumes du nouveau Monde. Car ceux qui les ont apperceus les premiers les ont appelez du nó du Sainct, ou de la Sainte au iour desquels ils ont esté descouverts, ou mesme les Capitaines, les Soldats, & les Pilotes qui en ont fait la descouverte leur ont donné leurs noms propres; dequoy nous touchons quelque chose en nostre Histoire de la Floride en l'endroit où nous en faisons la description, & parlons de ceux qui s'y en allerent les premiers. Là mesme, ie m'estois aduisé d'adiouster en suite du quinziesme Chapitre du 6. liure, toutes ces deductions de noms iointes ensemble avec celles du mot Peru, de peur qu'il ne vint faute de moy, auant que pouuoir mettre la main à cette Histoire. Mais puis qu'il a pleu à Dieu me maintenir en vie, i'ay trouué à propos de les oster de là pour les mettre chacune en son lieu. Toute l'apprehension que i'ay maintenant, c'est que quelque Historien ne s'en soit accommodé, d'autant que ce liure a desia passé par plusieurs mains, ioint qu'entre tant de personnes qui ont voulu sçauoir de moy la deduction du nom Peru, il s'en est trouué à qui ie ne l'ay peu refuser honne-

34 LE COMMENTAIRE ROYAL,
stemment pour leur estre entierement acquis, quel-
que dessein que i'eusse de n'en donner les memoires
à personne, & de les garder par deuers moy.

Description du Peru.

CHAP. VII.



'Empire des Yncas estoit ainsi borné de quatre costez, lors que les Espagnols y entrerent. Il s'estendoit du costé du Nord iusques à la riuiera Ancasmayu, qui passe entre les confins de Quito & de Pastu. Elle signifie en la langue generale du Peru *Riuiera Azurée*, & peu s'en faut qu'elle ne soit perpendiculairement sous la ligne Equinoctiale. Deuers le Midy il estoit borné de la riuiera appelée Mauly, qui court Lest Oüest au de là du Royaume de Chily, auant qu'arriuer au pays des Araucos, qui est à plus de quarante degrez de la ligne au Sud. Entre ces deux fleuues on compte enuiron mille trois cens lieuës de largeur par terre. Ce qu'on appelle Peru en a sept cens cinquante, depuis la riuiera Ancasmayu, iusques à la Prouince des Chicas, qui est la derniere des Charcas, à le prendre North Sud; Et quant au Royaume qu'ils appellent Chilé, il a pareillement a North Sud, cinq cens cinquante lieuës, à compter depuis les frontieres de la Prouince des Chicas, iusques à la riuiera Mauly. Il est borné vers

le Leuant d'une longue chaisne de montaignes toujours couuertes de neiges, & inaccessibles, non seulement aux hommes & aux bestes, mais aux oyseaux mesmes; & qui depuis Sainte Marthe s'estendent iusques au destroit de magellan, & sont appellées des Indiens *Ritisuyu*, comme qui diroit ceinture, ou escharpe de neige. A le prendre par la coste, les confins de cet Empire s'estendent depuis le Cap de Passau iusques à la riuere de Mauly, qui s'engolfe dans la mer du Sud. Tout ce Royaume paroist fort estroit à qui le considere du Leuant au Ponant. Sa plus grande largeur, si l'on trauerse depuis la Prouince Muyu-Pampa par le pays de Chachapuyas, iusques à la ville de Truxillo scituée sur la Coste de la mer, est de six vingts lieuës, & sa plus estroite estenduë, depuis le port d'Arica iusques à la Prouince appellée Liliari-cossa, n'est que de 70. lieuës. Voila quelles sont les quatre Confins de l'Empire qu'ont subiugué les Rois Yncas, dont nous pretendons escrire l'Histoire moyennant l'assistance Diuine. Mais auparauant que passer outre il ne sera pas hors de propos, de raconter icy l'aduenture de Pedro Serrano, que nous auons cy-deuant promise, tant pource qu'il n'y a pas longtemps qu'il en a esté parlé, qu'afin d'allonger vn peu ce Chapitre.

Pedro Serrano s'estant sauué à la nage, apres le desbris de son vaisseau, fut ietté en cette Isle deserte, qui fut depuis appellée de son nom. Elle auoit deux lieuës de circuit, à ce qu'il disoit, & la Carte de navigation assure le mesme. Car on y peut voir depein-

tes trois Isles fort petites, & tout à l'entour quantité de bancs de sable, où se remarque encore l'autre Isle qu'on appelle *Serranilla*, qui contient cinq petites Isles plus pleines de bancs que n'est la Serrane, desquels il y en a quantité en tout ce Parage. Aussi est-ce pour cela que les vaisseaux s'en esloignent tant qu'ils peuuent, afin de ne se mettre en danger de leur perte. Le malheur ayant donc voulu que Pedro Serrano fist naufrage en ce lieu là, il eut recours à son industrie pour se sauuer, & fist si bien qu'à force de nager il abborda l'Isle dont nous parlons. Y estant arriué, il s'y vit en estat de se dire l'homme du monde le plus desolé; car il n'y trouua ny eau ny bois, & non pas mesme de l'herbe, ny autre chose qui peust seruir à sa nourriture, en attendant qu'il passast par là quelque vaisseau, qui le receust pour l'empescher de mourir de faim & de soif, qui luy sembloit vne mort plus cruelle que s'il se fut noyé, pource qu'il n'eust pas languy si long temps. En ce miserable estat il passa la premiere nuit à pleurer son infortune, & à s'affliger bien fort, comme pourroit faire toute autre personne qui le verroit reduitte en de si grandes extremitez. Le lendemain il ne fut pas plustost iour, que s'estant mis à se pourmener tout allentour de l'Isle il y trouua quelques poissons sur le bord, tels que peuuent estre des Escreuisses marins & autres Coquillages qu'il recueillit, & les mangea cruds, n'ayant point de feu pour les faire cuire. Voila de quoy il se nourrit quelque temps, iusques à ce qu'ayât apperceu certaines Tortuës qui sortoient hors de la

mer, comme il vit qu'elles en estoient assez loing, il en attaqua vne dont il se saisit, & en fit de mesme de toutes les autres, qu'il pût attrapper; Puis empoignant vn cousteau, qu'il souloit porter à sa ceinture, & qui luy seruit alors d'un favorable instrument de vie, il en tua vne, & en beut le sang en lieu d'eau. En ayant fait autant des autres, il en couppa la chair par tranches, & la mit cuire au Soleil. Quant à leurs coquilles, apres qu'il les eust destachées, il s'en seruit à recueillir de l'eau de pluye; Car on ne peut mettre en doute que tout ce pays là ne soit extremement pluvieux. Il passa donc quelque temps à se nourrir de la chair de ces tortuës, qu'il tuoit en assez bon nombre, & dont il y en auoit de toutes façons, les vnes de la largeur d'une grande targe, & les autres moindres. Il est vray qu'il ne luy seruoit de rié de cōbattre les plus grandes, pource qu'elles se trouuoient plus fortes que luy, tellement qu'en vain il montoit sur elles pour les lasser, & les abattre sous luy, d'autant que le portant ainsi sur le dos, elles rebroussioient incontinent vers la mer, de sorte que l'experience luy monstroit quelles tortuës il deuoit ou combattre ou laisser, pour n'auoir dequoy en venir à bout. Cependant il n'est pas à croire combien d'eau il amassoit dans leurs conques, y en ayant quelques-vnes qui en tenoient vne quantité notable. Comme il vit qu'il auoit suffisamment à manger & à boire, il dit à par soy, qu'il ne luy falloit plus rien que du feu pour cuire sa viande, & faire fumée, si de hazard il passoit par-là quelque nauire. Sur cette imagination

que la neceſſité fit naiſtre en luy, comme ayant ac-
couſtumé d'aller ſur la mer, qui a cela de propre de
rédre ingenieux dás les trauaux ceux qui la frequen-
tent, il ſ'aduifa d'aller chercher des caillous, pour ſ'en
feruir comme de pierres à feu, & de ſon couſteau en
lieu de fuſil. Mais n'en trouuant point dans l'Isle, ou
il n'y auoit rien que du ſable, il entroít ſouuent dans
la mer, où il ſe mettoit à la nage & à faire le plon-
geon, n'oubliant aucune ſorte d'inuention pour voir
ſ'il ne trouueroit point ce qu'il cherchoit. En effect
il trauailla ſi bien, qu'à la fin ſa peine luy reüſſit, & il
trouua quelques Caillous, dont il choiſit les meil-
leurs, qu'il battit les vns contre les autres, avec tant
de bon ſuccez, qu'il en ſortit des eſtincelles de feu.
Alors d'une piece qu'il rompit de ſa chemiſe, il en fit
vne maniere de charpie, qui reſſembloit à du cotton,
& ainſi ſ'aydant de tout le fuſil enſemble, à la fin à
force de le battre, & d'adiouſter inuention ſur inuen-
tion, il en tira du feu, comme il deſiroit. Et d'au-
tant qu'il ne luy reſtoit plus qu'à trouuer de quoy
l'entretenir, pour cét effect il ſ'en alloit d'heure en
heure deſſus le bord de la mer, afin d'en ramaffer les
balliures; Car il y trouuoit quantité de mouſſe ma-
rine, qu'on appelle vulgairement *Ouas marinas*, &
meſme il y rencontroit quelquesfois des eſclats de
bois pourry, reſté du deſbris des nauires qui ſe per-
doient ſur la mer; Comme pareillement des os de
poifſon, des coquillages, & autres choſes ſembla-
bles, dont il entretenoit le feu. Avec que cela pour
empéſcher que l'eau ne vint à l'eſteindre, des plus

grandes tortuës qu'il auoit tuées, il en fit comme vne maniere d'auuent, vsant de toute la vigilance qui luy estoit possible, afin de le conseruer. Il passa deux mois en cette austerité de vie, à la fin desquels, voire auparauant, il se treuua tout nud, pource que les méchans habits qu'il auoit sur luy, se pourrirent par vn meslange de chaleur & d'humidité, les pluyes, comme i'ay dit, n'estant pas moins grandes en ce climat, que la chaleur y est excessiue. Aussi n'est-il pas à croire combien estranges estoient les incommoditez qu'elle luy causoit, n'ayant ny habillement, ny ombre pour se defendre du Soleil. De maniere que lors qu'il n'en pouuoit plus supporter la violence, il estoit contraint de se mettre dans l'eau pour y trouuer quelque rafraischissement. En ces traualx qui vont par dessus l'imagination, trois ans s'écoulerent tous entiers, durant lesquels il vit passer assez de nauires. Mais quelque fumée qu'il peust faire, signal ordinaire de ceux qui sont perdus sur la mer, les navigateurs passoiēt outre, & ne daignoient aller voir ce que c'estoit, de peur qu'ils auoient de se perdre eux-mesmes, & d'eschoüer sur les bancs. Dequoy le pauvre Serrano s'affligeoit si fort, qu'il est croyable qu'en des extremitez si rudes & si fascheuses, il eust preferé tres-volontiers la mort à la vie. Durant cela les incommoditez du temps, & les miseres qu'il enduroit, le firent deuenir velu comme vn Ours par toutes les parties de son corps, si bien que la barbe & les cheveux luy alloient plus bas que la ceinture. Apres auoir vescu de cette sorte durant trois ans, il

arriua finalement qu'un soir, comme il ne pensoit à rien moins il apperceut en cette Isle un homme qui la nuit d' auparauant auoit fait naufrage en ces bancs, & s'estoit sauué à la faueur d'une des planches du nauire. Le lendemain si tost qu'il fut iour cét homme inconnu ayant pris garde à la fumée que faisoit le feu de Pedro Serrano, & se doutant bien de ce que c'estoit, tacha de s'y en aller, s'aydant pour cét effect de la planche, & de l'adresse qu'il auoit à nager. Il seroit bien difficile de dire lequel des deux fut le plus estonné quand ils se virent d'assez prés. Serrano s'imagina d'abbord que c'estoit quelque Demon, qui sous la figure d'un homme s'en venoit à luy; pour le tenter, & le mettre au desespoir. Celuy cy cependant auoit la mesme pensée de Serrano; & à considerer un homme, ou plustost un monstre si velu par tout le corps, & qui ne sembloit estre que poil & que barbe, il creut voir le diable en sa propre figure. Comme ils fuyoient ainsi l'un de l'autre, à la fin le nouuel hôte se rassura de sa peur, quand il ouyt que Pedro Serrano disoit *Seigneur Iesus deliurez moy des tentations du diable*. Il l'abborda doncques, & les yeux tous beignez de larmes. Ha! mon frere luy dit-il, ne fuyez point ie vous prie: ie suis Chrestien comme vous, & en mesme temps pour mieux l'asseurer de cette verité, il se mit à dire *le Credo*. Alors Pedro Serrano ne pouuant plus douter apparemment que ce ne fust un Chrestien, accourut à luy, & ils s'embrasserent tous deux fort estroitement, avec des demonstrations d'une tendresse extraordinaire, & du grand regret qu'ils

auoient

auoient de se voir enuelopez dans vne mesme disgrâce, sans esperâce de s'en pouuoir retirer. En suite de cela s'estans racontés l'un à l'autre en peu de paroles leurs aduentures passées, Pedro Serrano, qui se douta bien que son hoste auoit faim, luy offrit à manger & à boire de ce qu'il auoit, ce qu'il accepta tres volontiers, puis ils s'entretindrent à loisir sur le suiet de leur miserable fortune. Ils commencerent deslors à mettre ordre le mieux qu'ils peurent aux moyens qu'ils leur falloit tenir pour s'empescher de mourir de faim, partageans pour cét effect les heures du iour & de la nuit, afin de pouruoir chacun à son tour à leurs communes necessitez, soit qu'il fust question de se fournir de quelque marée, ou d'aller chercher de la mouffe marine, des esclats de bois, des os de poisson, ou autres choses semblables. que la mer iettoit à bord, & s'en seruir pour entretenir leur feu; car c'estoit de quoy ils auoient vn soing particulier, & pour cela mesme qu'ils veilleient chacun à son tour, pour l'empescher des'esteindre. Ils passerent quelques iours à viure de cette sorte. Mais le malheur voulut qu'ils ne peurent estre long-temps ensemble sans se broüiller & se quereller, & mesme peu s'en fallut qu'ils n'en vinssent aux mains; par où l'on peut voir combien sont miserables les hommes de se laisser ainsi commander à leurs passions. Le suiet de leur querelle vint de ce que l'un pretendoit que ce fust à faire à l'autre de pouruoir aux choses qui leur estoient necessaires, tellement que cette broüillerie iointe aux paroles picquantes qu'ils se

dirent là dessus separa l'un d'avec l'autre. Mais en fin la necessité les rappella, & les mit bien ensemble, de telle sorte qu'ils ne se quitterent point de quatre ans, durant lesquels ils firent tousiours fumée à chaque vaisseau qu'ils virent passer ; en vain toutes-fois, & cela les affligea si fort, qu'ils perdirent toute esperance de pouuoir iamais sortir d'un si miserable exil.

Après qu'un si long temps se fut esoulé, voila finalement qu'un nauire venant à passer assez près du lieu où ils faisoient de la fumée, s'en apperceut de bonne fortune, si bien que ceux de dedans enuoyerent vne chaloupe à leur bord, afin de les prendre. Alors Pedro Serrano & son compagnon, qui n'estoit pas moins effroyable que luy, voyant que la chaloupe s'approchoit d'eux ; pour empêcher que les mariniers qui les alloient ioindre, ne les prissent pour quelques demons, & ne s'en fussent d'eux, se mirent à dire *le Credo*, inuokans à haute voix le nom de Iesus nostre Redempteur. En quoy certes ils furent bien-aduisez, & il est à croire que sans cela, les Mariniers s'en fussent fuïs, pource qu'ils paroïssent plustost des monstres, que non pas des hommes. Ils les receurent donc en leur chaloupe, d'où ils les furent mettre dans le nauire ; Où il n'y eust celuy des nauigateurs qui ne fust rauy d'estonnement & de pitié, de les voir en si miserable estat, & d'oïr les choses qu'ils auoient souffertes par le passé. Ils continuerent donc leur route, avec dessein de faire voile en Espagne ; mais le dernier

des deux mourut sur la mer, au grand regret de Pedro Serrano, lequel au sortir de tant de miseres, eust le bon-heur d'abborder en Allemagne, & d'estre présenté à l'Empereur ainsi affreux qu'il estoit, & couuert de poil, afin qu'une chose si extraordinaire fust vne preuue de son naufrage, & des grands maux qu'il auoit soufferts. Que s'il eust voulu tarder quelque temps en châce ville par où il passoit, pour y faire monstre de foy-mesme, il n'y a pas de doute qu'il eust amassé beaucoup d'argent. Aussi y eust-il quelques Seigneurs qui furent curieux de le voir, & luy donnerent de quoy passer son chemin. Mais par dessus tous les autres, l'Empereur bien estonné de luy ouïr dire les choses estranges qu'il racontoit de son naufrage, luy fit don de quatre mille poids de rente, qui valent au Peru quatre mille & huit cens ducats. Ce qui ne luy seruit de rien neantmoins, d'autant qu'il fut preuenue de mort, comme il s'en alloit à Panama pour y iouyr de ce reuenu. Je tiens cette Histoire d'un Gentilhomme digne de foy, qu'on appelloit Garcilanchez de Figueroa, qui en pouuoit parler comme sçauant, pour auoir conneu familièrement Pedro Serrano. Il asseuroit de luy en auoir ouïy faire le recit à luy-mesme, & disoit de plus qu'apres que Serrano eust veu l'Empereur, il se fit couper vne partie de ses cheueux & de sa barbe, qu'il porta depuis tant soit peu plus courte que la ceinture. Et d'autant qu'elle estoit fort large, & touffuë, il estoit contraint de la tresser quand il vouloit reposer, autrement elle l'incommodoit dans le liét, & l'empeschoit de dormir.

*De l'Idolatrie de ceux du Peru, & des Dieux
qu'ils adoroient avant qu'estre gouver-
nez par les Yncas.*

C H A P. IX.

POur mieux donner à entendre quelle estoit l'Idolatrie des Indiens du Peru, & quelle encore leur maniere de viure, il est necessaire que nous diuisions cet ancien temps en deux âges; Au premier desquels, nous dirons de quelle façon ils souloient viure, avant qu'estre gouvernez par les Yncas, & au second quel estoit le gouvernement de ces Rois, afin de ne confondre cette matiere, & de n'attribuer l'Idolatrie ny les mœurs des vns à celles des autres. Il faut donc sçauoir qu'en ce premier âge, il y auoit parmy les anciens Gentils des Indiens vn peu meilleurs que des bestes appruiuisees, & d'autres qui estoient pires que les animaux les plus sauuages. Or ayant à traiter de leur Idolatrie, il est à propos de commencer par leurs Dieux. Ils les choisissoiēt conformes à leur brutalité, & à l'infame inclination qu'ils auoient, soit à les adorer en grand nombre, soit à rendre des honneurs diuins aux choses du monde, les plus viles & les plus basses qu'on sçauroit s'imaginer. Car il est certain que chaque Prouince, chaque Nation, chaque Famille, chaque Ville, chaque rue, & mesme chaque

maison auoit ses Dieux differens de ceux des autres. Car ils s'imaginoient follement qu'il n'y auoit que le Dieu auquel ils se voüoient particulièrement qui les peust ayder à leur besoin; Et voila pourquoy ils tenoient pour estrangers tous ceux que les autres adoroient. Ce fut de cette pernicieuse creance que prirent leur origine les Dieux qu'ils eurent, qui furent diuers, & en fort grand nombre. Or d'autant que leur esprit n'alloit point si auant que celuy des Romains, qui se figuroient des Deitez imaginaires, telles qu'estoient la Paix, l'Esperance, la Victoire, & ainsi des autres; comme ils n'esleuoient point leurs pensées à des choses inuisibles, ils n'adoroient aussi que celles qu'ils voyoient, & le faisoient brutallement les vns à la difference des autres, sans considerer ny si elles en estoient dignes, ny sans mesme auoir égard à leur propre personne, veu qu'ils se portoient à l'adoration des choses qui leurs estoient inferieures. C'estoit donc leur principale intention d'auoir des Dieux qui differassent les vns des autres, sans se mettre en peine de quelque nature qu'ils peussent estre. Ils le tesmoignoient assez en ce qu'ils adoroient indifferemment des Herbes, des Plantes, des Fleurs, & des Arbres de toutes les sortes, des hautes montaignes, des Creuasses, des precipices profonds, de grosses pierres, & de petits cailloux diuersement colorez comme du Iaspe, qu'ils trouuoient dessus le bord des riuieres. Adioustons à cecy qu'en la Prouince qu'on appelle *Puerto Viejo*, c'est à dire le vieux port, ils adoroient particulièrement l'Esme-

raude, avec apparence qu'ils en eussent fait de mesme des Diamans & des Rubis s'il s'en fust trouué en ce pays-là. Ils adoroient encore diuers animaux, les vns pour leur cruauté, comme le Tygre le Lion, & l'Ours, qu'ils ne rencontroient iamais, que les tenant pour leurs Dieux ils ne se prosternassent à terre, & ainsi ils se laissoient tuer miserablement, sans prendre la fuite, & sans se mettre en deffence. I'obmets quantité d'autres animaux qu'ils adoroient à diuerses fins, les vns pour leurs ruses, comme les Singes, & les Renards, les autres pour leur fidelité, comme le Chien, & les autres pour leur vitesse, comme le Loup Ceruier. Ils en faisoient de mesme enuers vn Oyseau par eux appelé *Cuntur*, qui leur estoit en veneration, à cause de sa grandeur; & particulièrement à certains peuples qui se disoient estre descendus de luy. Il y auoit aussi quelques Nations qui sacrifioient aux Aigles, & d'autres qui adoroient les Faucons, à cause de leur adresse à voler, & à prendre du gibier pour s'en nourrir. Ils adoroient le Chahuan, à raison de la beauté de ses yeux & de sa teste, comme pareillement la Choüete, pour la subtilité de ses yeux qui voyét dás les tenebres; ce qui leur sembloit vne chose merueilleuse. Avec cela ils tenoient pour Deitez les Couleures, & les Serpens, principalement les plus cruels & les plus grands, tels que ceux qui sont en la Contrée des Antis, qui ont iusques à vingt cinq ou trente pieds de longueur, & autant de largeur ou peu s'en-faut. Ceux des pays où les Couleures n'estoient pas si grandes, qu'en la Contrée des

Antis, en adoroient d'autres de diuerſes formes, & meſme leur Idolatrie paſſoit iuſques aux Leſards, & aux Crapaux. En vn mot il n'y auoit point chez eux de ſi vilains animaux qu'ils ne recogneuſſent pour leurs Dieux, pluſtoſt pour monſtrer qu'ils en auoient de differents les vns des autres, que pour aucune vtilité qu'ils en peuſſent eſperer. Par où l'on peut voir, que ces peuples eſtoient extremément niays, & tels que des Brebis ſans Paſteur. Mais il ne faut pas ſ'eſtonner, ſi des gens qu'on n'inſtruiſoit point, & qui n'auoient aucune teinture des bonnes lettres, ſe laiſſoient choir en de ſi grandes erreurs, puis qu'il eſt certain que les Romains & les Grecs, qui ſe pic-quoiét ſi fort de ſçauoir, furent bien ſi aueuglez que d'auoir iuſques à trente mille Dieux, au temps le plus fleuriffant de leur Empire.

De diuers autres Dieux qu'ils eurent.

C H A P. X.

IL y euſt en ce premier âge pluſieurs autres Indiens de diuerſes Nations, qui firent election de leurs Dieux avec plus de conſideration que ceux dont nous venons de parler. Je mets en ce nombre ceux qui tenoient pour Deitez les choſes dont ils receuoient quelque proffit, tels qu'eſtoient ces peuples qui adoroient les ſources d'eaux viue, & les grandes Riuieres,

pource, qu'elles leur seruoient pour arroser les terres, où ils auoient semé des grains.

Les vns adoroient la Terre, & l'appelloient leur bonnemere, à cause qu'elle leur donnoit ses fruits; les autres l'Air, pource disoient-ils, qu'il faisoit viure les hommes par le moyen de la respiration; les autres le Feu, à cause qu'il leur seruoit à se chauffer, & à leur apprester à manger; Les autres le Mouton, pour le grand nombre de troupeaux qu'ils nourrissoient en leurs pasturages; Les autres cette longue estenduë de Montaignes dont nous auons desia parlé, tant à raison de leur hauteur merueilleuse, que pour estre la source de plusieurs fontaines & ruisseaux qui arrosoient leurs terres; Les autres le *Maiz* où le *garra* (c'est ainsi qu'ils appellent leur bled) pource qu'ils en faisoient du pain; Et les autres toutes les sortes de Legumes & de Fruicts que leur pays produisoit. Ceux qui habitoient la coste de cette mer auoient aussi vne infinité de Dieux qu'ils adoroient particulièrement. Mais à le prendre en general, ils recognoissoient la Mer pour la plus puissante de toutes les Deitez, & l'appelloient *Mamacocha*, c'est à dire leur mere. Par où ils vouloient donner à entendre, qu'elle leur seruoit de nourrisse, en leur donnant son poisson, pour se maintenir en vie. Tous ceux de la mesme Coste adoroient aussi en general la Baleine, à cause de sa monstrueuse grandeur; Où il est à remarquer qu'outre cette adoration, qui estoit commune entre-eux, ils en auoient en châce Province vne autre particuliere enuers les poissons qu'ils y tuoient

y tuoient en plus grande abondance. Ils faisoient à ce propos vn fort plaissant conte, à sçauoir que le premier de tous les poissons qui estoit au plus haut monde (c'est ainsi qu'ils ont accoustumé d'appeller le Ciel) engendroit tous les autres de la mesme espee, dont ils se nourrissoient, & que suiuant le cours des saisons, luy-mesme prenoit le soing de leur enuoyer quantité de ses enfans, pour leur commun aliment. Pour cette mesme raison les habitans de quelques Prouinces souloient adorer la Sardine, pource qu'ils en prenoient en plus grande quantité que d'autre poisson. I'obmets que plusieurs en faisoient de mesme de la Raye, du Chien de mer, de la Dorade, à cause de sa beauté, de l'Escreuille marin, & de toute autre sorte de marée qui leur tenoit lieu d'autre meilleur poisson, soit qu'il n'y en eust point en cette mer, ou qu'ils n'eussent pas l'adresse de le pescher. En vn mot, ils tenoient pour leurs Dieux ceux d'entre tous les poissons qu'ils sçauoient leur estre les plus profitables; De telle sorte qu'ils adoroient non seulement les quatre Elemens, chacun d'eux considéré à part soy, mais encore, tous les corps qui en estoient composez & formez, quelques abiets, & immondes qu'ils peussent estre. Il y auoit aussi d'autres peuples, comme les Chirhuanes & ceux du Cap de Passau, qui sont deux Prouinces seruans de bornes au Peru, du costé du Septentrion & du Midy, qui n'adoroient pour tout aucune chose ny basse ny haute, pour n'y estre portez d'inclination, ou pour raison de leur interest, ou par la crainte

30 LE COMMENTAIRE ROYAL,
mesme, si bien qu'ils viuoient alors, & vivent en-
core comme des bestes, qu'ils surpassent en bruta-
lité, ce qui procede sans doute de ce que l'establisse-
ment des Loix, & de la doctrine des Rois Yncas n'a
point passé iusques à eux.

Des Sacrifices qu'ils souloient faire.

CHAP. XI.

L'Inhumanité plus que barbare des sacri-
fices que faisoient ces anciens Idolatres
estoit tout à fait conforme à l'ignominie
& à la bassesse de leurs Dieux: Car lais-
sant à part leurs offrandes ordinaires, qui consistoiēt
en fruiets de la terre, en moissons, & en animaux,
ils sacrifioient en outre des hommes & des femmes
de tous les âges, apres les auoir fait prisonniers aux
guerres qu'ils se faisoient. Cette coustume execra-
ble alloit iusques à ce point de felonnie parmy quel-
ques vns de ces peuples, qu'elle surpassoit celle des
bestes les plus sauuages. Car n'estants pas contents
de sacrifier leurs prisonniers, ils immoloient au be-
soin leurs propres enfans. Or ce Sacrifice diabolique
d'hommes, de femmes, de garçons, d'enfans de
tout sexe, & de tous âges, se faisoient entre eux en les
ouurant tous en vie par le milieu de l'estomach, d'où
ils leur arrachoiēt le cœur & les poulmons; puis
de leur sang encore chaud, ils ensanglantoient l'Idole,

à laquelle le sacrifice s'adressoit. Ce qu'ils n'auoient pas plustost fait, que leurs Deuins tenoient fixement les yeux attachez sur le mesme cœur, & sur les poulmons, pour voir par les coniectures qu'ils en tiroient, si leur offrande auoit esté agreable ou non. Apres cela de quelque façon que la chose leur semblast auoir reüssi, ils brusloient à l'honneur de l'Idole les poulmons & le cœur de celuy qu'ils auoient sacrifié, dont ils mangeoient le corps à la fin, avec vn insatiable appetit, & quand c'eust esté leur enfant propre, ils ne laissoient pas de s'en resiouir.

Le R. P. Blas Valera, par les coniectures qu'on en peut tirer de diuers fragmens de ses memoires, sembloit auoir la mesme intention que i'ay, en plusieurs endroits de ses escrits, à sçauoir de diuiser les temps, les âges, & les Prouinces, afin que l'on en peust mieux comprendre les mœurs & la maniere de viure de chacune de ces Nations. En voicy vne preuue que i'ay tirée le mieux que i'ay peu d'un de ses cahiers rompus, où parlant de l'estat present de ces peuples, qui vsent encore aujourd'huy de la mesme inhumanité dont nous venons de parler, il en dit ce qui s'ensuit. *Les Habitans du pays d'Antismangent de la chair humaine. Les Tygres ne sont pas si cruels qu'eux; Ils ne recognoissent ny Dieu ny Loy; ne sçauent que c'est que de Vertu, & n'ont aucunes Idoles, ny rien qui en approche, si ce n'est qu'ils adorent le Diable, quand sous la forme d'un Serpent, ou de quelque autre animal, il se presente à ces miserables, afin de parler à eux. S'il arrive que par droit de guerre ou autrement, ils fassent vn prisonnier, & qu'ils le con-*

52 LE COMMENTAIRE ROYAL,

noissent pour estre vn homme de peu, ils l'escartellent incontinent & en donnent les membres à leurs amis, ou à leurs valets, afin de les manger s'ils veulent, ou de les vendre à la boucherie. Mais si c'est vn homme de condition, en tel cas les principaux s'assemblent entre-eux avec leurs femmes & leurs enfans, pour assister à sa mort. Alors ces impitoyables ministres du Diable, l'ayant despoüillé, l'attachent tout nud à vn gros pieu, & le descouppent par tout le corps à coups de rasoirs & de consteaux, faits d'vn certain caillou fort tranchant, & qui est vne maniere de pierre à feu. En cette cruelle execution ils ne le desmembrent pas d'abbord, mais ils ostent seulement la chair des parties qui en ont le plus; comme du gras de la iambe, des cuisses, des fesses, & des bras. Apres cela tous pestle-mesle, hommes, femmes, enfans, se teignent du sang de ce malheureux Martyr, & sans attendre que la chair qu'ils en ont tirée soit ou boüillie ou rostie, ils la mangent goulument, ou pour mieux dire, ils l'engloutissent sans la mascher, & ainsi ce miserable se voit mangé tout en vie, & enseuely dans le ventre de ses ennemis. La cruauté de ces meschans hommes, bien qu'inhumaine iusques au dernier poinct, ne l'est encore pas tant que celle des femmes, qui se frottent le bout des mammelles du sang de ce pauvre patient, afin de le faire succer à leurs enfans, avec le lait qu'elles leur donnent. Ils continuent avec beaucoup de ioye ce bourrelage sanglant, qu'ils appellent Sacrifice, iusques à ce que le prisonnier ayant acheué de viure, ils acheminent aussi de leur costé d'en manger la chair, & les entrailles; s'imagināt deslors que toutes les resiouyssances & les festes qu'ils sçauroient faire ne sont rien à comparaison des delices qu'ils s'en vont goustier. Ils tiennent cette viande en grande veneration, & la mangent comme vne chose sacrée. Que s'ils ont pris garde que dans les langueurs & les supplices qu'ils ont fait souffrir au mi-

serable deffunct, il ayt tesmoigné le moindre sentiment de douleur, ou en son visage, ou aux autres parties de son corps, ou mesme qu'il luy soit eschappé quelque gemissement, ou quelque soupir, alors ils brisent ses os, apres en auoir mangé la chair, & les iettent à la voirie, ou dans la riuere avec vn mespris extreme. Au contraire s'il s'est monstré resolu, constant, & mesme farouche dans les tourmens; en tel cas, comme ils en ont mangé la chair & les entrailles, ils seichent les nerfs & les os au Soleil; puis les ayant mis sur le sommet des montagnes, ils les tiennent pour des Dieux, les adorent, & leur font des Sacrifices. Voila quelles sont les Idoles de ces peuples brutaux, qui n'ont ny le sens commun, ny la moindre connoissance des bonnes choses, pource que l'Empire des Yncas ne s'est point estendu iusques à eux, ny mesme celuy des Espagnols, tellement qu'ils persistent encore aujourd'huy en leur infame ignorance, qui les rend pires que des bestes. Cette engaece d'hommes cruels, & desnaturez, est sortie de la Mexique, à ce que l'on tient, & a peuplé depuis toutes les Contrées de Daricn & de Panama, d'où elle a passé outre en ces grandes montaignes qui d'un costé abboutissent à Sainte Marthe, & de l'autre au nouueau Royaume de Grenade. Tout ce que ie viens de dire est tiré du R. P. Blas Valera, qui par le recit qu'il fait de ces detestables & infernaux Sacrifices, nous ayde à exagerer plus fort la façon de viure de ce premier âge, & celle qui s'y pratique encore aujourd'huy.


Il s'est trouué d'autres Indiens qui n'ont pas esté si desnaturez que ceux-cy, ny si cruels en leurs sacrifices. Car bien qu'ils fussent sanglants, la mort neantmoins ne s'en ensuiuoit pas, veu qu'ils se contentoient d'offrir simplement de leur sang qu'ils se fai-

soient tirer des bras ou des cuisses, selon que le sacrifice estoit d'importance. Que si la solemnité en devoit estre grande, en tel cas on leur en tiroit aux extremités des narines, ou entre les deux sourcils. De quoy certes il ne faut pas s'estonner, puis que l'on sçait bien que la saignée a tousiours esté ordinaire aux Indiens du Peru, vne entre les autres dont nous parlerons particulièrement cy-apres, de laquelle ils fouloient vser non seulement en leurs sacrifices, mais encore en leurs maladies, principalement pour appaiser les maux de teste. Or les sacrifices dont nous venons de parler n'estoient pas les seuls qui leur estoient ordinaires, veu qu'ils en auoient de différentes façons, qui s'introduisoient selon la diuersité des coustumes de châque Prouince. Toutesfois, à le prendre en general, ils sacrifioient la plus-part du temps des animaux, comme par exemple des Moutons, des Brebis, des Aigaux, des Lappins, & pareillement des Perdrix & autres oyseaux. Ils en faisoient de mesme du Suif, de l'herbe appelée *Cuca*, qui est si fort estimée parmy-eux, du Mayz, & des autres graines; ou bien des Legumes, du bois odorant, & de semblables choses que la terre leur produisoit. En quoy certes ceux de châque nation s'accommodoient à leurs propres sentimens, & à la nature de leurs Dieux, selon qu'ils iugeoient à peu-prés que leur offrande leur pourroit estre agreable. Par exemple s'ils adoroient des oyseaux, ou des animaux carnassiers, ils leurs offroient des choses qu'ils leur voyoient manger plus volontiers, ou à quoy il leur sembloit

qu'ils prenoient le plus d'appetit. Et voila, ce me semble, tout ce que l'on peut dire touchant les offrandes & les sacrifices de ces peuples Idolatres.

*De la maniere de viure de ces Anciens Gentils;
Ensemble de leur Gouvernement.*

CHAP. XII.

 Es Anciens Gentils n'estoient pas moins barbares en la façon de loger, & de viure ensemble, qu'ils l'estoient en matiere de sacrifier à leurs Dieux. Les plus Politiques d'entre eux demeuroient dans vn enclos, tel qu'un parc où l'on resserre les bestes, & où il n'y auoit ny place ny arrangement de ruës & de maisons. Il y en auoit encore, qui pour receuoir moins de dommage de leurs ennemis, avec lesquels ils estoient en guerre, s'en alloient demeurer sur le sommet des Montaignes, où ils se tenoient assurez comme en vne forteresse imprenable. I'obmets ceux qui se retiroient en des cauernes, & autres lieux escartez parmy les campagnes & les valons, où ils s'arrestoient selon les commoditez des lieux, & les moyens qu'ils trouuoient d'y demeurer, & de s'y nourrir. D'autres encore viuoient dans des fosses & dans les creux des gros Arbres, selon qu'ils trouuoient que la nature auoit mis ordre à leur logement, car pour eux ils ne s'en mettoient pas beaucoup en peine. Il s'en trouue

mesme encore aujourd'huy qui viuent dans cette mesme brutalité, tels que sont ceux du Cap de Passau, les Chirihuanes, & autres peuples que les Rois Yncas ont conquis, & qui se ressentent tousiours de la brutale façon de viure de leurs Peres. Or ce qu'il y a de pire, est que ceux-cy sont les plus reuesches de tous, ie ne diray pas à se reduire sous le seruice des Espagnols, mais sous le doux ioug de la Religion Chrestienne. Ce qui procede à mon auis, de ce que pour n'auoir iamais esté instruits, ils ne sont pas raisonnables, & ont à peine vne langue pour expliquer leurs pensées, quoy qu'ils soient d'une mesme nation, si bien que de cette sorte ils viuent comme des animaux de differētes especes, tousiours esloignez les vns des autres, sans iamais communiquer ensemble.

Le plus hardy d'entre-eux, & qui auoit plus d'assurance à leur commander, estoit celuy qui se faisoit leur Chef, & qui dans leurs peuplades & leurs Bourgs (si toutesfois il les faut ainsi nommer) vsurpoit le tiltre de Souuerain. Depuis que luy mesme se l'estoit donné, il traitoit ses suiets avec toute sorte de tyrannie & de cruauté, iusques-là mesme, qu'il se seruoit des hommes comme d'autant d'esclaves, & abusoit indifferemment de leurs femmes & de leurs filles. Ils se faisoient la guerre les vns aux autres, avec tant d'inhumanité, qu'en quelques Provinces ils escorchoient leurs prisonniers, & faisoient vn tambour de leur peau, pour espouuenter leurs ennemis, alleguant pour raison que cette Caisse faite du cuir de leurs parens auoit vne secrette vertu de les

de les mettre en furie, si tost qu'ils l'oyoient. Ils passoient leur vie dans vn continuel exercice d'assassins, & de voleries, sans faire difficulté de mettre le feu dans les Bourgs, & d'vser d'autres telles violences, par le moyen desquelles ils vsurpoient tyranniquement l'autorité sur autrui, & viuoient en petits Rois. Et d'autant qu'il s'en trouua parmy eux qui durant leur vie traiterent bien leurs suiets, les maintindrent en bonne paix, & firent obseruer la Iustice; cela fut cause qu'apres leur mort ils s'aduiferent de les mettre au rang de leurs Dieux, & de les adorer comme tels. Car apres auoir bien consideré leur vie & leur bon gouuernement, à comparaisson des meschancetez, & de la pernicieuse conduite des Tyrans qu'ils auoient eus, ils trouuoient qu'à moins de leur deferer des honneurs diuins, ils ne s'acquittoient pas de leur deuoir enuers eux. Ceux de quelques autres Contrées, n'auoient ny Chef qui les gouuernast, ny l'esprit de se gouuerner eux-mesmes en façon de Republique; tellement que sans vser d'aucune conduite en leur vie, ils la passaient dans vne stupidité qu'on pouuoit dire innocente. Car ils viuoient pesselles comme les brebis, sans se faire ny bien ny mal; ce qui procedoit plustost d'une pure ignorance, & du peu de malice qu'ils auoient, que d'un excès de vertu.

Quant à la maniere de s'habiller, & de couvrir leur nudité, la mode en estoit si ridicule & si honteuse en la plus part de ces Prouinces, qu'il n'est pas possible de se l'imaginer sans en rire. Il y en auoit

aussi quelques-vns , qui en leur manger estoient si affreux , & si barbares , qu'il n'eust pas esté possible de les regarder , sans en auoir peur , & s'en estonner. Mais sur tout en plusieurs Contrées de grande estendue , l'vne & l'autre extrauagance se remarquoient parmy ces Indiens en leur façon de manger , & de s'habiller. Ils ne semoient presque rien , ou du moins fort peu de chose dans les pays chauds , qui estoient les plus fertiles. La raison est , pource que la terre , leur donnoit assez de quoy viure à leur mode , par l'abondance des herbes , des racines , des fruits sauuages & des legumes qu'elle leur produisoit. Car bien que cela semblast peu de chose , si ne laissoient ils pas de s'en contenter , comme gens qui s'accommodoiēt à tout , pourueu qu'ils eussent de quoy se nourrir. En plusieurs Prouinces ils estoient si affriandez à la chair humaine , que sans attendre que celuy qu'ils auoient blessé à mort eust rendu l'esprit , ils beuuoiēt le sang qui sortoit de sa playe ; & en faisoient de mesme lors qu'ils le couppoient par quartiers , le sucçant aidement , iusques à s'en lauer les mains , de peur qu'il ne s'en perdist quelque goutte. Ils auoient des boucheries publiques de chair humaine , dont ils prenoient des morceaux qu'ils hachoiēt menu ; & des boyaux ils en faisoient des saussisses & des boudins , afin qu'il n'y eust rien de perdu. Pedro de Cieça rapporte la mesme chose au vingt-sixiesme Chapitre de son Histoire , où il en parle comme sçauant pour l'auoir veu de ses propres yeux. Cette manie alla si auant , qu'ils ne pardonnoient pas mesme aux

enfans qu'ils auoient eus des Estrangeres par eux prises à la guerre. Car de leurs prisonnières ils en faisoient leurs maistresses, & nourrissoient delicatement les enfans qu'ils en auoient, iusques à ce qu'ayant atteint enuiron treize ans, ils les tuoient pour les manger, & practiquoient le semblable enuers les meres, quand elles ne pouuoient plus engendrer. Les Indiens mesmes qu'ils faisoient leurs prisonniers, n'en estoient pas quittes à meilleur marché que les Estrangers. Que s'ils leur donnoient la vie, c'estoit pour les marier à des femmes de la nation des vainqueurs, afin de manger les enfans qui prouenoient de tels mariages, apres les auoir esleuez comme les leurs en attendant qu'ils fussent grands, & alors ils leur couppoient la gorge. Par où l'on peut voir qu'ils faisoient comme vn Seminaire de ieunes garçons pour les manger à la fin, sans estre touchez ny par la proximité du sang, ny par la nourriture qu'ils en auoient faite, bien que toutesfois elle ayt assez de force pour appriuoiser ensemble les animaux les plus contraires entre-eux par vne antipatie naturelle, comme l'experience le montre. Il faut donc bien dire que ces Barbares estoient plus cruels que les bestes les moins sensibles à la pitié, puisque sans auoir esgard ny à l'vne ny à l'autre de ces considerations, ils tuoient indifferemment & les enfans qu'ils auoient engendrez, & celles qui en estoient les meres; Ce qu'ils ne faisoient que pour les manger, sans espargner non plus les peres, qu'ils mettoient à mort tout de mesme que les autres, quand ils

oyoient qu'ils ne pouuoient plus auoir d'enfans, sans respecter ny alliance ny parenté. Je diray bien d'auantage, c'est que parmy ces peuples il s'en trouuoit de si affamez de chair humaine, que de leur insatiable estomach ils en faisoient vn tombeau à leurs plus proches amis. Car si tost qu'il y en auoit quelqu'un de deffunct, tous les parens s'assembloient entre-eux, & le mangeoient bouilly ou rosty, selon qu'ils le trouuoient gras ou maigre. Apres qu'ils en auoient fait festin, ils ramassoient tous les os, & avec de grandes demonstrations de dueil ils s'en alloient les enseuelir dans les ouuertures des rochers, ou bien dans le creux des Arbres, sans faire aucunes offrandes, pource qu'ils n'auoient point de Dieux, & n'adoroient alors rien que ce fut, non plus qu'aujourd'huy. Cette rage de se repaistre de chair humaine estoit plus commune aux Indiens des pays chauds, qu'à ceux des Contrées froides. Que s'il y auoit des endroits où la terre ne portast ny herbes, ny fruits, ny racines, pour estre sterile & froide, alors la necessité les contraignoit d'y semer du Mayz, & autres Legumes; ce qu'ils faisoient indifferemment en quelque temps que se fust. Pour ce qui est de la chasse & de la pesche, ils ne s'en preualoient pas beaucoup, pour n'y auoir non plus d'adresse qu'à toute autre chose.

De leur maniere de s'habiller.

C H A P. XIII.

Bien qu'il seroit possible plus à propos de ne parler ny de la nudité de ces anciens Gentils, ny de leur maniere de s'habiller, que d'en entamer le discours, à cause qu'il semble que cela choque la bien-seance, si ne laisseray-ie pas d'en dire quelque chose, pource que l'Histoire m'y oblige, pour ne la donner imparfaite, & ne rien oster à la verité. Que s'il y a de la faute de mon costé, ie priay les honnestes gens de ne m'escouter pas, & de me punir de cette disgrace, que ie tiendray pour bien employée. Les Indiens de ce premier âge n'alloient point autrement vestus que les bestes, comme n'ayans pour tout habillement que la peau dont la nature les auoit couuerts. Plusieurs d'entre-eux n'auoient sur le corps qu'une grosse ceinture de filasse, de laquelle ils se croyoient suffisamment couuerts, soit qu'ils la portassent ou par curiosité, ou par vne maniere de galanterie; & cela suffira pour maintenant, sans qu'il me semble besoing d'en dire davantage, pour ne violer les loix de l'honnesteré. Il me souuient à ce propos que l'an 1560. comme ie reuenois d'Espagne ie rencontray dans vne ruë de Cartagene cinq Indiens tous nuds, & qui ne marchoiert pas tous ensemble, mais l'un apres l'autre comme

les grues ou les oysons, combien qu'il y eust assez long-temps que le commerce qu'ils auoient avec les Espagnols deust auoir du moins vn peu corrigé les mauuaises habitudes qu'ils auoient prises en leur pays.

Les femmes alloient aussi routes nuës comme les hommes, si ce n'est que les mariées portoient attaché à vn fil grossier en forme de ceinture vn meschant haillon de cotton fait en quarré, qui leur seruoit comme de tablier; Et dans les pays où ny elles mesmes ny les hommes ne sçauoient ce que c'estoit ny de tissure ny de filer, les vns & les autres se couuroient les parties honteuses avec les fueilles ou l'escorce de quelque Arbre. Les filles auoient de mesme vne ceinture de fil, qu'elles portoient ordinairement avec vn tablier, qui par quelque marque differente des autres monstroient qu'elles estoient à marier; Et d'autant que ie veux garder la bienseance, comme i'ay dit, & n'offenser les chastes oreilles, i'ayme mieux taire que publier ce que ie pourrois dire à ce propos. Qu'il fust donc de sçauoir que les Indiens des pays chauds, ne s'habilloient point autrement que i'ay dit, & qu'en matiere d'honnesteté, ils n'estoient non plus considerables que des bestes despourueües de raison; Tellement que par cette brutalité, & par le peu de soing qu'ils auoient de couvrir leurs corps, il est bien ayé de voir qu'en cela non plus qu'en autre chose ils ne paroissent aucunement hommes; ce qui estoit commun generalement à tous ces Gentils auant l'Empire des Yncas.

Dans les pays froids ils alloient vn peu plus honnestement couverts, sans que toutesfois ils le fissent par honnesteté, mais seulement pour s'empescher d'auoir froid. Ils s'affubloient de peaux d'animaux, & de certaines couuertures qu'ils faisoient de chanvre sauuage, & d'vne espeece de ionc assez large, souple au maniment & qui sentoit fort bon; Ils le cueilloiet à la campagne, où il y en auoit quantité, vsant de cette inuention, & d'autres semblables pour couvrir leur nudité le mieux qu'ils pouuoient. Il s'en trouuoit d'autres neantmoins, qui n'estoient pas si grossiers; & qui se couuroient de certains manteaux bizarres, l'estoffe desquels estoit filée & tissüe d'vne estrange sorte. Ils les faisoient ordinairement de laine, ou d'vn certain chanvre sauuage, qu'ils appellent *Chahuar*, les portans attachez au col, & ceints par le milieu du corps, ce qui suffisoit pour les deffendre du froid. Voila de quelle façon ils s'habilloient en ce premier âge; car quant à ce que nous auons dit qu'aux pays chauds ils alloient pour l'ordinaire tous nus, c'est vne verité dont il ne faut pas douter. Ce que les Espagnols peurent assez remarquer en plusieurs Prouinces que les Rois Yncas n'auoient point encore soubmises à leur Empire. Je diray bien dauantage, c'est qu'il y a quantité de pays que les Espagnols ont conquis, dont les habitans sont si brutaux, qu'ils ne veulent en façon quelconque oüir parler de couvrir leurs corps, non pas mesmes ceux qui conuersent familièrement avec eux, & qui les frequentent iusques dans leurs maisons. Que si quel-

64 LE COMMENTAIRE ROYAL,
quesfois il leur arriue de s'habiller , c'est plustost
pource qu'ils se lassent d'en estre importunez, que
pour aucun plaisir qu'ils y prennent, ny pour aucu-
ne consideration d'honesteté. A quoy i'adiouste
que ce ne sont pas seulement les hommes qui le re-
fusent, mais les femmes mesmes ; de sorte que pour
leur faire despit, & leur reprocher qu'elles sont aussi
deshonestes que mauuaises fileuses, les Espagnols
ont accoustumé de leur demander par rallerie ; Si
c'est pour ne vouloir estre habillées qu'elles ne fi-
lent pas, ou si elles ne s'habillent point pour s'exem-
pter de filer ?

*De la diuersité de leurs Mariages, & de leurs
langues; Ensemble de leur abominable cou-
stume d'vser de poison, & de sortilege.*

C H A P. XIV.



Es Anciens Gentils ne resmoignoient
pas d'estre plus honnestes & plus ciuils
en toute autre action, & particuliere-
ment en celle du Mariage, qu'ils l'e-
stoient en la maniere de s'habiller, & de se nourrir.
Les vns s'assembloient de diuerses Nations, & s'ac-
copploient pisse-messe comme des bestes, selon
qu'ils se rencontroient, sans auoir aucune femme
qui leur fust particuliere. Les autres, dont la bruta-
lité n'estoit pas moindre, se marioient indifferem-
ment à

ment à qui que ce fust ; comme par exemple à leurs sœurs , à leurs filles , & mesme à leurs meres , qui toutesfois estoient les seules qu'on exceptoit en certains pays. De plus, les habitans de quelques Prouinces tenoient pour chose loüable de permettre aux filles d'estre aussi débordées qu'elles voudroient , & de s'addonner à toute sorte de vilénies ; d'où il s'ensuiuoit que les plus dissoluës trouuoient à qui se marier plustost que les autres , ce qui tournoit entierement à leur gloire. Car ils faisoient vne estime particuliere de celles qui auoient esté mariées , ou qui l'estoient , les honorant du tiltre de valeureuses ; Comme au contraire ils souloient appeller lasches les plus retenuës , & leur reprocher que personne n'auoit voulu d'elles. A cette coustume estoit directement opposée celle de quelques autres Prouinces , où les meres gardoient leurs filles avec vn soing merueilleux. Que s'il se presentoit quelque bon party pour les marier , ils les produisoient alors en public , où en presence des parens qui estoient demeurez d'accord du mariage , elles les deffloroient de leurs propres mains , pour monstrier à tous qu'elles auoient esté soigneuses de les bien garder.

En d'autres Prouinces , les meilleurs amis , & les plus proches parens de celuy qui se deuoit marier luy despucelloient sa maistresse , tellement que le mariage se consommoit ainsi , & le nouveau mary la receuoit pour sa femme , comme le remarque Pedro de Cieça au vingt-quatriesme Chapitre de son liure. Il y auoit aussi des Contrées dont les habitans estoient

suiets au detestable crime de Sodomie; ce qui n'arri-
 uoit neantmoins qu'à quelques particuliers, qui s'y
 adonnoient en cachette, si bien que ce vice contre
 nature n'estoit point commun à toute la Nation. En
 quelques endroits ils faisoient seruir leurs Temples
 à cette action detestable, pource que le Diable leur
 persuadoit que leurs Dieux y prenoient vn merueil-
 leux plaisir; Ce que ce commun ennemy du genre
 humain faisoit tout exprés, pour leur oster le voile
 de la honte, qui les retenoit; & rendre cette abomi-
 nation publique & commune entre-eux. Parmy ces
 peuples encore, il se trouuoit des hommes & des
 femmes qui faisoient mestier d'empoisonner. Ils se
 seruoient diuersement du poison, soit qu'il fust
 question de faire mourir soudainement, ou d'une
 mort lente. Aux vns ils ostoient l'usage de la raison,
 & aux autres les principaux traits du visage, qu'ils
 rendoient difforme & hideux à voir, ioint qu'ils leur
 faisoient venir par tout le corps certaines pustules
 noires & blanches, & les rendoient estroppiez de
 tous leurs membres. Châque Prouince, & chaque
 Nation, voire en plusieurs endroits chaque ville
 auoit son langage particulier, qui differoit de celuy
 de ses voisins. Ainsi ceux qui entendoient la langue
 l'un de l'autre, se disoient parens & bons amis, ou
 alliez; Comme au contraire ceux qui ne s'enten-
 doient pas, à cause de la difference de leur langage,
 se tenoient pour ennemis, & se faisoient vne cruelle
 guerre, iusques à s'entremanger comme des bestes
 sauuages, & de differentes especes. Adioustons à

cecy qu'il y auoit parmy eux beaucoup de forciers, & encore plus de forcieres, qui s'addonnoient la plus-part à ce dangereux mestier, afin qu'ayant moyen de communiquer particulièrement avec le Diable, ils se peussent mettre en estime parmy les peuples par la prediſtion des choses futures, & ainſi paſſer pour de grâds Deuins. L'obmets que par vn effet d'en- uie ou de haine contre les hommes, les femmes vſoient ſouuent de ces ſortileges, qui faiſoient les meſmes operations que le poiſon. Cela ſuffira pour maintenant touchant la façon de viure des Indiens de ce premier âge. Que ſi ie n'en ay rendu le diſcours conforme à la matiere, l'imagination du Lecteur pourra ſuppleer à ce deſſaut, ſi routesſois il eſt poſſible à l'eſprit humain de ſ'imaginer combien ont eſté grandes les abominations & les vilénies de ces Gentils. Auſſi ne ſe pouuoit-il autrement, puis qu'ils n'eſtudioient qu'en l'eſchole du Diable, qui leur ſeruoit de Maistre & de guide : Par où l'on peut voir qu'il y en auoit parmy eux de toutes les ſortes; A ſçauoir les vns barbares iuſques au dernier poinct en leur adoration, en leurs Sacrifices, & en leur façon de viure; & les autres ſi niays, & ſi ſots en tout ce qu'ils faiſoient, qu'on les euſt pris pour des beſtes appriuoifées. Mais le troiſieſme genre eſtoit de ceux qui tenoient des deux extremitez, comme nous le verrons cy-apres en la ſuite de noſtre Histoire, où nous deduirons en particulier, ce que nous n'auons dit qu'en general de la brutalité des habitans de chaque Prouince.

De l'origine des Incas Roys du Peru.

C H A P. XV.

IL ne se pouuoit rien trouuer de pire que l'estat de la vie & de la mort de ces Barbares, comme nous venons de móstrer; lors qu'il plût à Dieu permettre que d'un Ciel si couuert de broüillars, il en sortit vne belle Estoille, qui les esclairant parmy de si espais ses tenebres, leur donnaist quelque recognoissance de la Loy naturelle, & du respect que les hommes se doiuent porter les vns aux autres en praticquant la ciuilité. Il plût à Dieu, dis-ie, que les descendans du premier Gouverneur qui leur fut donné allant tousiours de bien en mieux cultiuassent ces esprits brutaux, & les transformassent en hommes, en les rendant capables de raison, & de toute sorte de bonne doctrine. Ce qui estoit entierement necessaire, afin que lors qu'il sembleroit bon au vray Soleil de Iustice de faire liure sur ces Idolatres les rayons de sa diuine misericorde, ceux qu'il y enuoyeroit les trouuassent plus dociles, & moins reuesches à receuoir la doctrine de l'Eglise nostre bonne Mere. En effect, ils l'ont receüe depuis, comme nous monstrerons plus au long dans la suite de cette Histoire. Et sans mentir l'experience a fait voir bien clairement, que parmy ces peuples des Indes, qui sont en si grand nombre, il

ne s'en est point trouué de plus prompts, ny de plus enclins à receuoir l'Euangile, que ceux qui ont eu le bon-heur d'estre gouuernez & instruits par les Roys Yncas; à quoy n'ont peu paruenir les autres nations des confins de cét Empire, plusieurs desquelles sont encore aujourd'huy aussi brutales qu'auparauant, sans que les Espagnols, qui depuis 71. an se sont donnez vne entrée dans le Peru, ayant peu iamais leur apprendre la ciuilité. Mais puisque nous sommes à la porte d'un si grád labyrinthe, il sera bon que nous passions dans la cognoissance des choses qui s'y trouuoient.

Après auoir bien examiné quelles traces, & quelles routes peuuent estre les meilleures, pour entrer dans le discours de l'origine des Yncas Roys du Peru, ie n'en trouue point de plus facile que celle-cy, qui est de raconter ce que durant mon bas âge, j'ay plusieurs fois oüy dire à ma mere, à ses freres mes oncles, & à mes autres parens, touchant l'origine dont nous parlons. Car tout ce qu'on en peut conter d'ailleurs se rapporte directement à ce que ie me propose d'en dire, ioint que pour l'apprendre au vray il me semble plus à propos d'vser des mesmes termes des Yncas que de ceux des autres Autheurs estrangers, qui en parlent chacun à sa mode. Je diray donc qu'au temps que ma mere residoit à Cozco, lieu de sa naissance, ce peu de parens qui nous estoient restez des cruantez & des tyrannies d'Atauhualpa, comme nous monstrerons en sa vie, s'en venoient la visiter presque toutes les semaines. En ces visites leur plus

grand plaisir estoit à s'entretenir de l'origine de leurs Roys, de leur Maiesté, de la grandeur de leur Empire, de leurs Conquestes, de leurs beaux Faits, de leur Gouuernement en temps de paix & de guerre, & des Loix qu'ils auoient sagement establies pour le bien de leurs suiets. En vn mot il ne s'estoit rien passé de leur temps à l'aduantage de leur pays, qu'ils ne fissent tomber à propos sur le suier de leur entretien. En suite de ce discours; des grandeurs & des prosperitez passées ils venoient à l'estat des affaires presentes; parlant, les yeux tous baignez de larmes, de la mort de leurs bons Roys, de la desolation de leur pays, & de la ruine de leur Empire. Voila les discours qu'auoient ensemble en leurs communes visites les Yncas & les Pallas; qui ne les finissoient iamais que par des larmes, quand ils se remettoient en mémoire les biens qu'ils auoient perdus, & les maux qu'enduroient les suiets sous le gouuernement d'un mauuais Roy. Durant ces choses, i'allois, & venois souuent où ils estoient, & prenois plaisir à les escouter, comme si i'eusse ouï lire quelque belle fable. Cela continua vn assez long-temps, à la fin duquel enuiron la dix-septiesme de mes années, vn iour que mes parens parloient du vieux temps à leur accoustumée, & de la vie de leurs Roys; Il arriua que m'adressant au plus âgé d'entre-eux, qui entretenoit la compagnie; Ynca, mon Oncle, luy dis-je, ie voudrois bien sçauoir n'y ayant parmy vous aucun liure pour vous conseruer entiere la memoire des choses passées, comment se peut-il faire que vous ayez

connoissance de l'origine de nos Roys? Car pour les Espagnols, & les autres peuples qui sont aux confins de leur Empire, il ne faut pas s'estonner si par le moyen des liures, & de la connoissance qu'ils ont de l'Histoire diuine & humaine, ils peuvent rendre compte de l'Estat de leurs Roys, & des Princes Estrangers; comme pareillement, du temps de leur Regne, & de la reuolution des Empires; iusques-là mesme qu'ils sçauent depuis combien de mille années Dieu a créé le Ciel & la Terre. Mais quant à vous autres qui ne sçavez ce que c'est de liures, comment pouuez vous parler au vray du temps passé? Sçauriez vous bien dire qui estoit le premier de nos Yncas? comment il s'appelloit? d'où il tiroit son extraction? par quels moyens il commença de regner? avec quelles forces il conquist ce grand Empire? & quels furent les commencemens de nos plus memorables faits d'armes? Alors l'Ynca, qui pour l'extreme plaisir qu'il prenoit à discourir de semblables choses, estoit bien ayse d'oïr que ie luy faisois ces demandes, se tournant vers moy, qui l'auois autresfois assez souuent escouté, mais non pas si attentiuement que ie l'escoutois alors; Mon Nepueu, me respondit-il, ie satisferay tres-volontiers aux choses que tu desires sçauoir de moy, & seray bien ayse que tu les oyas avec atténion pour les conseruer dans ton cœur (c'est le terme dont ils vsent ordinairement pour dire *se souvenir*). Tu sçauras donc qu'antiennement en toute cette grande estenduë de pays, il n'y auoit que montaignes & precipices, couuerts de brossail-

72 LE COMMENTAIRE ROYAL,
les, & de buissons. Les hommes de ce temps-là tels
que des bestes estoient sans police & sans Religion.
Il ne se parloit parmy eux ny de maison ny de ville; Et
d'autant qu'ils n'auoient aucune sorte d'esprit, ils ne
sçauoient ny cultiuer la terre, ny filer la laine ou le
cotton, pour en faire des habillements propres à
couvrir leur nudité. Quant à leur vie, elle estoit en-
tierement sauvage, car ils la passoient ensemble deux
à deux, ou trois à trois, selon qu'ils se rencontroient,
& se retiroient en des lieux soubterrains, & dans des
Cauernes. Les herbes des champs, les racines des Ar-
bres, les fruits sauvages & mesme la chair humaine
estoient les viandes dont ils se nourrissoient comme
des bestes. Les vns se seruoient de peaux d'animaux,
& d'escorces d'Arbres, ou mesme de leurs feuilles,
à couvrir leur nudité, & les autres alloient tous nuds;
Bref ils menoient vne vie tout à fait brutale, & s'ac-
couplioient avec les premieres femmes qu'ils rencon-
troient, sans en auoir aucune en propre, ou qui leur
fust particuliere.

Voilà quel fut le commencement du discours
que l'Ynca mon Oncle se proposoit de me faire mais
auparauant qu'en dire la suite, afin que vous ne vous
ennuyez d'oïr si souuent repeter ces mots *le Soleil no-*
stre Pere, j'ay à vous aduertir que c'estoit vne façon de
parler ordinaire aux Yncas; qui en vsoient par ma-
niere de veneration & de respect, toutes les fois
qu'ils parloient du Soleil, dont ils se disoient estre
descendus; tellement qu'il n'estoit permis qu'au
seul Ynca d'auoir à la bouche ce nom venerable.

Que si

Que si quelqu'autre en vsoit, on le lapidoit incontinant en qualité de Blasphemateur. Comme donc, continua l'Ynca, le Soleil nostre Pere vit que les hommes estoient tels que ie vous ay dit cy-deuant, il en fut touché de compassion, & leur enuoya du Ciel en terre deux de ses enfans, à sçauoir vn fils & vne fille, pour les instruire en la cognoissance du Soleil nostre Pere, afin qu'ils l'adorassent à l'aduenir, & le reconnussent pour leur Dieu. Ces deux enfans diuins leur furent aussi enuoyez, pour leur imposer des Loix, & leur donner des preceptes, par le moyen desquels ils peussent viure en hommes raisonnables, apprendre la ciuilité, demeurer en des maisons, peupler les villes, labourer la terre, cultiver les plantes, faire la moisson, nourrir des troupeaux, iouïr des commoditez qui en reuiendroient, s'accommoder des fruits de la terre, & finalement viure en vrais hommes, & non pas en bestes. Avec cét ordre, qu'il pleut au Soleil nostre Pere donner à ses deux enfans, il les mit près du marefcage de Titicaca, qui est à huiët cens lieuës d'icy, & leur dit qu'ils s'en allassent où bon leur sembleroit, & que lors qu'ils voudroient manger ou dormir en quelque lieu, ils essayassent de ficher en terre vne verge d'or, ayant deux doigts de grosseur, & demie aulne de long, qu'il leur donna tout exprés, pour vn signal infailible de sa volonté; qui estoit que là où cette verge s'enfonceroit dás la terre d'un seul coup qu'ils luy doneroiët, là mesme le Soleil nostre Pere vouloit que ses deux enfans s'arrestassent, pour s'y establir,

74 LE COMMENTAIRE ROYAL,
& y tenir leur Cour. En suite de cela leur voulant
recommander ce qui estoit de leur deuoir. Mes en-
fans, leur dit-il, quand vous aurez soubmis ces peu-
ples à nostre obeyssance, vous aurez soin de les main-
tenir par les Loix de la raison, de la pieté, de la cle-
mence, & de l'equité requise; faisant pour eux tout
ce qu'un bon Pere a coustume de faire pour des en-
fans qu'il a mis au monde, & qu'il ayme tendrement:
en quoy certes vous ensuiuez mon exemple, puis-
que comme vous sçauiez, ie ne cesse de faire du bien
à tous les mortels. Car c'est moy qui les esclaire de
ma lumiere, pour leur donner moyen de voir, & de
vacquer à leurs affaires; moy qui les eschauffe quand
ils ont froid, qui rends fertiles leurs champs & leurs
pasturages, qui fay fructifier leurs arbres, qui mul-
tiplie leurs troupeaux, & qui leur enuoye la pluye
& le beau temps quand la necessité le requiert. Moy
mesme encore prends le soing de faire le tour du
monde vne fois le iour, pour voir de quelle chose la
terre peut auoir besoing, afin d'y mettre ordre, au
soulagement de ceux qui l'habitent. Et partant, ie
veux que vous fassiez à mon exemple, comme mes
enfants bien aymez, que i'enuoye au monde pour le
bien & l'instruction de ces pauvres gés qui viuent en
bestes. C'est pourquoy ie vous donne dès à present
le tiltre de Roys, & veux que vostre Empire soit
souuerain sur tous les peuples que vous instruirez
par de fortes raisons & de bonnes actions, mais sur
tout par vostre exemple & par vostre bon gouuer-
nement.

Après que le Soleil nostre Pere eut ainsi déclaré sa volonté à ses deux enfans, il les congédia; si bien qu'en mesme temps ils sortirent de Titicaca, & se mirent à marcher du costé du Septentrion, sans qu'en tous les lieux où ils s'arrestoient ils manquassent le long du chemin d'esprouver leur verge d'or selon l'ordre qu'ils en auoient; mais ils trouuoient tousiours qu'elle ne s'enfonçoit point dans la terre. Comme ils eurent bien cheminé, ils arriuerent en fin en vn petit Dortoir qui est vers le Midy, à huit lieuës & demy de cette ville, & qu'on appelle vulgairement *Pacarec Tempu*, c'est à dire *dortoir du point du iour*, Nom qui luy fut imposé par l'Ynca, pource qu'il sortit de ce Dortoir lors que le iour commençoit à poindre. Là mesme se voit auourd'huy la Ville, que ce Prince enuoya peupler depuis au grand honneur de ses habitans, qui se glorifient fort de ce nom, pource qu'il luy fut imposé par nostre Ynca, lequel au sortir de ce lieu s'en vint avec la Royne sa femme en cette vallee de Cozco, où ne se voyoient alors que precipices & que montaignes.

De la fondation de la ville Imperiale de Cozco.

C H A P. XVI.



E premier lieu où ils s'arrestèrent dans ce vallon, continua l'Ynca, fut en cet endroit que l'on appelle *Huanacauti*, qui regarde cette ville du costé du Midy. Là ils firent la mesme

76 LE COMMENTAIRE ROYAL,
espreuue qu'auparauant ils auoient faite de leur verge d'or , qui au premier coup qu'ils en donnerent contre la terre , s'y enfonça si auât que iamais plus ils ne la virét. Alors nostre bon Ynca s'adressant à celle qui estoit & sa sœur & sa femme ; C'est en ce vallon dit-il , que le Soleil nostre Pere veut que nous nous arrestions , pour nous y establir & y faire nostre demeure , puisque telle est sa volonté. Et partant , ô ma sœur & ma Royne, il faut que vous & moy attirions ces gens , & les fassions assembler , pour les instruire , & leur faire le bien que le Soleil nostre Pere entend que nous leur fassions. Cela dit , ils sortirent tous deux de Huanacauri , & s'en allerent de toutes parts , qui d'un costé , qui de l'autre , pour faire assembler les gens. Et d'autant que cét endroit-là est le premier lieu de nostre connoissance , où nous scauons qu'ils ont mis le pied , & d'où ils sont sortis , pour s'en aller faire du bien à toute la race des hommes , nous y auons basti vn Temple , afin d'y adorer nostre Pere le Soleil , pour memoire de ses faueurs , & de tant de graces qu'il a faites au monde. Le Prince s'en alla donc au Septentrion , & la Princesse au Midy. S'estants ainsi separez , comme ils passoient leur chemin , ils arrestoient tout ce qu'ils trouuoient d'hommes & de femmes dans ces solitudes , que les brossailles dont elles estoient pleines , & les pantes des Rochers rendoient effroyables. Ils leur disoient , Que le Soleil leur Pere les auoit là enuoyez du Ciel , pour estre les Maistres & les Bienfacteurs de tous les habitans de ce pays , en les tirant de leur sauage

façon de viure, pour leur apprendre à se comporter en vrayes hommes; & partant, que pour accomplir le commandement du Soleil leur Pere, qui les auoit enuoyez, ils s'en alloient les chercher de toutes parts pour les ramasser, & les tirer de ces montaignes, afin de les mettre ensemble dans des villes, & leur donner de quoy manger, non pas en bestes, mais en vrayes hommes. Ces choses & autres semblables furent dites par nos Roys aux premiers Sauvages qu'ils rencontrèrent en ces montaignes. Eux cependant ne se trouuerent iamais si estonnez qu'ils le furent alors, de voir ces deux personnes parées des ornemens que le Soleil nostre Pere leur auoit donnez, leur habillement estant fort different de celuy de ces Barbares. Ils auoient les oreilles percées comme nous qui sommes leurs descendans, faisant paroistre bien clairement & par leurs paroles & par la maiesté de leurs visages, qu'ils estoient fils du Soleil, venus exprés pour leur donner des villes, où ils peussent demeurer ensemble, & des viandes pour se nourrir. Ainsi bien estonnez d'un costé de ce qu'ils voyoient, & de l'autre touchez de leurs promesses, ils n'en mirent plus en doute l'euenement, si bien que des lors ils les adorerent comme enfans du Soleil, & leur obeirent comme à leurs Roys. Apres tout cela, ils se ramasserent de toutes parts, & se disans les vns aux autres les grandes merueilles qu'ils auoient veües & ouyes, ils s'assemblerent hommes & femmes en fort grand nombre, & s'en allerent avec nos Roys, pour les suiure en quelque part qu'ils les voulussent mener.

Cependant nos Princes voyant tant de gens apres eux , en commirent quelques-vns , pour faire les prouisions de tous ensemble , afin qu'ils eussent de- quoy manger , & qu'en ces montaignes la faim ne les contraignist de s'escarter les vns des autres. Il y en eust aussi qui eurent la commission de faire des logemens & des maisons , suiuant le modelle que l'Ynca mesme leur en donna. Voila comme quoy nostre ville Imperiale commença de se peupler : Elle fut deslors diuisée en deux parties , dont l'une fut appelée *Hanan Cozco*, c'est à dire , comme tu sçais, *Cozco la haute*, & *Hurin Cozco*, qui signifie *Cozco la basse*. Le Roy trouua bon que ceux qu'il auoit amenez avec luy peuplassent *Hanan Cozco* , qu'ils nommerent pour cet effet la haute ville , tout de mesme que ceux qui vindrēt avec la Royne se mirent à peupler *Hurin Cozco*, & l'appellerent à cause de cela *Cozco la basse*. Or ce que la ville fut diuisée de cette sorte , ne se fit pas afin qu'en matiere de preeminences & d'exemptions les vns eussent de l'aduantage par dessus les autres , mais plustost pour les rendre tous esgaux , comme de bons freres , qui n'auoient qu'un mesme Pere , & qu'une mesme Mere. Car l'Ynca , qui en fit la diuision par la difference de ces deux noms, *Hanan Cozco*, & *Hurin Cozco* , trouua bon que cela fust ainsi , afin qu'il restast à la posterité vne perpetuelle memoire de ce que luy mesme auoit ramassé vne partie des habitans , & la Royne l'autre. Que s'il y eust en cela quelque difference entre-eux , elle ne fut autre , sinon qu'il voulut que ceux de *Cozco la haute*

fussent respectez, & reconnus comme freres aînez, & ceux de la basse tenus comme leurs cadets. Bref il iugea fort à propos qu'en matiere de preeminence & de dignité ceux-là fussent le bras droit, pour auoir esté attirez par vn homme, & ceux & le gauche pour estre venus sous la conduite d'une femme. Aussi fust-ce la raison pour laquelle on diuisa de mesme depuis ce temps-là toutes les villes de nostre Empire, autant les petites que les grandes: car la diuision s'en fit tousiours par quartier, ou par lignées, vsant ordinairement de ce terme. *Hananayllu*, *Hurinayllu*, c'est à dire, la haute & la basse Lignée, & de celuy-cy *Hanan Suyu* y *Hurin*, qui signifie le haut & le bas enclos.

Tandis que nostre grand Ynca vacquoit à peupler la ville, il apprenoit diuerses choses aux Indiens, à sçauoir aux hommes comment il leur falloit fendre & cultiuer la terre, & comment semer les moissons & les legumes, dont il leur monstra les plus profitables & les meilleures à manger. Pour ce mesme effet, il leur apprit à faire les charruës, & les autres instrumens dont on a coustume de se seruir. Bref il leur enseigna quelles commoditez ils pouuoient tirer des ruisseaux, qui courent en cette vallée de Cozco, iusques à leur monstrier à faire cette maniere de chaussure dont nous vsons. La Royne cependant n'estoit pas oyssiue de son costé, & dresseoit les Indienes aux exercices propres aux femmes; comme par exemple à filer, à tistre du cotron & de la laine, & à faire des vestemens, pour s'en habiller,

80 LE COMMENTAIRE ROYAL,
comme pareillement leurs maris , & leurs enfans,
sans oublier à leur dire ponctuellemēt tout ce qu'el-
le iugeoit appartenir au seruice de leur maison , & au
bien de leur mesnage. En vn mot nos Princes n'ou-
blierent rien de tout ce qui peut appartenir à la vie
humaine, qu'ils ne le monstrassent à leurs premiers
vassaux, le Roy ayant pris la charge d'enseigner aux
hommes ce qu'ils deuoient faire, & la Royne Coya
celle d'instruire les femmes.

*Des Conquestes du premier Ynca Manco
Capac.*

C H A P. XVII.



Es mesmes Indiens que l'Ynca venoit
nouuellement de reduire se voyans tous
autres qu'ils ne souloient estre , & re-
connoissans les biens-faits qu'ils auoiet
receus, en estoient si ayse, & si contents, qu'ils s'en
alloient de toutes parts en queste dans les broussail-
les, & parmy les rochers, pour voir s'ils n'y trouue-
roient point de leurs compatriotes; Comme en effet
ils n'en auoient pas si tost rencontré, qu'avec vne ex-
treme ioye ils les entretenoient sur le suiet de ces
enfans du Soleil, qu'ils disoient estre venus en leur
pays pour le commun bien de tout le monde. Sur-
quoy ils leur racontaient les grandes obligations
qu'ils leur auoient pour les biens-faits qu'ils en
receuoient

receuoient de iour en iour; Et pour les obliger à le croire, ils leurs monstroient les nouveaux habillemens, & les nouuelles viandes dont ils vsoient; Ioint qu'ils ne viuoient plus escartez dans des solitudes, mais vnis ensemble dans des villes, & des maisons. Ces discours estonnoient d'abbord les autres Sauuages, qui toutesfois s'en resiouissoient à la fin, & accouroiét à la foule pour voir les merueilles qu'on leur racontoit, & qui se disoient par tout de nos premiers Peres, nos Roys, & nos Souuerains Seigneurs. Alors, apres que leurs propres yeux leur auoient donné de nouuelles assurances de ce qu'ils ne sçauoient que par le rapport d'autrui, ils se voüoient entierement à leur seruice, & leurs rendoient toute sorte d'obeïssance. De cette façon la parole passant des vns aux autres, ils s'assemblerent si bien, qu'en fort peu d'années il y eut vne grande affluence de gens, de sorte qu'au bout de six ou sept ans il se trouua que l'Ynca en auoit assez pour faire vn corps d'armée, & se deffendre contre tous ceux qui le voudroient attaquer, ou mesme pour attirer par la force ceux qui refuseroient de venir à luy de leur bon gré; tellement que pour cette mesme fin il leur apprit à faire des armes offensiuës, comme par exemple des arcs, des flesches, des lances, des massuës, & autres semblables dont nous vsons aujourd'huy.

Or pour abbreger les memorables faits d'armes, & les Conquestes de nostre premier Ynca, tu dois sçauoir que du costé du Leuant il soufmit à son Em-

pire, tout ce qu'il y a de pays iusques au fleuve appellé *Paucartampu*, ; Que deuers le Ponent, il conquist huit lieux de terre iusques à la grande Riviere *Apurimae*, & au Midy neuf lieux, à sçauoir iusques à *Quequisana*. En toute cette estendue nostre *Ynca* enuoya peupler plus de cent Bourgs, dont les plus grands estoient de cent maisons, & les autres moindres, seló que la situation du lieu le pouoit permettre. Voila quelle fut la fondation, & quels les commencemens de nostre ville, que tu vois peuplée comme elle est. Voila dis-ie, quelle a esté la naissance d'un si grand, si riche, & si fameux Empire, que ton Pere & ses compagnons nous ont osté; Et voila, pour le dire en vn mot, quels furent les premiers *Yncas* & les Roys qui vindrent en ces contrées au commencement du monde, desquels ont pris leur origine les autres Princes que nous auons eus; & nous mesmes sommes venus d'eux. De te dire maintenant combien il y a d'années que le Soleil nostre Pere nous a enuoyé ses premiers enfans, c'est ce qui m'est impossible, & que ie ne sçaurois specifier, pource qu'il y a vn si long-temps, que la memoire ne l'a peu retenir, bien que toutesfois nous soyons tous d'opinion qu'il y a de cela plus de quatre cens années. Le nom de nostre premier *Ynca* estoit *Manco Capac*, & celuy de nostre Royne *Coya Mama Oello Huaco*, qui estoient freres tous deux, comme ie t'ay dit, & enfans du Soleil, & de la Lune nos Peres. C'est tout ce que ie puis dire, pour respondre aux demandes que tu m'as faites, auxquelles ie croy

auoir fatisfait assez amplement. mais pour ne te faire pleurer, ie ne t'ay point raconté cette Histoire avec des larmes de sang, bien que toutesfois ie n'en repende que trop dans le profond de mon cœur, pour l'extreme douleur que i'ay de voir nos Yncas exterminer, & nostre Empire perdu.

Voila quelle fut la relation que me fit cét Ynca, frere de ma mere, touchant l'origine des Roys de ce pays. L'ayant eüe de luy i'ay rasché depuis de la traduire fidellement de ma langue maternelle, qui est la mesme de l'Ynca en langage Castillan. Que si ie ne l'ay escrite en termes maiestueux, tels que ceux de l'Ynca, lors qu'il m'en faisoit le recit, ny en paroles si propres à exprimer que sont celles des Indiens, cela n'empesche pas, ce me semble, que ie ne doie estre excusable; car ie sçay assez que cette langue étant significatiue comme elle est, ie deuois possible m'estendre beaucoup plus que ie n'ay fait. Toutesfois i'ay trouué meilleur d'en abbreger la version en certaines choses, qui la pouuoient rendre odieuse, me contentant de n'y mettre que les vrais sentimens que i'ay iugé les plus conuenables à la connoissance de cette Histoire. Cét Ynca me dit plusieurs autres choses semblables, combien que succintement, dans les conferences & les visites qui se faisoient dans la maison de ma mere. Mais ie me reserue de les rapporter en d'autres lieux, où ie citeray l'Auteur. Et certainement il me desplaist fort de ne luy auoir fait quantité d'autres demandes, sur plusieurs matieres que ie sçauois maintenant, &

*Des fables Historiques touchant l'origine des
Incas.*

CHAP. XVIII.



Yant à rapporter les plus communes opinions touchant l'origine des Roys Yncas, ie diray que la plus part de ceux du Peru, à sçauoir les Indiens, qui sont au Midy de Cozco, qu'ils appellent *Collasuyu*, & ceux du Ponent, nommez *Cuntisuyu*, en racontent vne fable bien plaisante. Pour l'autoriser par le temps, ils disent qu'elle aduint apres le deluge, duquel toutesfois ils ne sçauent point donner d'autre raison, sinon qu'il a esté veritablement. Mais ils ignorent en tout, s'il fut general comme du temps de Noé, ou mesme particulier. C'est pourquoy, ce qu'ils en comptent & de plusieurs autres choses semblables estant plustost des resueries, & des fables mal-liées que des Histoires, ie suis bien content de les passer sous silence, ou du moins de n'en alleguer qu'une partie. Ils disent donc qu'apres que les eaux du deluge se furent retirées, il arriua qu'en la Contrée de *Tiahuacanu*, qui est au Midy de Cozco, s'apparut un certain homme si puissant, qu'il diuisa le monde en

quatre parties, & les donna à quatre hommes qu'il honora du tiltre de Roys, dont le premier s'appelloit *Manco Capac*, le second *Colla*, le troisieme *Tocay*, & le quatriesme *Pinahua*. Ils adioustent à cela, qu'il donna la partie Septentrionale à *Manco Capac*, celle du Midy à *Colla*, du nom duquel cette grande Prouince a depuis esté nommée; à *Tocay* celle du Leuant, & à *Pinahua* la derniere, à sçauoir celle du Ponent. Ils assuret de plus qu'apres les auoir ainsi obligez, il enuoya chacun d'eux aux terres qui luy appartenoient, pour y conquerir & gouuerner tout ce qui s'y trouueroit de gens. Où l'on peut remarquer combien il y a d'extrauagance en leur dire, en ce qu'ils ne voyent pas que le Deluge les deuoit auoir noyez, ou qu'il falloit que les Indiens fussent ressuscitez, pour estre conquis, & receuoir l'instruction qui leur deuoit estre donnée. En suite de cela, ils nous veulent faire accroire que de ce partage du monde nasquit par apres celuy que firēt les Yncas de leur Royaume appellé *Tahuantin Suyu*; Et que *Manco Capac* s'en estant allé iusques au Nord, arriua finalement en la vallée de *Cozco*, où il fonda cette ville, subiugua les peuples voisins, & se mit à les instruire; de maniere qu'appuyez sur ces principes il s'en faut biē peu qu'ils ne disent de *Manco Capac* les mesmes choses que nous en auons dittes. Mais bien qu'ils fassent venir de luy les Roys Yncas, si est-ce qu'ils n'ont pas l'esprit de dire au vray quels ont esté les descendans des autres Roys; Et voila les belles Histoires que ces anciens Gentils nous rapportent; ou plustost voila

quelles sont les bagatelles qu'ils nous estallent. Et sans mentir il ne faut pas s'estonner si des gens qui n'ont eu aucune connoissance des bonnes lettres, pour s'en seruir à conseruer la memoire de l'antiquité, traitent si confusement de ces premiers temps, puisque les Payens du vieux monde, qui estoient si sçauans, ont bien inuenté des fables qui sont incomparablement plus ridicules que celles cy: tesmoing celle de Pirrha & de Deucalion, & ainsi des autres; que ie laisse à part, & qu'il me seroit facile d'alleguer. Neantmoins, s'il falloit faire vn parallele des vns aux autres, ie m'assure qu'il s'y trouueroit beaucoup de rapport en diuers endroits, veu mesme qu'elles ont ie ne sçay quoy de semblable à l'Histoire de Noë, comme quelques Espagnols l'ont voulu dire, ainsi que nous verrons en son lieu. Mais pour reuenir à l'origine des Yncas, ie reserue à dire en vn autre endroit ce qui m'en semble.

Les Indiens qui viuent au Leuant & au Nord de la ville de Cozco, rapportent vne autre origine des Yncas semblable à la precedente. Car ils disent qu'au commencement du monde sortirent hors des fenestres de certains Rochers, qui sont auprès de la ville, en vn lieu qu'on nomme *Paucartampu*, quatre hommes & quatre femmes, Peres & sœurs. Ces fenestres adioustent-ils estoient trois de nombre, & n'y eut que celle du milieu qui seruit à la sortie de ces gens-là. Aussi fut-elle depuis appelle *la fenestre Royale*, & pour cela mesme couuerte de toutes parts de grandes placques d'or, où il y auoit quantité de

pierrerie enchassée. Mais quant aux fenestres des deux costez, elles estoient de mesme garnies d'or, sans que toutesfois il y eust aucun enrichissement de pierres precieuses. Le premier de ces freres est par eux appellé Manco Capac, & sa femme Mama Oellio. C'est leur opinion que celuy-cy fut le fondateur de cette Ville, qui en la langue particuliere des Yncas signifie nombril; que luy-mesme subiugua ces peuples, auxquels il apprit à viure en hommes, & que de luy sont descendus tous les Yncas. Quant au second frere, ils le nomment *Ayar Cachi*, le troisieme *Ayar Vehu*, & le quatrieme *Ayar Sauca*, Où il faut remarquer que le mot *Ayar* n'a point de signification en la langue generale du Peru, bien que toutesfois il en doive auoir vne en la particuliere des Yncas. Pour le regard de la diction *Cachi*, elle signifie le mesme que sel, tel que celuy dont nous vsons ordinairement, & par le mot *Vehu* se doit entendre vne sorte d'espicerie à peu près semblable au poiure, dont ils ont accoustumé de se seruir en leurs saupicquets, comme par celuy de *Sauca* est denotée la resiouissance. Or pour reprendre toutes ces choses, & venir à ce qu'ils racontent de ces trois freres, & de leurs sœurs, ils en disent mille extrauagances; Puis comme ils voyent qu'ils ne s'en peuuent tirer, ils font des allegories sur cette fable, disant que par le Sel, qui est vn de leurs noms, ils entendent les bons enseignemens que leur Ynca leur donna touchant leur façon de viure; par le poiure, le goust qu'ils y prirent, & par le mot de resiouissance, l'extreme contente-

ment qu'ils eurent depuis. Mais outre que ces choses sont tout à fait impertinentes d'elles-mêmes, ils les rapportent avec tant de confusion, qu'on entend plustost par coniecture ce qu'ils veulent dire, que par aucun ordre qu'ils tiennent en leurs discours, dont les paroles n'ont aucune liayson. Tout ce qu'ils affirment, c'est que Manco Capac est leur premier Roy, duquel les autres sont descendus; De maniere que de tous les trois costez ils rapportent l'origine des Yncas à Manco Capac, sans faire aucune mention des trois autres freres: au contraire ils les reduisent à neant avec leurs Allegories, si bien qu'il ne leur reste plus qu'un seul Manco Capac. Comme en effet il semble que cela soit ainsi, veu que depuis luy, jamais aucun Roy ny aucun homme qui soit sorty de sa tige, ne s'est appelé de ces noms, & que pas vne Nation ne se les est attribuez. Il s'est trouué quelques Espagnols, qui plus curieux que les autres en la recherche des choses, ayant oüy faire ces comptes, ont voulu dire qu'il falloit que ces Indiens eussent oüy parler de l'Histoire de Noë, de ses trois fils, de sa femme, & de ses bruz, qui furent quatre hommes & quatre femmes que Dieu sauua du deluge vniuersel. Ce sont eux adioustent-ils, qui seruent de suiet à la fable; dont les Autheurs se sont figurez la fenestre de *Paucartampu*, à l'exemple de celle qui estoit dans l'Arche. Quant à cét homme puissant, dont il est dit dans la premiere fable, que s'estant apparu en la Contrée de Tiahuanacu, il partagea le monde à ces quatre hommes; les plus subtils veulent que ce

Que ce soit Dieu, qui commanda à Noé & à ses trois enfans de peupler la terre. I'obmets quelques autres endroits de ces fables, qu'ils s'imaginent auoir du rapport avec ceux de l'Histoire sainte, & suis bien content de les passer sous silence, pour ne m'engager dans vn labyrinthe si profond : car il me suffit de parler simplement des fables Historiques, qu'il me souuient d'auoir ouï raconter à mes parens, comme ie n'estois encore qu'en mon bas âge; laissant à la discretion de ceux qui les liront de les expliquer comme bon leur semblera, & leur donner telle Allegorie qu'ils voudront. De toutes ces fables que nous auons dittes des Roys Yncas, les autres peuples du Peru tirét suiet d'en inuentér vne infinité de semblables touchant l'origine de leurs premiers parens, afin de se rendre differens les vns des autres, comme nous verrons en la suite de cette Histoire. Et certainement il n'est point d'Indien qui se picque tant soit peu d'honneur, qui ne se dise descendu de la premiere chose qu'il se met en la fantaisie, comme par exemple d'vne fontaine, d'vne riuiera, d'vn lac, de la mer, & des animaux les plus farouches, tels que sont les Lyons, & les Tygres; ou pareillement de l'Aigle, ou de l'oyseau appellé *Cuntur*, & de leurs semblables qui ne viuent que de proye; Ou finalement des montagnes, des precipices, & des cauernes, selon que chacun se l' imagine ou plus cōuenable à sa gloire, ou plus conforme à la vanité dont il se picque. Mais c'est assez parlé de leurs fables : passons à d'autres matieres.

*Protestation de l'Authheur touchant cette
Histoire.*

C H A P. XIX.



Pres auoir posé la premiere pierre de nostre edifice, par l'Histoire fabuleuse que nous auons rapportée de l'origine des Yncas Roys du Peru, il me semble à propos de passer outre dans la conqueste & la reduction des Indiens. Ce que ie feray en estendant vn peu plus au large la sommaire Relation que me donna l'Ynca dont i'ay parlé, ensemble celle de plusieurs autres yncas & Indiens, natifs des villes que ce premier Ynca Manco Capac enuoya peupler, & qu'il assuiettit à son Empire, avec lesquels i'ay eu moyen de communiquer, pour auoir esté nourry parmy-eux iusques à l'âge de vingt-ans. Il est veritable aussi que ie n'escry rien dequoy ils ne m'ayent donné cognoissance, veu que durant mon bas âge ils m'entretenoient souuent de ces Histoires, que i'escoutois volontiers, comme les enfans ont accoustumé de prendre plaisir aux fables qu'on leur raconte. Depuis, comme ie deuins vn peu plus grand, ils me donnerent vne plus ample cognoissance de leurs Loix, & de leur police, en opposant le nouueau gouvernement des Espagnols à celuy des Yncas, & faisant vne diuision particuliere de

toutes les maluerfations, & de la rigueur des peines dont on les fouloit punir. Ils m'apprenoient les deportemens de leurs Roys en temps de paix & de guerre; de quelle maniere ils traitoient leurs fuiets, & de quelle façon ils en estoient seruis. Avec cela ils meracontoient comme à leur enfant propre toute leur Idolatrie, qui consistoit en coustumes, en ceremonies, & en Sacrifices; Comme pareillement leurs festes grandes & petites, & de quelle façon ils les fouloient celebrer. A quoy ils adioustoient vn recit de leurs abus & de leurs superstitions, ensemble la difference de leurs Deuins ou bons ou mauuais, tant de ceux qui prenoient garde à leurs Sacrifices, que de toute autre sorte de gens semblables à eux. En vn mot il n'y auoit rien de remarquable en leur Estat dont ils ne m'entretinssent alors; Si bien qu'à la fin il se trouua qu'ils m'en dirent tant de choses, qu'il n'y a point de doute que ie fairois ce volume plus gros qu'il n'est, si ie les voulois rapporter toutes. I'en puis donc parler, à mon aduis, assez veritablement, & par le rapport des Indiens, & par ce que i'en ay veu moy-mesme, pour m'estre trouué en la plus part des festes, & des superstitions dont ils entretenoient leur Idolatrie. Car il me souuient que la coustume n'en estoit point encore du tout perdue, & qu'en ce temps-là i'auois enuiron treize ans. Comme ie nasquis donc huict ans apres que les Espagnols subiuguerent mon pays, où ie fus esleué iusques à la vingtiesme de mes années, ie remarquay quantité de choses que faisoient les Indiens qui

estoyent Gentils, lesquelles ie raconteray pour les auoir veuës. De plus, outre les Relations de mes parens, touchant ce que i'ay dit cy-deuant, & ce que i'ay veu moy mesme, i'ay trouué moyen d'en auoir quantité d'autres, traitant des conquestes de ces Roys, & de leurs memorables faits d'armes. Car si tost que i'entrepris de composer cette Histoire, i'escriuis à mes compagnons d'Escole, & les priay de m'enuoyer chacun en son particulier, tout ce qu'ils pourroient auoir de memoires touchant les Conquestes que les Yncas auoient faites des Prouinces de leurs Meres. Car il est à remarquer icy que chaque Prouince a ses comptes, & ses neuds, afin de soulager la memoire, en la cognoissance des Annales, ou des Histoires de son pays, & en conseruer la tradition, Si bien que par ce moyen les habitans peuuent beaucoup mieux retenir ce qui est arriué chez eux, qu'ils ne retiennent ce qui s'est passé dans les Prouinces des autres. Voila donc que mes compagnons d'Escole croyant veritable, comme il l'estoit en effet, ce que ie leur escriuis de mon dessein, furent bien aises de m'y pouuoir assister; de maniere que chacun d'eux le communiqua particulierement à sa mere, & à ses autres parens. Ils ne sceurent pas plustost qu'un Indien natif de leur pays en vouloit escrire l'Histoire, qu'ils tirerent de leurs archiues les Relations & les memoires qu'ils en auoient, & me les enuoyerent en mesme temps. I'ay appris par ce moyen quelles ont esté les Conquestes des Yncas, dont i'ay eu la mesme cognoissance que les Histo-

riens Espagnols en ont euë; Toute la difference qu'il y a, c'est que ie m'estends beaucoup plus qu'eux, comme le Lecteur pourra remarquer par les aduis que ie luy en donne en diuers endroits de cét ouurage. Or d'autant que tous les faits de ce premier Yncasont comme les fondemens & les sources de l'Histoire que nous auons à escrire, il nous seruira grandemét de les rapporter icy, du moins les plus importants & les principaux, afin que cela ne nous oblige à les repeter à l'aduenir, quand nous parlerons en particulier des vies, & des exploits de châcun de ces Yncas leurs descendâs. Car tous generalement, tant les Roys que ceux qui ne l'ont pas esté, se sont efforcez d'imiter en tout les coustumes, les mœurs & les actions de ce premier Prince Manco Capac. Tellement qu'apres auoir parlé des choses qui les regardent, nous aurons dit ce qui touche la vie de tous les autres. En cela neantmoins nous serons soigneux de ne rapporter que les choses qui viennent le plus de l'Histoire, & en laisserons à part plusieurs autres, comme impertinentes, & trop prolixes. Que s'il y en a quelques-vnes, tant de celles que nous auons cy-deuant alleguées, que des autres qui seront deduites, qui semblent estre fabuleuses, si ne laisseray ie pas de les escrire pour tout cela. Ce que ie feray exprés pour ne destruire les fondemens sur lesquels s'appuyent les Indiens, pour demonstrier les plus grandes, & les principales merueilles qu'ils nous racontent de leur Empire. Aussi est il vray, apres auoir bien consideré le tout, que de ces fabuleux commen-

cemens ont pris naissance les grandeurs que l'Espagne possède aujourdhuy reellement. Ayant donc à declarer tout ce qui appartient à la cognoissance la plus claire que l'on puisse donner des commencemens, du milieu, & de la fin de cette grande Monarchie, ie proteste de le faire le pl^r ponctuellemēt qu'il me sera possible. En quoy certes ie ne flatteray nullement la verité, ne disant rien que ie n'aye appris dès mon enfance, & dont ie n'aye tiré les relations de mes parens. Or quelque affection que ie puisse auoir pour eux, cela n'empeschera pas que ie ne deduise veritablement chaque action, sans rien adiouster ou diminuer en matiere des choses, qui seront ou bonnes ou mauuaises. Car puis qu'on sçait bien que la vie de ces anciens Gentils a produit quantité d'actions detestables; lors que i'en rapporteray la plus part, ie ne diray rien de nouveau, declarant seulement les mesmes choses: que les Historiens Espagnols ont escrites de ces Cōtrées & de leurs Roys. Ce que ie confirmeray en alleguant leurs mesmes paroles où il en sera besoing, afin que l'on voye que ie n'inuēte point des fourbes en faueur de mes parens, & que ie ne mets rien en auant qui n'ayt esté desia dit par les Espagnols. Ainsi ie ne seruiray que de commentaire à declarer & amplifier plusieurs choses qu'ils ont obmises, & laissées imparfaites, pour n'en auoir eu la relation toute entiere; & en adiousteray quantité d'autres qui manquent à leur Histoire, bien que toutesfois elles soient veritablement aduenues. Par mesme moyen i'en retranche-

ray quelques-vnes qui sont asseurement superflües; Et c'est en cela que les mesmes Autheurs Espagnols ont failly, apres les fausses relatiós qu'ils en ont euës, pour ne s'estre aduisez d'en demáder des memoires qui fussent conformes à la distinction des temps, ou des âges, & à la diuision des Prouinces & des nations; Ou mesme il n'est pas incompatible que cela ne soit arriué par la difficulté du langage, qui les a empesché de s'entendre les vns les autres. Car quelque sçauant que se pût dire pour lors vn Espagnol en la langue Indienne, il est à croire que de dix parties il en ignoroit neuf, soit pource qu'un mesme mot signifie plusieurs choses, ou bien à cause que la prononciation en marque la difference, & luy donne diuers sens, comme nous verrons cy-apres par l'explication de quelques mots que ie seray contraint d'alleguer, pour estre de l'essence de mon suiet.

En vn mot ayant dessein de parler de ce grand Estat, qui a esté plustost destruit que connu, ie diray ponctuellement & sans fard tout ce qui concerne l'Idolatrie, les superstitions, les Coustumes, les Sacrifices, & les ceremonies de ces anciens Gentils; Ensembles leur gouuernement, leurs Loix, & leur maniere de viure en temps de paix & de guerre. Ce que ie feray, s'il plaist à Dieu, sans cõparer aucune de ces choses, & autres semblables à celles qui se trouuent dans les Histoires diuines & humaines, ny au gouuernement de nostre temps, pour ce qu'en cela toute comparaison me semble odieuse. Je laisseray pourtant à la curiosité du Lecteur d'en faire des pa-

96 'LE COMMENTAIRE ROYAL,
ralleles comme il aduifera ; Et fuis bien certain
qu'il y trouuera plusieurs euenemens qui semblent
auoir du rapport à quelques Histoires des sainctes
lettres, & aux fables prophanes de l'ancienne Gen-
tilité. Il y trouuera, dis-ie, quantité de Loix & de
Couftumes, dont les vnes reffemblent à celles de no-
stre temps, & les autres leur font du tout contraires.
Pour mon particulier apres auoir trauaillé de tout
mon possible sur cette matiere, n'ayant peu faire ce
que i'eusse bien desiré, i'auray recours à la discretion
du Lecteur, pour suppleer à mes deffauts. Par mes-
me moyen ie le priay d'auoir esgard à ma bonne
volonté, qui n'aspire qu'à le contenter, quoy que ie
ne pense pas pouuoir faire monter si haut les for-
ces d'un Indien, qui n'a iamais esté nourry parmy
les liures, mais plustost parmy les armes & les che-
uaux.

*Des Bourgs & des Villes que le premier Ynca
enuoya peupler.*

C H A P. XX.

POur reuenir à l'Ynca Manco Capac, il
faut sçauoir qu'apres auoir fondé la ville
de Cozco, qu'il diuisa en deux parties,
comme nous auons dit cy-deuant, il en
fit de mesme de plusieurs autres. Car de ce mesme
costé de la ville qui regarde le Soleil Leuant ayant
attiré

attiré quantité de gens, dans toute cette estendue de pays qui se borne de la Riviere appellée *Paucartampu*, il enuoya peupler aux deux endroits du chemin Royal d'Antisuyu treize lieux assez remarquables, que ie ne nommeray pas pour euitier la prolixité, les habitans desquels estoient presque tous de la nation qu'on appelle Poques. Au Ponent de la ville à quelques neuf ou dix lieuës à la ronde, il fit peupler de mesme trente Bourgs, qui se voyent aux deux costez du chemin dont nous venons de parler. Toutes ces peuplades se firent de trois nations différentes, appellées Masca, Chillqui, Papri. Au Nord de la ville furent encore iettez les fondemens de vingt Bourgs, dont les habitans estoient composéz de quatre Nations, qui sont Mayu, Cancu, Chinchapucuyu, Rimactampu. Ces Bourgs sont pour la plupart en la belle Vallée de Sacahuana, où Gonçal Piçarro donna bataille, & fut fait prisonnier. Le Bourg le plus esloigné de ceux-cy est à sept lieuës de Cozco, & les autres s'estendent le long du chemin Royal de Chinchafuyu, tant à main droite qu'à gauche. Vers cet endroit de la ville Imperiale qui regarde le Midy, furent peuplées trente-huict ou quarante Bourgades, dont il y en auoit dix-huict de la Nation Ayarmaca, qui estoient de part & d'autre trois lieuës à la ronde du chemin Royal de Collasuyu, à le prendre depuis le parage des Salines, qui sont à vne petite lieuë de la ville, où se donna la sanglante bataille du vieux Dom Diego d'Almagro & de Hernando Piçarro. Quant aux autres peuplades, elles estoient

98 LE COMMENTAIRE ROYAL,
de cinq ou six nations diuerſement appellées, à ſçauoir Queſpicancha, Muyna, Vrcos, Quehuar, Huaruc, Cauina. Ces dernieres auoient cette ſole creance, que leurs premiers Peres eſtoient ſortis d'un marescage où ils diſoient que les ames des morts retournoient, & qu'elles en ſortoient de-rêchef pour entrer dans le corps de ceux qui naiſſoient, & en prendre poſſeſſion. Ces Cauiniens auoient vne Idole dont la figure eſtoit effroyable, & luy faiſoient des Sacrifices du tout barbares, qui furent depuis abolis par l'Ynca Manco Capac, qui leur oſta leur Idole, & voulut qu'ils adoraffent le Soleil comme ſes autres vaffaux.

Ces Bourgs, qui eſtoient enuiron cent de nombre, furent ſi petits au commencement, que les plus grands n'auoient pas dauantage de cent maiſons, & les moindres n'en auoient que vingt cinq ou trente. Mais il arriua depuis que par des priuileges particuliers, qui leur furent octroyez par le meſme Manco Capac, comme nous dirons cy-apres, ils s'augmenterent de telle ſorte, que la plus-part furent de mille feux, & les moindres de trois à quatre cens; mais ces meſmes graces & priuileges qui leur auoient eſté faits par le premier Ynca & ſes deſcendans, furent cauſe que le grand Tyran Atauhualpa les ruina, les vns plus & les autres moins, iuſques là meſme qu'il en fit deſmollir pluſieurs à fleur de terre. Il eſt arriué depuis que le temps leur a bien fait encore changer de face. Car ny les Bourgs de ce coſté là, que l'Ynca Manco Capac enuoya peupler, ny preſque

tous les autres du Peru ne font plus en leur ancienne situation ; n'y ayant que vingt-ans, comme il sera dit en son lieu, qu'un Viceroy ayant trouué moyen d'en ioindre cinq ou six ensemble d'un costé, & sept ou huit de l'autre, tant du plus que du moins, selon qu'ils se rencontroient, en fit de grandes Bourgades ; D'où s'ensuiuirent plusieurs inconueniens, que ie passe sous silence, pource qu'ils sont odieux.

De l'instruction que l'Ynca souloit donner à ses Sujets.

CHAP. XXI.



Pres que l'Ynca Manco Capac eut ainsi peuplé les villes & les Bourgades dont il auoit ietté les fondemens, il tourna toutes ses pensées à polir, & bien instruire ses Suiets. Il leur enseigna pour cet effet ; premiere-ment à cultiuer la terre, à pouruoir aux commoditez de leur meſnage, & à faire toutes les autres choses qu'il iugea necessaires à la vie humaine ; puis il leur apprit les bonnes mœurs, & la ciuilité, leur recommandant d'estre honnestes en leur conuerſation, & de se rendre de bós offices les vns aux autres, ſans sortir iamais des bornes que la raison & la Loy naturelle leur auoient prescrites. Ce qu'il trouua moyen de leur persuader avec plus d'efficace en leur remonſtrant, que s'ils vouloient viure entre eux dans

100 LE COMMENTAIRE ROYAL,
vne mutuelle concorde, sans auoir aucune sorte d'animosité ny de passion, il falloit qu'ils s'empeschassent de faire aux autres, ce qu'ils n'eussent point voulu leur estre fait à eux mesmes, puisque les Loix estoient aussi bien establies pour eux que pour autrui. Et d'autant que leur brutalité les emportoit d'ordinaire dans vne concupiscence detestable, qui estoit le vice le plus commun entre-eux; afin d'y pouruoir, il voulut qu'à l'aduenir, ils ne violassent en façon quelconque, le respect qui se doit à l'honnesteté des femmes & des filles. Il ordonna par mesme moyen que chascun d'eux n'auroit qu'une femme, qu'il espouseroit dans sa parenté, afin qu'il n'y eust point de confusion dans les lignées, & que nul n'eust à se marier qu'au dessous de vingt ans, afin qu'ils peussent tous amasser du bien, & vacquer aux affaires de leur maison. Auec cela il fit ramasser tout ce qu'il y auoit de brebis & de moutons à la cāpagne, de la laine desquels il les habilla, s'aidant en cela de l'industrie de la Roïne Mama Oello Huaco, qui monstra aux Indiennes l'art de filer & de tistre. De plus il leur apprit luy-mesme à faire cette maniere de chausure, dont ils vsent encore aujourd'huy, & qu'ils appellent *Usuta*. Ce qu'ayant iudicieusement establi, il donna à chāque Nation, ou à chāque peuple de ceux qu'il soubmit à son pouuoir vn Curaca, qui est le mesme que le Cacique en la langue de Cuba ou de saint Dominique, c'est à dire vn Gouverneur, qui eust le soin de ceux qui luy seroient donnez en charge. Et d'autant que cette affaire luy sembla de

grande importance, il ne choisit pour la conduite d'autrui que ceux d'entre-eux qu'il iugea les plus gens de bien, & qui auoient le plus trauaillé à la reduction des Indiens par leur vigilance & leur bon exemple. En cette espece d'autorité qu'il leur donna sur les autres, ce qu'il leur recommanda le plus, fut de les instruire comme Peres, & par mesme moyen il enioignit aux Indiens de leur obeir comme bons enfans.

Il ordonna qu'on eust à mettre ensemble toute la recolte qui se feroit en châce Cômunauté, afin de partager par apres entre-eux ce dequoy ils auroient besoing, en attendant qu'on eust moyen de donner des terres à châceun en particulier. A tous ces preceptes il adiouta ceux qui concernoient le culte diuin touchant leur Idolatrie. Pour cela mesme, il leur marqua le lieu qui luy sembla le plus propre à bastir vn Temple au Soleil, où ils peussent luy faire des Sacrifices. Il voulut que le tenant pour leur Dieu, ils l'adorassent, & luy rendissent graces de tant de biens qu'il leur faisoit en les esclairant de sa lumiere. Surquoy il leur remonstroit, que c'estoit luy qui rendoit fertiles leurs champs, qui produisoit les fruiets de la terre, & qui faisoit multiplier leurs troupeaux, sans y comprendre vne infinité d'autres biens qu'ils receuoient tous les iours de luy. Il leur disoit en suite, qu'ils luy deuoient vne adoration particuliere, & à la Lune, pour leur auoir enuoyé deux de leurs Enfans, qui leur ayant fait quitter leur façon de viure brutale & sauuage, les auoient mis dans le train


de la vie humaine, & de la société civile. Avecque cela il voulut, que lors qu'il y auroit autant de femmes du sang Royal, qu'il en falloit pour le service du Soleil, ils eussent à luy bastir vne maison, où ces Dames seroient enfermées, pour luy rendre le culte qui luy appartenoit. Il leur recommanda d'observer & d'accomplir ponctuellement toutes ces choses, pour ne se monstrier ingrats des bien-faits receus, ne pouvant nier qu'ils ne fussent grands; Et leur en promit encore d'autres plus considérables, de la part du Soleil son Pere, en cas qu'ils fissent ce qu'il leur disoit; les assurant au reste que c'estoit le Soleil mesme, qui luy inspiroit ces choses pour les leur dire, & que ce grand Dieu, comme bon Pere, luy seruoit de guide, & d'adresse en toutes ses actions, & en ses paroles.

Comme les Indiens ont tousiours esté iusques à maintenant fort niais & fort credules, ils adioustèrent foy à tout ce que l'Ynca leur dit, & le creurent fils du Soleil. Ce qu'ils se persuaderent d'autant plus facilement, qu'il y en auoit desia parmy eux qui faisoient de semblables comptes de leur naissance, bien que toutes fois, ils ne la fissent pas si noble que l'Ynca, pource qu'ils se disoient estre descendus des premiers animaux qu'ils se mettoient en la fantaisie, & des choses les plus terrestres, & les plus basses. De cette façon les Indiens iugeans à peu-près de l'extraction de l'Ynca par la leur propre, & par les grands biens qu'il leur auoit faits, le tindrent assurement pour estre fils du Soleil; Tellemēt que dès ce temps-

là, ils l'adorerent comme tel & promirent d'obeir de point en point à ses commandemens ; Ce qu'ils protesterent par cét adueu general, Qu'un mortel ne pouuoit pas auoir mis en euidence les choses qu'il leur auoit tesmoignéés, & partant qu'ils le croyoient vn homme diuin, qui leur estoit venu du Ciel.

Des marques d'honneur, & autres enseignes fauorables, que l'Ynca donna à ses Sujets.

C H A P. XXII.

 Ynca Manco Capac employa plusieurs années à ce que i'ay dit cy - deuant, & à beaucoup d'autres choses semblables, qu'il fit pour le commun bien de ses sujets. A la fin comme il eust tiré de grandes preuves de fidelité, d'amour, & d'adoration ; pour les obliger dauantage à tous ces devoirs qu'ils luy rendoient, il s'aduifá de les ennoblir, en leur donnant le mesme nom qu'il auoit, & les mesmes marques d'honneur qu'il souloient porter sur la teste. Ce que toutesfois il ne voulut faire, qu'apres leur auoir persuadé qu'il estoit fils du Soleil, afin que par ce moyen ses faueurs leurs fussent en plus grande consideration. Pour mieux entendre cecy, il faut sçauoir, que l'Ynca Manco Capac ne portoit ordinairement que l'espaisseur d'un doigt de cheveux, qu'il auoit coupez par eschellons ; & que ses descendans les por-

terent depuis de mesme que luy. Il se les couppoient avec des rasoirs faits de pierres à feu, & les laissoient de la hauteur que nous auons ditte; où il est à remarquer que la necessité les contraignoit d'vser de ces rasoirs peu commodes, pour n'auoir encore l'inuention des ciseaux; tellement que chacun se peut bien imaginer, qu'ils ne se faisoient le poil qu'avecque beaucoup de peine. Surquoy ie diray qu'il me souuiendra tousiours que l'vslage des ciseaux s'estant depuis introduit dans le pays, il y eust vn Ynca qui n'en pouuant assez louer l'inuention; Sans mentir, dit-il à vn de mes compagnons d'Eschole, quand les Espagnols vos Peres n'auroient fait autre chose que nous apporter des rasoirs, des ciseaux, des peignes, & des miroirs, cela pouuoit suffire pour nous obliger à leur donner liberalement tout ce que nous auions d'or & d'argent. Ils auoient donc les cheueux coupez, cōme ie viens de dire, & les oreilles percées, principalement les femmes, qui se les accommodoient d'une estrange sorte, pour y porter des pendans. Car c'estoit leur coustume, comme nous dirons cy-apres, de s'y faire vn trou d'une grandeur incroyable à qui ne l'auroit veu; estant presque impossible, que ce peu de chair qui fait le bout de l'oreille se peust dilater de telle sorte, qu'elle fust capable de supporter vn pendant de la largeur du pied d'un bocal, qui estoit la forme ordinaire de leurs pendans d'oreille, qu'ils portoiēt attachez à des lassets longs d'un quart d'aulne, & gros d'environ la moitié d'un doigt. Et d'autant que les Indiens fouloient vser de cette

maniere

maniere de pendans , les Espagnols les nommerent pour cela *Orejones*, c'est à dire *hommes à grandes oreilles*, nom qui leur est demeuré depuis en quelques Contrées des Indes.

Les Yncas portoient aussi sur la teste en lieu de bonnet vne maniere de tresse ou de cordon nommé *Llantu*, qui estoit de plusieurs couleurs , & environ de la grosseur d'un doigt. Cette tresse leur faisoit quatre ou cinq tours de la teste , & ressembloit à vne guirlande; Et voila quelles estoient les principales enseignes ou marques d'honneur de l'Ynca Manco Capac, qui consistoient en cette maniere de tresse dont nous venons de parler, comme aussi en la façon de se couper les cheveux, & de porter les oreilles percées, sans y comprendre plusieurs autres enseignes dont nous parlerons cy-apres , qui n'appartenoient qu'à la personne du Roy.

Or le premier priuilege que l'Ynca donna à ses vassaux , fût de leur permettre à tous generalement de porter la tresse à son imitation, pourueu qu'elle fust seulement noire, & non pas de toutes couleurs, comme la sienne. Quelque temps s'estant escoulé apres qu'il leur eust fait cette grace, il leur en octroya depuis vne autre, qu'ils estimerent plus fauorable, à sçauoir de pouuoir porter les cheveux par eschelons , avec difference neantmoins, selon que les vns estoient plus suiets que les autres. En quoy certes & en toute autre chose l'Ynca proceda si iudicieusement, que pour empescher qu'il n'y eust de la confusion au partage ou en la diuision qu'il faisoit de

châque Prouince, ou de châque Nation, & par mesme moyen mettre de la distinction entre luy, & ses Sujets, il s'aduisa de la rendre remarquable par leur habillement de teste. Il ordonna pour cét effet que les vns eussent à porter vne tocque en façon de bonnet à oreilles, ouuerte iusques aux temples, ayant les cheveux des deux costez iusques aux extremitez des oreilles; & que la coiffure des autres ne leur vint qu'au milieu de l'oreille, ou mesme qu'il y en eust qui la portassent plus courte. Mais quoy qu'il en fût, il deffendit que pas vn d'eux n'eust à porter les cheveux si courts que luy; Où il faut remarquer que tous ces Indiens, principalement les Yncas, prenoient vn extreme soing d'auoir tousiours les cheveux de mesme, & de les couper quand il le falloit, afin qu'ils ne semblassent changer de mode en leur coiffure, se faisant voir d'une façon aujourd'huy, & demain de l'autre. De sorte qu'il n'y auoit pas vn d'eux qui n'eust vne curiosité particuliere de bien aiuster sa coiffure, pour la rendre differente de celle des autres, d'autant que châque Nation faisoit trophée de son habillement de teste, principalement si elle l'auoit receu de la main de l'Ynca.

*De quelques autres enseignes plus fauorables, &
du nom Ynca.*

C H A P. XXIII.



Velques années & quelques mois s'estans escoulez, il leur fit vne autre grace plus fauorable que les precedentes, qui fut de leur permettre de se percer les oreilles, à condition que le trou n'en seroit pas la moitié si grand que celuy de l'Ynca. A cette ordonnance il adiousta, qu'ils porteroient pour pendans d'oreille des choses diuerfes, selon la difference des noms & des Prouinces, à sçauoir les vns, comme ceux de la Nation Mayu & Cancu, vn morceau de bois de la grosseur du doigt, les autres, comme ceux qu'on nommoit *les Poques*, vn floccon de laine blanche, qui des deux costez de l'oreille leur deuoit sortir de la grosseur d'un poulce. Il commanda de plus que les peuples appelez Mui-na, Huaruc, Chillqui, eussent à vsfer de pendans d'oreille de ionc commun, que les Indiens nomment *Tutura*, & que la Nation Rimactampu, ensemble ceux qui en estoient voisins en portassent du bois qu'on appelle *Magney* aux Isles de Barlouento, & Chuchau en la langue generale du Peru; duquel ayant osté l'escorce, le dedans en eist fort tendre & fort maniable. Il voulut de mesme par vne grace

108 LE COMMENTAIRE ROYAL,
speciale que les trois peuples que l'on nomme Vricos, Yucay, & Tampu, qui sont au dessous de la riuere d'Yucay, eussent les oreilles plus ouuertes que toutes les autres Nations, pourueu toutesfois qu'elles le fussent la moitié moins que l'Ynca n'auoit accoustumé de les porter. Pour cela mesme il leur donna la mesure du trou, comme à tous les autres, afin qu'il ne fust pas plus grand qu'il le desiroit. Quant aux oreilleres, il trouua bon qu'elles fussent du iong Tutturá, pource qu'elles ressembloient plus à celles de l'Ynca, & il luy sembla plus à propos de les appeller *Oreilleres*, que pendans d'oreille, à cause qu'elles ne pendoient point, mais y estoient enchassées.

Quant aux differences de ces Enseignes, outre qu'elles estoient des marques pour discerner les Nations & leurs Noms, elles demonstroient encore, du moins les Indiens le tenoient ainsi, vne faueur particuliere, selon qu'elles ressembloient le plus à celles du Roy : aussi est-il vray que ce qu'il donnoit ces marques d'honneur, n'estoit point à la volée, ny pour affectionner les vns plus que les autres, mais bien par vne pure consideration de Iustice, & d'equité. Car s'il en voyoit quelques-vns qui fussent plus dociles que les autres, & plus capables de sa doctrine, ou qui eussent trauaillé particulierement à la reduction des Indiens, à ceux-là il bailloit les Enseignes les plus semblables à celles de sa personne, & les honoroit de faueurs particulieres. Or pource qu'il leur donnoit tousiours à entendre, qu'il ne faisoit tout cela que par la reuelation & l'ordre ex-

prés qu'il en auoit de son Pere le Soleil, les Indiens ne manquoient iamais d'y adiouster foy. De maniere qu'ils se rendoient tousiours souples aux commandemens de l'Ynca; & quelque traitement qu'il leur peust faire, ils le trouuoient bon, & en estoient contents. Car avec ce qu'ils croyoient, que tout cela leur estoit enioint par vne particuliere reuelation du Soleil, l'experience leur apprenoit qu'ils recueilloient de grands biens de cette obeïssance qu'ils luy rendoient.

Après que toutes ces choses se furent ainsi passées; à la fin l'Ynca se voyant sur l'âge, commanda à ses principaux Sujets de s'assembler en la ville Imperiale de Cozco; Ce qu'ils n'eurent pas plustost fait, qu'il leur declara en pleine assemblée, que l'heure s'approchoit en laquelle il s'en deuoit retourner au Ciel, pour s'y reposer avec le Soleil son Pere (paroles dont tous les autres Roys ses descendans vserent depuis en se voyant proches de leur fin) & partant qu'ayant à les quitter, il leur vouloit laisser le dernier comble de ses graces & de ses faueurs, à sçauoir le nom Royal, afin qu'eux & leurs descendans fussent à l'aduenir estimez de tout le monde. Il adiousta en suite, que pour leur monstrier qu'il les aymoit comme ses enfans, il vouloit qu'eux mesmes & leur Posterité s'appellassent tousiours Yncas, sans distinction ny difference quelconque des vns avecque les autres, comme il y en auoit eu aux graces & aux faueurs qu'il leur auoit faites par le passé; Qu'au reste il entendoit que tous generalement iouïssent à pur

110 LE COMMENTAIRE ROYAL,
& à plein del'eminente grandeur de ce nom , pour
recompense de ce qu'ils auoient esté les premiers
vassaux , qui s'estoient reduits volontairement à son
seruice. Il leur declara là dessus , qu'à cause de cela il
leur donnoit ses mesmes Enseignes ou les marques
d'honneur & de plus son nom Royal ; Ioint que les
aymant comme ses enfans , il estoit bien aise qu'ils en
eussent le tiltre ; à quoy il se portoit volontairement ,
pource qu'il se promettoit qu'eux & les leurs
seruiroient tousiours leur Roy , & ceux qui succede-
roient aux Conquestes & à la reduction des autres
Indiens , pour l'aecroissement de cét Empire ; De
toutes lesquelles choses il les prioit de se souuenir , &
de les grauer au profond de leur cœur , afin d'y res-
pondre par leurs seruices , comme bons & fidelles
Suiets. Il conclud tout cecy par vne expresse decla-
ration qu'il leur fit de ne vouloir pas que leurs fem-
mes ny leurs filles fussent appellées Pallas , comme
celles du sang Royal ; Alleguant pour raison que
n'estant pas capables de porter les armes comme les
hommes , ny de seruir à la guerre , elles ne meritoient
point par consequence d'estre honorées de ce nom
Royal.

De ces Yncas , qui furent faits par vn priuilege
special , se disent descendus ceux qui en portent en-
core auourd'huy le nom dans le Peru ; & de qui les
femmes s'appellent Pallas & Coyas , pour iouyr des
exemptions que les Espagnols leur ont données , &
aux autres Nations , tant en cecy qu'en plusieurs cho-
ses semblables. Quant aux Yncas du sang Royal , ils

sont en fort petit nombre, & la plus-part inconnus, pour estre fort paures par vn effet de la tyrannie & de la cruauté d'Atahuallpa. Car il est certain que s'il s'en eschappa quelques-vns des principaux & des plus remarquables, ils finirent depuis miserablement leur iours par d'autres calamitez qui leur suruindrent, comme il sera dit en son lieu. De toutes les marques d'honneur que l'Ynca Manco Capac souloit porter sur sa teste, il n'en reserua qu'une seule, tant pour soy, que pour les Roys ses descendans; à sçauoir vne bordure de couleur en façon de frange, qui luy couuroit le front d'une temple à l'autre. Le Prince son heritier la porta iaune, & moindre que celle du Roy son Pere, comme nous le monstrerons plus amplement cy-apres, quand nous parlerons des ceremonies qu'ils obseruoient, lors que l'ayant déclaré pour successeur legitime, ils luy prestoient le serment de fidelité. Quant aux autres Enseignes ou marques d'honneur, que les Roys Yncas portèrent depuis, nous en traiterons aussi en son lieu, & dirons comme quoy on les armoit Cheualiers.

Les Indiens estimoient fort ces Enseignes dont leur Roy les fauorisoit, comme venans de la personne Royale, tellement qu'encore qu'elles leurs fussent données selon les differences que nous auons dittes, si ne laissoient-ils pas de les accepter avec de grands aplaudissemens, pource que l'Ynca leur faisoit accroire qu'il les leur donnoit comme nous auôs dit par l'express commandement du Soleil, pour recompense du merite & des beaux-faits de châce

112 LE COMMENTAIRE ROYAL,
Nation ; à cause dequoy ils tenoient à singuliere fa-
ueur d'en estre honorez. Mais quand ils virent à quel
poinct de gloire & de dignité monta la derniere
grace qui leur fut faite , à sçauoir celle du surnom
ynca, & que non seulement eux , mais leurs descen-
dans aussi en estoient honorez ; Alors certes ils fu-
rent si fort ravis de la generosité de leur Prince , &
de sa magnificence , qu'ils ne sçauoient par quelle
demonstration tesmoigner la ioye qu'ils en auoient
en leur ame. Ce qui leur faisoit dire les vns aux au-
tres , que leur ynca n'estant pas content de les auoir
transformez en hommes , de bestes qu'ils estoient
auparauant , ny de s'estre estudié par toute sorte de
soings & de bien-faits à leur apprendre les choses
necessaires à la vie humaine , comme aussi les Loix
naturelles, pour viure moralement, & la cognoissan-
ce du Soleil leur Dieu, ce qui suffisoit pour les ren-
dre à iamais ses esclaves, il s'estoit bien voulu abbaif-
fer par vn excez de bonté extraordinaire, iusques à
les honorer de ses Enseignes Royales. Qu'au reste au
lieu de leur imposer des tributs, il leur auoit commu-
niqué la Maiesté de son nom , qui estoit si haut & si
grand , qu'ils le tenoient pour diuin , si bien que pas
vn d'eux n'osoit le proferer, qu'avec beaucoup de ve-
neration , lors qu'il falloit nommer le Roy ; & que
toutesfois pour leur donner estre & qualité, il l'auoit
maintenant rendu si commun , qu'ils en pouuoient
tous vser , estants faits fils adoptifs du fils du Soleil,
bien qu'ils tinssent à honneur d'estre ses Sujets, & ses
Vassaux ordinaires.

Des noms

Des noms & des surnoms que les Indiens donnerent à leur Roy.

CHAP. XXIV.



Pres que les Indiens eurent bien considéré les hautes faueurs, & les graces signalées que l'Ynca leur auoit faites, avec des demonsttrations d'un amour extraordinaire, ils se mirent à l'enuy sur les loüanges de leur Prince, & à le combler de benedictions infinies. Ils commencerent des-lors à chercher des tiltres & des surnoms qui fussent dignes de luy, & de la grandeur de son courage, ou qui peussent mesme signifier à la fois toutes ses actions & ses vertus heroïques. Or les principaux de ces nös, qu'ils inuenterent pour le loüer furent ces deux-cy. Le premier celuy de Capac, qui signifie Riche non pas en biens de fortune, car comme disent les Indiens ce Prince n'en eut aucuns, mais bien en thresors d'esprit, de compassion, de clemence, de courtoisie, de liberalité, de iustice, & de bonnes œuures envers les pauvres. Et d'autant qu'au dire de ses Sujets il en auoit fait en si grand nombre, & de si heroïques qu'on ne les pouuoit assez admirer, ce n'estoit pas sans raison, adioustoient ils, qu'ils l'appelloient Capac, qui signifie encore riche & puissant en armes. Le second nom fut Huaç Chacuiac, c'est à dire amateur

114 LE COMMENTAIRE ROYAL,
des pauvres, & leur bien-faicteur. Tiltre qu'ils s'adui-
serent de luy donner, afin que comme le premier si-
gnifioit les grandeurs de son courage, le second fust
vne marque des grands biens qu'il auoit faits à ses
Sujets. Ce Prince fust donc des-lors appelé Manco
Capac, ayât tousiours esté nommé auparauant Man-
co Ynca. Que si nous venons à considerer ce mot
Manco, nous ne douterons point que ce ne soit vn
nom propre: mais nous ne sçauons pas ce qu'il signi-
fie en la langue generale du Peru. A quoy i'adiou-
ste qu'en celle dont les yncas souloient vsfer en par-
ticulier, quand ils parloient les vns aux autres, qui
s'est depuis entierement abolie, il falloit necessaire-
ment que ce mesme mot eust quelque signification,
veu que les noms des Roys en auoient vne pour la
plus-part, comme nous monstrerons cy-apres; quand
nous viendrons à l'explication des autres. Quant à ce
nom ynca, il faut remarquer, qu'à le considerer en
vn Prince, c'est le mesme que Seigneur, ou Roy, ou
Empereur, & qu'en tous les autres il signifie seule-
ment Seigneur. Mais à l'expliquer proprement & en
son vray sens, il sert à denoter vn homme de sang
Royal. Car quelques grand Seigneurs que les Cura-
cas pussent-estre, si est-ce qu'ils ne les appelloient
point yncas. Que s'ils vouloient denoter vne fem-
me de sang Royal, ils l'honnoient du tiltre de
Pallas; comme pour distinguer le roy d'auec les au-
tres Incas, ils l'appelloient Capac ynca, qui signifie
absolument Seigneur, comme les Turcs ont accou-
stumé d'appeller leur Prince le grand Seigneur. De-

quoy nous rendrons raison plus amplement cy-apres, pour le contentement des curieux, en la declaration que nous ferons des noms Royaux, tant des hommes que des femmes. L'adiouste pour conclusion, que les Indiens appellerent encore leur premier Roy, & ses descendans aussi Yntip Churin; C'est à dire fils du Soleil, bien que toutesfois ce nom luy fust donné, comme ils le croyoient faussement, plustost par nature que par imposition.

Le Testament, & la mort de l'Inca Manco Capac.

CHAP. XXV.

MAnco Capac regna plusieurs ans, mais l'on ne sçait pas combien, pour le pouuoir asseurer au vray. Les vns disent qu'il tint le sceptre trente ans durant & les autres qu'il en regna plus de quarante; durant lequel temps il s'occuppa tousiours aux choses que nous auons rapportées. Se voyant proche de la mort il appella ses enfans, dont il en auoit plusieurs, tant de la Royne Mama Oello Huaco sa femme, que des Maistresses qu'il auoit entretenues, disant qu'il importoit au bien de son Estat qu'il y eust plusieurs enfans du Soleil. Il fit venir encore deuant luy les principaux de ses sujets, ausquels il se mit à faire vn long discours en forme de testament. Il recommanda sur toutes choses au Prince

116 LE COMMENTAIRE ROYAL,
son heritier, & à ses autres enfans d'aymer ses fujets,
se montrans tousiours soigneux de la conseruation
de leurs biens; & aux fujets d'estre fidelles au Roy, de
luy rendre le seruice qu'ils luy deuoient, & d'obser-
uer soigneusement les loix qu'il leur auoit laiffées,
par l'expres commandement de son Pere le Soleil.
Leur ayant parlé de cette sorte, il les renuoya: puis il
fit plus particulierement à ses enfans vne autre re-
monstrance qui fut la derniere de sa vie. Par elle il
leur recommanda en termes exprés de se souuenir
tousiours qu'ils estoient fils du Soleil, & par consé-
quent obligez de l'adorer comme leur Dieu & leur
Pere. Il leur dit de plus, qu'à son imitation ils eussent
à garder ses loix, & ses commandemens; Qu'ils fus-
sent eux-mesmes les premiers à les obseruer, pour
donner bon exemple à leurs fuiets; Qu'ils se mon-
strassent debonnaires & pitoyables à tous; Qu'ils
s'affuiertissent les Indiens par biens-faits & par
amour, & non par la force; Que ceux qu'ils gaigne-
roient par la violence, ne leur seroient iamais bons
fuiets: qu'ils les maintinssent par la iustice, sans iamais
souffrir qu'il leur fust fait aucun tort: Et pour con-
clusion qu'en toutes leurs actions ils se montrassent
vrais fils du Soleil, confirmant tousiours par les ef-
fects ce qu'ils asseuroient par les paroles; afin que
les Indiens eussent subiect de les croire, au lieu de se
mocquer d'eux, s'ils leur oyoient dire vne chose, &
leur en voyoient faire vne autre. Il leur recomman-
da sur tout d'instruire pleinement leurs enfans en
toutes les choses qu'il leur auoit dites; afin que ses

enseignemens, & ses remonstrances peussent passer à leurs descendans de race en race, & qu'ainsi ils fussent soigneux d'accomplir & d'observer exactement ce que son Pere le Soleil desiroit qu'ils fissent. Au reste il les assura, que c'estoit de luy que venoient toutes les choses qu'il leur disoit, & qu'il leur laissoit par testament, comme autant de tesmoignages de son intention, & de sa derniere volonté. Aquoy il adiousta pour conclusion, que le Soleil l'appelloit, qu'il s'en alloit reposer avec luy, qu'ils vescuissent en bonne paix, & qu'estant au Ciel il auroit tousiours soing d'eux, les assisteroit de ses faueurs, & leur seroit secourable en toutes leurs necessitez,

Voila quelles furent les remonstrances & les paroles de l'Ynca Manco Capac; qui les ayât acheuees, acheua de viure aussi, & laissa pour heritier le Prince Sinchi Roca son fils aîné, qu'il auoit eu de Coya Mama Oello Huaco sa femme & sa sœur. Outre ce Prince ils laisserent encore d'autres fils, & d'autres filles, qui furent mariez ensemble, pour nes'allier que de ceux de leur sang, qu'ils disoient fabuleusement estre de la race du Soleil; à cause dequoy ils tindrent tousiours depuis en grande veneration ceux qui se pouuoient vanter d'en estre descendus, sans meslange d'autre sang que de celuy-cy, qu'ils croyoient estre diuin: comme au contraire ils appelloient humaine toute autre race, & celle là mesme des plus grands Seigneurs leurs vassaux, par eux nommez *Curacas*.

L'Ynca Sinchi Roca espousa sa sœur aînée, qui s'appelloit Mama Oello, ou Mama Cora, selon quelques

vns ; Ce qu'il s'aduifa de faire à l'imitation de son Pere , ou si vous voulez , du Soleil & de la Lune ses ayeulx ; pource qu'en effet ces Gentils croyoient que la Lune fust femme & sœur du Soleil. Or ce qu'ils firent ce mariage, fut pour conseruer leur sang en sa pureté, comme aussi pour faire que le Royaume appartint legitimement de par le Pere & la Mere au fils qui en prouiendroit ; Et pareillement pour plusieurs raisons , que nous deduirons plus amplement , cy apres. Ce fut encore pour cela qu'ils marierent de mesme les autres freres, tant les bastards que les legitimes , à sçauoir pour conseruer & augmenter la succession des Yncas. Or ce qu'ils mesloient ainsi les freres avec les sœurs , estoit pour obeir à l'express commandement que l'Ynca Manco Capac leur en auoit fait de la part du Soleil , leurs fils ne pouuant se marier autrement , pour conseruer leur sang pur & entier, ny l'Ynca heritier du Royaume espouser d'autre personne que sa sœur ; Comme en effet ils l'observerent tousiours depuis , ainsi que nous monstrerons par la suite de cette Histoire.

La mort de l'Ynca Manco Capac fût extrêmement sensible à ses Suiets, qui en porterent le deuil plusieurs mois durant ; en firent les funerailles, & en embaumerent le corps , pour l'auoir tousiours avec eux, & ne le perdre iamais de veüe. Aussi l'adorerent ils comme Dieu fils du Soleil , & luy firent quantité de Sacrifices de moutons, d'aigaux, de brebis, de lapins domestiques, d'oyseaux , de moissons & de legumes ; le reconnoissant pour souuerain Seigneur

de tout ce qu'il leur auoit laissé. Que si des choses que j'ay veuës & remarquées, touchant le naturel, & la façon de viure de ces peuples, plusieurs coniectures s'en ensuiuent; celle que ie puis tirer à peu près de l'origine de ce Prince Manco Ynca, que ses Sujets appellerent Manco Capac pour ses qualitez eminentes, est à mon aduis, Qu'il falloit que cét homme là fust quelque Indien de bon esprit, & non moins recommandable pour le conseil que pour la prudence; Qu'ainsi sçachant merueilleusement bien iuger de la stupidité de ces peuples, & du grand besoing qu'ils auoient d'apprendre à bien viure, afin de se faire estimer d'eux, il s'aduisa subtilement de feindre que luy & sa femme estoient enfans du Soleil, & que leur Pere les auoit enuoyez du Ciel par deuers eux pour les instruire, & leur faire du bien. Au reste il est vray-semblable que pour les mieux fortifier en cette creance, il se presenta en l'equipage que nous auons dit cy-deuant, se faisant particulièrement remarquer par ses oreilles, qu'il auoit si grandes, comme c'est la coustume des Yncas de se les faire croistre par artifice, qu'il ne seroit pas possible de le croire à qui ne l'auroit veu comme moy en la personne de ses descendans, tant la largeur en est ample & prodigieuse. Et d'autant que par les biens & les honneurs que ce nouueau Roy fit à ses Vassaux, il leur confirma la fable de sa Genealogie, les Indiens creurent assëurement, qu'il estoit fils du Soleil, venu du Ciel pour les assister. Sur cette créace ils l'adorerent pour tel, à l'imitation des anciens Gen-

120 LE COMMENTAIRE ROYAL ,
tels, qui plus raisonnables qu'eux, en faisoient de
mesme à ceux qui les obligeoient par de semblables
biens-faits, où il est à remarquer que la chose du
monde à quoy ces gens-là s'arrestent le plus, c'est à
considerer si les actions de leurs Maistres respon-
dent aux enseignemens qu'ils leur donnent. Que
s'ils trouuent qu'il y ait de la conformité en leur vie
& en leur doctrine, ils se laissent incontinent persua-
der par leur exemple, sans qu'il soit besoing d'au-
tre argumēt pour les ranger à ce qu'on desire d'eux;
Ce que j'ay bien voulu dire, pour monstrier que ny
les Yncas du sang Royal, ny ceux du pays ne tirent
point d'ailleurs l'origine de leurs Roys, que de ce
que nous en auons veu dans leurs fables Histori-
ques, qui se rapportent les vnes aux autres, & qui
toutes d'un commun accord font Manco Capac leur
premier Ynca.

*Des Noms appellez Royaux, & de leur signi-
fication.*

C H A P. XXVI.

IL ne sera pas hors de propos que nous
rapportions icy succintement la significa-
tion des noms Royaux appellatifs, tant
des hommes que des femmes, & que
nous monstriers par mesme moyen, à qui & com-
ment ils se donnoient, & mesme comme quoy l'on
en souloit

en fouloit vſer; Par où nous verrons combien grande a eſté la curioſité que les Yncas ont eüe de ſ'impoſer des noms & des ſurnoms; ce qui me ſemble vne choſe aſſez remarquable. Pour commécer donc par le nom Ynca, il faut ſçauoir qu'en la perſonne Royale il ſignifie Empereur ou Roy, & qu'en ceux de ſa race, c'eſt le meſme que qui diroit *homme de ſang Royal*. Car ce nom leur appartenoit à tous moyen-
nant la difference que ie viens de dire, & ne ſe don-
noit toutesfois qu'aux deſcendans de la ligne maſ-
culine. Ils appelloient leurs Roys Capac ynca, c'eſt
à dire ſeul Roy, ſeul Empereur, ou ſeul Seigneur,
pour ce que *Capa* ſignifie, ſeul. Or ils ne le donnoient
à pas vn de la race, ny à pas vn Prince heritier, qui
n'eût premierement ſuccédé à la Couronne. Car
n'y ayant qu'un ſeul Roy, ils ne pouuoient donner ſon
nom qu'à luy ſeulement, pource qu'autrement ils
euſſent fait pluſieurs Roys. Ils l'appelloient encore
Huacchacuyac, c'eſt à dire Amateur & bien-faicteur
des pauvres, qui eſtoit vn ſurnom qu'ils n'attribuoient
qu'à leurs Roys, à cauſe du ſoing particulier qu'ils
fouloient tous auoir, depuis le premier iuſques au
dernier, de faire du bien à leurs ſuiets. Quant au ſur-
nom *Capac*, duquel ie penſe auoir dit cy-deuant qu'il
ſignifie Riche en generoſité, ou bien ſplendide &
Royal, ils ne le donnoient non plus qu'au Roy ſeule-
ment, pour ce qu'il eſtoit leur principal Bien-fai-
cteur. Ils l'appelloient de plus *Yntip Churin*, c'eſt à
dire fils du Soleil, tiltre dont ils honoroient tous les
hommes du ſang Royal, qu'ils diſoient fabuleuſe-

122 LE COMMENTAIRE ROYAL,
ment estre descendus du Soleil, & ne l'attribuoiet iamais aux femmes. Dauantage les fils du Roy & tous ses Parens descendus en ligne masculine estoient par eux nommez, *Auqui*, comme qui diroit Infants, ainsi qu'on appelle les Puisnais du Roy d'Espagne. Ils re-tenoient ce nom iusques à ce qu'ils se mariassent, & alors on les honnoroit de celuy d'Ynca. Voila quels estoient les noms & les surnoms qu'ils donnoient à leur Roy & à ceux du sang Royal, sans y comprendre les autres que nous verrons cy-apres, qui de noms propres deuenoient appellatifs en leurs descendants.

Que s'il est question maintenant de passer aux noms des femmes du sang Royal, il faut sçauoir que la Royne, femme legitime du Roy estoit par eux appellée *Coya*, c'est à dire Royne ou Imperatrice. Ils luy donnoient encore le nom de *Mamanchic*, c'est à dire nostre mere, pource qu'à l'imitation de son mary, elle faisoit l'office de Mere enuers tous ses parens & ses Suiets. Ils nommoient *Coya* ses filles par vne maniere de participation du costé de la Mere, ce nom ne leur estant pas naturel, pour ce qu'il n'appartenoit seulement qu'à la Royne: Ils appelloient *Pallas*, c'est à dire femmes du sang royal les Maistresses du Roy qui estoient leurs parentes, & toutes les autres femmes du sang royal: car pour le regard des Estrangeres, & de celles qui n'estoient point de son sang, ils les appelloient *Mamacuna* qui est le mesme que *Matrone*, ou qui à le prendre plus au large denote vne femme qui est obligée de faire office de Mere. Ils

nommoient *Nusta* ou femme de sang royal les Infantes filles du Roy, & toutes les autres filles de la mesme race. C'estoit neantmoins avec cette difference, qu'ils appelloient simplement *Nusta* celles qui estoient legitiment d'extraction Royale, au lieu qu'aux Bastards ils donnoient le nom de la Prouince où leur mere auoit pris naissance, comme qui diroit *Colla Nusta*, *Huanca Nusta*, *Quitu Nusta*, & ainsi des autres Prouinces. Où il faut remarquer que ce nom de *Nusta* leur demeueroit iusques à ce qu'elles fussent mariées, car alors elles prenoient celui de *Palla*.

Voila quels estoient les noms & les surnoms des personnes descenduës du sang royal en ligne masculine; A faute dequoy combien que la mere fust parente du Roy, pource qu'il aduenoit plusieurs fois que les Roys marioient aux plus grands Seigneurs du pays des Bastardes qui se trouuoient leurs parentes; En tel cas ny les fils ny les filles qui naissoient de tels mariages, ne prenoient point les noms du sang royal, mais bien celui de leur Pere ou de leur Mere, c'est à dire qu'ils ne s'appelloient ny Yncas ny Pallas. Toute la raison qu'on peut alleguer de cela, est que les Yncas ne faisoient aucune estime de l'extraction du costé de la femme, pour n'auillir & n'abbaisser la grandeur du sang royal. Car c'estoit leur creance que les descendans en ligne masculine perdoient beaucoup de leur lustre & de leur naissance royale, s'il y auoit vn meslange de sang estrange, ou qui ne fust pas de la mesme lignée, & qu'à plus forte

124 LE COMMENTAIRE ROYAL,
raison la ligne des femmes y gaignoit encore moins.
Que si maintenant nous rapportons ces noms les
vns aux autres, nous trouuerons que celuy de *Coya*,
qui veut dire Royne, a de la correspondance avec le
nom *Capa Ynca* qui signifie seul Seigneur; Que celuy
de *Mamanchic*, c'est à dire nostre Mere; est confor-
me au nom *Huacchacuyac*, qui signifie Amateur, ou
Bien-faiteur des pauures; Que le nom de Nusta ou
d'Infante a du rapport avec *Auqui*, & que Palla, ou
femme de sang Royal est presque le mesme que le
nom Ynca. Voila quels estoient les noms qu'on
appelloit Royaux, qui me furent donnez à moy-
mesme, & dont i'eu souuent appeller les Yncas &
les Pallas, parmy lesquels i'estois ordinairement en
mon enfance. Or quelques grands Seigneurs que
fussent les Curacas, si est-ce que ny eux, ny leurs fem-
mes, ny leurs enfans ne pouuoient prendre ces
noms, pource qu'ils n'apparteoient qu'à ceux qui
estoient directement descendus du sang royal en
ligne masculine. A quoy ne sert de rien d'opposer
l'opinion de Dom Alonso de Erzilla & Cuniga, le-
quel en l'explication des mots Indiens qu'il a faite
en vers, parlant du nom Palla dit, qu'il signifie vne
Dame qui a quantité de richesses & de Vassaux.
Car il est à remarquer qu'au temps que ce Cauallier
arriua en ces Contrées, les noms d'Ynca & de Palla
estoient imposez desia fort improprement à plu-
sieurs personnes, ce que ie ne dis pas, à mon aduis,
sans quelque raison, pource qu'il n'est point de peu-
ple, si grossier, & si barbare soit-il, qui ne se picque

des noms Illustres, & des tiltres heroïques; d'où il arriue qu'en vn pays où personne ne l'empesche, les plus ambitieux d'honneur vsurpent les meilleurs noms, & se les attribuent iniustement, comme il est arriué à plusieurs dans le lieu de ma naissance.

Fin du premier Livre.



LE
COMMENTAIRE
ROYAL
DES YNCAS.

LIVRE II.

Où il est monstré quelle a esté leur Idolatrie; Qu'ils ont figuré le vray Dieu, & creu l'immortalité de l'Ame, ensemble la Resurrection vniuerselle. Avec vn recit particulier de leurs Sacrifices, & de leurs Ceremonies; De la coutume qu'ils auoient d'enrouler leurs Sujets par Decuries, pour le bien de leur Estar; De l'office des Decurions, ou des Dizeniens; De la vie & des conquestes, tant de Sinchi Roca leur second Roy, que de celles de Lloque Yupanqui son successeur, & des Sciences dont les Yncas eurent cognoissance.

Idolatrie du second âge, & son origine.

CHAPITRE I.



Idolatrie qui fut en regne parmy ces peuples au temps que nous appellons le second âge; prit son origine de l'Ynca Manco Capac premier fondateur de la Monarchie des Yncas.

Rois du Peru, qui regnerent à la verité plus de quatre cens ans, mais non pas à mon aduis iusques à six cens années ou enuiron, comme le P. Blas Valera l'a rapporté. Nous auons dit au precedent liure quel homme ce fut que Manco Capac, d'où il vint, quels fondemens il ietta de son Empire, la reduction qu'il fit des Indiens ses premiers Vassaux, les enseignemens qu'il leur donna, comment il leur apprit à cultiuer la terre, à bastir des maisons, à viure dans vn mesme enclos, & à faire toutes les autres choses qu'il iugea necessaires pour l'entretienement de la vie humaine. En suite de cela, nous auons monstré comment la Royne Mama Oello Huaco apprit aux Indiennes à filer, à tistre, à esleuer leurs enfans, à seruir leurs maris avec amour, & à prédre le soinde toutes les autres choses qu'une hōeste femme doit faire dans sa maison. Apres tout cecy il a esté dit que l'un & l'autre leur enseignerent la Loy naturelle, qu'ils leurs dōnerent des instructiōs pour bien viure moralemēt au commun proffit de tous, afin de ne se faire aucun tort les vns aux autres, ny en leurs biens, ny en leur honneur; & que par mesme moyen ils leurs apprirent l'Idolatrie, leur commandant d'adorer pour principal Dieu le Soleil, qu'ils leur persuaderent estre tel à cause de sa lumiere, & de sa beauté merueilleuse. Pour leur mieux faire accroire cela, l'Ynca leur disoit que *Pachacamac*, c'est à dire. celui qui soutient le monde, n'auoit donné à ce bel Astre tant de grands aduantages par dessus toutes les estoilles du Ciel, destinées pour le seruir, que pour leur appren-

dre à l'adorer & le tenir pour leur Dieu. Pour cette
 mesme fin il leur representoit les grâds biens dôt le
 Soleil les cōbloit tous les iours, & la faueur particu-
 re qu'il leur auoit faite n'aguere de leur enuoyer ses
 enfans, afin que les tirant de leur brutale façon de
 viure, ils les fissent vrayz hommes, comme ils l'auoiēt
 veu par espreuue, & comme ils le verroient avecque
 le temps. D'un autre costé pour mieux desabuser
 leurs esprits, & les retirer de la pluralité de leurs
 Dieux, ils leurs remonstroient, Qu'en vain ils met-
 toient leur esperance en des choses si viles, pour en
 auoir du secours à leur besoing; & qu'il s'en falloit
 beaucoup que de ces vilains animaux qu'ils ado-
 roient, ils en receussent le bien que le Soleil leur
 Pere leur faisoit de iour en iour; Qu'à bien confide-
 rer les herbes, les plantes, les arbres, & les autres
 choses qu'ils recognoissoient pour des Diuinitez, ils
 trouueroient qu'elles n'estoient que de simples crea-
 tures de ce grand Astre, qui leur donnoit l'estre pour
 le seruice des hommes, & pour la nourriture des
 bestes; Qu'il y auoit bien de la difference de la lu-
 miere, & de la beauté de cēt Astre à l'horrible defor-
 mité d'un Crapault, d'un Lezard, d'un Serpent,
 & des autres reptiles qu'ils tenoient pour Dieux;
 Et partant qu'ils les deuoient plustost chasser de
 deuant eux que les adorer, puis que la Nature les
 auoit produits pour les auoir en horreur, non pas
 pour les estimer, & en faire estat. Par ces rai-
 sons & autres semblables l'Ynca Manco Capac trou-
 ua moyen de persuader à ses premiers Sujets d'a-
 dorer

dorer le Soleil, & le recognoistre pour Dieu.

Eux cependant conuaincus par ce raisonnement, mais encore plus par les grands biens qu'ils auoient receus; & desabusez par leurs propres yeux, se resolurent en fin de n'adorer que le Soleil, sans luy donner pour Compagnon ny Pere ny frere. Par mesme moyen ils tindrent leurs Roys pour estre naiz de cét Astre, & creurent absolument que cét homme & cette femme qui auoient fait tant de choses pour eux, estoient ses enfans qu'ils auoient enuoyez du Ciel. Tellement que sur cette croyance ils luy rendirent des honneurs Diuins, & en firent de mesme depuis à tous leurs descendans, qu'ils adorerent avec plus de veneration interieure & exterieure, que les anciens Gentils Grecs & Romains n'en eurent iamais pour leurs plus grands Dieux, tels qu'estoient Iupiter, Mars & ainsi des autres. Je dy donc qu'ils les adorent aujourd'huy comme l'on faisoit alors, iusques là mesme que châque fois qu'ils veulent nommer quelqu'un de leurs Roys Yncas, ils s'y preparent auparauant par des grandes marques d'adoration. Que si quelqu'un leur demande pourquoy ils le font, puis qu'ils sçauent bien que leurs Yncas ont esté des hommes comme eux, & non pas des Dieux; ils respondent à cela, qu'ils se tiennent desia pour desabusez de leur Idolatrie, & qu'ils les adorent pour le grand nombre de biens-faits qu'ils en ont receus; Qu'au reste ils se font comportez enuers leurs Suiets en vrays Yncas fils du Soleil, & que si maintenant on leur peut monstrier des hommes qui

130 LE COMMENTAIRE ROYAL,
leur ressembtent, ils les adoreront comme eux.

Ce fut icy la principale Idolatrie que les Yncas enseignerent à leurs Suiets. Or bien qu'ils eussent accoustumé d'vser de plusieurs Sacrifices, que nous rapporterons cy-apres, & de beaucoup de superstitions, comme d'adiouster foy aux songes, de s'amuser aux Deuins, & de s'arrester à telles autres sortiles, sans y comprendre quantité de choses qu'ils deffendoient; Si est-ce qu'ils ne receuoient point d'autre Dieu que le Soleil, qu'ils adoroient pour ses excellentes qualitez, & pour les grands biens qu'il faisoit au monde. En quoy toutesfois, ils se monstroient plus aduisez & plus Politiques que n'auoient fait leurs predecesseurs du premier âge. Tellement que par succession de temps, ils luy bastirent des Temples qu'ils ornerent de richesses incroyables; ce qu'ils ne firent pas à la Lune. Car bien qu'ils la tinssent pour la sœur & la femme du Soleil, & mesme pour la mere des Yncas, si est-ce qu'il ne se trouue point qu'ils l'ayent iamais adorée comme Deesse, ny fait des Sacrifices sur ses Autels, ny dressé des Temples à sa gloire; Ce qui n'empeschoit pas qu'ils ne l'eussent en grâde veneratió, iusques à l'appeller la Mere vniuerselle de toutes choses, sans que neantmoins ils allassent plus auant dans leur Idolatrie. Ils appelloient le Tonnerre, l'Esclair, & la Foudre, *les executeurs de la Iustice du Soleil*, comme nous verrons cy-apres, lors que nous parlerons de l'apartement qu'ils leur bastirent en la maison du Soleil, qui estoit dans Cezco. Mais il ne s'ensuit pas de là

qu'ils les ayent iamais tenus pour Dieux, comme vn Historien Espagnol nous l'a voulu faire croire; au contraire, s'il aduenoit qu'un logis ou vn autre lieu fust frappé d'un esclat de foudre, ils l'auoient en si grande abomination, qu'ils en muroient aussi tost la porte avec de la pierre & de la bouë, afin qu'il n'y entraist iamais personne. Que si la foudre estoit tombée à la campagne, ils en remarquoient l'endroit avecque des bornes, qu'ils y mettoient, afin qu'aucun n'y mist le pied. Bref ils appell'oient tels lieux infortunez, malencontreux, & maudits, disant que le Soleil leur auoit enuoyé cette malediction par le moyen de la foudre, qui estoit comme son valet, & le Ministre de sa iustice. Je puis confirmer cette verité par ce que i'en ay veu moy-mesme en la ville de Cozco, & dire qu'au temps qu'elle fut partagée entre ceux qui la conquirent, vn des apartemens de la maison Royale de L'Ynca Huaynacapac, qui escheut pour sa part & portion à Anthonio Altamirano, se trouua muré comme nous venons de dire. Car la foudre y estant auparauant tombée, les Indiens ne manquerent pas d'en condamner les portes à force de pierres & de bouë, prenant cet euenement pour vn si mauuais Augure qu'ils dirent tout haut, qu'asseurement leur Roy perdroit vne partie de son Empire, ou qu'il luy arriueroit quelque autre disgrâce semblable, puis que le Soleil son Pere auoit marqué ce lieu pour infortuné. Depuis, estât aduenu que les Espagnols le rebastirent; trois ans apres la foudre tomba derechef au mesme logis, & le brussa tout

entier. Ce qui donna suiet aux Indiens de dire entre les autres contes qu'ils faisoient; Que puis que ce lieu là estoit maudit du Soleil, les Espagnols ne le deuoient point rebastir, mais plustost le laisser inhabité comme il estoit, sans en faire estat. Par où l'on peut voir le peu d'apparence qu'il y a de croire ce qu'en dit l'Historien Espagnol, dont nous auons parlé cy-deuant; Car il est euident que si les Indiens eussent pris ces lieux pour estre Sacrez, ils y eussent basti leurs plus beaux Temples, alleguant pour raison que la Foudre, l'Esclair, & le Tonnerre, qui estoient leurs Dieux, vouloient sans doute demeurer en ces endroits là, puis qu'ils les marquoient eux-mesmes, & les consacroient. Ils les appellent tous trois ensemble *Yllapa*, qui est le mesme nom qu'ils ont donné aux armes à feu, à cause de leurs effets conformes à ceux de ces Meteores. Quant aux autres noms qu'ils attribuënt au Tonnerre & au Soleil en quelques Contrées, ils sont tous nouueaux, & composez par les Espagnols, qui en matiere de ces mots, ny des autres qui leur ressemblent, n'ont iamais eu de relation asseurée pour fonder leur dire, pource qu'il ne se trouue point qu'il y ayt eu de tels noms en la langue generale des Indiens du Peru; Ioint qu'en leur nouuelle composition, qui n'est pas des meilleures, ils ne signifient rien pour tout de ce qu'ils voudroient qu'ils signifiasent.

Les Yncas ont figuré le vray Dieu.

CHAP. II.

LEs Indiens n'ont pas seulement adoré le Soleil comme vn Dieu visible, auquel ils ont offert des Sacrifices, & celebré de grandes festes à sa gloire, ainsi qu'il sera dit en vn autre endroit; mais de plus les Roys Yncas, & leurs *Amantas*, qui estoient les Philosophes du pays, esclairez de la lumiere naturelle, ont figuré le vray Dieu nostre Souuerain Seigneur, qui a créé le Ciel & la Terre, comme nous verrons cy-aprés par les arguments & les mots sententieux que quelques-uns d'entre-eux ont laissez de la Maiesté diuine, qu'ils ont appelée *Pachacamac*; où il nous faut remarquer que c'est vn nom composé de *Pacha* par où est denoté le monde & de *Camac*, qui est vn participe du temps present du verbe *Camar*, qui signifie animer, lequel tire son Ethymologie du nom *Cama*, qui est le mesme que l'ame. De sorte qu'à ioindre le tout ensemble, par le mot de *Pachacamac* est demonstré *Celuy qui est l'ame de l'vniuers*, & en toute son entiere signification qui luy est la plus propre, c'est le mesme que si l'on disoit celuy qui est à l'Vniuers ce que l'ame est au corps, ce qu'a voulu donner à entendre Pedro de Cieça au 72. Chap. de son liure; où voulant expliquer ce mot; *Le nom de ce Demon*, dit-il, *signifie*

Celuy qui a fait le monde, pource que Cama est le mesme que Facteur, & Pacha est pris pour l'Vniuers. Mais il m'excusera s'il, luy plaist, si ie dis qu'il a failly, & qu'estant Espagnol il ne pouuoit pas sçauoir la langue aussi bien que moy, qui suis Ynca & Indien. Ce mot leur estoit en si grande veneration qu'ils n'osoient le proferer. Que s'il falloit qu'ils le fissent necessairement, c'estoit avec de merueilleuses demonstrations de respect & de reuerence. Car alors ils resserroient les espauls, ils baissoient la teste & tout le corps; ils haussioient les yeux vers le Ciel, puis tout à coup ils les penchoient en bas; ils portoient sur l'espaule droite les mains ouuertes, & donnoient des baisers à l'air. Toutes lesquelles choses parmy les Yncas & leurs Vassaux estoient des marques d'une souueraine adoration, & d'une reuerence extraordinaire, avec lesquelles ils nommoient Pachacamac, adoroient le Soleil, & reueroient le Roy. En cecy neantmoins ils procedoient par degrez, ou plus ou moins, selon la qualité des personnes. Car ils vsoient d'une partie de ces ceremonies enuers ceux du sang Royal, & en faisoient de beaucoup moindres aux autres Seigneurs, tels qu'estoient les Caciques. Il se remarquoit par les effets, qu'en leur ame ils auoient en plus grande veneration Pachacamac que non pas le Soleil; Ce qui paroissoit assez, en ce qu'ils n'osoient proferer son nom, au lieu qu'ils nommoient le Soleil à tout moment. Que si quelqu'un leur demandoit, qui estoit Pachacamac, ils respondoient que luy seul donnoit la vie à l'Vniuers, & le faisoit sub-

sister ; Qu'ils ne le cognoissoient point neantmoins, pour ne l'auoir iamais veu ; à cause dequoy ils ne luy barissoient point de Temples , & ne luy offroient aucuns Sacrifices , mais ils l'adoroient en leur cœur, c'est à dire mentalement, & le tenoient pour le Dieu inconnu. Augustin de Carate, Liure second, Chapitre cinquiesme, escriuant ce que le R. P. F. Vincent de Valuerde dit au Roy Atahualpa , à sçauoir que nostre Seigneur Iesus-Christ auoit créé le monde, rapporte que l'Ynca luy respondit ; *Qu'il ne sçauoit rien de cela, & ne croyoit pas qu'aucun peust creer quelque chose, si ce n'estoit le Soleil, qu'il tenoit pour Dieu, & la Terre pour Mere avecque leurs Guaccas ; Qu'au reste Pachacamac auoit tiré ce grand monde du neant, &c.* Par où l'on peut voir clairement que les Indiens le tenoient pour le Souuerain Createur de toutes les choses d'icy-bas.

Cette verité que ie declare, à sçauoir que par le nom de Pachacamac, les Indiens ont figuré le vray Dieu, auquel ils l'ont attribué ; fut confirmée par le Diable mesme, bien qu'il le fist malgré luy. Car estant, comme il est, le Pere du mensonge, si ne pût il s'empelcher de dire le vray, de quelque desguisement dont il vst, lors que voyant prescher en ce pays-là le Sainct Euangile, & qu'on y baptisoit desia les Indiens, il aduertit quelques-vns de ses familiers en la vallée qu'on appelle auiourd'huy *Pachacamac*, à cause du fameux Temple qu'ils y bastirent à ce Dieu inconnu ; que c'estoit vne mesme chose de luy & du Dieu que les Espagnols preschoient, com-

136 LE COMMENTAIRE ROYAL,
me le rapporte Pedro de Cieça de Leon en l'Histoire
du Peru, Chapitre 72. Le R. P. F. Ierosme Roman
en sa Republique des Indes Occidentales, liure pre-
mier, Chapitre cinquiesme, en dit tout autant; Et
ils font tous deux vne grande faute, en ce que par-
lant de ce mesme Pachacamac, ils prennent ce mot
pour le Diable mesme, pour n'en sçauoir la propre
signification. Or quand cét ennemy du genre hu-
main confessa que le Dieu des Chrestiens & Pa-
chacamac estoient vne mesme chose, asseurement
il dit la verité, pource que l'intention de ces Indiens
fut d'attribuer ce nom au Souuerain Dieu, qui don-
ne l'estre & la vie au monde, comme le signifie ce
mesme nom, bien que toutesfois à le prendre d'un
autre costé, il mentist de s'appeller soy-mesme Pa-
chacamac. Car les Indiens n'eurent iamais inten-
tion de donner ce nom au Diable, qu'ils appelloient
ordinairement *Cupay*; Et mesme quand ils le vou-
loient nommer, ils souloient cracher à terre en-
signe de malediction, & d'abomination, au lieu qu'ils
nommoient Pachacamac avecque l'adoration & les
demonstrations de culte que nous auons dittes cy-
deuant. Et d'autant que ce commun ennemy du
genre humain n'auoit que trop de pouuoir sur ces
Infidelles, il se disoit leur Dieu, & se faisoit de feste
en toutes les choses qu'ils reueroient, & qu'ils te-
noient pour sacrées. Ce qu'il leur donoit assez à con-
noistre, lors qu'aux Oracles qu'il rendoit en leurs
Temples, en leurs maisons, & aux autres Lieux, il se
disoit estre le Pachacamac, & tout ce à quoy les In-
diens

diens attribuoient de la Diuinité; D'où il s'ensuiuoit que ces misérables se laissans ainsi tromper, adoroient toutes les choses dans lesquelles le Diable parloit à eux, se faisant accroire que c'estoit la pèité qu'ils s'imaginoient. Que s'ils eussent creu au vray que le diable s'y fust meslé, assurément ils les eussent bruslées, comme ils font aujourd'huy par vn particulier effet de la Misericorde diuine.

Les Indiens ne sçauent pas d'eux-mesmes, ou du moins ils n'osent point faire la Relation de ces choses avecque leur propre signification, ny en expliquer les mots, pource qu'ils voyent que les Chrestiens Espagnols les ont toutes en horreur comme diaboliques. Aussi les confirment-ils pour telles, & en parlent de la façon qu'ils se l'imaginent, sans se donner la peine de s'en esclaircir nettement par la vraye signification des mots du pays. Ce qui procede encore de ce qu'ils ignorent les vrayes fondemens de la langue generale des Yncas, pour voir & entendre la deduction, l'Ethymologie, & la propre signification de semblables mots. D'ou vient qu'en leurs Histoires ils donnent encore vn autre nom à Dieu, qui est celuy de *Tici viracocha*, duquel ie ne sçay point la signification, ny eux non plus. Voila comme se doit entendre le nom de *Pachacamac*, que les Historiens Espagnols ont si fort en horreur, pource qu'ils n'en sçauent pas l'explication, bien que toutesfois ils se puissent sauuer d'vn autre costé, s'ils disent que le Diable parloit aux Infidelles dans ce riche Temple, où sous ce mesme nom qu'il s'attri-

buoit, en se faisant adorer pour Dieu ; Mais pour moy qui suis Indien, & qui par vn particulier effet de la misericorde Diuine fais profession de la Religion Chrestienne; si quelqu'un me demandoit maintenant ; Comment s'appelle ton Dieu en ta langue ? ie luy respondrois *Pachacamac*, pource qu'en la langue generale du Peru, il n'y a point d'autre nom qui conuienne à Dieu que celuy-là. Tellement que tous ceux que les Historiens luy attribuent, peuuent estre dits impropres, sans en excepter pas vn. La raison est, ou pource qu'ils ne sont point de la langue generale, ou bien à cause qu'ils sont corrompus par celle de quelques Prouinces particulieres; ou nouuellement composez par les Espagnols. Or quoy que quelques-vns de ces noms modernes puissent estre pris conformement à la signification Espagnolle, comme le mot de *Pachayachacher*, par qui ils veulent estre denoté, Celuy qui a fait le Ciel, bien que toutesfois cela signifie plustost Celuy qui instruit le monde, & que pour mieux parler il fallat dire *Pacharurac*, pource que *Rura* signifie faire; si est-ce que tous ces mots n'ont rien de commun avecque la langue generale du pays, soit, à cause qu'ils ne sont pas naturels, mais estrangers, soit pource qu'à dire le vray, ils abbaissent ie ne sçay quoy de cette ineffable grandeur de Dieu, & de cette haute Majesté où l'esleue le nom de *Pachacamac*, qui luy est entierement propre. Pour mieux entendre ce que nous disons, il faut sçauoir que le verbe *Yacha* veut dire apprendre, & que y adioustant cette syllable *Chi*,

c'est le mesme qu'enseigner; comme pareillement le verbe *Rura* signifie agir, & avec l'addition de *Chi*, c'est comme si l'on disoit faire, ou commander qu'ils fassent; & l'on peut dire le mesme de tous les autres verbes, qu'ils s'imaginent. Et d'autât que ces Indiens n'attachoient point leur esprit à des meditatiôs speculatiues, mais à des choses materielles; de là vient aussi que ces verbes dont ils vsent ne denotent nullement ny de hauts chefs d'œuure; ny des effets miraculeux & diuins, côme pourroit estre celuy de la creation du monde, & ainsi des autres; Au contraire ils signifient des actiôs basses, rampantes, mechaniques, & produites par la main des hommes, plustost que des œuures qui appartiennent à la Diuinité. Or est-il que de toutes ces choses materielles est grandement esloigné le nom *Pachacamac*, qui signifie, comme nous auons dit, Celuy qui opere enuers le monde ce que fait l'ame avecque le corps, en luy donnant l'estre, la vie, l'accroissement, & la nourriture. De ces choses que i'ay dites il est aisé d'inferer, qu'on ne peut appeller qu'impropres tous les Noms nouvellement 'composez, pour les attribuer à Dieu, s'il est ainsi que ceux qui en sont les Autheurs, entendent parler en la propre signification du langage des Indiens: La raison est, pource qu'ils ne denotent rien que de bas & de vulgaire, bien que toutesfois il y ait quelque esperance qu'avecque le temps, ils pourront estre receus, & se polir par l'usage. Quoy qu'il en soit, ceux qui les composent, doiuent soigneusement prendre garde à ne changer la signifi-

140 LE COMMENTAIRE ROYAL,
cation du nom ny du verbe. Car cela n'est pas de
petite consequence pour les faire approuuer des In-
diens , & empescher qu'ils ne s'en mocquent , sur
tout en ce qui touche la doctrine Chrestienne , &
l'instruction de ces ames , qui est la principale fin
pour laquelle on doit composer ces mots avecque
beaucoup d'attention.

*D'une Croix qu'auoient les Incas en vn lieu
Sacré.*

CH A P. III.



Es Roys Incas eurent dans Cozco vne
Croix de marbre fin, qu'on nomme autre-
ment laspe Cristallin , & ne sçait-on pas
depuis quel temps elle y pouuoit estre. Quoy qu'il
en soit , l'an 1560. ie la laissay en la Sacristie de la
grande Eglise, où elle estoit attachée à vn clou , &
percée par le haut. Je me souuiés que l'attache estoit
d'une lisiere de velours noir , avec apparence d'y
auoir eu , au temps que les Indiens la possedoient,
vne boucle d'or ou d'argët, à la place de laquelle l'on
en auoit mis vne de soye. Elle estoit longue d'enui-
ron trois quarts d'aune, large de trois doigts, espais-
se presque d'autant, toute d'une piece, & d'une pierre
extremement luisante & polie; sans qu'en ses angles,
qui estoient fort bien-faits, ny en ses branches de
forme quarrée, il y eust aucune inegalité. Ils la gar-

doient en vne de leurs maisons Royales , dans vn appartement de ceux qu'ils appellent *Huaca*, qui est vn lieu tenu pour sacré. Combien qu'il ne l'adorassent pas ils l'auoient neantmoins en tres-grande veneration, soit qu'ils le fissent ou pour la beauté de sa figure, ou pour quelque consideration que nous ne scauons pas. Ils la garderent tousiours en ce lieu là, iusques à ce que le Marquis Dom Francisco Piçarro entra dans la vallée de Tumpiz, où pour vne chose fort memorable, qui aduint à Pedro de Candia, ils commencerent à l'adorer, & l'eurent en plus grande veneration qu'auparauant, comme il sera dit en son lieu.

Après que les Espagnols se furent faits Maistres de cette ville Imperiale, & qu'ils y eurent basti vn Temple à nostre grand Dieu, ils mirent comme nous auons dit, cette Croix en la Sacristie de l'Eglise Cathedrale de Cozco, bien qu'à mon aduis il eussent eu plus de raison de la mettre sur le grand Autel, après l'auoir enrichie d'or & de pierrerie. Ils commencerent deslors à se seruir des choses mesmes qu'ils trouuerent dans les Indes, & particulièrement de cette Croix, pour rendre ceux du pays affectionnez à nostre sainte Religion. De toutes lesquelles choses ils en firent vn parallele avec les nostres, & pareillement de quelques-vnes de leurs Ordonnances, qu'ils trouuerent auoir vn peu de conformité avec les commandemens de nostre sainte Loy, & beaucoup de ressemblance avecque les œuures de misericorde, comme nous verrons cy-apres. Je diray là dessus sur

142 LE COMMENTAIRE ROYAL,
le suiet de la Croix, que les Yncas & tous les peuples
de leur Empire ont cette loüable coustume, de ne
jurer iamais en quelque façon que ce soit, au lieu
qu'il ne s'en trouue que trop parmy nous, qui à leur
grande confusion iurent à tout propos, ou par le
nom de Dieu, ou par la Croix mesme, & en iugemēt,
& dehors; soit qu'ils le fassent ou pour confirmer ce
qu'ils disent, ou sans aucune necessité, & par vne
pernicieuse habitude. Les Indiens tout au contraire,
comme nous l'auons remarqué ailleurs, auoient en
si grande veneration les noms de Pachacamac, & du
Soleil, qu'ils ne les proferoient iamais qu'avec vn
religieux respect, & en intétion de les adorer. Quand
ils examinoient quelque tesmoing, pour importan-
te que fust l'affaire dont il estoit question, au lieu de
luy faire prestler serment, le Iuge se contentoit de
luy dire ces paroles. *Promets tu d'aduoir la verité à l'Yn-
ca?* A quoy le tesmoing respondoit; *Oüy ie le promets.*
Surquoy le Iuge parlant à luy derechef; *Prends bien
garde,* adioustoit-il, *à ne point desguiser le vray, & à ne
cacher aucune des particularitez du fait; mais dy purement ce
que tu sçais.* Ce que le tesmoing promettoit pour la
seconde fois, disant, *Asseurement ie le feray ainsi.* Alors
sur la promesse qu'il auoit faite, le Iuge luy laissoit
dire tout ce qu'il sçauoit de l'affaire, sans le sonder
par aucune autre demande, comme nous auons ac-
coustumé de faire; Et quand mesme il estoit que-
stion d'un meurtre, qui s'estoit ensuiuy de quelque
querelle, ceux que l'on produisoit en tesmoigna-
ge, estoient simplement requis de dire nettement

ce qu'ils sçauoient de cette querelle, sans rien passer de ce qu'auoient fait ou dit ceux qui s'estoient battus ensemble. Comme en effet, on s'instruisoit alors du procès par la bouche des tesmoins, selon qu'ils deposoient en faueur des vns, ou contre les autres. Or il arriuoit rarement qu'en telles depositions ils osassent mentir, pour estre ce peuple d'un naturel grandement timide, & fort religieux en son Idolatrie; ioint qu'ils n'ignoroient pas combien grande estoit la peine de ceux qu'on pouuoit conuaincre de mensonge. Car si l'affaire estoit d'importance, on les faisoit mourir bien souuent, non tant pour la faute pareux commise en leur deposition, que pour auoir menty à l'Ynca, & violé son Ordonnance, qui leur commandoit expressement de dire la verité. Aussi comme ils sçauoient fort bien que parler au Iuge estoit la mesme chose que comparoistre deuant l'Ynca, qu'ils adoroient pour Dieu; cette consideration, sans y comprendre les autres, estoit la principale qui les obligeoit à ne point mentir en leurs tesmoignages.

Après que les Espagnols eurent conquis cét Empire, quelques meurtres remarquables s'estants faits en vne Prouince des Quéchuas, le Gouverneur de Cozco y enuoya vn Iuge exprés, pour informer de l'affaire. Il s'y en alla donc; & estant question d'ouir la deposition d'un Curaca, qui est le mesme que parmy nous vn Seigneur qui a plusieurs Vassaux; pour mieux l'obliger à dire la verité, il le voulut faire iurer sur la Croix de sa baguette, qu'il luy presenta

144 LE COMMENTAIRE ROYAL,
pour cét effet. Mais l'Indien bien estonné de cela,
*Je ne pense pas luy respondit-il, auoir esté baptisé pour iurer
comme font les Chrestiens.* Alors sur ce que le Iuge luy
dit derechef, qu'il eust à iurer par les noms du Soleil
& de la Lune ses Dieux, comme pareillement par
ses Yncas; *Tu te trompes,* luy respondit le Curaca, *si tu
crois qu'il me soit permis de prophaner ces beaux noms, que nous
autres Indiens n'auons accoustumé de proferer que pour vne mar-
que d'adoration.* Quelles assurances aurons nous donc,
adiousta le Iuge, de la verité de ton dire, si tu ne
nous en donnes quelque gage? *Il te doit suffire* luy re-
partit l'Indien, *que ie t'en donne ma parole, & de sçauoir
que ie parle à toy, comme à ton Roy mesme, puis que tu viens icy
rendre la iustice en son nom, du moins c'est ainsi que nous auons
accoustumé de proceder enuers nos Yncas.* Neantmoins pour
satisfaire en quelque façon à ce que tu desires de moy, ie iureray
par la terre, disant que ie veux bien qu'elle s'ouure, & m'englou-
tisse tout en vie, si ie ne dis la verité. Le Iuge ayant pris ce
serment de luy, puis qu'il n'en pouuoit tirer d'autre,
l'interrogea sur le fait de ces meurtres, pour sçauoir
qui en estoient les auteurs. A quoy le Curaca luy
respondit selon ce qu'il en sçauoit. Mais voyant qu'il
ne luy demandoit rien touchant les agresseurs de
cette querelle, qui estoient ceux là-mesme qu'on
auoit tuez, il le pria de luy laisser deduire au long
tout ce qu'il en sçauoit, pource, luydit-il, *que ie ne
croy pas dire la verité toute entiere, comme ie te l'ay promis,
lors que ie responds simplement aux demandes que tu me fais, veu
qu'en tel cas, ie ne dis qu'une partie du fait, & ne declare point
l'autre.* A quoy le Iuge ayant voulu repliquer qu'il
estoit

estoit content pourueu qu'il respondist à ce qu'il luy demandoit; Si vous l'estes, luy dit le Curaca, ie ne le suis pas pour moy, si pour satisfaire à ma promesse ie ne declare entierement ce que les vns & les autres ont fait. Ainsi le Iuge s'estant esclaircy de l'affaire, le mieux qu'il luy fut possible, s'en retourna à Cozco, où il raconta ce qui s'estoit passé entre le Curaca & luy, au grand estonnement de ceux qui l'oüyrent.

*De plusieurs Dieux que les Historiens Espagnols
ont attribuez improprement aux Indiens.*

C H A P. IV.

POur reuenir à l'Idolatrie des Yncas, nous dirons plus amplement que nous n'auons fait cy-deuant, qu'ils n'auoient pour tous Dieux que le Soleil, qu'ils adoroient entierement: aussi ne fut ce qu'à luy qu'ils bastirent de beaux Temples, qui par le dedans, à le prendre du haut en bas, estoient tous couuerts de lames d'or. Avecque cela, ils luy souloient faire plusieurs Sacrifices, luy offrans quantité d'or, & ce qu'ils auoient de plus precieux, pour recompense des choses qu'il leur auoit données; iusques là mesme qu'ils luy adiugerent le tiers de routes les terres labourables des Royaumes & des Prouinces de leur Conqueste; Ensemble les biens qui en prouviendroient, & vn nom-

bre infiny de troupeaux; loint qu'ils luy bastirent des maisons, dont l'enclos estoit fort grand, pour la demeure des filles qui luy estoient dediées, lesquelles y gardoient vne perpetuelle virginité.

Outre le Soleil, ils adorèrent interieurement le Pachacamac pour le Dieu inconnu, comme nous auons dit cy-deuant. Ils l'auoient en plus grande veneration que le Soleil, bien que toutesfois ils ne luy fissent ny Temples, ny offrandes, ny Sacrifices, pour ce disoient-ils, qu'ils ne le cognoissoient pas, pour ne s'estre iamais fait voir à eux, encoré qu'ils le creussent estre en effet; Dequoy nous traiterons plus amplement en vn autre endroit, où il sera parlé du fameux & riche Temple, qui fut dedié depuis à ce Dieu inconnu, en vn lieu qu'on appella de son Nöm *la vallée de Pachacamac*; par où l'on peut voir que les Yncas n'adoroiēt point d'autres Dieux que les deux que nous auons dit, l'vn visible, & l'autre inuisible. Car ces Princes & leurs Amautas, qui estoient les Philosophes & les Docteurs de leur pays, gens qui n'auoient aucune teinture des bonnes lettres, tenoient pour chose inciuile & infame, d'attribuer le nom, l'honneur, l'autorité, la puissance, & les autres qualitez diuines aux choses sublunaires; Ce qui fut cause que par vne Loy qu'ils establirent, & qu'ils firent publier, ils ordonnerent à tous ceux de leur Empire d'adorer le Pachacamac pour Dieu & Souuerain Seigneur, & avecque luy le Soleil, pour les grands biens qu'il leur faisoit à tous generalement; Voulant quant au reste qu'on eust à reuerer la Lune,

pource qu'elle estoit sa femme & sa sœur, & à porter de l'honneur aux Estoilles, qu'ils disoient estre les Damoyelles & les filles seruanes de sa maison.

Il sera parlé en son lieu de *Viracocha*, qui estoit vn Dieu, ou plustost vn Fantosme, qui s'apparut à vn Prince heritier des Yncas, se disant estre fils du Soleil. Les Espagnols attribuent plusieurs autres Dieux aux Yncas, pour ne sçauoir diuiser les temps ny les Idolatries de ce premier âge, non plus que celles du second; Ce qui procede encore de ce qu'ils ignorent la propriété du langage, qui les empesche d'en demander de veritables relations aux Indiens, ou d'entendre celles qu'ils leur en donnent. Cependant cette ignorance fut cause d'abbord qu'ils attribuerent, comme i'ay dit, quantité de Dieux aux Yncas, & tous ceux-là mesme qu'ils abolirent dans les pays des Indiens, qu'ils assuiettirent à leur Empire qui estoient horribles, & en grand nombre. Que s'il en faut chercher vne raison plus particuliere, l'on trouuera que cét abus est venu de ce que les Espagnols ne pouuoient sçauoir encore les diuerses significations du nom *Huaca*, duquel si l'on prononce la dernière syllabe en retirant la langue vers le palais, il signifie le mesme qu'Idole, comme pourroit estre Iupiter, Mars, Venus, & ainsi des autres, sans que de ce nom l'on en puisse deduire vn Verbe pour dire Idolatrer, ou commettre Idolatrie. A quoy i'adiouste qu'oultre cette premiere & principale signification, il en a quantité d'autres dont nous alleguerons plusieurs exemples, afin qu'on le puisse mieux en-

tendre. Caril signifie vne chose sacrée, à leur mode, comme estoient toutes leurs Idoles, à sçauoir les Rochers, les Pierres, les Arbres, ou le diable entroit pour parler à eux, & leur faire accroire qu'il estoit Dieu. Je diray bien dauantage, c'est qu'ils appelloient Huaca les offrâdes mesmes qu'ils faisoient au Soleil, comme des figures d'hommes, d'oyseaux & d'autres animaux, faites d'or, d'argent, ou de bois, & ainsi des autres choses qu'ils estimoient sacrées, & qu'ils auoient en grande veneration, à cause qu'elles appartenoiēt au Soleil, puis qu'il les auoit receües en offrâdes. Ils donnoient aussi le nom de Huaca à quelque tēple que ce fust, ou grand, ou petit, cōme pareillement aux tombeaux qu'ils auoient à la campagne, aux recoins des maisons, où le Diable souloit parler à leurs Prestres, & aux autres lieux où ils deuisoient familièrement avecque luy, lesquels ils tenoient ordinairement pour sacrez, & les respectoient sans comparaison, comme nous pourrions faire vn Oratoire ou vne Chapelle.

Ces Indiens appellent encore Huaca toutes les choses, qui en excellence & en beauté surpassent celles de leur espece, comme vne Rose, vne Pomme & ainsi des autres fruits, qui sont ou meilleurs, ou plus beaux que tous ceux de l'arbre; attribuant ce mesme nom aux arbres, qui ont quelque aduantage sur ceux de leur genre. Et toutesfois en vn sens contraire, ils nomment Huaca, les choses qui apportent de l'horreur & de l'effroy à ceux qui les voyent, pour estre difformes & monstrueuses, telles qu'estoient

les grandes Couleures des Antis, ayant iusques à vingt-cinq ou trente pieds de longueur. Ils en vsoiēt de mesme enuers celles qui passioient l'ordinaire de la nature; comme par exemple, s'il arriuoit qu'une femme eust deux enfans d'une ventrée, prenant cela pour une merueille, ils appelloient Huaca la mere & les Lumeaux; qu'ils couronnoient de fleurs, & les portoient publiquement par les ruës, avec de grandes demonstrations d'allegresse, ne cessant en leurs chansons & en leurs danses de louer la mere, à cause de sa grande fecondité; Comme au contraire, il y auoit d'autres Nations qui pleuroient en de semblables euenemens, & qui les prenoient pour estre de mauuais augure. C'est le mesme nom qu'ils attribuent encore à tous les troupeaux, & les haras dont les bestes ont deux portées à la fois; pource qu'y ayant grand nombre de troupeaux en ce pays-là, principalement de vaches, & de jumens, elles n'en ont qu'une pour l'ordinaire. Pour cela mesme en leurs Sacrifices, ils offroient plus volontiers les aigneaux beffons, s'il y en auoit, que non pas les autres de la mesme espece, d'autant qu'ils les croyoient auoir ie ne sçay quoy qui tenoit du prodige & de la merueille; Ils les nommoient doncques Huaca, comme pareillement les enfans qui venoient au monde d'une façon extraordinaire, c'est à dire qui estoient ou plus ou moins imparfaits, soit qu'ils eussent six doigts à la main, ou en l'un des pieds, ou qu'ils nasquissent bossus, ou qu'en leur visage il y eust quelque deffaut remarquable, cōme par exem-

150 LE COMMENTAIRE ROYAL,
ple vne levre fenduë en forme de bec de lievre (&
de ceux il y en auoit plusieurs parmy eux) Ou mes-
mes qu'ils fussent lousches , & eussent telles autres
imperfections de Nature. Voila donc comme ils se
feruent diuerfement du mot Huaca , qu'ils donnent
de mesme aux sources d'eau viue , qui rejallissent à
gros boüillons , & qui deuiennent riuieres. Ce qu'ils
font asseurement , pour monstrier qu'elles ont ie ne
sçay quoy de plus noble que les autres fontaines ; En
vñant de mesme enuers les petits Caillous , qui sont
sur le bord des fleuues , ou des petits ruisseaux , s'ils
les trouuent esmaillez de diuerses couleurs , & que la
Nature ingenieuse en ses ouurages y ayt tracé des
figures & des traits qui les rendent differents des au-
tres pierres.

Ils s'aduiferent aussi de nommer Huaca , la gran-
de Montagne couuerte de neige , qui s'estend par
tout le Peru , iusques au destroit de Magellan ; nom
qu'ils luy donnerent , à cause de sa hauteur & de sa
longueur. Ce qui est , sans mentir , vne chose du tout
admirable à quiconque la cõsidere atentiuement. Ils
nomment encore aujourd'huy de mesme les Monts
qui sont esleuez par dessus les autres ; Ensemble les
hautes tours des maisons , & les grands costaux que
l'on trouue en passant chemin , dont il y en a quel-
quesfois de trois , quatre , cinq , & six lieuës de haut ,
& qui sont aussi droits qu'une muraille. Les Espa-
gnols par corruption du mot les appellent *Apachitas* :
Et il est certain que les Indiens les adoroient , & leur
faisoient des offrandes , comme nous monstrerons

cy-apres , lors que nous dirons quelle estoit cette maniere d'adoration. Il est tres - certain qu'ils appelloient Huaca , toutes ces choses & autres semblables , non pour aucune inclination qu'ils eussent à les adorer , ny à les tenir pour des Deitez , mais seulement pour monstrier qu'elles auoient ie ne scay quoy de particulier & d'extraordinaire , qui les obligeoit d'en parler avecque beaucoup de respect & de veneration. Cependant les Espagnols qui n'entendoient que la premiere & la principale signification du mot Huaca , qui est le mesme qu'Idole ; sans considerer qu'il en auoit plusieurs autres differentes , s'allerent imaginer que les Indiens tenoient pour Diuinitez toutes les choses qu'ils appelloient Huaca , & que les Yncas les adoroient comme ceux du premier âge.

Que s'il est question maintenant d'expliquer le nom *Apachitas* , que les Espagnols attribuent aux Tertres haut esleuez , iusque là mesme qu'ils les font passer pour Dieux des Indiens , il faut sçauoir que *Apacheta* est le datif , & *Apachecpa* le genitif de ce participe du temps present *Apachec* , qui est vn nomina-tif , & qu'en y adioustant la syllabe *Ta* il deuient datif , & signifie *Celuy qui fait supporter* , sans dire ny quoy , ny qui il est. De maniere qu'à prendre ce mot , suiuant l'ordinaire façon de parler des Indiens , lesquels , comme nous auons desia monstrier , & comme nous monstrerons cy-apres , comprenoient beaucoup de choses en vne seule parole ; C'estoit le mesme que s'ils eussent dit , *Rendons vne humble action de graces , &*

*offrons quelque chose à Celuy qui nous donne autant de vigueur & de force, qu'il nous en faut, pour monter iusques au sommet de ces lieux si haut esleuez, & si rabboteux; Paroles dont ils n'vsoient iamais que lors qu'ils auoient gaigné le haut du Costau. Ce qui a donné suiet aux Historiens Espagnols de croire qu'ils en appelloient le sommet *Apachitas*, pour leur auoir oüy dire ce mot. Tellement qu'à faute d'en sçauoir la signification, ils ont ainsi appelé les Costaux & les hautes Collines. Mais toutes les fois que les Indiens esclairez de la lumiere naturelle vsoient de ces termes, leur intention estoit de monstrier, qu'ils deuoient rendre graces, & faire quelque offrande au Pachacamac, ou au Dieu inconnu, qu'ils adoroient mentalement, pour leur auoir aydé à venir à bout de ce trauail. Aussi arriuoit-il ordinairement, que se voyans au plus haut du Costau, ils posoient leur fardeau, s'ils en auoient, puis haussant premierement les yeux au Ciel, & apres les penchant vers la terre, ils faisoient les mesmes marques d'adoration qu'ils souloient faire au Pachacamac, comme il a esté dit cy-deuant. Auecque cela ils repetoient deux ou trois fois le darif *Apacheca*; Apres par vne maniere d'offrande, ils se tiroient le poil des sourcils; Et soit qu'ils en arrachassent ou non, ils les souffloient en l'air, comme s'ils l'eussent voulu enuoyer au Ciel. Par mesme moyen ils iettoient l'herbe par eux appelée *Cuca*, qu'ils auoient à la bouche, & qui estoit fort en estime parmy-eux, comme s'ils eussent voulu dire qu'ils offroient à Pachacamac ce qu'ils auoient de plus précieux.*

precieux ; Et en cas qu'ils ne peussent auoir quelque chose de meilleur, ils luy presentoient pour offrande de petits esclats de bois , ou des pailles mesmes , s'ils en rencontroient. Que s'ils n'en trouuoient aucunes, ils offroient quelque caillou , ou bien à faute de cela vne poignée de terre ; de toutes lesquelles offrandes il y auoit de grandes Mont-ioyes sur le sommet des Costaux. Or quand ils faisoient ces ceremonies, ils ne regardoient iamais le Soleil , d'autant que ce n'estoit pas à luy, mais bien au Pachacamac que s'adreffoit leur adoration ; Ioint que tous ces dons n'estoient pas tant des offrandes que des marques de leur affection, comme sçachant bien que des choses de si peu de valeur ne meritoient pas d'estre offertes. Dequoy ie puis parler au vray comme tesmoing oculaire, pour l'auoir veu plusieurs fois marchant avec eux ; où il est à remarquer que telles ceremonies n'estoient faites que par ceux qui se deschargeoient de quelque fardeau qu'ils portoient. Mais depuis il a pleu à Dieu par sa misericorde infinie, qu'au lieu de toutes ces choses il y ait au sommet de ces Costaux de grandes Croix , que ceux du pays adorent, pour recognoissance de la grace que nostre Seigneur Iesus-Christ leur a faite, de leur en auoir communiqué l'vsage.

*De plusieurs autres significations du mot
Huaca.*

C H A P. V.



Cette mesme diction *Huaca*, si l'on en prononce la derniere syllabe du plus profond du gosier passe pour vn Verbe, & signifie *pleurer*. Ce qui a donné suiet à deux Autheurs Espagnols, qui ne sçauoient pas cette difference, d'vser de ces mots en leur Histoire. *Les Indiens pleurent, & gemissent, quand ils entrent dans leurs Temples, pour y faire leurs Sacrifices; ce qu'ils donnent à entendre par le mot Huaca.* Mais ils ne voyét pas la grande difference qu'il y a de cette signification, l'un estant vn verbe, & l'autre vn nom. Et toutesfois cela ne consiste qu'en la differente prononciation, sans changer la lettre ny l'accent. Car la derniere syllabe du mesme mot, se prononce tantost du fond du gosier, & tantost en tirant la langue vers le haut du Palais. De laquelle prononciation, & de toutes les autres, qui sont remarquables en cette langue, les Espagnols, pour curieux qu'ils soient, n'en font point d'estat, pour n'auoir rien de commun avec leur langage; bien que toutesfois il leur importe grandement de le sçauoir. Je rapporteray à ce propos ce qui m'aduint vn iour avec vn Religieux de saint Dominique, qui auoit esté quatre ans au Peru Pro-

Professeur de la langue generale de cét Empire. Ce bon Pere ayant sceu que i'estois natif de ce pays là, me fist l'honneur de me venir voir, pour communiquer avecque moy; & ie le visitay aussi plusieurs fois à sainct Paul de Cordouë. Estant donc aduenu qu'une fois entre les autres nous entraîmes en discours touchant la langue de ces Contrées, & les différentes significations qu'ont les mesmes mots; Je rapportay pour exemple celuy de *Pacha*, lequel prononcé pleinement selon l'accent Espagnol, signifie le Ciel, la Terre, l'Enfer, & quelque terrain que ce soit. Aquoy le Religieux fit response, qu'il se pouoit prendre aussi pour des habillemens, & mesme pour les meubles d'un logis. Il est vray, luy respondis-je, mais ie voudrois bien que vous m'eussiez dit quelle difference il y a en la prononciation, pour faire qu'il signifie ce que vous dittes? Le n'en sçay rien, me repliqua-t'il. Et quoy, luy dis-je alors, est-il bien possible, qu'ayant enseigné cette langue vous ne scachiez pas cela? Le vous aduise donc que si par ce mot l'on veut donner à entendre un habillement, ou une robe, il en faut prononcer la premiere syllabe les levres serrées, & la rompre avec le ton de la voix, de telle sorte que cela fasse une maniere de son. Surquoy ie luy monstray de vive voix la prononciation de ce nom & de plusieurs autres, n'estant pas possible de l'enseigner autrement; Ce qui fut au Professeur un grand sujet d'admiration, & aux Religieux, qui se trouverent en nostre conference.

Ce que nous venons de dire sert d'un tesmoigna-

ge assez ample, pour monstrier que les Espagnols sont grandement ignorans dans les secrets de cette langue, puis que ce Religieux, qui auoit fait profession de la monstrier, n'en auoit point la principale cognoissance. Il ne faut donc pas s'estonner, si pour ne la sçauoir comme il faut, nos Historiens font de si grandes fautes dans leurs escrits, & s'ils en tirent de si mauuais consequences; Comme quand ils disent que les Yncas & leurs suiets adoroient pour Dieux toutes les choses qu'ils appelloient Huaca, pource qu'ils ignoroient les diuerses significations de ce nom. Cela suffira pour maintenant touchant les Dieux, & l'Idolatrie des Yncas; En laquelle s'il y a quelque chose à remarquer, ie trouue que ces Indiens, tant ceux du second âge, que du premier, doiuent estre fort louiez, en ce qu'en vne si grande diuersité de Dieux ridicules il ne se trouue point qu'ils ayent adoré la Volupté, ny le Vice comme les anciens Gentils, qui adoroient ceux-là mesme qu'ils tenoient pour Adulteres, pour Homicides, & pour Yurognes, mais particulièrement Priape; bien que routesfois ils se picquassent fort des belles lettres, & des grandes cognoissances, sans considerer que leur sçauoir chocquoit directement les bonnes mœurs.

Il s'est trouué vn autre Historien, qui parlant de l'Idole *Tanga-tanga*, nous a voulu persuader que ceux de Chuquisaca l'adoroient, & que les Indiens disoient qu'il estoit vn en trois, & trois en vn. Mais pour moy ie n'ay iamais oüy parler de telle Idole, & ne trouue point que ce mot soit de la langue gene-

rale du Peru. Ce qui n'empesche pas toutesfois qu'il ne puisse estre receu dans cette Prouince, qui est à cent quatre-vingt lieuës de Cozco. Toutesfois il y a plus d'apparence de croire que c'est vne diction que les Espagnols ont corrompuë, comme c'est leur coutume de corrompre tous les mots Indiens, & de les prononcer à leur mode. Ainsi il n'est pas incompatible qu'ils n'ayent dit *T'anga-tanga* au lieu d'*Acatanca*, qui est pris pour vn Escarbot. Nom qui avec beaucoup de propriété est composé du mot *Aca* qui signifie *excrement*, & du Verbe *Tanca* (prononcant la derniere syllabe du fonds du gosier) qui est le mesme que pousser avec violence, si bien qu'à ce compte-là *Acatanca* signifieroit *Celuy qui reiette, ou qui repousse quelque ordure*

De dire maintenât qu'ë ce premier âge ceux de l'ancienne Gentilité, auant l'Empire des Roys Yncas, renoiët pour Dieu l'Escarbot; cela ne semblera pas incompatible à quiconque voudra considerer, côme nous auons dit, qu'ils adoroient quantité de choses aussi abiectes & aussi viles que celle-là, dont ils reietterent le culte à l'aduenement des Yncas, qui les defendirent toutes. Quant à ce que les Indiens disoiët (si toutesfois il le faut croire) que ce *Tangatanga* estoit vn en trois, & trois en vn, ie m' imagine pour moy, que ce fut vne nouuelle inuention dont ils s'aduiferent entre-eux, apres qu'ils eurent oüy parler de la Trinité, ou de l'vnité du vray Dieu nostre Souuerain Seigneur. Ce qu'ils firent sans doute, pour flatter les Espagnols par vne maniere de com-

plaisance, en leur disant qu'en leur Religion ils auoient certaines choses semblables aux nostres, comme celle cy touchant la Trinité, que le mesme autheur dit qu'ils attribuoient au Soleil & à ses rayôs, iusques là mesme, qu'ils se disoient auoir des Confesseurs comme les Chrestiens, auxquels ils faisoient vne entiere declaration de leurs pechez. Mais toutes ces choses sont tellement esloignées de l'apparence, qu'on n'en peut iuger autrement comme i'ay dit, sinon que les Indiens les ont inuentées, afin que s'accommodant à l'humeur des Espagnols, ils en tirassent d'eux plus de courtoisie; ce que ie certifie, comme Indien, pour la cognoissance que i'ay du naturel de ces peuples. Je dis donc qu'ils n'ont iamais eu d'Idole sous le nom de la Trinité; mais qu'il est bien vray que la langue generale du Peru, qui n'est pas beaucoup copieuse en paroles, comprend en vne seule diëction trois ou quatre choses differentes, comme par exemple le nom *Illapa*, qui comprend l'Esclair, le Tonnerre & la Foudre ensemble; Et le mot *Maqui*, lequel signifie la main, & pareillement le mollet du bras, & toute son estendue. Il en est de mesme encore du nom *Chaqui*: Car s'il est prononcé nettement comme l'on l'escrit en Espagnol, il denote le pied, & comprend tout à la fois le pied, le gras de la jambe, & la jambe mesme. Ce que ie pourrois demonstrier aussi par plusieurs autres noms de cette nature, qu'il me seroit ayisé de produire; Mais il ne s'ensuit pas pour tout cela qu'ils ayent adoré des Idoles sous le nom de la Trinité, ny qu'il y en ait eu de

tel en leur langue , comme nous monstrerons cy-apres. Que si l'on m'allegue que le Diable preten-
doit possible de se faire adorer sous ce nom-là; le res-
pondray que cela se pouuoit en effet , veu le grand
Empire qu'il se donoit sur ces Infidelles entierement
esloignez de la verité Chrestienne, & tout à fait plon-
gez dans l'Idolatrie. Voila les abus qui se sont com-
mis dans la vaine Religion de ces anciens Gentils,
que i'ay succintement demonstrez. A quoy i'adiou-
steray pour conclusion de ce Chapitre ; que si du
mesme nom *Chaqui* l'on en prononce la premiere
syllabe en retirant la langue vers le palais , il signi-
fie alors auoir soif, ou bien estre sec, ou essuyer quel-
que chose mouillée, qui sont trois diuerfes signifi-
cations en vne seule parole.

*Tesmoignage d'un Auteur, touchant les
Dieux qu'ils auoient.*

CHAP. VI.

JE me seruiray à ce propos de l'autorité
du R. P. Blas Valera, dans les papiers du-
quel i'ay trouué les paroles suiuanes, que
i'ay pris la peine de traduire, pour estre de
mon suiet, afin de les rapporter icy. En cet endroit
donc de ses memoires, où il parle des Sacrifices que
faisoient les Indiens de la Mexique, & ceux des autres
Prouinces, ensemble des Dieux qu'ils adoroient;

Il n'est pas possible, dit-il, d'expliquer par des paroles, ny mesme de s'imaginer sans estonnement, & sans horreur, combien estranges, cruels, inhumains, & contraires à la vraye Religion estoient les genres de Sacrifices, que les Anciens Indiens souloient faire, ny combien grande la quantité de leurs Dieux; qui estoit telle, qu'en la seule ville de Mexique, & en ses faubourgs, il y en auoit plus de deux mille. Ils appellent generalement Teutl leurs Dieux & leurs Idoles, qui en particulier ont diuers noms. Car de croire ce que Pierre Martyr, l'Euesque de Chiapa, & quelques autres Historiens affirment, à sçauoir que les Indiens de Cuzumela, suiets à la Prouince de Yncatàn, adoroient pour Dieu le sacré signe de la Croix, & que ceux de la Iurisdiction de Chiapa auoient cognoissance de la tres-saincte Trinité, & de l'Incarnation de nostre Seigneur Iesus-Christ; c'est à mon aduis, ce qu'on ne peut faire, sans vne bien grande absurdité. Il est donc plus vray-semblable que les Historiens Espagnols se sont imaginez cette explication, qu'ils ont appliquée à ces Mysteres; comme nous lisons dans les Histoires de Cozco, qu'ils appliquoient à la Trinité les trois Statuës du Soleil, qui estoient dans son Temple; & pareillement celles du Tonnerre, & de l'Esclair. Mais ie responds à cela que s'il est vray, comme il n'y a point de doute, qu'auourd'huy mesme ces peuples sçauent à peine s'il y a vn saint Esprit, apres tant d'enseignemens que les Euesques & les Prestres leur en ont donnez; Il n'est pas possible que dans les tenebres où ils estoient plongez alors, ils peussent auoir vne claire cognoissance du mystere de l'Incarnation, & de la Trinité. Or la coustume de nos Espagnols, qui escriuoient l'Histoire de ces Contrées, estoit de demander en leur langue à ceux du pays les choses qu'ils desiroient sçauoir. Eux cependant, qui n'auoient point vne entiere cognoissance de
l'antiquité

l'antiquité ny la memoire assez bonne les leur racontoient imparfaites, & dans vn meslange de Fables poëtiques, ou d'Histoires fabuleuses. En quoy ce qui se trouuoit de pire, estoit le peu de cognoissance, que chacun d'eux auoit du langage de l'autre, pour s'entendre entre-eux tant en leurs demandes qu'en leurs responses; Ce qui ne pouuoit proceder, que de la grande difficulté du langage Indien; Ioint que ceux du pays n'auoient encore pour lors qu'une bien legerete teinture de la langue Espagnole. Cependant, de cette ignorance des vns & des autres s'ensuiuoient de grands abus, pourcc que ny l'Indien ne pouuoit entendre ce que l'Espagnol luy demandoit, ny l'Espagnol comprendre encore moins la response que l'Indien luy faisoit. De maniere qu'il arriuoit plusieurs fous, qu'ils s'entendoient tantost au contraire de leurs intentions, & tantost qu'au lieu de conceuoir les choses dans leur propre & vraye signification, ils comprenoient celles avec qui tant seulement elles auoient de la ressemblance & de la conformité. Ainsi parmy cette grande confusion le Prestre ou le Seculier qui s'instruisoit d'eux, tiroit de leur response ce qui luy sembloit plus conforme à son intètion, ou plus à son goust, & ce qu'ils imaginoit que l'Indien pouuoit auoir respondu. De cette façon se laissans conduire à leur simple sentiment & à ce que l'imagination leur dictoit, ils escriuoient pour veritables des choses, auxquelles les Indiens n'auoient pas tant seulement songé. Cela estant, ie ne pense pas que l'on me puisse blasmer quand ie dis que de leurs veritables Histoires, s'il y en a quelques-vnes, l'on n'en scauroit tirer vne consequence d'aucun mystere de nostre Religion Chrestienne. Il ne faut pas douter neantmoins qu'en cecy le Diable par vn effet d'orgueil & d'ambition n'ayt brigué d'estre tenu & honoré comme Dieu, non seulement en ce qui est des Ceremonies des Gentils, mais encore en quelques costumes de la Religion.

Chrestienne, qu'il a introduites, comme vn Singe enuieux, & maling, en plusieurs Contrées des Indes, afin d'en estre mieux honore, & tenu en plus grande estime par ces Miserables. De là vient qu'il y auoit parmy eux vne Prouince, dont les habitans se confessoient de vne voix, pour nettoyer leurs pechez; & vne autre où ils souloient lauer la teste aux enfans. I obmets ces Contrées où ils ieusnoient avec vne merueilleuse abstinence, & ces autres où ils s'offroient volontairement à la mort, pour la deffense de leur fausse Religion. De cette façon comme en l'ancien monde les fidelles Chrestiens se presentoient au Martyre pour la foy Catholique, afin de gagner le Ciel, au prix de leur sang; Ainsi au monde nouveau les Gentils s'exposoient à la mort par la malice du Diable. Mais quant à ce qu'on a voulu faire accroire qu'ils tiennent que Icona est Dieu le Pere, Bacab Dieu le Fils, Estruac, le saint Esprit, Chiripia, la tres-sainte Vierge Marie, & Ischen, la bien-heureuse sainte Anne; Et qu'avec cela Bacab mis à mort par Eopuco represente nostre Seigneur Iesus-Christ crucifié par Pilate; Toutes ces choses & autres semblables, ne sont à proprement parler que fables, & qu'inuentions de quelques Espagnols, que les Indiens ignorent entierement. Il est bien vray neantmoins que ceux qu'ils adoroient sous ces noms-là furent autresfois des hommes & des femmes, qui seruoient de suiet à leur detestable Idolatrie. Car les Mexicains auoient des Deesses & des Dieux qu'ils adoroient, parmy lesquels ils en mettoient d'extremement sales & difformes, qu'ils disoient estre les Dieux des Vices, tels qu'estoient, Tiazolteuti, Dieu de la Luxure, Ometochtli, Dieu de l'Yurognerie, & Viteilpuchtli, Dieu de la Guerre & du Meurtre. De plus ils appelloient Icona

le Pere de tous leurs Dieux, qu'ils croyoient les auoir engendrez des femmes & des maistresses qu'ils auoient eues. Aussi disoient-ils qu'il estoit le Dieu des gens mariez, comme Bacab l'estoit des enfans de famille, Ettruac, le Dieu de l'air, Chiripia, Mere des Dieux, & la Terre aussi; Ilchen leur Marâtre, ou leur belle mere, & Thalac, le Dieu des eaux. Ils reueroient encore plusieurs Dieux semblables, dont ils tenoient les vns pour auteurs des Vertus morales, comme par exemple Quecal-coathl, Dieu aerien, reformateur des mœurs, & les autres pour directeurs de la vie humaine & de l'âge des hommes. Ils auoient en outre vn nombre infiny d'images & de figures de leurs Dieux, inuentées pour diuerses fins, & la plus-part desquelles estoient horribles & difformes. De tous ces Dieux ils en adoroient les vns en commun, & les autres en particulier, iusques là mesme, que tous les ans chacun les changeoit à sa mode, & selon qu'il le trouuoit bon. Apres auoir reietté ceux-cy comme sur-annez, & qu'ils estimoient infames, pour ne leur auoir esté vtils, ils en reueroient d'autres sous le tiltre de leurs bons Genies, ou pour mieux dire de leurs Demons domestiques. I'obmets ces Dieux imaginaires, qu'ils croyoient estre comme surintendants de l'âge des enfans, des jeunes, & des vieillards. Ceux qui heritoient de quelque bien, pouuoient si bon leur sembloit, accepter ou repudier les Dieux de leurs Peres, qui ne leur permettoient pas de se soubmettre à eux, s'ils ne le vouloient. Les vieillards reueroient aussi certains Dieux d'une plus haute volée, qu'ils reiettoient à la fin, & en mettoient d'autres à leur place, apres la reuolution de l'année, ou de l'âge du monde, qui estoit le terme dont souloient vser les Indiens. Voilà quels estoient les Dieux que tous ceux de la Mexique, de Chiapa, de Guatimala, de Paz, de Vera, & des autres Contrées des Indes souloient adorer, croyant

ceux de leur eslection plus grands & plus hauts que les autres, à cause de leur autorité Souueraine. Quand les Espagnols s'en allerent en ce pays là, ils trouuerent que les Dieux qu'adoroient les habitans estoient faits & esleus, à ce qu'ils disoient, depuis la renouation du Soleil dans le dernier âge. Car au rapport de Gomara, chascun Soleil, de la façon qu'ils le prenoient, estoit de huiect.cens & soixante années, bien que toutesfois il y en eust beaucoup moins, au compte des mesmes peuples de la Mexique. Or cette façon de compter par Soleils l'âge du monde, estoit vne chose assez commune, & fort vsitée entre ceux de la Mexique & du Peru. Que s'il en faut croire leur supputation, les ans du dernier Soleil se doiuent compter depuis l'an de nostre Seigneur mille quarante trois. Conformement à cecy, il n'y a point de doute que les peuples de la Mexique adorerent les anciens Dieux, au temps qui preceda ce dernier âge. Car pour ceux qui furent six ou sept cens ans auparauant, ils perirent tous, à ce qu'ils disent, & furent submergez dans la mer, si bien qu'au lieu d'eux ils en inuenterent quantité d'autres. D'où il s'ensuit necessairement, qu'on ne scauroit appeller que fausse l'opinion de tous ces Auteurs, qui se sont imaginez que les Dieux nommez par les Indiens Icona, Barac, & Estruac, estoient parmy eux, comme sans comparaison sont parmy nous le Pere, le Fils, & le saint Esprit.

Tous les autres habitans de ces Contrées septentrionales, qui respondent à celles du vieux Monde, comme par exemple les Prouinces de la grande Floride, & les Insulaires, n'auoient aucunes Idoles, ny aucuns Dieux qu'ils eussent faits, & choisis. De sorte qu'ils n'adoroient seulement que ceux que Varron appelle Naturels, à sçauoir les Elemens, la Mer, les Lacs, les Riuieres, les Fontaines, les Montaignes, les bestes sauvages, les Serpens, les Moissons, & ainsi des autres choses; Coustumè qui

prit son origine des Chaldées, & s'establit insensiblement parmy diuers peuples. Ceux qui mangeoient de la chair humaine, & qui tenoient l'Empire de la Mexique, ensemble toutes les Isles & la plus-part des confins du Peru, garderent brutalement cette pernicieuse habitude, iusques au regne des Yncas, & des Espagnols. Tout ce que ie viens de rapporter est tiré du R. P. Blas Valera, qui dit en vn autre endroit, que les Yncas n'adoroient que le Soleil, & les Planetes, & qu'en cela ils imitoient les Chaldées.

Qu'ils ont creu l'Immortalité de l'ame, & la Resurrection vniuerselle.

CHAP. VII.

LEs Yncas Amautas ont creu que l'homme estoit composé d'ame & de corps, que l'ame ne pouuoit mieux estre appelée qu'un esprit immortel, & que le corps estoit fait de bouë, pource qu'il deuenoit terre. Pour cela mesme ils le nommoient *Alpacamasca*, c'est à dire terre animée; & pour en marquer la difference avecque les bestes, ils vsoient du mot *Runa*, qui signifie vn homme doué d'entendement & de raison, au lieu que celui de *Llama* leur seruoit pour denoter vne beste. Et d'autant que la raison naturelle leur apprenoit que les animaux croissoient, & auoient du sentiment, ils leur attribuoient pour cet effet l'ame vegetariue & la sensitiue, mais non pas la raisonna-

ble. Ils croyoient qu'après cette vie il y en auoit vne autre qui estoit meilleure pour les bons, & pire pour les meschans, à cause de la recompense des vns, & du supplice des autres. Auecque cela ils diuisoient l'Vniuers en trois mondes, dont ils appelloient le premier, à sçauoir le Ciel *Hanan Pacha*, c'est à dire le haut Monde, où les gens de biens receuoient le salaire de leurs vertus; Le second, *Hurin Pacha*, ou le bas monde, à cause de la generation & de la corruption, & le troisieme, *Veu Pacha*, qui signifie le Centre de la terre ou le Monde inferieur, qu'ils disoient estre destiné pour la demeure des meschans. Or pour les mieux expliquer, ils le nommoient encore autrement, à sçauoir *Cupaypa Huacin*, c'est à dire maison du Diable; ioint que ne prenant pas l'autre vie pour estre spirituelle, mais corporelle come celle que nous passons icy bas, ils disoient que le repos du haut Monde consistoit à mener vne vie paisible, & libre des inquietudes de celle-cy; Come au contraire ils tenoient assurement que la vie du Monde inferieur, que nous appellons Enfer, estoit pleine de toutes les maladies, & de tous les maux que nous souffrons icy bas, sans qu'il y eust aucune sorte de repos, ny de contentement. De cette façon ils diuisoient cette vie en deux parties, donc l'une pleine de delices, de contentement, & de repos, estoit pour les gens de bien, & l'autre toujours ennuieuse, & penible, pour ceux qui auoient mal vescu. A quoy il faut adiouter qu'ils ne comptoient point parmy les plaisirs de l'autre vie, ny les voluptez charnelles, ny les autres vices non plus, mais

bien la tranquillité de l'ame, & celle du corps, qu'ils mettoient à n'auoir aucun soucy, ny aucune peine.

Les Yncas croyoient encore la Resurrection vniuerselle, sans que toutesfois leur esprit s'esleuast plus haut que cette vie presente, pour laquelle ils disoient que nous deuions ressusciter, sans s'imaginer ny gloire ny peine quelconque. Ils auoient vn soin extraordinaire de mettre en lieu de seureté leurs ongles, & les cheueux qu'ils se coupoient, ou qu'ils s'arrachotent auecque le peigne. Pour cét effet ils les souloient cacher dans les fentes, ou dans les trous des murailles. Que si de hazard ils venoient à choir auecque le temps, & qu'il passast par là quelque Indien qui s'en apperceust, il les releuoit incontinent, & les resserroit; ce qui me donnoit enuie assez souuent de leur demander à quelle fin ils faisoient cela? A quoy certes-ils me respondoient tous d'un mesme accord vne chose extremement ridicule. Sçauiez vous bien, me disoient-ils, que tout ce que nous sommes de gens, qui auons pris naissance icy bas, viendrons reuiure en ce Monde (c'est ainsi qu'ils s'exprimoient, n'ayans aucun verbe pour dire *ressusciter*) & que les ames sortiront des tombeaux auec tout ce qu'elles auront de leurs corps. Pour empescher donc que les nostres ne soient en peine de chercher leurs ongles & leurs cheueux, car il y aura ce iour-là bien de la presse, & bien du tumulte; nous les mettons icy ensemble, afin qu'on les trouue plus à l'aise, & mesme s'il estoit possible nous cracherions volontiers tousiours en vn mesme lieu. Francisco Lopez de Go-

168 LE COMMENTAIRE ROYAL,
mara au Chapitre 123. de son liure parlant des enter-
remens que l'on souloit faire aux Roys & aux grands
Seigneurs du Peru; *Quand les Espagnols, dit-il, ouuroient
ces tombeaux, & en iettoient les ossemens çà & là, les Indiens
les prioient de n'en rien faire, afin qu'ils se trouuassent ensemble,
lors qu'il faudroit ressusciter, Par où l'on peut voir, qu'ils croyoient
la resurrectiō du corps, & l'immortalité de l'ame, &c.* Cela sert
à mon aduis, d'une preuue bien euidente de ce que
nous disons, veu que cét Autheur, qui n'auoit iamais
esté aux Indes, ne pouuoit escrire cecy en Espagne,
sans en auoir eu la mesme relation. A ces paroles sont
presque conformes celles d'Augustin de Carate, en
son premier liure, Chapitre 12. Et Pedro de Cieça au
Chapitre 72. dit pareillement, *Que les Indiens ont creu
l'immortalité de l'ame, & la resurrection des corps.* Ces au-
thoritez iointes à celle de Gomara, que i'ay trouuées
en lisant tous ces Autheurs, apres auoir escrit ce que
i'en auois ouï dire à mes parens, m'ont grandement
pleu, pour l'apprehension que i'auois que cette crean-
ce touchant la Resurrection étant bien fort esloi-
gnée de celle des Gentils, l'on ne me reprochast d'a-
uoir inuenté ce que i'en ay dit, s'il ne se fust trouué
quelque Espagnol qui en eust fait mention dās l'Hi-
stoire. Surquoy ie puis dire veritablement, & certi-
fier que i'ay trouué ces autoritez apres auoir escrit
tout cecy; afin qu'on ne croye pas qu'en aucune de
ces choses ie suiue les Espagnols; bien que neant-
moins quand ie trouue de leurs autoritez, ie sois
bien aise de m'en seruir, & mesme de les alleguer,
pour confirmation de ce que i'ay ouï dire aux miens,
par la


par la tradition qu'ils en ont eüe. Le mesme m'est encore arriué touchant la Loy qu'ils auoient contre les Sacrileges, & pareillemēt contre ceux qui estoient conuaincus d'Adultere, avecque les femmes de l'Ynca, ou du Soleil, comme nous verrons en suite. Car apres l'auoir escritte, ie l'ay trouuée fortuitemēt dans l'Histoire du Thresorier General Augustin Garate; ce qui m'a fort contenté, pour m'auoir donné moyen de confirmer cette verité par le tesmoignage de cēt Espagnol, sur tout en vne matiere de cette importance. De vous dire maintenant par quelle tradition, ou comme quoy les Yncas ont peu croire la Resurrection des corps, puis que cet article est de nostre foy, c'est ce qui m'est impossible. D'ailleurs dans la profession que ie fais de porter les armes, ce n'est point à moy à m'enquerir de choses si hautes; loint que ie ne pense pas que l'on s'en puisse iamais esclaircir au vray, que lors qu'il plaira à Dieu nous les descouurir. Tout ce que ie puis dire en cela, c'est qu'asseurement ces Indiens croyoient la Resurrection.

L'auois desia escrit tout cecy dans mon Histoire de la Floride; mais ie le tiray depuis de son propre lieu, pour obeyr à la Requeste que m'en firent les Reuerends Peres de la Compagnie de Iesus, Miquel Vazquez de Padilla natif de Seuille, & Ierosme de Prado de la ville d'Vbeda. L'ayant donc osté de-là, bien qu'un peu trop tard, ie me suis aduisé de le mettre icy, comme en son lieu propre, afin que tout ce grand edifice ne manquaist point d'une pierre que j'ay

170 LE COMMENTAIRE ROYAL,
iugé luy estre si necessaire ; A quoy nous adioustes-
rons en suite quantité d'autres choses, selon qu'elles
se presenteront. Car il n'est pas possible de raconter
tout à la fois les grandes sottises, ny les extrauagan-
ces, & les fables que ces peuples tenoient pour autât
de veritez ; Comme quand ils disoient, que l'ame
sortoit du corps, tandis qu'il dormoit, pource qu'elle
mesme ne pouuoit dormir, & qu'en ces promena-
des elle voyoit par le monde les choses que nous di-
sons auoir songées. En effet cette vaine creance au-
thorisoit beaucoup celle qu'ils auoient des Songes,
qu'ils expliquoient religieusement, iusques à dire,
qu'ils estoient autant d'augures, & de certains Pro-
nostiques, d'où les hommes pouuoient tirer des
consequences inuitables des maux & des biens qui
leur deuoient arriuer.

Des choses qu'ils Sacrifioient au Soleil.

CHAP. VIII.

 Es Yncas sacrifioient au Soleil quantité de
choses differantes, sur tout des animaux
domestiques, grands, & petits. Mais le prin-
cipal Sacrifice, & le plus estimé de tous, estoit ce-
luy des Aigneaux, des Moutons, & des Brebis ste-
riles. Ils offroient aussi des Lapins priuez, ensemble
toute sorte d'Oyseaux bons à manger, comme aussi
du Suif, des Espics, & des Legumes. Ils en faisoient

de mesme de l'Herbe appellée *Cuca*, & des habillemens les plus fins. Toutes lesquelles choses estoient par eux bruslées & présentées au Soleil, en action de graces de ce qu'il les auoit créées pour la nourriture des hommes. De plus ils offroient en Sacrifice vne bonne quâtité d'vn certain breuuage dont ils vsoiét, qui estoit fait d'eau & de Mayz. Car en leurs repas ordinaires, quand il leur prenoit enuie de boire, apres auoir mangé (ce qu'ils ne faisoient iamais autrement) ils trempoient le bout du doigt dans le breuuage qui estoit au vase; Puis regardant le Ciel avecque beaucoup de veneration, & secoüant du doigt, comme qui donneroit vne chiquenaude, la goutte qui s'y estoit attachée, ils l'offroient au Soleil en recognoissance de ce qu'il leur bailloit à boire; & en mesme temps ils donnoient deux ou trois baisers à l'air, ce qui estoit entre-eux, comme nous auons desia dit, vne particuliere marque d'adoration; Puis sans vser d'autre Ceremonie, apres qu'ils auoient fait cette offrande des premiers vases, ils beuuoiient tout à leur aise, & comme bon leur sembloit.

Ie me souuiens d'auoir veu faire cette Ceremonie, ou pour mieux dire cette Idolatrie aux Indiens qui n'estoient point baptisez. Car de mon temps il y en auoit plusieurs, principalement d'entre les Vieillards; dont i'en baptisay quelques-vns moy-mesme, pource qu'il le fallut par necessité. L'on peut donc bien dire qu'en leurs Sacrifices, les Yncas estoient en partie ou du tout semblables aux Indiens

172 LE COMMENTAIRE ROYAL,
du premier âge, & que s'il y auoit de la difference,
elle consistoit seulement en ce qu'ils ne sacrifioient
ny chair ny sang humain, principalement si la mort
s'en estoit ensuiuie; Au contraire ils l'auoient en si
grande horreur, qu'ils en deffendoient l'usage, & n'en
mangeoient point. Que si quelques Historiens l'ont
escrit autrement, c'est qu'ils ont esté trompez par
ceux qui leur en ont donné les relations, & pour n'a-
uoir sceu la diuision des âges & des Prouinces; non
plus que le lieu, ny le temps auquel se faisoient
ces Sacrifices d'hommes, de femmes, & d'enfans.
Vn certain Autheur parlant des Yncas, dit à ce pro-
pos, qu'ils sacrifioient des hommes, & nomme là
dessus deux Prouinces, où l'on souloit faire ces Sa-
crifices, dont l'une est presque à cent lieuës de Cozco,
car c'estoit dans cette ville où les Yncas sacrifioient
ordinairement, & l'autre porte le mesme nom; L'une
à deux cens lieuës de Cozco, tirant vers le Sud, &
l'autre à plus de quatre cens du costé du Nord. Par
où l'on peut voir clairement, que pour ne sçauoir di-
uiser le temps ny les lieux, ils ont attribué plusieurs
fois aux Roys Yncas quantité de choses qu'eux mes-
mes deffendirent à leurs suiets, apres qu'ils les eu-
rent soubmis à leur Empire, & que les Indiens n'en
ont iamais usé qu'en ce premier âge.

Je puis tesmoigner au vray d'auoir plusieurs fois
ouï dire à mon Pere & à ceux de son temps (lors qu'en
leurs discours familiers ils comparoient ensemble
ces deux Republiques, à sçauoir celle de la Mexique,
& celle du Peru) que l'une estoit incomparablement

plus loüable que l'autre ; aussi quand ils deuisoient entre eux particulièrement touchant la coustume de sacrifier des hommes, & de manger de la chair humaine, il n'est pas à croire cōbien ils loüoient les Yncas du Peru, pource qu'ils ne permettoient pas que l'on fit de tels Sacrifices ; Comme au contraire ils auoient en abomination ceux de la Mexique, à cause qu'ils souffroient l'vn & l'autre dedans leur ville, & hors de son enclos ; Ce qu'ils pratiquoient d'une façon detestable, & tout à fait diabolique, cōme il est rapporté dans l'Histoire de la Conqueste de ce pays. Car il est certain, bien que le bruiet n'en soit pas commun, que celuy qui le conquist, & qui le subiugua par deux fois, en fut l'Historien luy mesme, comme ie le croy veritable pour moy, pour ce qu'en mon Pays & en Espagne, i'en ay ouy faire le recit à des Gentilshommes dignes de foy, qui me l'ont ainsi certifié: ioinct que cette Histoire tesmoigne assez la verité de leur dire ; si on la considere attentiuement ; Et peut on bien asseurer que ce fut vn grand dommage qu'on ne la publiast point au nó de son Autheur, qui l'eust grandement mise en credit, & se fust fait aduoüer en tout veritable imitateur du grand Iules Cesar.

Or pour reuenir aux Sacrifices, nous dirons que les Yncas ne consentoient iamais qu'il s'en fit aucuns ny d'hommes ny d'enfans, non pas mesme durant la maladie de leurs Roys, comme le rapporte vn ancien Historien. Car lors qu'ils se trouuoient mal, ils n'appelloient pas ces accidés des effets de l'humaine

174 LE COMMENTAIRE ROYAL,
fragilité, tels que sont ceux qui arriuent à l'ordinaire
des hommes ; mais ils les tenoient comme pour des
messagers du Soleil Pere de leur Ynca, *qui venoit, à ce*
qu'ils disoient, appeller son fils, afin qu'il se reposast au Ciel en
sa compagnie, car c'estoient les mots qu'auoient ordi-
nairemēt à la bouche tous les Roys Yncas, lors qu'ils
se voyoient à l'article de la mort. Comme ils pu-
blioient donc cette vanité de toutes parts, afin que
les Indiens n'en doutassent point, ny de toutes les au-
tres choses, qu'ils souloient dire du Soleil, sembla-
bles à celles-cy ; ils ne vouloient pas souffrir que l'on
contredit leur volonté, en faisant des Sacrifices pour
leur guérison, puis qu'eux mesmes confessoient que
le Soleil, duquels ils estoient fils, les appelloit pour
s'aller reposer avecque luy : Ce qui suffira mainte-
nant, pour monstrier qu'ils ne sacrifioient ny hom-
mes, ny femmes, ny enfans ; en attendant que cy-
apres nous racontions plus au long leurs Sacrifices,
rāt en commun qu'en particulier, & les festes solem-
nelles qu'ils souloient faire au Soleil.

Toutes les fois qu'ils entroient en leurs Temples,
ou qu'ils y estoient dedans, le Principal de ceux qui
s'y donnoit vne entree, portoit la main sur l'un des
sourcils ; & soit qu'il en arrachast du poil, ou non, tant
y a qu'il le souffloit en l'air deuant l'Idole, en signe
d'offrande. Où il faut remarquer que cette espee d'a-
doration ne se faisoit point au Roy, mais seulement
aux Idoles, aux arbres, & aux autres choses, où le Dia-
ble souloit entrer, afin de parler à eux. Cette mesme
coustume estoit obseruee par les sorciers, & par leurs
faux Prestres, lors qu'ils entroient dans des recoins,

& des lieux secrets, pour y parler avecque le Diable; comme si par cét acte d'idolatrie ils eussent voulu obliger cette Deité imaginaire à les ouyr, & leur faire responce, veu que par cette demonstration ils luy offroient leurs personnes; Ce que ie puis asseurer au vray, pour auoir veu commettre cette Idolatrie à plusieurs d'entre eux.

*Qu'ils attribuoient au premier Ynca l'institution
de leurs Prestres, de leurs Coustumes, de leurs
Ceremonies, & de leurs Loix.*

C H A P. IX.

Les se seruoient ordinairement de Prestres à faire leurs Sacrifices; en quoy il y auoit cette distinction, qu'en la ville de Cozco les Prestres de la maison du Soleil estoient tous Yncas, nais du sang Royal; au lieu que pour tout autre seruice du Temple il suffisoit qu'ils fussent du nombre des Yncas priuilegez. Ils n'estoient pour souuerain Prestre qu'un des Oncles ou des Freres du Roy, ou si c'estoit quelque autre il falloit du moins qu'il fust legitimement venu de son sang. Le Prestre n'auoit point d'habillement particulier entr'eux, mais bien l'ordinaire; ioint qu'en toutes les Prouinces où le Soleil auoit des Temples en fort grand nombre, il n'y auoit que ceux qui en estoient natifs, & parens du Seigneur de chèque

176 LE COMMENTAIRE ROYAL,
Prouince, qui pouuoit exercer cette charge en leur Religion. Mais quant au principal Prestre, comme sans comparaison pourroit estre vn Euesque parmy nous, il falloit qu'il fut Ynca. Or afin qu'en leurs Sacrifices & en leurs ceremonies ils se rendissent conformes à leur Metropolitain, en toutes les charges de preeminence, ils esliuoient les Yncas pour superieurs en temps de paix & de guerre, sans demettre ceux du pays, afin qu'on ne leur reprochast point de les desdaigner, & d'vser de tyrannie enuers eux. Ils eurent de mesme plusieurs maisons de Religieuses, d'or les vnes gardoient vne perpetuelle virginité, sans sortir iamais: & les autres estoiet Maistresses du Roy, de la qualité desquelles il sera parlé plus amplement cy apres, ensemble de leur maniere de viure, & pareillement de leurs charges, & de leurs exercices ordinaires.

Il faut sçauoir apres tout cecy que quelques Sacrifices, ou quelques loix que les Roys Yncas voulussent establir tant au spirituel de leur vaine Religion, qu'au temporel de leur Gouuernement politique, ils les attribuoient tousiours au premier Ynca Manco Capac. Car ils disoient ordinairement qu'il les auoit toutes fondées, en mettant les vnes en vsage, & leur laissant seulement vn crayon des autres, afin que leurs descendans y apportassent les derniers traits, quand il en seroit temps. Et comme ils le tenoient asseurement pour estre fils du Soleil, & venu du Ciel, pour gouuerner les Indiens, & leur imposer des loix, ils croyoient aussi que son Pere luy auoit dit
&

& enseigné quelles Loix il deuoit faire pour le commun bien des hommes, & quels Sacrifices luy offrir dans les Temples qui luy feroient consacrez. Or ce qu'ils soustenoient cette fourbe, & taschoient de la faire passer pour veritable, estoit pour donner plus de vigueur & de force à tout ce qu'ils ordonneroient à l'aduenir; A cause de quoy l'on ne peut pas asseurer au vray quel des Yncas fit telle ou telle Loy: Car comme ils n'eurent point l'usage de l'escriure ny des liures, ils manquerent de plusieurs choses, qui s'y conseruent pour instruire la Posterité. Mais quoy qu'il en soit, il est bien certain que ce qu'ils auoient de Loix & d'ordonnances, estoit ou nouveau, ou reformé sur l'antiquité, selon que le temps, & la necessité le requeroient.

Ils font vn de leurs Roys, comme nous verrons en sa vie, grand Legislateur, pource qu'il leur donna plusieurs Loix nouvelles, & qu'il corrigea, ou augmenta toutes celles qu'il trouua faites. A laquelle qualité, ils adioustent celle de Souuerain Prestre, à cause qu'il institua quantité de Ceremonies & de Coustumes, pour en vser en leurs Sacrifices, & qu'il orna plusieurs Temples d'une infinité de richesses; Et ils disent de plus, qu'il fust vn excellent Capitaine, qui conquist vn grand nombre de Prouinces & de Royaumes. Mais quelque tiltre qu'ils luy donnent d'illustre Legislateur, si est-ce qu'il ne font aucune mention en particulier, ny des Loix qu'il leur imposa, ny des Sacrifices qu'il institua. De sorte que ne trouuant par où mieux s'eschapper, ils attribuent au

178 LE COMMENTAIRE ROYAL,
premier Ynca toutes ces choses, tant pour ce qui est
de leurs Loix, que du fondement de leur Empire. Sui-
uant cét ordre cõfus nous rapporterõs icy la premiere
Loy fondamentale de leur Estat; puis nous passerons
aux autres, & aux Conquestes de tous les Roys; aux
vies desquels, & à leurs faits memorables, no⁹ entre-
mellerons plusieurs autres Loix; & finalement nous
parlerõs de leurs mœurs, de leurs coustumes, de leur
maniere de Sacrifier, des maisons de leurs Religieu-
ses; de leurs festes solemnelles, des Ceremonies qu'ils
obseruoient, quand ils faisoient des Cheualiers, du
seruice de leur Maison, & de la pompe de leur Cour;
Ce que nous ferons à dessein, afin que le Lecteur se
desennuye par la diuersité de ces comptes agreables.
Mais auant que passer outre, il me semble que ie ne
feray pas mal de preuuer les choses que i'ay dittes
par les authoritez des Historiens Espagnols, qui ont
escrit de cette mesme matiere.

*Autheur preuue ce qu'il a dit cy-deuant par le
tesmoignage des Historiens Espagnols.*

C H A P. X.

POur faire voir que ce que i'ay dit de l'o-
rigine des Yncas, & des choses qui se pas-
serent auant-eux, n'est point de mon in-
vention, mais que c'est vne commun Re-
lation, que les Indiens ont faite aux Historiens Es-

pagnols; Il me semble fort à propos de rapporter icy vn Chapitre, de ceux que Pedro de Cieça de Leon, natif de Seuille, met en la premiere partie de sa Cronique du Peru, où il fait le denombrement & la description de ces Prouinces, avec vn recit particulier de la fondation des nouvelles villes, de la façon de viure des Indiens, de leurs mœurs, de leurs Coustumes, & ainsi des autres choses, qui font le tiltre du liure de cét Auteur. Cette Histoire fut composée dans le Peru par luy mesme; pour l'escrire avec plus d'asseurance & de verité, qui dit auoir fait par terre quelques douze cens lieues de chemin, à le prédre en long, depuis le port d'Vraca iusques à la ville qu'ils appellent auiourd'huy *Ciudad de Plata*. Comme il voyageoit ainsi, il se donnoit le soing d'escrire en chèque Prouince la Relation qu'on luy faisoit des Coustumes & des Loix de ceux du pays, soit qu'elles fussent ou barbares ou politiques, le tout selon la diuision des temps & des âges. Suiuant cette instruction il rapporte ce que faisoient les habitans de chèque Contrée, auant que les Yncas les assuejerissent à leur Empire, & ce qu'ils firent depuis; à quoy il employa vn assez long-temps; car il fut neuf ans tous entiers, à recueillir les Relations qu'il en auoit eues, à sçauoir depuis l'an quarante-vn iusques à cinquante. Ayant donc à escrire ce qu'il auoit remarqué depuis Vraba iusques à Pasto, qui est aux frontieres du pays des Yncas, il'en fait vn Chapitre particulier, qui est le trentehuietieme de son Histoire, où il dit les paroles suiuanes.

Ayant souuent à traiter des Yncas en cette premiere partie, ensemble des lieux où ils faisoient leur demeure, & de plusieurs autres particularitez, il m'a semblé à propos d'en dire icy quelque chose, afin que le Lecteur sçache quels ils ont esté, & qu'il ne mette point leur valeur en doute, prenant l'un pour l'autre; bien que toutesfois j'aye desjà parlé d'eux & de leurs beaux faits assez amplement, en vn liure particulier que j'en ay escrit. Les Indiens de Cozco nous ont donné plusieurs Relations d'où l'on peut tirer cette consequence, qu'il y auoit autresfois de grands desordres en toutes les Prouinces de ce Royaume, que nous appellons Peru, dont les habitans estoient si peu raisonnables, & si despourueus d'esprit, qu'il n'est pas possible de le croire. C'est l'opinion commune que tous ces peuples viuoient en bestes; que parmy eux les vns mangeoient de la chair humaine, & les autres se marioient à leurs filles, ou mesme à leurs meres; Dequoy n'estans pas contents, à des pechez si horribles ils en adioustoient quantité d'autres beaucoup plus enormes, iusques là mesme, qu'ils auoient de grandes familiaritez avec le Diable, & le seruoient avecque beaucoup d'honneur & de reuerence.

Ils auoient sur le haut des Collines & des Montaignes quantité de Chasteaux & de places fortes, d'où ils se declaroient la guerre pour les moindres choses, & s'entretuoient inhumainement, ou se faisoient prisonniers. Or bien qu'ils fussent plongez dans ces inhumanitez, & accoustumez à de si grands vices, l'ontient neantmoins qu'il y en auoit parmyeux, qui ne laissoient pas d'auoir quelque Religion; à cause dequoy en diuerses Contrées de ce Royaume ils bastirent de grands Temples, où ils souloient faire leurs prieres, & adorer le Diable, qui se communiquoit à eux visiblement, vsant enuers ces Idoles de superstitions, & de Sacrifices abominables. Tandis que les habitans de ce Royau-

me vivoient ainsi, voilà que dans le Prouinces de Colloa, & en d'autres pays se remuerent de grands Tyrans, qui commencerent à se declarer la guerre à outrance, en authorisant à toute reste le meurtre & les voleries. Dans ce commun desordre, les vns & les autres furent cause de grandes calamitez, & qu'il y eust plusieurs fortes places desmolies, sans que ces Barbares missent aucune fin à leurs sanglantes querelles; Dequoy le commun Ennemy du genre humain se resiouysoit extremement, à cause qu'il se perdoit vne infinité d'ames.

Toutes les Prouinces du Peru estoient dans ces diuisions mortelles; lors que tout à coup l'on vit suruenir deux Freres, dont l'un s'appelloit Manco Capac, de qui les Indiens comptent de grandes merueilles, & des fables fort plaisantes, comme l'on pourra voir dans le Liure que j'ay allegué cy-deuant, apres qu'il sera mis en lumiere. Ce Manco Capac fonda la ville de Cuzco, & fit des Loix pour le commun vsage des habitans. Luy-mesme & ses descendants s'appellerent Yncas, c'est à dire Roys ou grands Seigneurs. Ils se rendirent avec le temps si redoutables, & si puissans, qu'ils sousmirent à leur Empire toute cette grande estenduë de pays qui est depuis Pasto iusques à Chilé. Leurs triomphantes bannieres furent veuës tant du costé du Sud que du Nord, sur les Riuieres de Maule & d'Angas Mayo, où se borne leur Empire, qui ne pouuoit estre que bien grand, puis qu'il y a plus de treize cës lieues de l'une à l'autre. Ils firent bastir quantité de Chasteaux & de places fortes en toutes les Prouinces de leurs Estats; à la garde desquelles ils mirent de bös Capitaines & des Gouverneurs fideles. Aussi faut-il aduoüer que par leur bonne conduite ils firent des choses si merueilleuses, qu'il se trouue peu de Princes qui ayent eu de l'aduantage sur eux en matiere de bien regir vn Estat. Or quoy que l'vsage des lettres ne fust point introduit en ces Con-

treés de leur Empire, si ne laissoient-ils pas d'auoir le sens extrêmement bon, & vne grande viuacité d'esprit.

Ils apprirent à leurs suiets cette loüable coustume de se seruir d'habillemēs pour couvrir leur nudité, & de porter en lieu de souliers vne maniere de sandales, ou pour mieux dire, de brodequeins. Ils se plaisoient fort à ouyr parler de l'immortalité des ames, & des autres secrets de la Nature, croyant pour certain que toutes les choses du monde auoient esté créées, & qu'elles se conseruoient par le moyē du Soleil, qu'ils tenoient pour le Souuerain Dieu, auquel ils bastirent de magnifiques Temples. Ils adoroient, comme les Gentils, iusques aux arbres & aux pierres, seduits par la malice du Diable. Dans les principaux de leurs Temples, ils auoient quantité de belles filles, qui viuoient comme autresfois dans Rome les Religieuses de Vesta, & obseruoient presque les mesmes Loix. C'estoit leur coustume de n'enuoyer iamais à la guerre que les plus vaillans & les plus fidelles Capitaines qu'ils pouuoient trouuer dans le pays. Ils auoient vne merueilleuse soupplēse d'esprit, & vne adresse incroyable à remettre bien ensemble ceux qui estoient ennemis, sans auoir recours aux armes pour les ranger à la paix. Que si quelques-vns faisoient les mutins & les rebelles, la seuerité qu'ils employoient à les chastier estoit extrêmement grande. Mais ayant desia fait, comme i'ay dit, vn liure du Gouvernement de ces Yncas. il me doit suffire d'en auoir icy traité succinctement; Car ie suis bien certain que ceux qui prendront la peine de le lire, y trouueront quels ont esté ces Roys, & qu'ils ont valu beaucoup.

Ce que ie viens de rapporter est tiré du 38. Chapitre de l'Histoire de Pedro de Cieça de Leon, où il semble auoir remarqué tout ce que succinctement nous auons dit, ou que nous dirons au long de l'I-

dolatrie des Roys Yncas, comme aussi de leurs Conquestes, & de leur Gouvernement en temps de paix & de guerre: Ensuitte de tout cecy, il rapporte plus auant la mesme chose dans le contenu de 83. Chapitres qu'il escrit du Peru, où il parle tousiours à la loüange des Yncas. Que s'il traite des Prouinces dont les habitans sacrifioient des hommes, mangeoient de la chair humaine, alloient tous nuds, laissoient la terre en frische, à faute de la sçauoir cultiuier, & commettoient vne infinité d'abus estranges, iusques à se porter à l'adoration des choses infames & viles; il adiouste tousiours en suitte, qu'ils perdirent toutes ces mauuaises Coustumes par les instructions que leur donnerent les Yncas, apres qu'ils eurent conquis leur pays. Puis, là où il parle de plusieurs autres Prouinces, qui tenoient la mesme façon de viure, il en adiouste la cause, disant que le gouvernement des Yncas n'estoit point encore venu iusques à eux; Et en d'autres endroits où il traite des Contrées dont les habitans estoient plus ciuilez, & moins barbares que leurs voisins; *Ces Indiens*, dit-il, *se reformerent par le gouvernement des Yncas*. Par où l'on peut voir qu'il leur donne tousiours la gloire d'auoir aboly les abus, & rendu meilleures les bonnes Coustumes, comme il sera dit en quelques endroits, où nous repeterons ses mesmes paroles. Que si quelqu'un les desire voir au long, il n'a qu'à lire son Histoire, où il trouuera que les Coustumes de ces Indiens estoient du tout diaboliques, & leurs ordures si estranges, que l'imagination des hommes n'en sçauoit trou-

184 LE COMMENTAIRE ROYAL,
uer de plus grandes. Dequoy toutesfois l'on ne s'estonnera pas, si l'on considere que le Diable en estoit l'auteur, & que les mesmes choses qu'il enseignoit aux anciens Gentils, il les enseigne encore auourd'hui à ceux qui ne sont point esclairés des veritables lumieres de la foy.

Or bien qu'en diuers endroits de son Histoire, il rapporte que les Yncas, ou leurs Prestres, parloient au Diable, & qu'ils auoient beaucoup d'autres superstitions odieuses, si est-ce qu'il ne s'en trouuera pas vn seul, où il die qu'ils sacrifioient des hommes ou des enfans. Il n'y a seulement qu'un endroit, où parlant d'un Temple qui estoit aux enuiron de Cozco, il remarque qu'ils y sacrifioient du sang humaine, qu'ils versioient dans vne masse de pain, & faisoient cette saignée entre les deux sourcils, côme il sera dit en son lieu, sans que pour cela l'on fit mourir ny des hommes ny des enfans. Ce mesme Auteur trouua moyen, comme il dir, de conferer avecque plusieurs Curacas, qui auoient connu le dernier de leurs Roys, qu'on nommoit Huayna Capac. De ces Curacas il eut diuerses Relations touchant ce qu'il escriuit; où il est à remarquer que les choses d'alors (depuis lesquelles il s'est passé enuiron cinquante ans) differoient beaucoup de celles d'auourd'hui, pour estre plus fresches, & plus approchantes de cet âge. Ce que j'ay bien voulu dire, pour refuter l'opinion de ceux, qui ont mis en auant que les Yncas sacrifioient des hommes & des enfans, combien qu'ils ne l'ayent jamais fait: toutesfois le croira qui voudra, puis que de quelque

de quelque façon que l'affaire se passast ils commettoient tousiours vne Idolatrie , quoy qu'à dire le vray tels Historiens ne deuoiét point mettre en auât vne si grande inhumanité, sans en estre auparauant bien asseurez. Le R. P. Blas Valera parlant des Antiquitez du Peru, & des Sacrifices que les Yncas faisoient au Soleil , qu'ils reconnoissoient pour leur Pere ; *Leurs successeurs*, dit-il, *pour vn tesmoignage de grande veneration faisoient au Soleil plusieurs Sacrifices de brebis, & d'autres animaux* ; mais ils ne luy sacrifioient iamais des hommes , comme Polo , & quelques autres à son imitation l'ont faussement affirmé.

Ce que nous auons dit que les Yncas sortirent d'un marefcage appellé Titicaca, est pareillement confirmé par Francisco Lopez de Gomara en son Histoire generale des Indes, Chapitre 120. où il parle de la race d'Atahualpa, qui fut pris & mis à mort par les Espagnols. Le mesme est aussi rapporté par Augustin de Carate Surintendant general des finances de sa Maiesté, qui l'asseure ainsi en l'Histoire qu'il a escrite du Peru, liure premier Chapitre treiziesme ; & par le R. P. Ioseph Acosta, lequel dans le fameux liure qu'il a composé de la Philosophie naturelle & morale du nouveau monde, liure premier, chapitre vingt-cinquiesme, parle plusieurs fois à la loüange des Yncas. Par où l'on peut voir que ce que ie dis n'est pas nouveau, & qu'estant nay Indien i'amplifie par la propre Relation que i'en ay, celle que les Espagnols comme estrangers n'ont fait qu'abreger, pour n'auoir sceu la proprieté de la langue, que i'ay

186 LE COMMENTAIRE ROYAL,
apprise en mon enfance, comme ayant succé, s'il faut
ainsi dire, avecque le lait de ma nourrice, ces veritez
& ces fables de la façon que ie les raconte. Passons
outre maintenant dans la connoissance de l'ordre
qu'obseruoient les Yncas à gouverner leurs Royau-
mes.

*Les Yncas diuisoient leur Empire en quatre par-
ties, & tenoient vn Role de leurs Sujets.*

C H A P. XI.


L'Empire des Roys Yncas estoit par eux
mesmes diuisé en quatre parties, qu'ils
appelloient *Tauantinsuyu*, c'est à dire les
quatre parties du monde, conforme-
ment aux principales du Ciel, qui sont l'Orient, le
Ponent, le Septentrion, & le Midy. La ville de Coz-
co en estoit comme le point ou le centre, à ce qu'ils
disoient. Aussi signifioit elle en la langue particu-
liere des Yncas *le nombril de la terre*, nom qui ne luy est
point improprement imposé, ny sans vne grâde res-
semblance. Car tout le Peru est long & estroit com-
me le corps humain, & la ville de Cozco en fait pres-
que le milieu. Ils appelloient *Antisuyu* cette partie
qui regarde l'Orient, à cause de la Prouince des An-
tis qui est au Leuant, à raison de quoy ils nomment
encore *Anti* toute cette grande estenduë de montai-
gnes couuertes de neige à l'Orient du Peru. Ils vſent

du mot *Cuntisuyu* pour denoter la partie du Ponent, ainsi dit de la Prouince de *Cunti*, qui est fort petite. Quant à la partie du Nord, elle prend le nom de *Chinchasuyu* de la Prouince de *Chincha*, qui est vne des plus grandes du pays, située au Nord de la ville; & celle de la *Collasuyu*, qui est comme le destroit du milieu, emprunte le sien d'une autre Prouince de large estenduë, qu'ils appellent vulgairement *Colla*, qui est du costé du Sud. Par ces quatre Prouinces ils entendoient tout ce qu'il y auoit de pays iusques à ces quatre parties, combien que sortant de leurs bornes il y eust d'autres Contrées dans lesquelles ils empietoient de plusieurs lieuës; Comme par exemple le Royaume de Chilé, qui du costé du Sud est à plus de six cens lieuës de la Prouince de Colla, & qui toutesfois estoit compris dans la partie de Collasuyu; Comme pareillement le Royaume de Quito, qu'ils comprenoient dans le destroit de Chinchasuyu, quoy que vers le Nord il fust à plus de quatre cens lieuës de Chincha. De sorte que nommer ces parties-là, estoit le mesme que dire à l'Orient, au Ponent, &c. ioint que c'est ainsi qu'ils appellent encore aujourd'huy les quatre principaux chemins que l'on trouue au sortir de Cozco, pource qu'ils conduisent aux quatre parties du Royaume. Pour establir le fondement de leur Estat, les Yncas inuenterent vne Loy, par le moyen de laquelle ils se promirent de preuenir & arrester tous les maux qui pourroient naistre dans leurs Royaumes. C'est qu'ils ordonnerent qu'en toutes les villes de leur Empire, grandes, ou

188 LE COMMENTAIRE ROYAL,
petites, les habitans seroient enrolez dans le registre public par Decuries de dix en dix, le Chef desquelles, à sçauoir le Decurion prédroit la charge des neuf. Cinq de ces Decuries auoient vn autre Decurion ou Chef, qui en commandoit cinquante. Par mesme moyen vn autre Capitaine auoit sous luy deux Decuries de cinquante, c'est à dire de cent hommes; puis en augmentant tousiours cinq Decuries de cent estoient sous la charge d'un autre Decurion, qui auoit sous luy cinq cens Bourgeois. Ensuite de quoy deux Compagnies de cinq cens hommes reconnoissoient vn General, qui en commandoit mille. Car ils ne vouloient pas qu'il y eust plus de mille habitans en leurs Decuries, alleguant pour raison que c'estoit bien assez qu'un Chef eust mille hommes à commander, afin d'en rédre bon compte. De maniere qu'à bien considerer le tout, ils auoient des Decuries de dix, de cinquante, de cent, de cinq cens, & de mille, avecque leurs Decurions, ou leurs Chefs d'Escadre, qui dependoiēt les vns des autres, à le prendre des moindres aux plus grands, iusques au dernier, qui estoit le principal Decurion que nous appellons General.

De l'office des Decurions.

CHAP. XII.

 Es Decurions ou les Dixainiers estoient obligez à deux choses enuers ceux de leur Decurie, ou de leur Escadre ; L'une de solliciter pour eux en cas de necessité, rédant bon compte des incommoditez de leurs gens au Gouverneur, ou à tel autre Ministre, qui auoit charge d'y mettre remede ; Comme par exemple de leur donner des viures pour se nourrir, des grains à semer, de la laine pour s'habiller, ou mesme dequoy rebastir leur maison, en cas qu'elle fust tumbée, ou que le feu s'y fust mis dedans, & ainsi des autres incommoditez grandes ou petites. Secondement, c'estoit le deuoir du Decurion de se porter pour accusateur, s'il aduenoit que quelqu'un de son Escadre eust commis la moindre faute. Car alors il estoit obligé d'en rendre compte au Decurion duquel il dependoit, qui deuoit luy-mesme, ou bien le Chef qui estoit par dessus luy, prendre le soin de faire chastier le coupable. Car commel'offence estoit plus ou moins enorme, il y auoit aussi preeminence de dignité entre les Iuges, qui releuoient pour l'ordinaire les vns des autres. Ils y procedoient de cette sorte, afin que le chastimets en ensuiuist sans delay, & qu'à chaque accusation il ne fust pas besoing d'éuoquer la cause à vne

190 LE COMMENTAIRE ROYAL,
plus haute Iurisdiction, par vn ou plusieurs appels,
iusques à la faire tomber entre les mains des sou-
uerains Iuges de la Cour. Ils alleguoient là dessus,
qu'en matiere de punition, les delays en obligeoiēt
plusieurs à faire du mal; que les procès ciuils s'en-
trenoient iusqu'à l'infiny, à force de productions,
d'appels, & de preuues, & que les pauues ainsi tra-
ueriez, pour n'auoir de quoy fournir parmy ces lon-
gueurs, estoient à la fin cōtraints d'abandonner leur
bon droit, & de perdre leur bien miserablement, y
ayant trois fois autant de frais que de principal. Pour
empescher donc que tels inconueniēs n'arriuaissent,
ils s'aduiferent de donner ordre, qu'en châce ville
il y eust vn Iuge qui ordonnast definitiuement des
procès qu'auroient ensemble les habitans, horsmis
toutesfois, ceux qui feroient intentez par vne Pro-
uince contre l'autre, touchāt les bornes des champs,
ou le droit des pasturages. Car en tel cas l'Ynca de-
putoit vn Commissaire particulier, afin d'en iuger,
comme nous dirons cy-apres.

Tout Caporal ou Chef d'Escadre; grand ou pe-
tit qui se monstroient nonchalant à solliciter pour ses
gens, estoit chastié plus ou moins, selon l'importan-
ce du fait, & de la necessité, qu'ils auoient soufferte
pour n'auoir esté assistez. Que si connoissant au vray
que quelqu'un de ceux qui estoient sous luy eust
commis vne mauuaise action, il tarδοit vn iour à
l'accuser, sans que la cause en fut legitime, en tel cas
il estoit declaré coupable pour autruy, & chastié par
deux fois; l'une pour n'auoir bien fait son deuoir, &

l'autre pour s'estre chargé de l'offense du coupable, à faute de l'accuser. Et d'autant que chaque Caporal releuoit d'un autre Chef, qui auoit l'œil sur luy, & qui esclairoit ses actions, cela les obligeoit tous à bien faire, & à s'acquitter de leur charge le mieux qu'ils pouuoient. Cependant vne si bonne police estoit cause qu'il n'y auoit ny vagabonds ny fayneants dans tout le pays, & que chacun prenoit garde à ne rien faire qui ne fust de iustice, comme ayant tousiours vn accusateur qui l'esclairoit. D'ailleurs, pour y donner meilleur ordre par l'apprehension de la peine, ils la faisoient si rigoureuse, que pour la moindre faute que ce fust, ils condamnoient à la mort la plus-part du temps ceux qui en estoient conuaincus. Car ils ne le chastioient pas tant disoient-ils, pour leur propre faute & pour celle d'autrui, que pour auoir contreuenue au commandement, & à la parole de leur ynca, qu'ils respectoient comme leur Dieu. Et bien que celuy qui estoit offensé n'en eut formé aucune plainte, & qu'on ne procedast en cette affaire que par la voye ordinaire du Procureur Fiscal, ou du Decurion, selon qu'ils y estoient obligés par le deuoir de leur charge, si ne laissoit-on pas selon l'importance de la faute, de punir entierement le delinquant de la peine ordonnée par la Loy, qui estoit, ou la mort, ou le foüet, ou le banissement, & ainsi des autres peines.

Ils chastioient vn fils de famille selon que la faute qu'il auoit faite, se trouuoit grande ou petite, sans luy pardonner pas vne de ces actions que l'on appelle

192 LE COMMENTAIRE ROYAL,
ordinairement des traits de ieunesse. En quoy toutes-
fois ils moderoient plus ou moins la peine par l'âge,
conformement à son innocence. Quant au Pere, ils
le punissoient à toute rigueur, pour n'auoir destour-
né ces mauuaises habitudes de son fils, en prenant le
soing de l'instruire, & de le corriger en son bas âge.
Le Decurion estoit encore obligé d'accuser le fils
aussi bien que le Pere de quelque faute que ce fust
que l'un ou l'autre eust commise; tellement que cer-
te precaution dont on vsoit, faisoit que les Peres esle-
uoient leurs enfans avec un merueilleux soing, &
qu'ainsi ils les empeschoient de faire des actions in-
dignes d'eux, & dans la ville, & à la campagne; d'où
il s'ensuiuoit que les ieunes gens, qui d'ailleurs sont
en ce pays là d'un naturel fort docile, n'estoient pas
moins doux ny moins appriuoisez que des Aignaux,
à cause des bonnes instructions qu'ils receuoient
de leurs Peres.

*De quelques Loix qu'eurent les Incas dans l'e-
tendue de leur Empire.*

CHAP. XIII.

LEs Indiens ne fouloient point condamner à
l'amande, ny confisquer iamais le bien de
personne. Ils alleguoient pour raison que se
prendre aux biens des coupables, & les laisser en vie,
n'estoit pas bannir le crime d'un Estat, mais donner
aux

aux Criminels la liberté de faire de plus grands maux. Si vn Curaca fereuoltoit, ce qu'ils chastioient à toute rigueur, ou s'il faisoit quelque autre offense, pour laquelle il meritaſt d'estre executé, combien qu'il le fut en effet, si est-ce que celuy qui deuoit succeder à son office, ne le perdoit point. Au contraire ils le luy donnoient, luy representant la faute & la peine de son Pere, afin qu'il prist garde à ne faire comme luy. Pedro de Cieça de Leon parlant des Yncas à ce mesme propos au 28. Chapitre de son Livre. *Pour empescher, dit-il, que leurs suiets ne leur voulussent du mal, ils auoient cette coustume de n'oster iamais la dignité de Cacique à ceux qui la tenoient hereditaire, & qui estoient du pays. Que si de hazard quelqu'un auoit commis vne faute, qui fust si enorme, qu'il meritaſt pour punition d'estre degrade de cette marque d'honneur & de noblesse, ils la donnoient en tel cas à l'un de ses enfans ou de ses freres, commandant à tous de leur obeyr, & de les reconnoistre pour Caciques, &c.* Voila ce qu'en dit Pedro de Cieça, qui se rapporte en quelque façon à la coustume qu'ils auoient d'observer le mesme en matiere des charges militaires. Car ils ne castoient iamais les Capitaines natifs des Prouinces, où ils auoient pris des gens, pour les mener à la guerre; Au cōtraire ils les laissoient fort paisibles dās leurs charges, quand mesme ils eussent esté Maistres de Camp; & leur donnoient pour Chefs d'autres personnes du sang Royal. Dequoy les Capitaines estoient bien ayſes, d'autant que par ce moyen, ils seruoient de Lieutenans aux Roys Yncas desquels ils se disoient estre les Soldats & les Ministres, ce que les Suiets te-

194 LE COMMENTAIRE ROYAL,
noient à singuliere faueur. En la sentence que don-
noit vn Iuge, il ne deuoit nullement defroger à la pu-
nition portée par la Loy, mais bien l'executer de
point en point, sur peine de mort, s'il auoit contre-
uenu aux Ordonnances du Roy. Ils disoient là des-
sus, qu'on ne pouuoit permettre au Iuge d'y adiou-
ster ou diminuer quelque chose du sien, sans rual-
ler la maiesté de la Loy; Qu'au reste on la deuoit
d'autant plus respecter, que c'estoit le Roy mesme
qui l'auoit faite du consentement de tous ceux de
son Conseil; Que des Iuges particuliers n'auoient pas
tant d'experience qu'eux, & partant que les autho-
riser iusques à ce point, seroit rendre la Iustice ven-
ale, & ouurir vn chemin à la corruption ou par prieres
ou par presens. Ils adioustoient en suite, que cela ne
se pouuoit souffrir sans attirer vn grand desordre
dans l'Estat, d'autant que par ce moyen chèque Iu-
ge entreprendroit de faire à sa mode; & qu'en vn
mot il n'estoit pas raisonnable qu'aucun d'entre-eux
se rendist Legislatteur, mais qu'il se deuoit porter
simplement pour executeur de ce que la Loy com-
mandoit, quelque rigoureuse qu'elle peust estre. Je
sçay qu'apres auoir bien considéré la grande seueri-
té de ces Loix, la plus-part desquelles, comme nous
auons dit cy-deuant, condamnoient à la mort pour
la moindre faute, elles passeront d'abbord pour iniu-
rieuses & barbares. Mais d'un autre costé si l'on s'ar-
reste sur le proffit que cette rigueur apportoit à leur
Estat; L'on trouuera que ceux qui les auoient faites,
estoit des hommes bien aduisez, qui vouloient

par ce moyen preuenir les accidens, & de raciner les maux de leur Republique. Car il n'y a pas de doute que les hommes, qui ayment naturellement la vie, apprennent à estre sages, de peur de la perdre, s'ils faillissent contre des Loix si rigoureuses, & dont ils ne pouuoient euitter la peine; De maniere que cette apprehension leur faisoit auoir en si grande horreur le vice, qu'à peine en toute vne année il se trouuoit vne seule faute punissable dans tout l'Empire de l'Ynca. La raison est, pource qu'encore que son estenduë fust de treize cens lieuës, & qu'il y eust entre eux diuersité de Nations & de langues, si est-ce que tous les habitans se gouernoient par des mesmes Loix, comme si tout ce grand peuple n'eust esté qu'une seule famille. D'ailleurs comme ces Loix leur sembloient diuines, cela seruoit grandement à les leur faire estimer, avecque beaucoup d'amour & de respect. Car pour la mesme raison qu'en leur vaine creance ils tenoient leurs Roys pour fils du Soleil, & le Soleil pour leur Dieu, ils appelloient diuins aussi les commandemens du Roy, & à plus forte raison les Loix particulieres, qu'il faisoit pour le commun bien de tout le pays. Aussi disoient-ils ordinairement que le Soleil commandoit à l'Ynca son fils, de faire ces Loix, & qu'il les luy reueloit. Tellement que si quelqu'un les violoit, il se croyoit Anatheme & Sacrileges, sans que mesme sa faute fust diuulguée; Aussi arriuoit-il assez souuent, que ceux qui se sentoient coupables & conuaincus par leur conscience, s'en alloient volontairement deuant le Ju-

ge faire vne declaration de leurs plus secretes offenses. Car cette creance qu'ils auoient, que l'ame se condamnoit elle mesme, les obligeoit pareillement à croire que par ses pechez elle estoit cause de tous les malheurs qui arriuoient à la Republique; comme par exemple des maladies, des morts, des mauuaises saisons, & ainsi des autres disgraces, ou communes ou particulieres. Pour empescher donc qu'à cause de leur offense leur Dieu n'enuoyast d'autres maux au monde, ils disoient qu'ils vouloient expier leur peché par leur mort. Cela me fait dire toutes les fois que i'y pense, que ces confusions publiques peuuent bien auoir donné suiet aux Historiens Espagnols, de soustenir que les Indiens du Peru confessoient secretement leurs pechez, comme les Chrestiens, & qu'ils auoient des Confesseurs exprés. Mais ils ne voyent pas que c'estoit vne fausse relation des Indiens, qui pour se rendre complaisans à l'humeur des Espagnols, leur faisoient accroire cela, respondant aux demandes qui leur estoient faites des choses qu'ils iugeoient estre selon leur goust, bien que nullement conformes à la verité. Car il est certain que les Indiens (i'entends parler de ceux du Peru, & non pas des autres peuples, dont ie n'ay aucune connoissance) n'vsoient point de confessions secretes, mais de celles dont nous venons de parler, qu'ils faisoient publiquement, demandant qu'on eust à punir leur faute d'un chastiment exemplaire.

En quelque procès dont il fust question, ils n'apelloient iamais d'une Chambre à l'autre. Car le pre-

mier Iuge ne pouuant contreuenir à la Loy, la faisoit executer de poinct en poinct par sa Sentence, & ainsi l'affaire se terminoit. Il est vray que veu le bon ordre qu'y apportoiēt ces Roys, & l'honneste façon de viure de leurs Sujets, il y auoit fort peu de procès entre-eux. Pour les vuider sans delay, ils estoient vn Iuge en châce ville, qui apres l'audience donnée aux parties, les obligeoit de mettre en execution dans cinq iours le contenu de la Loy. Que si de fortune il se passoit quelque action, qui pour estre plus considerable, ou plus noire que l'ordinaire, eust besoing qu'on la renuoyast par deuant le Iuge Prouincial, l'on s'en alloit pour cét effet droit à luy, qui en ordonnoit definitiuement. Car pour empescher que ceux qui estoient en procès ne fortissent de leur Prouince, il y auoit dans la ville capitale vn Surintendant de la Iustice, pour faire droit aux parties. Et d'autāt que les Roys Yncas scauoient fort bien que les pauures n'auoient pas de quoy aller playder hors de leur pays, ny en d'autres Tribunaux, à cause des frais qu'il leur falloit faire, qui estoient quelquefois plus grands que le principal, si bien qu'ils se voyoient contraints de laisser perdre leur bon droit à faute de le pouuoir deffendre, principalement s'ils auoient affaire à des parties qui fussent plus riches qu'eux, la coustume de telles gens estant de rendre mauuaise par leur puissance la cause des miserables, quelque bonne qu'elle soit; Pour remedier à cela, ils ordonnerēt qu'il y auroit fort peu de sieges Presidiaux, où ceux qui auroient procès pourroient recourir,

sans sortir de la Prouince. Il ne se donnoit point de Sentence par les Iuges ordinaires, de laquelle à chaque Lune ils ne fussent obligez de rendre compte à leurs Superieurs, qui le rendoient pareillement à d'autres Iuges, desquels ils n'estoient que Subalternes. Car il y en auoit à la Cour de plusieurs grades, qu'on souloit employer diuersement, selon que l'importance de l'affaire le requeroit; Et pour cela mesme en toutes les negotiations de l'Estat, il y auoit ordre des moindres aux plus grands, iusques aux souuerains Iuges, qui estoient les Viceroy, ou les Lieutenans des quatre parties de l'Empire. Ce rapport d'un Iuge à l'autre se faisoit exprés, pour voir s'ils auoient bien & deüement exercé leur charge, afin que par ce moyen les Iuges inferieurs fussent soigneux de s'en acquitter, ou qu'à faute de cela on les chastiait à toute rigueur; ce qu'on pouuoit appeller vne secrete reformation, qui se faisoit de mois en mois. Quand ils vouloient donner ces aduis à l'Ynca, & à ceux de son grand Conseil, ils se seruoient de certains cordons de diuerses couleurs, où il y auoit quantité de neuds, par où il comprenoient comme par des chiffres, tout ce que l'on vouloit dire. Car par les differentes couleurs de ces neuds estoient demonstrees les fautes qu'on auoit chastiees; Ioint qu'ils donnoient à connoistre la punition du coupable conformement à la Loy par le moyen de certains petits filets de plusieurs couleurs, & qui estoient attachez aux fiscelles ou aux cordons les plus gros. La necessité, qui est la mere des inuentions, les

faisoit recourir à ces marques exterieures , pource qu'ils n'auoiēt aucun vsage des lettres, comme nous monstrerons cy-apres en vn Chapitre particulier, où i'espere que nous ferons vne plus ample Relation de leur façon de compter par neuds, chose que les Espagnols ont plusieurs fois admirée. Aussi ne s'estonnent-ils pas sans raison de voir que leurs meilleurs Arithmeticiens se trompent assez souuent en leur calcul, au lieu que les Indiens sont si asseurez en leurs comptes, & en leurs Reigles de partition, & de compagnie, que plus on leur en propose de difficiles, & plus ils s'en acquittent facilement. Ce qui procede sans doute de ce que ceux qui en font mestier ne vacquent ny iour ny nuit qu'à cela tant seulement, si bien qu'il est impossible que par cette assiduité ils ne s'y rendent habiles.

Quand il suruenoit quelque differend entre deux Royaumes ou deux Prouinces, pour le fait des bornes, ou pour le droit des pasturages, l'Ynca y souloit deputer vn Iuge du sang Royal, avec commission expresse de s'informer, & se porter sur les lieux, pour voir de quoy il estoit question entre les parties, afin que toutes choses bien considerées de part & d'autre, il trouuast moyen de les accorder; ce qu'ils ne faisoient iamais que cēt accord ne se passast par vne Sentence qu'il donnoit au nom de l'Ynca, qui tenoit lieu d'une Loy inuiolable, & auoit la mesme force que si le Roy l'eust prononcée. Que si quelquesfois le Iuge ne pouuoit mettre d'accord les parties, en tel cas il donnoit aduis à l'Ynca des difficul-

200 LE COMMENTAIRE ROYAL,
tez quil'empeschoient, & de ce que l'vne & l'autre
pretendoiet auoir. Surquoy l'ynca faisoit vn Edit qui
passoit pour Loy; ou bien, s'il n'approuuoit point le
rapport du Commissaire, il ordonnoit qu'il y auroit
suspension de poursuite en ce procès, iusques à la
premiere visite qu'il feroit en cette Prouince, afin
qu'apres auoir veu sur les lieux le fait dont il s'agis-
soit, il en ordonnast definitiuement; Ce que ses Su-
jets tenoient à singuliere faueur.

*Que les Decurions deuoient rendre compte de ceux
qui naissoient & qui mouroient.*

C H A P. XIII.

POur reuenir aux Caporaux ou aux Decu-
rions, outre que par le deuoir de leur
charge, ils estoient obligez de proteger
leurs gens, & d'en estre comme les Pro-
cureurs Fiscaux, il falloit pareillement qu'à chaque
mois de l'année ils rendissent compte à leurs Supe-
rieurs d'un degré à l'autre de ceux des deux sexes qui
naissioient & qui mouroient, & que par consequent
au bout de l'année le Roy en sceust le nombre au
vray, comme aussi de ceux qu'on auoit enuoyez à la
guerre, & lesquels y estoient morts. Ce mesme ordre
des Decurions s'obseruoit en la Milice touchant les
Chefs d'Escadre, les Enseignes, les Capitaines, les
Maistres de Camp, & le General, montant d'un
degré

degré à l'autre. Car ces Chefs par le deuoir de leur charge seruoient à leurs Soldats & de protecteurs & d'accusateurs, d'où il s'ensuiuoit qu'en la plus grande violence de leur guerre, les affaires n'estoient pas moins bien reiglées qu'à la Cour mesme, ny moins tranquilles qu'en pleine paix. Ils ne souffroient iamais le sac, ny le pillage des villes, non pas mesme de celles qu'ils gaignoient à force d'armes. Les Indiens souloient dire, que le soing extraordinaire qu'on apportoit à chastier les premieres fautes, empeschoit qu'on ne faillist ny deux ny trois fois; Et qu'il n'estoit pas possible qu'en vn Estat où l'on ne se donnoit point la peine d'estouffer les mauuais plantes en leur naissance, il ne se comit vne infinité de maux; Qu'au reste ce n'estoit pas vne bonne maxime en vne Republique bien policée, ny vn bon moyen de tenir en bride les meschans, que d'attendre qu'il y eust diuerses plaintes formées cōtre eux; veu que la plupart du temps plusieurs qui en auoient esté mal traitez, ne daignoient se plaindre, pour ne rendre leur infamie publique, & attendoient l'occasion de s'en venger de leurs propres mains; d'où ne pouuoient aduenir que beaucoup de maux, & de pernicieux scandales, ausquels on couppoit chemin, lors qu'on se mettoit en deuoir de conseruer la Iustice aux Bourgeois, & de chastier ceux qu'on sçauoit estre coupables.

Les noms de ces Decurions estoient tirez ordinairement du nombre de leurs Decuries; Comme par exemple ils appelloient les premiers *Chunca Camayu*.

Comme qui diroit, *Celuy qui a charge de dix*. Car le mot *Chunca* signifie dix, & par *Camayu* est denoté *Celuy qui a quelque charge*. Ils en faisoient de mesme des autres denominations, qu'ils tiroiét des nombres, que ie passe sous silence, pour euitier la prolixité, & me contente de dire que les curieux auroient sans doute bien du plaisir à voir deux ou trois nombres multipliez, & composez du mot *Camayu*. A quoy j'adiouste qu'il a plusieurs autres significations, qui se forment des Noms & des Verbes qu'on y entremesse, & que mesme ils s'en seruent quelquefois pour denoter vn *perpetuel Pipeur* & vn *Berlandier*. Car ils appellent *Chunca* quelque ieu que ce soit, pource qu'on les compte tous par nombres. Et d'autant que tous les Nombres aboutissent à celuy de dix, c'est pour cela qu'ils l'ont pris pour le ieu mesme; tellement que lors qu'ils veulent iouer, ils ont accoustumé d'vser du mot *Chuncasum*, comme s'ils disoient à le prendre à la rigueur de sa propre signification, *Comptons par dixaines, ou par nombres*, c'est à dire ioïons. Ce que j'ay bien voulu remarquer, & le rapporter icy, afin de faire voir aux Lecteurs qu'estant tres-certain que les Indiens se seruent d'un mesme mot à diuerses significations, il est grandement difficile de tirer de leurs propres racines les proprietéz de cette Langue.

Par le moyen de ces Decurions, l'Ynca & ses Viceroy, ou ceux qui estoient Lieutenans dans les Prouinces ou dans les Royaumes, scauoient tous au vray, combien il y auoit d'habitans en chaque ville.

Ce qui leur seruoit à partager deuëment, sans fouler personne les contributions des œuures publiques, qu'ils estoient obligez de faire en commun en leurs Prouinces; comme par exemple les Ponts, les Chemins, les Chaussées & ainsi des autres reparations; pource qu'ils faisoient leur compte là dessus, pour enuoyer des gens à la guerre, pour le Combat, & pour le Bagage. Que si quelqu'un en retournoit sans congé, en tel cas sur la simple accusation qu'en formoit son Capitaine, ou bien son Enseigne, son Chef d'Escadre, ou son Decurion dans la ville; on luy faisoit incontinant son procès, par lequel il estoit condamné à la mort, pour auoir esté si lasche & si traistre que d'abandonner ses compagnons, ses parens, son Capitaine, & l'Ynca mesme, ou le General, qui representoit sa personne. Or ce n'estoit pas seulement pour le fait des Contributiōs, & des Roles des gens de guerre, que l'Ynca vouloit sçauoir tous les ans, cōbien il auoit de Suiets de tous âges en chacune des Prouinces & des villes de son Empire. Car ce qu'il en faisoit, estoit pour s'instruire encore touchant l'abondance ou la sterilité de chāque pays; afin de preuenir la famine par ce moyen, & secourir de viures les Bourgeois; comme pareillement pour apprendre quelle quantité de laine & de cotton il faudroit auoir pour les habiller, quād il en seroit temps, ainsi que nous monstrerons ailleurs. De toutes lesquelles choses, l'Ynca commandoit qu'on l'aduerst de bonne heure; afin que sans vser de delay, l'on eust moyen d'assister ses Sujets, quand ils en auroient

besoing. Par où l'on peut voir facilement que les Yncas se donnoient le soing de preuenir les incommoditez de leurs Vassaux; pour le commun bien desquels ils faisoient des choses si merueilleuses, que ce n'est pas sans raison que le R. P. Blas Valera dit en plusieurs endroits de son Histoire, *Qu'au lieu de leur donner le tiltre de Roys, on les deuoit plustost appeller de soigneux & biē aduisez Tuteurs des Orphelins*, à cause dequoy les Indiens pour comprendre le tout en vn mot, les souloient nommer *Amateurs des pauvres*.

Pour empescher que les Gouverneurs & les Iuges, ny tous les autres Officiers subalternes, non plus que ceux qui auoient le maniment des biens du Soleil & de l'Ynca, n'abusassent point de leurs charges, il y auoit des Controleurs & des Commissaires establis exprés, qui s'en alloient secrettement dans les Prouinces, pour s'enquerir des maluersations de tels Officiers; dequoy ils rendoient compte à leurs Supérieurs; afin de les faire chastier par le deuoir de leur charge, & tels Espions estoient par eux appelez, *Cucuy Ricoc*, comme qui diroit *Celuy qui a l'œil par tout*. Ainsi il n'y auoit point d'Officier en tout l'Estat, ny en la maison du Roy & en son Domaine, qui ne fust subalterne à vn autre, & ne dependit de luy; afin que cela l'obligeast à estre sage, & à bien faire sa charge. S'il arriuoit qu'un Gouverneur ou vn Officier qui estoit sous luy, eust peché contre l'equité dans les bornes de sa iurisdiction, ou commis quelque autre offense, il estoit puny avecque plus de rigueur qu'un homme du commun, qui auoit failly de mesme. Car

alors on le traitoit avec vne seuerité d'autant plus grande, qu'il estoit releué par dessus les autres par l'office qu'il exerçoit. Ils alleguoient pour raison, Qu'il n'y auoit aucune apparence de souffrir qu'un homme choisy exprés pour rendre la iustice aux autres, fist des meschancetez luy mesme au lieu de les chastier, & partant qu'il meritoit d'estre puny extraordinairement, pource qu'il offensoit le Soleil, & l'Ynca, qu'il auoiet esleu à cette charge, pensant qu'il deust estre plus homme de bien que les autres.

Opinion des Indiens touchant les Yncas du sang Royal, qu'ils disent n'auoir iamais commis aucune faute.

CHAP. XV.

IL ne se trouue point, à ce que disent les Indiens, qu'ils ayent iamais puny pas vn Ynca du sang Royal, à tout le moins en public pour auoir commis quelque faute qui meritaist vn chastiment exemplaire. Toute la raison qu'ils en donnent est, que la doctrine de leurs Peres, l'exemple de leurs Ancestres, & la voix publique, qui les fait fils du Soleil, naiz pour instruire les hommes, & pour leur faire du bien, les rete-noient dans les bornes d'une si grande moderation, qu'ils seruoient d'un parfait modelle de sagesse à leur Estat, plustost que d'un suier de scádale, & d'une pier-

206 LE COMMENTAIRE ROYAL,
re d'achopement. Ils adioustoient à cela , qu'ils ne pouuoient pas faillir , pour n'en auoir les occasions , qui sont les passions desreiglées , qu'on a pour les femmes , ou pour les biens ensemble , la conuoi- tise , & les autres effets de l'humaine fragilité. De toutes lesquelles choses leur Ynca estoit exempt à ce qu'ils disoient ; Car s'il desiroit des femmes , il luy estoit permis d'en auoir de toutes les sortes ; Et quelque belle que fust vne fille ; il n'auoit qu'à la demander à celuy qui en estoit Pere , qui n'auoit garde de la luy refuser ; au contraire il ne manquoit iamais de la mettre entre ses mains , & de le remercier bien humblement de ce qu'il auoit daigné s'abbaïsser iusques à la prendre pour sa Maïstresse ou pour sa seruante. Ils en disoient de mesme touchant les biens , desquels leurs Yncas n'auoient iamais eu faute , pour vsurper ceux d'autruy , ny souffert aucune incommodité qui les peust obliger à faire des concussions. Car en quelque lieu qu'ils se trouuassent , ils auoient à leur commandement toutes les richesses du Soleil , & des Yncas leurs Predecesseurs , comme en ayant le gouuernement ; à faute dequoy , les Chefs des Iurisdiccions & les Gouverneurs des lieux estoïent obligez de leur fournir tout ce dequoy ils auoient besoin ; alleguant pour raison , qu'en qualité de fils du Soleil , & de freres de l'ynca , ils pouuoient disposer de ses biens , & y prendre telle part qu'ils iugeoient leur estre necessaire. Ils manquoient pareillement de toutes les occasions qui par vn effet de colere ou de vengeance portoient au meurtre les au-

tres hommes. Car tant s'en faut qu'aucun les voulut offenser, qu'au contraire, il n'y auoit celuy d'entre-eux qui ne leur defferast le second rang apres le Roy & qui ne les adorast. Que si quelqu'un pour grand qu'il fust, mettoit en colere vn Ynca, il estoit tenu pour Sacrilege, & puny à la rigueur; de mesme que s'il se fust attaqué au Roy. Aussi peut-on asseurer au vray qu'il n'y eut iamais d'Indien chastié pour auoir offensé vn Ynca, en sa personne, en ses biens, ou en son hôneur; la raison est, pource qu'il ne s'en trouuoit point qui l'osât faire, veu que tous ceux du pays tenoient les Yncas pour Dieux; desquels on peut dire pareillement, qu'ils n'estoient iamais punis pour leurs fautes, d'autant qu'ils n'en commettoient aucunes, du moins qui fussent enormes. Tellement qu'ils se sentoient fort scandalisez, s'il aduenoit que les Espagnols parlant de leur vie, leur demandassent quelque chose qui pût rendre tant soit peu suspecte leur probité. C'est possible de cela qu'un de leurs Historiens, a tiré cette mauuaise consequence. *Que ceux du pays auoient vne Loy entre-eux, qui exemptoit de la mort vn Ynca, quelque crime qu'il eust commis.* Mais tant s'en faut qu'il le faille croire, qu'au contraire telle loy ne pouuoit estre que scandaleuse aux Indiens, pource que par elle il leur eust esté permis de s'abandonner impunement à toute sorte de maux. A quoy s'opposoit directement ce qu'ils disoient d'ordinaire, à sçauoir, *Que les Loix estoient faites indifferemment pour tout le Monde, & qu'en cas qu'un Ynca vint à faillir, ils le degraderoient aussi-tost, le decla-*

208 LE COMMENTAIRE ROYAL,
rant n'estre point du sang Royal ; & le puniroient
auec plus de rigueur que les autres , pource qu'il se
trouueroit que d'Ynca qu'il souloit estre , il seroit
deuenu *Auca*, c'est à dire Traistre, Tyran, & Pariure.

Pedro de Cieça de Leon parlant de la Iustice des
Yncas, touchant la discipline militaire rapporte au
44. Chapitre de son liure ; *Que s'il se faisoit quelque vio-*
lence, ou quelque volerie aux terres frontieres, ceux qui se trou-
uoient coupables estoient chastiez incontinant avec beaucoup de
seuerité ; & qu'en cela les Yncas se monstroient si equitables,
& si rigoureux ensemble ; qu'ils ne pardonnoient pas mesme à
leurs propres enfans, s'ils auoient failly, &c. Et au Chapitre
60. parlant de cette mesme Iustice ; *S'il arriuoit, dit-il,*
que parmy ceux qui accompagnoient l'Ynca il s'en trouuât quel-
qu'un, qui fust si hardy que d'entrer ou dans les champs ou dans
les maisons des Indiens ; quoy que le dommage n'en fust pas grand,
si ne laissoient-ils pas de le faire mourir aussi-tost, &c. Ce qui
s'entendoit generalement de tous, adioust le mes-
me Autheur, & sans aucune distinction des yncas,
pource que leurs Loix estoient vniuerselles. Or ce qui
les obligeoit par dessus tout à bien viure, estoit le
haut tiltre qu'ils se donnoient de fils du Soleil. Car
ils ne se picquoient pas moins de surpasser les autres
en probité qu'en naissance, afin que les Indiens ne
doutassent point que ces qualitez ne leur fussent he-
reditaires. Comme en effet ils le croyoient si bien,
que s'il aduenoit à quelque Espagnol de louer leurs
Roys, ou quelque vn de leurs parens ; *Assurement, luy*
respondoient-ils, il n'y a pas de quoy s'estonner s'ils faisoient
de si grandes choses, puis qu'ils estoient Yncas. Que si tout
au contraire


au contraire on blasmoit vne mauuaise action, *Il est certain, disoient-ils, que iamais Ynca n'a fait cela, s'il n'a esté Bastard ou quelque Imposteur*, comme ils le reprochoient à Atahualpa, pour la trahison qu'il auoit faite à son frere Huascar, qui estoit ynca, & legitime heritier de l'Empire, ainsi qu'il sera dit en son lieu.

En châcune des quatre parties de l'Estat, l'ynca renoit trois sortes de Conseils, dont l'un estoit pour la guerre, l'autre pour le fait de la Iustice ordinaire, & le dernier pour le regard des biens. Or châcun de ces Conseils auoit ses Officiers subalternes, à le prendre des plus grands aux moindres; iusques aux derniers, qui estoient les Decurions, ou les Dixainiers, lesquels de degré en degré deuoient rendre compte aux Cours souueraines de tout ce qui se faisoit dans l'Empire. Il y auoit de plus quatre Viceroyes, châcun desquels presidoit aux Conseils qui se tenoient dans son Gouuernement. Ceux-cy receuoient l'estat des affaires qui se passoient dans le Royaume; pour en rendre compte à l'ynca, duquel ils despendoient immediatement, & estoient Souuerains dans leur Prouince. Il falloit qu'ils fussent yncas legitimes, & bien entendus aux affaires de la paix & de la guerre. Aussi n'y auoit-il qu'eux qui fussent du Conseil d'Estat, & qui receussent de la propre bouche de l'ynca, l'ordre qu'il falloit tenir en quelque temps que ce fust; Ce qu'ils faisoient sçauoir à leurs Ministres, qui le communiquoient aux autres de degré en degré, iusques aux derniers. Il suffira d'auoir dit

210 LE COMMENTAIRE ROYAL,
cecy touchant le Gouuernement & les Loix des Yncas : passons outre maintenant dans le discours de leur vie & de leurs faits , où nous entremeslerons les choses qui nous sembleront les plus remarquables.

*La vie & les faits de Sinchi Roca , second Roy
d'entre les Yncas.*

C H A P. XVI.

 L'Ynca Manco Capa succeda son fils Sinchi Roca ; où il est à remarquer que *Roca* qui est le nom propre ne signifie aucune chose que ie sçache en la langue generale du Peru, si ce n'est qu'en la particuliere des Yncas il ayt quelque signification que ie confesse m'estre inconnüe. Le R. P. Blas Valera parlant de ce nom remarque bien que *Roca*, si l'on en prononce l'R. doucement comme nous faisons , signifie vn *Prince prudent*, mais il ne dit pas en quelle langue. Ce qu'il rapporte en l'endroit où il traite des vertus & des belles qualitez de cet Ynca, comme nous verrons cy-apres. Quant au mot *Sinchi*, c'est vn adiectif, qui est le mesme que *Vaillant*. Car ils disent qu'il eust beaucoup de courage & de force, bien qu'il n'exercast ny l'un ny l'autre à la guerre, pource qu'il ne la faisoit à personne. Dequoy toutesfois il donnoit de bonnes preuues, quand il estoit question de luter, de courir,

de sauter, de tirer vne pierre, de darder vn lauelot, & de faire toute autre sorte d'exercices, où il s'agissoit de la force; en matiere desquels, il surpassoit tous ceux de son temps.

Ce Prince ayant solennellement fait son deuoir en la pompe funebre de son Pere, & pris la couronne Royale, qui estoit vne bordure de couleur, fit dessein d'estendre plus loing les bornes de son Empire. Pour cela mesme ayant fait vne assemblée des Principaux Curacas que son Pere luy auoit laissez, il les harâgua long-temps, pour leur donner à connoistre sa volonté. Entre les autres choses qu'il leur remonstra par ce discours, il leur dit particulieremēt celles-cy; Que son Pere voulant retourner au Ciel luy auoit recommandé sur tout de conuertir les Indiens à la connoissance & à l'adoration du Soleil; Et partant que pour executer son commandement il estoit resolu de faire assembler tous ceux des terres frontieres, pour leur dire; Que puis qu'ils tenoient l'Ynca pour leur propre Roy, ils estoient obligez comme luy, de rendre les mesmes deuoirs au Soleil, qui estoit leur commun Pere; Qu'il leur enioignoit expressement de le faire ainsi, puis que cela ne pouuoit tourner qu'à leur proffit, & au bien de leurs voisins; Qu'il importoit grandement de les tirer hors de leurs ordures, & de leur brutale façon de viure; qu'eux mesmes pouuoient bien connoistre par leur propre exemple, combien leur vie presente estoit differente de celle qu'ils auoient menée par le passé, auant la venue de l'Ynca leur Pere; Et que par consequent il falloit

que cela les obligeat à luy ayder à reduire ces Barbares ; afin que les autres se rangeassent plus facilement, quand ils verroient les grands biens que leurs voisins auroient receus par ce changement de vie.

La responce que les Curacas firent à cecy fut, qu'ils estoient prests d'obeir à leur Roy, pour l'amour duquel ils se ietteroient tres-volontiers dans le feu, s'il en estoit besoing. Surquoy ils acheuerent leur Conference, & prirent iour pour se mettre à la Campagne. Comme il fut venu, l'Ynca sortit avecque ses gens, & fut iusques à Collasuyu, qui est au midy de la ville de Cozco. Là il fit assembler ceux du pays, & tascha d'abbord de les gagner par belles paroles, leur persuadant par l'exemple des autres, que la raison les obligeoit de se soubmettre à l'Empire de l'Ynca, & à l'adoration du Soleil. En effet ceux des Nations qu'on appelle Puchina, & Canchi, qui sont en cette frontiere, s'y accorderent incontinant, & obeirent à l'ynca. A quoy ils furent portez par leur propre naturel, qui les rendoit enclins à tout croire, principalement en matiere de nouveauté, comme c'est la coustume des Indiens ; mais encore plus par l'exemple de ceux qu'ils voyoient desia reduits, l'imitation d'autrui estant la chose du monde dont ils se picquent dauantage, & la plus capable de les conuaincre. Ainsi durant tout le temps que l'Ynca vescut, il gagna peu à peu ces peuples de la façon que nous auons ditte, sans recourir aux armes ny à la force. Tellement que par ce moyen il estendit de ce costé là, les bornes de son Empire iusques à la ville

que l'on appelle Chuncara, c'est à dire vingt lieues au de là du pays que son Pere auoit conquis ; & se rendit maistre de plusieurs villes, qui sont aux deux costez du grãd chemin. Ayant ainsi reduit ces Barbares, il prattiqua enuers eux les mesmes maximes de son Pere, qui furent, de leur apprendre à cultiuier la terre, de les instruire en la vie morale & naturelle, & de leur remonstrier doucement, qu'ils deuoient quitter leurs Idoles & leurs mauuaises coustumes, pour adorer le Soleil, & faire ses commandemens, qui consistoient en l'observation des Loix que luy mesme auoit reuelées & declarées à l'Ynca Manco Capac. Aussi arriua-t'il que les Indiens luy obeyrent sans difficulté, & firent de poinct en poinct tout ce qu'il desira d'eux ; De maniere qu'ils vescuient depuis vn assez long-temps sous le nouueau gouuernement del'Ynca Sinchi Roca, lequel à l'imitation de son Pere, fit de son costé tout ce quiluy fut possible pour le commun bien de ses Sujets, qu'il traita paisiblement.

Quelques Indiens tiennent que cét ynca ne gaigna qu'autant de pays qu'il y en a iusques à Chuncara ; Comme en effet, à le bien considerer, on trouuera que c'estoit assez, veu le peu de pouuoir qu'auoient alors les Roys yncas. Mais il y en a plusieurs qui le font aller bien plus auant, & qui disent qu'il gaigna beaucoup d'autres villes le long du grand chemin d'Vmasuyu, à sçauoir Cancalla, Cacha, Rurucachi, Assillu, Afancatu, & Auancani, iusques à Puçara d'Vnasuyu ; qu'on appelle ainsi, pour la

distinguer d'auec vne autre ville du mesme nom, qui est en la Contrée d'Orcosuyu. Mais ceux qui ont escrit cela me pardonneront, s'il leur plaist, si ie dis que c'est vne impertinence à tous autres qu'à ceux du Peru de s'amuser à nommer ainsi en particulier les villes & les Prouinces. Et d'autant que Puçara signifie forteresse, ils disent encore que ce Prince fit bastir celle-cy, pour estre comme la frontiere du pays qu'il audoit cōquis; & que du costé des Antris, il gaigna tout ce qu'il y a d'estenduë iusques à la riuiera qu'on appelle *Callahuaya*, où s'engendre de l'or si pur & si fin, qu'il passe vingt-quatre carats; comme pareillement, tous les autres Bourgs que l'on trouue entre *Callahuaya*, & le chemin Royal d'*Ymasuyu*, où sont les villes que nous auons cy-deuant nommées. Mais soit qu'il en faille croire les vns, ou les autres, & que ce fust ou le second ynca, ou le troisieme qui fist tributaires ceux de ces Contrées, tant y a qu'il est bien certain que les yncas les gaignerent, non par la force des armes, mais par le moyen des persuasions & des promesses dont ils leur firent sentir les effets. Or pource qu'il n'y eut aucune guerre en ces Conquestes, l'on n'en peut asseurer autre chose, sinon qu'elles durerent plusieurs années, sans que toutesfois l'on en sçache le nombre precisement, ny mesme du Regne de l'ynca Sinchi Roca, que quelques-vns disent auoir esté de trente ans. Ce Prince ayant assuietti ces peuples, se comporta enuers eux à l'imitation d'un bon iardinier; lequel ayant planté quelque arbre le cultiue soigneusement de toutes les

façons qui luy semblent nécessaires pour en auoir le fruit qu'il desire. Ainsi il employa toute sorte de soins & de diligences pour polir, & ciuiler ces peuples. Ce qui luy reussit si heureusement, qu'il recueillit à la fin tout le fruit qu'il pouuoit esperer de son trauail. Car ses Sujets, qui luy furent tousiours obeïssants, & fidelles, embrasserent passionnement ses Loix & ses ordonnances, & les obseruerent avec beaucoup de veneration, pource qu'on leur faisoit croire que c'estoient autant de commandemens du Soleil, leur protecteur & leur Dieu.

L'Ynca Sinchi Roca ayant vescu plusieurs années en la tranquillité que nous auons ditte, mourut à la fin, disant qu'ils s'alloit reposer avecque son Pere le Soleil, apres tant de peine qu'il auoit eüe à reduire les hommes à sa connoissance, & à l'adoration qu'ils luy deuoient. Il laissa pour successeur *Lloque Yupanqui*, qu'il auoit eu de Mama Cora, ou selon quelques-vns de Mama Oello sa femme & sa sœur. Outre ce Prince son heritier, il eut d'autres fils de sa femme, & de ses Maistresses, qui estoient ses niepces, que nous appellons legitimes, pour estre sorties de son sang. A quoy il faut adiouster qu'il eut quantité de Bastards des autres femmes Estrangeres, dont il entretenoit vn grand nombre, afin d'accroistre la race & la maison du Soleil, comme souloient dire les Indiens.

Du troisiſme Roy Lloque Yupanqui, & de la ſignification de ſon Nom.

C H A P. XVII.

L'Ynca Lloque yupanqui fut le troisiſme Roy du Peru: on l'appella *Lloque* à cause qu'il estoit gaucher; Ce qui luy arriua par la faute & le peu de soin de ceux qui l'esleuerēt en son enſace. Quant à ce nom *Yupanqui*, il luy fut donné à cause de ses vertus & de ses faits memorables. Surquoy ie diray qu'afin de comprendre quelques façons de parler, dont les Indiens du Peru ont accoustumé d'vſer en leur langue generale, il est beſoing de ſçauoir, que le mot *Yupanqui* tiré d'un Verbe, est la ſeconde personne du futur imparfait de l'indicatif, au nombre ſingulier, qui signifie *tu compteras*. Où il est à remarquer qu'en un ſeul mot ainſi proferé absolument ils comprennent tout ce que l'on ſçauroit s'imaginer à la loüange d'un Prince, comme s'ils diſoient; Tu compteras ſes beaux faits, ſes excellentes vertus, ſa pieté, ſa clemence, & ainſi du reſte; ce qui est vne maniere de parler qu'ils tiennent pour elegante. Or bien que les paroles en ſoiēt courtes, comme il me ſemble auoir dit, ſi ne laissent elles pas d'estre grandement ſignificatiues d'elles meſmes. Que ſi les Indiens vſoient ainſi des noms, ou des verbes qu'ils impoſoient à leurs Roys, ils le faisoient

faisoient à dessein, afin de comprendre tout ce que l'on pouuoit dire là dessus, comme nous l'auons monsté en ce mot *Capac*, qui signifie *Riche*, non pas en biens de fortune, mais en toutes les vertus qu'un bon Prince peut auoir. Comme cette façon de parler estoit estimée noble, ils l'appliquoient à leurs Roys tant seulement, & non pas aux autres, quelques grands Seigneurs qu'ils fussent. Car ils croyoient estre de la bien-seance, de ne point rendre commun ce qu'ils attribuoient à leurs Yncas; & faire autrement passoit chez eux pour un Sacrilege. En quoy, ce me semble, ces noms auoient ie ne sçay qu'elle conformité avecque celui d'*Auguste*, que les Romains donnerent à Octauius Cesar pour ses vertus eminentes; estant certain qu'il perd toute sa grace & sa maiesté, si on l'attribue à un autre qu'à un Empereur, ou à quelque Monarque.

Que si l'on m'allegue que ces mots *Tu compteras*, se peuuent indifferemment approprier au bien & au mal, ie respondray à cela, qu'en ces termes, qui sont de l'Elegance de cette langue, les Indiens n'vsent iamais du mesme Verbe, pour donner à entendre le bien & le mal, mais l'un des deux tant seulement. Comme au contraire quand ils veulent parler d'un mauuais Prince, ils prennent un autre Verbe different, la signification duquel est appropriée aux meschancetez de celui qu'ils blasment. A quoy peut seruir d'exemple le mot *Huacanqui*, lequel à parler de mesme, en temps, en nombre, & en personne, signifie *tu pleureras*, à sçauoir ses cruauitez inhumaines.

218 LE COMMENTAIRE ROYAL,
exercées en public & en particulier, soit par le poi-
son ou par le glaive, ensemble son insatiable auari-
ce, iointe à ses actions tyranniques, qu'il a faites sans
distinguer les choses profanes d'auec les sacrées, &
pour le dire en vn mot *tu pleureras*, tout ce qu'un mau-
uais Prince a de vicieux, & de méchant pour attirer
les larmes des hommes. Et d'autant, qu'à leur iuge-
ment il ny auoit rien de mauuais à pleurer en leurs
Yncas; quand ils vsoient du Verbe *Huacanqui*, cela
s'entendoit des Amoureux; Comme s'ils eussent
voulu dire, *qu'ils pleureroient* à cause des inquietudes &
des peines que les Amans ont accoustumé d'auoir.
Ainsi en la mesme signification que nous auons dit-
te, les Indiens attribuerent à trois autres de leurs
Roys ces deux noms *Capac* & *Yupanqui*, pour s'en estre
rendu dignes, comme nous verrons cy-apres. Il y en
eust aussi plusieurs du sang Royal, qui les prirent, & qui
du nom propre qu'ils donnerent aux Yncas en firent
vn surnom, comme il est arriué en Espagne rouchant
celuy d'Emanuel, qui de nom propre d'un Infant de
Castille est deuenu surnom en ses descendans.

*Des conquestes que fit l'Ynca Lloque
Yupanqui.*

C H A P. XVIII.



Pres que Lloque Yupanqui se fut mis en pos-
session de son Royaume, & qu'il en eust fait
la reueuë en personne, il se resolut de l'a-
grandir, & d'en estendre les bornes le plus loing qu'il

pourroit. Il fit leuer pour cét effet six ou sept mille hommes de guerre, afin de s'en aller à cette Conqueste avecque plus de puissance, & d'autorité que ses Predecesseurs; depuis le regne desquels il y auoit desia soixante ans d'escoulez. Pour mieux venir à bout de son dessein, il s'aduisa que ce n'estoit pas assez d'essayer à gagner les voisins par le moyen des persuasions ou des prieres; mais qu'il luy falloit encore employer les armes, & la puissance, principalement contre les plus obstinez. En cette entreprise il prit pour Maistres de Camp deux de ses Oncles; & pour ses Capitaines & ses Conseillers quelques autres de ses parens: puis laissant le chemin d'*Vmasuyu*, que son Pere auoit tenu en sa Conqueste, il prit celui d'*Orcosuyu*. Où il est necessaire de remarquer que l'un & l'autre se diuisent à Chuncara, d'où ils aboutissent au destroit appellé Collasuyu, & s'estendent vers le grand Marecage de Titicaca.

Si tost que l'Ynca fut hors de cette frontiere, il entra dans vne grande Prouince appellée *Canas*, où il enuoya des hommes exprés à ceux du Pays, pour leur dire de sa part, Qu'ils eussent à se reduire au seruice, & à l'obeïssance du Fils du Soleil, & à quitter leurs pernicieux Sacrifices & leurs coustumes brutales. Mais auant que passer outre, les Canas employèrent quelque temps à s'enquerir de tout ce que l'Ynca leur demandoit. Ils voulurent sçauoir par mesme moyen quelles Loix ils deuoient suiure, & quels Dieux adorer. De quoy s'estans esclaircis, ils firent responce, qu'ils estoient contents d'adorer

220 LE COMMENTAIRE ROYAL,
le Soleil, d'obeyr à l'Ynca, & d'observer ses Loix
pource qu'elles leur sembloient meilleures que les
leurs propres. Cette resolution prise, ils s'en allerent
au deuant du Roy, & se declarerent ses tributaires,
& ses Vassaux. L'Ynca leur laissa donc des gens, tant
pour les instruire en leur Idolatrie, que pour leur ap-
prendre à cultiuer la terre & la partager entre-eux.
Ce qu'il n'eut par plustost fait, qu'il passa outre ius-
ques au pays de ceux qui sont appelez *Ayauri*. La res-
ponse que rendirent ceux-cy aux remonstrances &
aux prieres qui leur furent faites, fut qu'ils vouloient
tous mourir resolument pour la deffence de leur li-
berté; Ainsi n'estant pas possible de les auoir par la
douceur, ny par l'exemple des autres Indiens, qui
s'estoient reduits, tant ils estoient endurcis & ob-
stinez en leur resolution; Il ne fut, plus question que
d'en venir à la force. Pour cét effet l'Ynca voyant qu'il
luy arriuoit tout le contraire de ce qui estoit aduenu
à ses Predecesseurs, se resolut de combatre ces Bar-
bares, principalement quand il apperceut qu'ils ne
vouloient entendre aucunes raisons. Voila donc que
luy & ses gens se mirent tous en bataille, plustost
pour se deffendre d'eux, que pour leur nuire de vo-
lonté deliberée. En ce combat, qui dura vn assez
long-temps, il y en eut de part & d'autre quelques-
uns de tuez & de blesez, sans qu'on pût iuger de
quel costé panchoit la victoire. Mais enfin les enne-
mis firent retraite en leur ville, où ils se fortifierent
le mieux qu'ils peurent, faisans tous les iours des
sorties contre les gens de l'Ynca. Luy cependant,

pour ne contreuenir aux choses que ses Predecesseurs auoient desirées, vsoit de toute sorte d'excuses, afin de ne vuidier ce differend par vn combat general; & comme s'il eust esté luy-mesme assiege il souffroit genereusement les laschetes & les iniures de ces Barbares, recommandant tousiours à ses gens de les boucler, s'il estoit possible, & les tenir estroitement assiegez, afin de les reduire à se rendre sans en venir aux mains. Mais cette bonté de l'Ynca ne seruant qu'à aigrir plus fort le courage des assiegez, estoit cause qu'ils deuenoient de iour en iour plus obstinés, & plus farouches au combat. De sorte qu'ils estoient bien si hardis, que d'entrer iusques au quartier de l'Ynca, quoy que toutesfois en ces escarmouches & en ces rencontres, ils eussent tousiours du pire.

Cependant pour empescher que cette resistance des Ennemis ne seruist d'exemple aux autres Nations, & ne les portast à prendre les armes insolemment; l'Ynca se resolut de chastier ces Mutins, & pour ce sujet il enuoya querir du renfort, plus pour monstrier sa puissance; que pour aucun besoing qu'il en eust. Auecque cela, il tint les ennemis de si près, & les assiegea si bien de toutes parts qu'ils ne pouuoient plus sortir en façon quelconque, pour aller donner ordre aux choses qui leur estoient necessaires. Dequoy ils s'affligeoient grandement, & encore plus de ce que les viures commençoient à leur manquer. A la fin, pour essayer à se tirer par la force de leurs bras, des grandes extremitez où ils estoient, ils firent vne sortie, & chargerent rude-

ment les gens de l'Ynca qui leur résisterent d'un grand courage. En ce combat il y en eut quantité de tuez & de blesez de part & d'autre. Toutesfois les Barbares y eurent du pire, & se trouuerent si mal de la bataille, qu'ils n'y oferent plus retourner, ny faire d'autres sorties. Et bien qu'il fust facile aux gens de l'Ynca d'en mettre la plus-part au fil de l'épée, si est-ce qu'ils n'en voulurent rien faire, & se contenterent de les tenir tousiours assiégez, pour les obliger à se rendre volontairement. Cependant les gens de secours que l'Ynca auoit enuoyé querir, arriuerent dans le Camp; Ce qui fit que les Ennemis perdirent courage, & qu'ils se rendirent, voyant bien que la place n'estoit plus tenable. L'Ynca les receut à discretion, sans aucun traité; & leur ayant enuoyé faire vne serieuse reprimande, pour le peu de respect qu'ils auoient porté au fils du Soleil, il leur pardonna, & mit ordre qu'on eust à les bien traiter, sans auoir esgard à l'obstination qu'ils auoient monstrée en leur résistance. En suite de quoy, il leur laissa des hommes pour les instruire, & pareillement pour faire election des biens qu'ils iugerent les plus conuenables au Soleil & à l'Ynca, pour les approprier à l'un & à l'autre. Ce qu'il n'eut pas plustost fait, qu'il s'en alla à Pucara, où il fit bastir vne forteresse qu'il appella de ce nom, afin qu'elle seruist à deffendre la frontiere de cé pays qu'il auoit conquis. Cela luy sembla necessaire encore, pour tenir en bride les habitans de cette ville, qu'il auoit fallu gagner à force d'armes, ioint que la nature du lieu seruoit de

fortification à cette place, où il mit vne bonne garnison ; puis il reprit le chemin de Cozco, & y fut receu avec beaucoup de resjouissance.

*De la conqueste de Hatun Colla, & des plaisans
contes que font les Collas touchant leur
Genealogie.*

CHAP. XIX.



Velques années apres l'Ynca Lloque Yupanqui s'aduifa de retourner à la conqueste & à la reduction des Indiens. Car dès leur aduenement à la Couronne les Yncas ayant semé le bruit que le Soleil les auoit enuoyez icy bas, pour tirer les hommes de leur brutale façon de viure, & leur apprendre la Politique; leurs successeurs entretindrent tousiours leurs Sujets en cette opinion, couurant leur ambition de ce beau pretexte ; *Que le Soleil le vouloit ainsi*, combien qu'en effet leur principale intention fust d'assuiettir les Indiens à leur Empire. Ce fut donc avecque ce mesme pretexte que l'Ynca mit sur pied huiet ou neuf mille hommes de guerre ; si bien qu'ayant donné ordre aux Officiers & aux Capitaines de son armée, il s'en alla par la Prouince de Collasuyu, iusques à la forteresse de Pucara, où arriva depuis la deroute de Francisco Hernandez Giron, en la bataille qui fût appellée du nom de ce

224 LE COMMENTAIRE ROYAL,
fort. De ce lieu là il enuoya ses Auancoueurs à Paucarcolla, & à Hatuncolla, d'où prit son nom la Contrée de Collasuyu, qui est vne fort grande Prouince, laquelle en contient plusieurs autres sous le mot de Colla. Ils dirent de sa part à ceux du pays, qu'ils ne fissent point de resistance, comme les Ayauriens, que le Soleil auoit chastiez par le glaive & par la famine, pour auoir esté si hardis que de prendre les armes contre ses enfans; & qu'il en feroit autant d'eux, s'ils se laissoient choir dans la mesme faute. Cette proposition estant faite les Collas ne furent pas long temps pour en resoudre, & les Principaux d'entre-eux s'assemblerét pour cét effet dans Hatuncolla, qui signifie Colla la grande. Là se representant que le malheur adueni n'aguere à ceux d'Ayauri & de Pucara, estoit vne punition du Ciel; Et prenant exemple à l'infortune d'autrui, ils respondirent à l'Ynca, qu'ils estoient fort contents d'estre ses Sujets, d'adorer le Soleil, d'obeyr à ses Loix, & de les obseruer exactement. Apres cette response, ils s'enallerent au deuant de luy avec des acclamations solempnelles, & de nouueaux chants d'allegresse, qu'ils inuenterent pour tesmoigner leur esprit.

L'Ynca receut les Curacas avec beaucoup d'aplaudissemēt, & leur fit quantité de presens, iusques à leur donner de ses propres robbes; ce qu'ils tindrent à singuliere faueur. Depuis luy mesme & ses Descendans, cherirent fort ces deux villes, & particulièrement *Hatuncolla*, pour les grandes demonstrations que les Habitans leur auoient données de leur

leur bienueillance. Aussi les Yncas leur furent toujours fauorables, & recogurent leurs bons serui-
ces, tant qu'ils vescurent, iusques à les recomman-
der à leurs successeurs, lors qu'ils se voyoient sur le
poinct de rendre l'esprit. De quoy ne se contentant
pas, ils embellirent cette ville avecque le temps de
quantité d'Edifices extremement beaux, & mesme
d'un Temple dedié au Soleil, & d'une maison de Re-
ligieuses, qu'ils y fonderent; Chose que les Indiens
prisoient grandement.

Pour mieux entendre ce qui regarde les Collas, il
faut sçauoir que ce sont plusieurs peuples, differents
entre-eux, & qui se vantent aussi d'estre descendus de
diuerfes choses. Car les vns veulent que leurs pre-
miers Peres soient sortis du grand Marefcage de
Titicaca, iusques là mesme qu'auant le Gouverne-
ment des Yncas, ils croyoient auoir pris naissance de
luy, l'adoroient entre leurs Dieux, dont ils auoient
vn grand nombre, & luy faisoient des Sacrifices sur
le bord de ses Riuieres. Les autres, aussi extrauagans
que les premiers, se disoient venir d'une grande fon-
taine, d'où ils s'imaginoient que le premier de leurs
Ayeuls estoit sorty. Il y en auoit aussi qui asseuroient
que leurs Predecesseurs estoient naiz de certaines
fosses, & des creuasses de quelques Rochers fort
grands; si bien qu'ils tenoient ces lieux là pour sa-
crez, & leur faisoient des Sacrifices de temps en
temps, pour recognoissance de ce qu'ils deuoient à
leurs Peres. I'obmets ceux qui se vantoient que le
premier de leur Nation auoit tiré son origine d'un

certain fleuve qu'ils reueroient comme leur Pere, iusques à tenir pour Sacrileges ceux qui en tuoient les poissons, pource qu'ils les croyoient estre leurs freres. Ils faisoient plusieurs autres contes semblables touchant leur Genealogie, & auoient par mesme moyen quantité de Dieux tous differents, qu'ils reueroient pour diuerses considerations, selon qu'ils s'imaginoient. Il est vray neantmoins que les Collas ne laissoient pas d'auoir vn Dieu particulier, qu'ils adoroient tous egalelement, & le tenoient pour le Chef de tous les autres, à sçauoir vn Mouton blanc, auquel ils faisoient des Sacrifices, en recognoissance de ce qu'ils auoient quantité de troupeaux. Ils alleguoient à ce propos que le premier Mouton qu'il y auoit eu au plus haut Monde (c'est ainsi qu'ils appelloient le Ciel,) s'estoit donné plus de soing d'eux que des autres Indiens, & qu'il les aymoît particulièrement, pource qu'il faisoit multiplier le bestail en leur pays, plus qu'en toute autre Contrée. Ce qu'ils s'imaginoient estre veritable, pource qu'en effet les pasturages y estoient beaucoup meilleurs, & les troupeaux mieux nourris qu'en tout le reste du Peru. De maniere que pour recognoissance de ce bien fait les Collas adoroient le Mouton, auquel ils offroient en Sacrifice des Aigneaux & de la graisse; Où il sera bon de remarquer, qu'ils faisoient vne particuliere estime des Moutons, qui estoient tous blancs, d'autant qu'à ce qu'ils disoient, ils approchoient plus que les autres de la Deité de leur premier Pere, pour la ressemblance qu'ils auoient avecque luy.

A ces sottises & à ces contes ridicules estoit iointe vne autre brutalité bien grande. Car en plusieurs Prouinces des Collas, les habitans estoient infames iusqu'à ce poinct, qu'ils permettoient à leurs filles de se prostituer à tous venans, auant qu'estre mariées, & de faire de leur corps, tous les tours de souplesse, & toutes les desbauches imaginables. Tellement que les plus dissoluës d'entre-elles trouuoient plustost à se marier que les autres, pource que l'excez du vice leur tenoit lieu d'une tres-haute vertu. Mais les Roys Yncas abolirent depuis toutes ces pernicieuses coustumes; principalement celle qu'ils auoient, touchant la pluralité de leurs Dieux. Car ils leur persuaderent enfin, qu'il n'y auoit que le Soleil qui meritaist d'estre adoré pour son excellence, & sa beauté merueilleuse, outre que toutes les choses qu'ils tenoient pour Deitez, luy deuoient l'estre & la nourriture. Or bien que les contes qu'ils faisoient de leur Genealogie fussent ridicules, si est-ce que les Yncas ne les contredisoient point; Au contraire, comme ils se picquoient eux mesmes d'estre venus du Soleil, ils estoient bien-ayses qu'il y eust quantité de telles fables, afin que la leur passast pour vray-semblable, & que cela seruist pour en faciliter la creance.

Après que l'ynca eut mis ordre au gouvernement des principales villes de tout ce pays, tant pour le fait de la Religion, que des reuenus du Soleil & de l'ynca, pour estre annexez à leur Domaine, ils aduinsa de retourner à Cozco; & ne voulut point pour

228 LE COMMENTAIRE ROYAL,
cette fois aller plus auant en ses conquestes. Car les
Yncas tenoient vne maxime fondée sur la raison, &
sur le bon ordre, qui estoit, d'aduancer peu à peu
leurs conquestes, sans y apporter de la violence; Ce
qu'ils faisoient à dessein, afin que tous leurs Sujets
allechez par la douceur de leur gouuernement, inui-
tassent leurs voisins à s'y soubmettre; Comme en
effet, ce procedé estoit bien meilleur que s'ils eussent
tout à la fois enuahy plusieurs Contrées, chose qu'ils
ne pouuoient faire sans scandale, & sans se rendre
coupables d'ambition, de conuoitise, & de tyran-
nie.

*Le grand Pays de Chucuytu se soubmet paisible-
ment à l'Empire de l'Ynca, & plusieurs
Prouinces en font de mesme.*

C H A P. XX.

L'Ynca fut receu dans Cozco avec de
grands applaudissemens, & des resmoi-
gnages d'une allegresse publique. Il y
passa quelques années avec vne grande
tranquillité, sans penser à autre chose, qu'au gou-
uernement & au commun bien de ses Sujets. Mais
enfin il s'aduifa d'en sortir, & de faire vne reueüe de
son Royaume, tant pour l'extreme contentement
que les Indiens receuoient de le voir en leur pays,
que pour empescher qu'à cause de son absence ses

Ministres ne deuinssent nonchalans en l'exercice de leurs charges. Apres que cette visite fut acheuée, il fit leuée de gens de guerre, pour adiouster de nouvelles conquestes à celles qu'il auoit faites par le passé. Auec ces Soldats, qui estoient dix mille de nombre, conduits par des Capitaines d'esslite, il se rendit à Hatuncolla, & aux confins de Chucuytu, Province extremement peuplée, & qui pour estre des principales de tout le pays, fut donnée à l'Empereur, au partage que les Espagnols firent de ces terres. Y estant arriué, il enuoya sommer les habitans à son accoustumée, leur faisant dire qu'ils adorassent le Soleil, & le tinssent pour leur Dieu. Alors ceux de Chucuytu, bien que grandement puissants, & dont les Predecesseurs auoient conquis quelques villes de cette frontiere, ne voulurent point neantmoins resister à l'ynca; Au contraire ils s'offrirent par leur responce, à luy obeyr tres-volontiers, pource qu'il estoit Fils du Soleil, de la clemence & de la bonté duquel ils s'asseuroient tellement, que pour iouyr de ses biens-faits, ils estoient contents de se donner à luy, & se rendre ses Vassaux.

L'ynca les receut auec sa courtoisie ordinaire; leur fit des caresses & des presens, chose qui plaisoit fort aux Indiens; Et voyant le bon succez qu'auoit eu cette conqueste, enuoya sommer de mesme les autres villes prochaines, iusques au Canal du grand Lac, ou du Marescage de Titicaca; Ce qui luy reüssit si bien, qu'elles obeïrent, toutes à l'imitation de celles de Hatuncolla, & de Chucuytu. Les principales

230 LE COMMENTAIRE ROYAL,
de ces villes furent Hillaui, Chulli, Pumata, & Cipita, dont ie me contente de faire mention generalement, sans m'arrester aux demandes ny aux responses que firent les Habitans de châque ville en particulier, pource qu'elles furent toutes conformes à ce que nous auons dit cy-deuant, & qu'il n'est pas besoing de le repeter tant de fois. Il y en a qui asseurent que l'Ynca fut plusieurs années à conquerir ces villes. Mais quoy qu'il en soit, cela me semble de peu d'importance, puis qu'ils demeurent tous d'accord de la maniere qu'il se les assuietit.

Les ayant pacifiées, il renuoya son armée, ne retenant près de sa personne que les Gardes qui luy estoient necessaires, & ceux qu'il iugea les plus propres pour l'instruction de ses nouueaux Sujets. Or ce qu'il voulut assister luy-mesme à toutes ces choses, fut en partie pour en haster le succez, & en partie aussi pour fauoriser de sa presence ces villes & ces Prouinces, qui estoient les principales; ioint que cela portoit coup, pour ce qu'il auoit à faire à l'aduenir. Les Curacas & tous leurs Vassaux se creurent fort honorez de ce que l'Ynca daigna passer l'Hyuer parmy-eux; ce que les Indiens tenoient pour la plus haute faueur qu'on leur peust faire. Luy cependant les traita le plus doucement qu'il luy fut possible, adioustant à ses caresses beaucoup de nouuelles faueurs, & d'autres effets de sa bien-veillance, qu'il faisoit naistre de iour en iour, pour les attacher plus puissamment à son seruice: Car l'experience, & l'instruction de ses Ancestres, l'obligeoient à croire,

Que la douceur & les biens-faits estoient les plus puissants charmes que peust auoir vn grand Prince, pour gaigner les Estrangers, & les ranger à l'obeïssance ; A cause de quoy les Indiens publioient de toutes parts la grandeur & la vertu de leur Roy, qu'ils disoient estre vray Fils du Soleil. Or tandis que l'Ynca estoit au pays des Collas, il fit tenir prests dix mille hommes de guerre pour le printemps suiuant; qui ne fut pas plustost venu, qu'ayant ramassé toutes ses troupes, il voulut qu'elles fussent commandées par quatre Maistres de Camp; & enuoya pour General de l'armée vn sien frere, le nom duquel est inconnu aux Indiens. L'ordre qu'il luy donna fut de suiure l'aduis de ces Capitaines en la conqueste qu'il luy enuoyoit faire; Enioignant tres-expressement à ces Chefs, qui estoient cinq; de ne combattre en façon quelconque les Indiens, qui refuseroient de se reduire par la douceur, mais de faire en sorte de les auoir par caresses & par biens-faits, à l'imitation de leurs deuanciers, faisant enuers eux l'office de peres enclins à la paix, plustost que de Capitaines accoustumez à la guerre. Apres ces choses il leur commanda que du mesme costé du Ponent où ils estoient, ils eussent à s'en aller en la Prouince appelée Hurin Pacaça, afin d'y ranger les habitans au deuoir. En effet le General & les Capitaines s'acquitterent si dignement de leur commission, qu'avec beaucoup de bonne fortune, ils conquirent vingt lieuës de pays, à sçauoir iusques à cet endroit qui diuise la coste de la Montagne, appelée vulgairement *Sierra ne-*

uada, pource qu'elle est tousiours couuerte de neige. Il ne leur fut pas mal-ayfé de reduire les Indiens, pour ce que n'ayant ny ordre ny police entre-eux, ils viuoient pêle-mêle comme des bestes sauuages, se laissant gouuerner à celuy des leurs qui l'emportoit par la force, & par la tyrannie: Tellement que sans faire mine de se deffendre, comme gens paisibles & niays, ils se rendirent d'eux-mêmes, au bruit des meruëilles qu'ils oyoiét dire tous les iours des Yncas Fils du Soleil. Le General & ses quatre Chefs furent bien prés. de trois ans à conquerir ce pays, pource qu'ils perdirent plus de temps à faire instruire ces homes brutaux, qu'à se les assuiettir. Comme ils eurent fait cette Conqueste; & laissé des Ministres necessaires pour gouuerner ces gens-là, ensemble des Capitaines & des Soldats, qu'ils y mirent en garnison pour la deffense des terres conquises, ils s'en retournerent trouuer l'Ynca, pour luy rendre compte des choses qu'ils auoient faites. Luy cependant, qui durant cette conqueste s'estoit occupé à la visite de son Royaume, avec vn soing particulier de l'embellir par diuers moyens, & de rendre labourables les terres qui estoient en frische; fit faire de nouveaux canaux, & des bastimens necessaires pour la commodité des Indiens, comme des maisons de retraite, des ponts, & de grands chemins, afin qu'entre les Prouinces, il y eust communication des vnes aux autres. A leur arriuée le General & les Capitaines furent fort bien receus de luy, qui les recompensa dignement de la peine qu'ils auoient eüe; puis s'en retourna.

retourna droit à Cozco, en intention de mettre fin à ses conquestes, pource qu'il creut auoir estendu assez loing les bornes de só Empire. Aussi est-il vray, qu'à le prendre du costé du Nord. Sud, il gaigna plus de quarante lieuës de terre, & deuers L'est huest plus de vingt, iusques au pied de la Montagne dont nous auons parlé cy-deuant, qui diuise le plat pays; Et c'est la distinction que les Espagnols y ont mise par ces deux noms.

Il fut receu dans Cozco avec des acclamations, & des resiouïssances vniuerselles; n'estant pas à croire combien l'aymoient tous les Habitans, à cause de sa douceur, de la bonté de son naturel, & des grands biens qu'il leur faisoit liberalement. Il passa ce qui luy resta de vie dans vn grand calme, n'ayant rien si à cœur que de s'employer au commun bien de ses Vassaux, & de leur rendre Iustice. Il enuoya par deux diuerses fois à la visite de son Royaume le Prince son heritier; qu'on appelloit *Mayta Capac*, auquel il donna pour luy tenir compagnie des hommes d'âge & d'experience, afin que par leur moyen il apprît à cognoistre ses Sujets, & à les bien gouverner. Comme il se vit proche de sa fin, il fit venir ses enfans, & particulièrement le Prince son heritier, leur recommandant sur toutes choses, en lieu de testamēt & de sa derniere volonté, de trauailler tousiours à l'vtilité publique, & d'observer les Loix, & les ordonnances que leurs Predecesseurs leur auoient laissées, par l'ordre exprés du Soleil, leur Dieu & leur Pere, & de ne s'essloigner en rien de ses commandemens. Quant

aux Capitaines Yncas , & aux autres Curacas , qui estoient Seigneurs de plusieurs Vassaux, il les exhorta d'auoir soing des pauures , & d'obeyr à leur Roy ; y adioustant pour conclusion , qu'ils vescuissent en bonne paix ; & que le Soleil son Pere l'appelloit, pour s'aller reposer avecque luy , apres tant de peine qu'il auoit eüe. Ayant dit ces choses , & autres semblables , il rendit l'esprit , & laissa plusieurs enfans de tous les deux sexes , qui luy nasquirent de ses Maistresses. Car de sa femme legitime , qui s'appelloit *Mama Cava* , il n'eust qu'un seul fils , à sçauoir le Prince *Mayta Capac* , qui luy deuoit succeder , & deux ou trois filles. Lloque Yupanqui sceut si bien gagner les cœurs & les volonteiz durant sa vie , qu'apres sa mort il fut pleuré generalement de tous ses Sujets , pour ses vertus eminentes. Aussi le mirent-ils au nombre de leurs Dieux enfans du Soleil ; & comme tel ils l'adorerent publiquement. Mais afin que le Lecteur ne se lasse de voir si souuent vne mesme chose repetée dans cette Histoire , il ne sera pas hors de propos d'entremesler à la vie des Roys Yncas quelques-vnes de leurs coustumes , & de leurs belles qualitez. Car il me semble que le recit en sera plus agreable que celuy de leurs Conquestes & de leurs guerres , qui ont presque toutes esté faites d'une mesme sorte. Commençons donc par leurs sciences , & par la cognoissance qu'ils en ont eüe.

Des sciences que les Incas ont eues , & premierement de l'Astrologie.

CHAP. XXI.



Es Incas eurent fort peu de connoissance de l'Astrologie, & de la Philosophie naturelle: car n'ayant aucun vſage des lettres, ils ne pouoient pas eſtre beaucoup ſçauants. L'on tient neantmoins qu'il y auoit parmy eux quelques bons eſprits, du moins ils les croyoient tels, & les appelloient *Amantas*. Ceux-cy auoient des raisonnemens ſubtils, à la maniere des Philosophes, & en reduiſoient la Theorie en pratique, comme ils le teſmoignoient aſſez ſouuent en certaines choſes qui touchoient le gouuernement de leur Eſtat. Toutesſois pour ce que ne ſachant pas eſcrire, ils ne les peurent transmettre à leurs Succesſeurs, elles perirent enfin avec ceux qui les auoient inuentées. De cette façon ils ignorèrent entierement les ſciences, ou du moins ils n'en eurent qu'une bien foible teinture, ou qu'un ſimple crayon, qui leur venoit de la lumiere naturelle. Et d'autant qu'ils y adiouſterent depuis des traits fort groſſiers, pour les faire voir, & remarquer à tout le monde, il ne ſera pas hors de propos de les demonſtrer icy, & de dire par meſme moyen quel

236 LE COMMENTAIRE ROYAL,
sentiment ils eurent de châce chose.

Il n'y a point de doute qu'ils sceurent la Philosophie morale, & que leurs Coustumes, leurs Loix, & leur maniere de viure furent les liures où ils la laisserent escrite, comme il sera bien ayfé de voir cy après, par ce que nous en dirons. A quoy certes leur seruoit grandement la Loy naturelle, qu'ils s'estudioient d'observer, iointe à l'usage des bonnes mœurs, qu'ils pratiquoient de iour en iour dans leur Republique.

Quant à la Philosophie naturelle, il est bien à croire qu'elle leur estoit inconnüe, & ne les touchoit aucunement. Car comme en leur simple façon de viure ils suiuoient leur inclination, ils ne se soucioient point de sçauoir les secrets de la Nature, pource qu'il n'y auoit rien qui les obligeast à les rechercher. Aussi n'estoit-ce point pour aucune cognoissance qu'ils eussent d'elle, ny des qualitez des Elemens, qu'ils sçauoient que la terre estoit froide & seiche, & le feu chaud & sec, mais bien pource qu'en effet ils sentoient qu'il eschauffoit & brusloit; Si bien qu'ils apprenoient cela par espreuue, non pas par la Philosophie. Que si l'on me dit qu'ils sçauoient les vertus occultes, & les proprietéz de certaines plantes, dont ils souloient vser contre leurs maux, comme nous dirons de quelques-vnés, quand nous parlerons de leur maniere de se guerir, ie respondray à cela, qu'ils l'auoient appris par l'experience & par la necessité, plus que par les voyes de la Philosophie naturelle, comme gens qui ne s'amusoient iamais aux specula-

tions des choses , s'ils ne les touchoient avecque leurs mains.

Pour le regard de l'Astrologie , ils en auoient vn peu plus de cognoissance que de la Philosophie naturelle , pour estre portez à cette haute speculation par des obiets qui resueilloient leur curiosité , tels qu'estoient le Soleil , la Lune , & les diuers mouuemens de la Planete de Venus , qu'ils voyoient tantost deuant le Soleil , & tantost derriere ; Comme pareillement , les changements de la Lune , soit qu'elle fust pleine , ou en son croissant , ou que mesme elle se desrobbaſt à leur veuë en sa conionction , par eux appellée sa mort , pource qu'ils ne la voyoient point durant ce temps-là , qui estoit de trois fois vingt-quatre heures. De cette mesme façon se representant la nature du Soleil , il estoient tous estonnez de voir qu'à diuers temps ils s'esloignoient d'eux , & s'en approchoit , & qu'il y auoit des iours , les vns plus grands que les nuicts , les autres moindres , & les autres egaux. Toutes lesquelles choses furent cause que les esprits s'arrestèrent à les considerer , bien que toutesfois si materiellement , que cette contemplation n'alloit pas plus loing que leur veuë.

Ils s'estonnoient donc des effets de ces choses , & ne se soucioient point toutesfois d'en rechercher les causes ; tellement qu'ils ne mettoient point en question s'il y auoit plusieurs Cieux , & ne s'en imaginoient qu'vn seulement. Ainsi ils ne pouuoient rendre raison , ny du changement de la Lune , ny des

mouuemens des autres Planetes , plus ou moins viftes ou tardifs ; iufques-là mefme qu'ils ne cognoiffoient que les trois Aftres nommez cy-deuant, pour ce qu'ils y trouuoient tant d'efclat & tant de beauté à comparaiſon des autres, qu'eux feuls eſtoient capables de les mettre dans l'admiration. Quant aux Signes celeſtes, c'eſt dequoy ils ne s'aduiferent iamais, ny moins encore de leurs influences. Ils appelloient le Soleil *Ynti*, la Lune *Cuilla*, & l'Eſtoille de Venus *Chafca*, c'eſt à dire cheuelue, à cauſe qu'elle à pluſieurs rayons. Et d'autant qu'ils ne iugeoient des choſes que par les ſens, ils fouloient auſſi arreſter leur veuë ſur les Plyades, & les admirer pour cette ſeule raiſon, que ces Eſtoilles iointes de près leur ſembloient différentes des autres. Or comme il n'y auoit point de neceſſité qui les obligeaſt à la contemplation des autres Eſtoilles, ils ne s'y amuſoient pas auſſi, & ne donnoient point de nom particulier qu'à celles que nous auons dittes, les nommant toutes en general *Coyllur*, qui eſt le meſme qu'Eſtoille.

*De leur façon de compter l'année, & comment
ils cognoissoient les Solstices, & les Equi-
noxes.*

CHAP. XXII.



Velques grossiers que fussent les Yncas; si ne laisserent-ils pas de cognoistre que le mouuement du Soleil s'acheuoit dans vne année. Ce qu'ils denoterent par le nom *Huata*, c'est à dire *l'an*, bien qu'à le prendre en vne autre signification, ce mesme mot soit vn Verbe qui signifie *attacher*, sans changer ny la prononciation ny l'accent. Le menu peuple comptoit les années par les Recoltes, & tous ensemble cognoissoient les Solstices du Printemps, & de l'Hyuer d'une façon extraordinaire. Dequoy ceux du pays laisserent des marques grandement visibles; qui furent huit tours, qu'ils firent à l'Orient, & autres huit au Ponent de la ville de Cozco, flanquées quatre à quatre; & deux desquelles, plus petites que les autres, & d'environ trois estages de hauteur, estoient posées entre deux autres beaucoup plus grandes. Les petites estoient à huit, dix, & vingt pieds l'une de l'autre, & aux costez se voyoient rangées en pareille distance les deux autres tours, beaucoup plus grandes que celles qui en Espagne sont des eschauguetes aux ports de mer, ou sur les fron-

tieres. Celles-cy seruoient comme de visée, afin de mieux descourir, de maniere que ce qu'il y auoit d'espace entre les petites tours par où le Soleil passoit à son leuer & à son coucher, estoit le poinct des Solstices, de telle sorte que les tours de l'Orient respondoient à celles du Ponent, pour preuue du Solstice du Prinremps ou de l'Esté.

Pour le mieux verifier, l'Ynca se mettoit pour l'ordinaire en vn lieu commode, d'où il regardoit attentiuement, si le Soleil le leuoit & se couchoit entre les deux petites tours qui estoient à l'Orient & au Ponent, & ainsi par le moyen de la peine que se donnoient les plus habiles des Indiens à faire ces observations, ils se rasseuroient en l'Astrologie de leurs Solstices. Pedro de Cieca, Chapitre 92. fait mention de ces tours, & le P. Ioseph Acosta en dit aussi quelque chose au 3. Chapitre de son sixiesme liure. Mais ny l'un ny l'autre n'en designent pas le poinct. Les Indiens les denotoient par des marques si grossieres, pour ne le sçauoir faire autrement, ny les demonstrent par les iours des moys, auxquels tels Solstices ont accoustumé d'arriuer. Car ils souloient compter les moys par les Lunes, & non par les iours, comme il sera dit cy-apres. Or bien qu'ils fissent châce année de douze Lunes, neantmoins pource que l'an solaire a vnze iours plus que le lunaire commun; comme ils n'auoient pas l'esprit d'ajuster l'un de ces ans avecque l'autre, ils se seruoient pour cela du mouuement du Soleil, pour trouuer leur compte touchant les Solstices, & ne comptoient point par Lunes.

Lunes. De cette façon, ils diuisoient vn an d'auec l'autre, se seruant de l'année Solaire & non pas de la Lunaire pour l'obseruation du temps qu'il falloit semer la terre. Or bien qu'il y en ayt eu quelques-vns qui ont voulu dire qu'ils n'ignoroient point l'art de supputer egalement les deux années, à sçauoir la Solaire & la Lunaire, si est ce qu'il y a de l'apparence qu'ils se trompoient en leur Relation; la raison est, pource que si les Indiens eussent sceu faire cela, assurement ils auroient marqué les Solstices par les iours des moys, ausquels ils arriuent ordinairement, sans qu'il eust esté besoing de faire des tours, ny de prendre tant de peine pour voir leuer le Soleil, & se coucher vis à vis d'elles. Je me souuiens que ie les laissay sur pied l'an 1560. & si depuis ce temps-là l'on ne les a point abbattuës, par elles mesmes on pourra verifier encore si le lieu par où les Yncas souloient prendre garde aux Solstices, estoit vne des tours de la maison du Soleil, ou quelque autre endroit. Dequoy ie ne parleray point icy, pour n'en estre pas assuré.

Ils cognoissoient encore les Equinoxes, & faisoient en ce temps-là de grandes solemnitez. En celuy de Mars, les habitans de Cozco souloient couper leurs Mayz, ou leurs bleds, & se resiouyr entre eux, principalement à Collcampara, qui estoit comme le iardin du Soleil. Mais sur tout en l'Equinoxe de Septembre ils celebroident vne des quatre principales festes qu'ils appelloient *Citua Raymi*, comme il sera dit en son lieu. Pour verifier l'Equinoxe, ils auoient de ri-

ches colonnes artistement trauaillées, & dressées au milieu des Paruis ou des places, qui estoient deuant le Temple du Soleil. Là s'assembloient leurs Prestres, quand ils sçauoient à peu près que l'Equinoxe s'approchoit: & pour le cognoistre ils se donnoient le soing tous les iours de prendre garde à l'ombre que la colonne faisoit. Car il faut remarquer que ces colonnes estoient posées au centre d'un cercle fort grand, & qui contenoit toute l'estendue & la largeur de la place. Du milieu de ce cercle ils tiroient vne ligne de l'Orient au Ponent, la longue experience leur ayant appris en quel endroit ils deuoient chercher leur poinct, & ainsi par l'ombre que la colonne faisoit sur la ligne, ils cognoissoient que l'Equinoxe approchoit. Que si elle occupoit pleinement le milieu, depuis le leuer du Soleil iusques au coucher, & si à midy le Soleil mesme enuironnoit la colonne seule, sans faire aucune ombre, de quelque costé qu'on tournast la veuë, ils tenoient ce iour-là pour l'Equinoxial. Alors ils paroient ces colonnes de fleurs & d'herbes odorantes; puis ils y mettoient dessus la chaire ou le Throsne du Soleil, où ils disoient qu'il se venoit asseoir ce iour-là avec toute sa lumiere, & qu'il s'arrestoit à plein sur ces Colonnes. Aussi l'adoroient-ils particulièrement ce mesme iour, avec les plus grandes demonstrations qu'ils luy pouuoient donner de leur allegresse; & luy faisoient de riches presens d'or, d'argent, de pierrerie, & d'autres choses de prix. Où il est à propos de remarquer, qu'à mesure que les Roys Yncas gai-

gnoient des Prouinces, les Amautas, qui estoient leurs Philosophes, apprenoient par espreuve, que plus ils s'approchoient de la ligne Equinoxiale, & moins d'ombre faisoient les Colomnes en plein midy ; à cause dequoy celles qui estoient les plus proches de Quito ; & dans cette ville mesme & en son parage, iusques à la coste de la mer, estoient les plus estimées , pource que le Soleil y donnant à plein, n'y faisoit aucune ombre à midy. Pour cette mesme raison ils reueroient plus ces Colomnes que les autres , pource disoient-ils , qu'il falloit bien croire que le Soleil ne trouuoit point de siege plus agreable que celuy-là, puis qu'il prenoit plaisir de s'y asseoir droitement , au lieu qu'il ne s'arrestoit aux autres que de costé. Voila les fables que ces Barbares se figuroient en leur Astrologie, où leur imagination ne passoit pas plus auant que les choses qui s'offroient materiellement à leurs yeux. Or pource que telles Colomnes estoient à ces Indiens autant de sujets d'Idolatrie, le Gouverneur Sebastien de Belalcaçar fit abattre celles de toute la Contrée de Quito, & ce qu'il y en auoit par tout le Royaume fut aussi demostly par les autres Capitaines Espagnols.

De ce qu'ils croyoient des Eclipses du Soleil & de la Lune.

C H A P. XXIII.

ILs souloient compter par Lunes les mois de leur année, qu'ils appelloient *Quilla*, à le prendre d'une Lune nouvelle à l'autre; Et n'y auoit point de mois qui n'eust son nom particulier, comme la Lune l'auoit aussi, par le croissant de laquelle ils comptoient les demi-mois, & les semaines par les quartiers, n'ayant aucuns noms pour en specifier les iours. Pour le regard des Eclipses du Soleil & de la Lune, ils les sceurent bien considerer avec admiration, mais non pas en cognoistre la cause. Quand le Soleil s'eclypsoit, ils disoient qu'il estoit fasché contre-eux, pour quelque faute qu'ils auoient commise, puis que sa face en estoit toute troublée comme celle d'un homme en colere; & là dessus, à la maniere des Astrologues, ils pronostiquoient qu'il leur arriueroit bien-tost quelque grande punition. Ils en disoient de mesme de l'Eclipse de la Lune; qu'ils croyoient estre malade, quand ils la voyoient noircie, & asseuroient que si elle acheuoit de s'obscurcir, elle mourroit asseurement, & tomberoit du Ciel, si bien qu'ils periroyent tous, & la fin du monde arriueroit; Ce qui leur donnoit si fort l'alarme qu'aussi-tost qu'elle commeneoit à Eclips-

per, ils se mettoient à faire vn grand bruit, avec des Trompettes, des Cornets, des Atabales, & des Tambours. Avecque cela, ils attachoient les chiens, & leur donnoient plusieurs coups, pour les faire abboyer, comme s'ils eussent inuoqué la Lune, qu'ils croyoient auoir de l'affection pour ces animaux, à cause d'vn signalé seruice, qu'elle en auoit receu autrefois; tellement que par cette plaisante fable, ils s'imaginoient qu'oyant leurs pitoyables abbois, elle prendroit pitié d'eux, & s'esueilleroit de l'assoupissement que sa maladie luy causoit.

Mais quelque extrauagant que fust ce conte, il ne l'estoit pas tant que ce qu'ils s'imaginoient des taches noires qui se voyent sur la face de la Lune. Car cette autre fable auoit ie ne sçay quelle conformité avec celle des anciens Gentils, par laquelle ils feignoient que Diane aimoit les chiens & la chasse; au lieu que celle-cy estoit tout à fait brutale, & contre le sens commun. Ils disoient donc que le Renard s'estant rendu amoureux de la Lune pour son extreme beauté, s'auisa vn iour de monter au Ciel pour se ioindre à elle. Comme en effet il l'embrassa si estroitement, qu'à force de la serrer & de la baiser, il luy fit les taches qui se remarquent en elle. Ce qui est sans doute, vne fable si sottement inuentée, qu'apres celle-là, ie ne pense pas qu'il en faille chercher d'autre, pour faire voir l'impertinence de ces Barbares. Or tandis que la Lune estoit ainsi malade, ils incitoient les enfans & les ieunes garçons à l'inuoquer, les larmes aux yeux, & à faire de grands cris.

248 LE COMMENTAIRE ROYAL,
en l'appellant *Mama Quilla*, c'est à dire la mere Lune
la priant au reste de ne se point laisser mourir, de
peur que sa mort ne fust cause de leur perte vniuer-
selle. A quoy les hommes & les femmes respon-
doient confusement, avec vn bruit si estrange, qu'il
n'est pas possible de s'en imaginer vn semblable.

Ainsi selon que l'Eclypse auoit esté grande ou pe-
rite, ils iugeoient plus ou moins de la maladie de la
Lune. Que si elle s'obscurcissoit entierement, ils la
croyoient morte, & apprehendoient à tout moment
qu'elle ne tombast, pour les faire perir tous; Ce qui
leur faisoit redoubler leurs pleurs & leurs plaintes,
côme gens qui pensoient estre à la fin du monde. Au
contraire quand ils voyoient quelle reprenoit peu à
peu sa lumiere, ils disoiēt qu'elle cōmençoit à se bien
porter, & que le Pachacamac, qui soustenoit l'Vni-
uers, l'auoit guerrie, luy commandant expressement
de ne mourir pas, de peur que tout le monde ne pe-
rist. Mais lors qu'elle s'esclaircissoit à l'accoustu-
mée, ils se resiouissoient tous de sa guerison, & la
remercioient humblement de ce qu'elle n'estoit
point tombee; dequoy ie puis parler au vray pour
l'auoir veu plusieurs fois. Ils appelloient le iour
Punchan, la nuit *Tuta*, & le matin *Pacari*, ioint qu'ils
auoient des noms particuliers, pour denoter les au-
tres parties du iour & de la nuit, comme le leuer de
l'Aurore, la mynuit, & l'heure de midy.

Ils admiroient fort les effets de l'Esclair, du Ton-
naire, & de la Foudre, & les appelloient tous trois en-
semble *Yllapa*, sans que toutesfois ils les adorassent

comme Dieux. Ils les auoient neantmoins en grande veneration, & les tenoient pour les valets du Soleil, qu'ils croyoient faire leur residence en l'air. Par mesme moyen ils rendoient beaucoup d'honneur à l'Arc-en-Ciel tant pour la merueilleuse beauté de ses couleurs, que pour la connoissance qu'ils auoient qu'elles venoient du Soleil; ce qui fut cause que les Roys Yncas le prirent pour leur deuise. A quoy il faut adiouter que chacune de ces choses auoit son logement à part dans la maison du Soleil, comme il sera dit en son lieu. Ils s'imaginoient que les taches noires, qui se remarquent en cette longue trace que les Astrologues appellent vulgairement le chemin de lait, representoient la figure d'une Brebis, qui alaitoit vn Aigneau, comme ils me le monstroient quelquefois à moy-mesme, disant; voyez vous la teste de la Brebis, voyez vous bien l'Aigneau, & le corps de tous les deux? Mais quelque demonstration qu'ils n'en fissent, ie ne pouuois me l'imaginer, & ne voyois que des taches noires.

De ces impressions & de ces figures d'Astrologie, ils en traçoient la peinture en leur imagination; & ne faisoient des pronostiques ny des iugemens que du Soleil, de la Lune, & des Cometes, qu'ils tenoient pour des choses estranges & grandes, qui presageoient la mort des Roys, & la destruction des Royaumes, & des Prouinces, comme nous remarquerons plus particulieremēt cy-après, en vn endroit où il sera parlé de quelques Cometes. Toutesfois leurs pronostiques ordinaires auoient pour fonde-

250 LE COMMENTAIRE ROYAL,
mens les songes, & les Sacrifices, plustost que les
Estoilles, & les impressions de l'air. Mais sur tout les
predictions qu'ils tiroient des songes estoient si
estranges, & si effroyables à les ouyr raconter, que
pour ne scandaliser les ames vulgaires, ie suis bien-
ayse de les passer sous silence. Quant à la Planete de
Venus, pource qu'ils la voyoient, tantost au matin,
& tantost au soir, ils disoient que telle chose arri-
uoit à cause que le Soleil, souuerain Roy des Estoil-
les, vouloit que celle cy, comme la plus belle de
toutes, se tint tousiours près de luy; & qu'elle mar-
chât deuant ou derriere, selon qu'il le iugeoit à pro-
pos.

Quand ils voyoient que le Soleil se couchoit, &
qu'il sembloit se precipiter dans la mer, qui en toute
l'estenduë du Peru est du costé du Ponent, ils disoient
qu'il entroit dedans, où par la violence de sa chaleur,
il desseichoit la plus-part des eaux, & qu'à l'imitation
d'un bon nageur, il faisoit le plongeon par dessous
la terre, qu'ils croyoient estre sur l'eau, pour sortir
le iour d'apres des portes de l'Orient; ce qu'ils ne di-
soient que du coucher du Soleil, sans parler de ce-
luy de la Lune, ny des autres Estoilles. De toutes
lesquelles choses, que les Yncas tenoient pour
vrayes en leur Astrologie, on peut inferer qu'ils n'y
estoyent gueres sçauans. Passons maintenant à la
Medecine, & disons de quelle façon ils en vsoient.

Dela

*De la cognoissance qu'ils auoient de la Medecine,
& de la Methode par eux obseruée en la
guerison de leurs maladies.*

C H A P. XXIV.

Ils tenoient pour vne chose vtile & necessaire l'euacuation par les Medecines, & par la saignée, qu'ils souloient faire aux bras & aux cuisses, sans sçauoir ny à quelles maladies elle seruoit, ny quelle estoit la disposition des veines; & sans y entendre d'autre finesse, sinon qu'ils ouuroient la veine la plus proche de l'endroit où estoit le mal. Que s'ils auoient de grandes douleurs à la teste, ils se faisoient saigner au plus haut du nez, à sçauoir entre les deux sourcils. Quant à leur lancette, elle n'estoit autre que la pointe d'un caillou, qu'ils attachoient à vn petit baston fendu en deux; puis ils l'appliquoient sur la veine; qu'ils ouuroient avec moins de douleur que n'en font les lancettes ordinaires. Pour le regard des Medecines, ils s'en seruoient au hazard, sans sçauoir ny connoistre les humeurs par l'vrine, où ils ne regardoient iamais, ny quelle chose c'estoit que le Phlegme, la Colere, & la Melancolie.

Ils se souloient purger quand ils se sentoient pesans & chargez d'humeurs, bié que toutesfois ils fussent plus sains que malades, & ne prenoiét pour tout

remede que d'une certaine racine blanche, à peu près semblable à des nauets. La doze estoit d'environ deux onces, tant du masle que de la femelle, qu'ils piloient par égales parties, & l'aualoiét dans de l'eau, ou dans un certain breuuage dont ils vsoient ordinairement. Si tost qu'ils auoient pris cette medecine, ils se mettoient au Soleil, afin qu'il leur esmeut les humeurs par la chaleur, & que l'operation en fust meilleure; Comme en effet une heure apres, ils se sentoient si esbranlez par tout le corps, qu'ils ne se pouuoient soustenir. Car alors semblables à ceux qui n'ont pas accoustumé d'aller sur la mer, ils auoient de grands maux de cœur, & la teste leur tournoit; outre qu'ils n'auoient ny nerf ny veine aux bras ou aux cuisses; ny aucune iointure en leur corps, où il ne leur semblast sentir des fourmis, qui les faisoient frissonner. Que s'il faut parler plus particulieremēt de la qualité de ce remede, ie diray qu'il a cela de propre de faire aller par bas & par haut tous ceux qui en prennent, & de les affoiblir tellement, qu'on diroit à tout coup qu'ils s'en vont rendre l'esprit. Ils perdent tout appetit tant que cela dure, & iettent tout ce qu'ils ont d'humeurs dans le corps, iusques à des vers. Mais enfin apres que la Medecine a bien operé, ils se sentent si affamez, qu'ils ne demandent qu'à manger, comme ie l'esprouay moy-mesme à deux diuerses fois que l'on me fit prendre de cette racine, pour me guerir d'un mal d'estomach. Ces euacuations & ces saignées se faisoient par l'ordonnance du plus experimenté d'entre-eux, & particulièrement de

certaines vieilles, telles que sont parmy nous les sages femmes, & de leurs herboristes, d'ot il y en auoit de tres-excellens au temps des Yncas, qui cogoïssent la vertu de plusieurs plantes, & les enseignoient par tradition à leurs descendans. Ceux-cy passoient ordinairement pour de fort grands Medecins, & ne s'employoient qu'à la guerison des Roys & des personnes de leur sang, ou bien des Curacas, & de leurs Parens. Quant à ceux du commun, ils se guerissoient les vns les autres par l'usage des remedes, dont ils auoient appris les vertus de pere en fils. S'il arriuoit que les enfans qui estoient à la mamelle, eussent quelque maladie, ils les lauoient d'vrine au matin, & les enueloppoient avecque leurs langes; iusques-là mesme, qu'ils luy en donnoient à boire. Avecque cela lors qu'en la naissance d'un enfant, il luy coupoient le nombril, ils luy laissoient le boyau de la longueur d'un doigt, & le gardoient avec un grand soing, apres qu'il estoit tombé; puis ils le luy donnoient à sucer, s'il estoit malade. Dequoy pour mieux s'asseurer, ils luy faisoient tirer la langue; & s'ils voyoient qu'elle fust blanche, ils tenoient cela pour vne marque d'indisposition, si bien qu'ils luy donnoient alors le boyau, afin qu'il le sucçast, & il falloit que ce fust le sien propre, pource que celuy d'un autre ne luy pouoit seruir, à ce qu'ils disoient. De vous dire maintenant s'il y auoit en ces choses-là des vertus specifiques, & de secretes proprietes de la nature, ce m'est vne chose impossible, pour ne m'en estre iamais enquis, & n'en auoir ouï parler à

254 LE COMMENTAIRE ROYAL,
personne. Ils ne sçauoient ny l'art de taster le pouls,
ny de iuger d'une vrine ; & toute la connoissance
qu'ils auoient de la fièvre ne se fondoit que sur l'ex-
cessiue chaleur du corps, outre qu'ils se purgeoient,
& se faisoient saigner, auant que tomber malades.
Car lors qu'ils l'estoient, ils vsoient simplement d'un
bon regime de viure, & laissoient faire le reste à la
nature, sans recourir aux remedes. Ils ne sçauoient
ce que c'estoit de clisteres, ny d'onctions, & d'empla-
stres, dont ils n'vsoient que fort rarement, & les
faisoient de choses communes. En un mot peu s'en
falloit que le menu peuple, & les pauvres gens qui
estoient parmy eux, ne se traitassent en bestes. A
quoy i'adiouste pour conclusion, que le froid ou le
frisson de la fièvre tierce ou quarte estoit par eux
appellé *Chuechu*, c'est à dire trembler, & le chaud
Ruppa, qui est le mesme que se brusler, & qu'ils ap-
prehendoient grandement ces maladies, à cause des
extremitez du froid & de la chaleur.

*De la cognoissance qu'ils auoient des Plantes
medecinales.*

CHAP. XXV.



Les sçauoient la secrete vertu de la gomme
d'un certain Arbre qu'ils appellent *Mulli*,
& les Espagnols *Molle*, l'effet de laquelle
est merueilleux, & presque surnaturel en la guerison

des playes. L'herbe *Chilca* chauffée sur vn rechaud, est admirable à guerir les douleurs froides des iointures, & mesme les cheuaux qui ont les pieds gastez ou les nerfs foulez. Ils se seruent aussi d'une certaine racine, comme celle du Chien-dent, mais qui est vn peu plus grosse, pour fortifier les dents, & les genciues, & y faire venir la chair. Pour cét effet ils ont accoustumé de la mettre sur vn rechaud, & de l'approcher du feu, puis quand elle est bien chaude, & presque rostie, ils la couppent à belles dents, & la mettent entre les genciues, où ils la laissent vn peu de temps, iusques à ce qu'elle se refroidisse, avec vne extreme douleur du patient, à qui ce Caustique brusle la bouche. Ceux qui vsent de cette racine se l'appliquent auant que se mettre au liét, & le lendemain matin ils ont les genciues blanches comme de la chair qu'on auroit échaudée; Ce qui les incommode si fort, qu'ils sont deux ou trois iours sans macher, ny sans pouuoir prendre que des choses liquides. Mais enfin cette chair bruslée vient à tomber, & au dessous d'elle s'en descouure vne autre extremement belle & vermeille. Ils se renouellent ainsi les genciues de temps en temps. Ce que ie voulu moy-mesme esprouuer vne fois, sans que i'en eusse besoing; mais ie me souuiens que ie quittay là bien viste cette racine, comme ie vis qu'elle me brusloit.

Ils se seruoient à diuerses fins de l'herbe ou de la plante que nous appellons vulgairement du *Tabac* & les Indiens *Sayri*, qu'ils prenoient par les narines pour se descharger le cerueau. A quoy certes elle est

extremement propre , & a plusieurs autres vertus, que l'experience a fait cognoistre aux Espagnols, qui la nomment pour cét effet, *L'herbe sainte*. l'obmets cette autre Plante que les Indiens appellent *Mateellu*, les proprietéz de laquelle sont presque miraculeuses, pour la guerison du mal des yeux. Elle croist dessus le bord des ruisseaux , n'ayant qu'un pied de hauteur, ny qu'une seule feuille, qui est toute ronde , & ne peut mieux estre comparée qu'à celle que les Espagnols nomment vulgairement *Orejade Abadou*, *Oreille d'Abbé*, qui naist sur les toits en temps d'Hyuer. Les Indiens la mangent creüe , & le goust en est fort bon. Que si on la masche, & si vn peu auant que se coucher l'on en met le jus & le marc en forme d'emplastre sur les paupieres des yeux malades, ferrant le tout d'un bandeau, pour empescher l'herbe de tomber; quelque taye qu'o y puisse auoir, elle la dissipe dans vne nuit, & guerit le mal entierement, pour violente que soit la douleur, & quelque accident qu'il y puisse auoir.

Le rapporteray icy pour preuue de mon dire, que ie mis vn iour de cette mesme herbe sur l'œil d'un ieune homme, qui l'auoit presque hors de la teste, avec vne inflammation si grande , qu'il sembloit estre tout en feu, ioint qu'il s'y estoit fait dessus vne certaine carnosité, qui tomboit presque sur la iouë, & empeschoit qu'on ne discernât le blanc de l'œil d'avecque le noir. Dequoy l'effet fut si merueilleux, que la premiere nuit qu'on y mit de la mesme herbe, l'œil se remit aussi-tost en son assiete naturelle,

& la seconde il fut entierement guery. l'ay veu depuis en Espagne ce mesme ieune homme, qui m'a dit qu'il ne void pas si clair de l'autre œil que de celuy dont il auoit esté si fort malade. l'appris à connoistre cette plante d'un Espagnol qui me la monstra, & qui me iura de plus, qu'ayant esté sur le point de perdre la veüe, il l'auoit recourée en deux nuicts, par la vertu de cette herbe. Aussi quelque part qu'il la vist, il la baisoit mille fois; puis se la mettoit sur les yeux & sur la teste, & ne cessoit de rendre graces à Dieu, de ce qu'il luy auoit suscité vn si bon remede pour le guerir. A cette plante j'en pourrois adiouster plusieurs autres, dont les Indiens mes parens souloient vser en leurs maladies. Mais pource que ie ne m'en souuiens pas, ie suis contraint de les passer sous silence.

L'on peut voir par là que les Indiens Yncas du Peru se seruoient ordinairement de simples, pour se guerir de leurs maux, & non pas de medecines composées. Qu'es'il est vray qu'ils estoient si peu soigneux de leur santé, qui est la chose du monde la plus importante, qu'ils negligeoient d'apprendre la methode & les moyens de la conseruer; il est bien à croire qu'ils n'estoient non plus sçauans en la Philosophie naturelle ny en l'Astrologie, qu'en la Medecine, & encore moins en la Theologie. La raison est, pource qu'ils n'auoient pas l'esprit assez haut, pour l'eleuer iusques aux choses inuisibles; si bien que toute leur Theologie estoit comprise dans le seul nom de Pachacamac. Mais les Espagnols ont esprou-

258 LE COMMENTAIRE ROYAL,
ué depuis ce temps-là les proprieté de plusieurs
choses qu'ils ont parmy eux, qui sont fort propres à
la Medecine, & particulièrement le Mayz, qu'ils ap-
pellent *Cara*. Ce qu'ils ont appris en partie par les
aduis que les Indiens leur en ont donnez; & en par-
tie aussi pour auoir Philosophé sur la nature des cho-
ses, qu'ils voyoient; tellement que l'experience leur
fait voir, qu'outre que le Mayz a beaucoup de suc &
de substance, pour la nourriture du corps humain,
il est fort propre à guerir les maux des reins, les dou-
leurs de la vessie, la grauelle, & les retentions d'uri-
ne. Dequoy ils se sont aduisez, pour auoir pris garde
qu'il n'y a presque point d'Indiës qui soiët trauaillez
de ces maladies, à cause de leur boisson ordinaire,
qui est faite de Mayz, & assez commune à plusieurs
Espagnols, qui sont suiets à tels maux; Ioint que
pour enguerir quantité d'autres, les Indiens font de
ce Mayz vne maniere d'emplastre.

*De ce qu'ils sçauoient de Geometrie, de Geogra-
phie, d'Arithmetique & de Musique.*

CHAP. XXVI.

Les sçauoient la Geometrie, pource que
cette cognoissance leur estoit necessaire
pour mesurer leurs terres, & en faire le
partage entre-eux. Toutesfois ils ne la
possedoient que materiellement, non par la hauteur
des degrez,

des degrez, ny par vne supputation speculatiue, mais par le moyen des niueaux, des neuds, & des petits caillous, dont ils vsoient à faire leurs comptes; Dequoy ie ne parleray pas icy, pource que i'aurois de la peine à me faire entendre. Quant à la Geographie, ils en eurent assez de cognoissance, pour tirer des plans, & faire des modelles, & des desseins de leurs Prouinces & de leurs villes; Car pour le regard des autres, ils ne s'en soucioient point, & les tenoient pour indifferentes. Ie me souuiens à ce propos d'auoir veu représentée à leur mode la ville de Cozco, & vne partie de sa frontiere, ensemble les quatre chemins principaux, le tout fait de terre, de caillous, & de petits bastons ajustez à leur compte, & à leur mesure, avecque ses places, ses Carrefours, & ses ruës; iusques là mesme qu'on y remarquoit les trois ruisseaux qui passent par cette ville, ce qui estoit vne chose admirable à voir.

Là se voyoit encore représenté le paysage d'alentour avec ses Montagnes, ses Colines, ses Costaux, ses Plaines, ses Riuieres, & ses Ruisseaux; le tout si naïuement, que le meilleur Cosmographe du monde n'eust pas eu l'esprit de le mieux faire. Ils auoient fait ce modele, pour le môstrer à vn Visiteur, nommé Damian de Vaudera, qui auoit des lettres expediees en Chancellerie, portant comission de s'enquerir combien il y auoit de villes & d'habitans en la Prouince de Cozeo; Et pour cela mesme il y eut d'autres Visiteurs enuoyez exprés, par toutes les autres Contrées du Royaume. Ce dessein, ou pour mieux dire

ce plan de Cozco, que ie vis moy-mesme, auoit esté fait à Muyna, que les Espagnols nomment *Mohima*, qui est à cinq lieuës de cette Ville, à le prendre du costé du Sud; & i'eus le bon-heur de me trouuer en cette visite, qui se fit de la plus-part des villes, & des Indiens, qui estoient du gouuernement de Garcilasso de la Vega mon cher Seigneur.

Pour ce qui est de l'Arithmetique; l'on ne peut mettre en doute qu'ils n'y excellassent, & que les preuues qu'ils en donnoient ne fussent visibles, & merueilleuses. Car ils se seruoient pour cét effet, comme i'ay dit cy-deuant, de plusieurs neuds, qui estoient en des ficelles de diuerses couleurs, avec quoy ils rendoient compte de tout ce qu'il y auoit d'impôts & de contributions dans le Royaume de l'Ynca. Auecque ces neuds ils sommoient, deduisoient, & multiplioient leurs comptes, ou pour leur charge, ou pour leur descharge; Et afin de sçauoir à quoy chaque ville estoit obligée, ils en faisoient les partitions avec des caillous, & des grains de Mayz; & les faisoient si bien, qu'ils trouuoient tousiours leur compte. Cela leur estoit d'autant plus aysé, qu'en matiere d'affaires de paix ou de guerre, soit qu'il fust question de Vassaux, de tributs, de troupeaux, de Loix, ou de Ceremonies & de toutes les autres choses dont il leur falloit respondre, ils auoient des Maistres des Comptes expressement establis; & qui les rendoient facilement, pource qu'ils ne s'estudioient qu'à cela; ioint qu'ils mettoient à part le Compte de chaque chose qui se faisoit par fils, ou par

escheueaux , qui leur tenoient lieu de Cahiers separez. Ainsi bien que leur grãd Thresorier eust deux ou trois charges ensemble , tant du plus que du moins , si ne laissoit-il pas de les faire , pour le bon ordre qu'il y obseruoit , en mettant à part le compte de chãque chose. Dequoy nous parlerons plus amplement cy-apres , quand nous traiterons de leur methode à compter par fils & par neuds , & de quelle façon ils s'entendoient.

Ils n'estoient pas bien versez en la Musique , & en sçauoient neantmoins quelques accords , dont les Collas Indiens souloient vser en certains instrumẽts , qu'ils faisoient avec quatre ou cinq tuyaux de roseau attachez ensemble , chãcun desquels auoit vn poinct plus haut que l'autre en façon de tuyau d'Orgue ; Si bien que de tous ensemble se formoit vne harmonie de quatre tons differens , qui sont le dessus , la taille , la haute-contre , & la basse. Quand quelque Indien ioiioit de cẽt instrument , vn autre luy respondoit en accord de quinte , & en toute sorte de tons , qu'ils haussioient ou baissioient plus ou moins , sans aucune dissonance. Ils ne se connoissoient point à la diminution des points de Musique , les leurs estants tous entiers , & d'vne seule mesure. Quant à leurs ioũeurs d'instrumens ils estoient Indiens , & l'on y dresseoit les grands Seigneurs , pour estre de la Musique du Roy. Car bien que leur maniere de chanter fust extrêmement grossiere , elle n'estoit pas commune neantmoins , & ils auoient assez de peine à l'apprendre. Leurs Flustes estoient de quatre ou cinq points ,

262 LE COMMENTAIRE ROYAL,
comme celles de nos Bergers, & châceune s'accor-
doit à part, pource qu'ils ne sçauoient pas l'art de les
accorder ensemble, s'il falloit faire quelque concert.
Ils y chantoient dessus des airs à leur mode, dont les
paroles estoient en vers mesurez, composez par ga-
lenterie sur le suiet de leurs amours, & des mescon-
tentemens ou des faueurs, qu'ils receuoient de leurs
Maistresses.

Châque chanson auoit son ton particulier, telle-
ment qu'on n'en pouuoit dire deux differentes sur
vn meisme ton. La raison est, pource qu'un Amant,
qui vouloit donner vne serenade à sa Dame, suiuiot
le mouuement de sa passion, quand il ioüoit de son
Flageollet; & par la diuersité du ton, ou ioyeux, ou
triste, il faisoit sçauoir à sa Maistresse, & à tous ceux
qui l'oyoiert, la disgrâce ou le plaisir de son ame, se-
lon le traitement ou bon ou mauuais que luy faisoit
la personne aimée. De cette façon s'il eust dit deux
differentes chansons sur vn meisme ton, l'une eust ap-
porté du desordre à l'autre, & empesché le Galand
de se faire entendre, ce qui estoit sa principale inten-
tion, comme s'il eust deu parler avecque sa Fluste,
& exprimer ses pensées. Je rapporteray à ce propos,
qu'un Espagnol ayant trouué de nuit à heure induë
dans vne rue de Cozco vne Indienne, qu'il connois-
soit, la voulut mener en son logis. Surquoy l'Indien-
ne le priant de l'excuser; Sçays-tu bien, luy dit-elle,
que cette Fluste que tu oys maintenant, de laquelle
mon Seruiteur iouë en la prochaine Colline, m'ap-
pelle avec tant de passion & de tendresse, qu'il faut

necessairement que ie m'y enaille. Laisse moy donc ie te prie, car la violence de mon amour m'emporte de ce costé-là, & veut que ie sois sa femme, & luy mon mary.

Ils ne chantoient point au son de la Fluste, les vers qu'ils composoient sur leurs guerres, & sur leurs valeureux faits d'armes, pource qu'ils ne s'adressoient point à leurs Maistresses, tellement qu'ils n'en vsoient qu'en leurs principales festes, en leurs victoires, & en leurs triomphes, pour représenter ce qu'ils auoient fait de memorable. Quand ie sortis du Peru, qui fut en l'année 1560. ie laissay dans Cozco cinq Indiens, qui estoient si habiles à ioüer de toute sorte de Flustes, qu'il n'y auoit point de tablature sur l'Orgue, à laquelle ils ne s'accordassent à l'ouverture du liure. Ces ioüeurs d'instrumens estoient à Iean Rodriguez de Villa Lobos, qui estoit habitant de cette ville, & maintenant, qui est l'an 1602. l'on tient qu'il y a quantité d'Indiens qui excellent en la Musique, & à ioüer de ces mesmes instrumens. Quoy qu'il en soit, lors que i'estois dans le pays, ils ne souloient point chanter; & le faisoient à mon aduis, pource qu'ils n'auoient pas la voix bonne, ou du moins ils ne l'exerçoient point; comme au contraire il s'y trouuoit quantité de Mestiz, qui l'auoient excellente.

*De la Poësie des Incas Amautas, qui sont leurs
Philosophes, & des Harauicus, ou de
leurs Poëtes.*

C H A P. XXVII.

LEs Amautas, ou si vous voulez, leurs Philosophes estoient grandement bien versez, à composer des Comedies, & des Tragedies aussi, qu'ils representoient deuant leurs Roys & les Seigneurs de la Cour aux iours de leurs festes solempnelles. Ceux qui en ioüoient les personnages n'estoiét pas gens du cômun, mais tous Gentilshommes & fils de Curacas, qui estoient eux mesmes de la partie avec des Maistres de Camp; Ce qu'ils faisoient à dessein, afin de faire voir en leur naturel les actes des Tragedies, dont les arguments estoient fondez la plus-part sur des actions militaires, & sur les triomphes, les victoires, les faits memorables, & les grandeurs de leurs Roys, ou des autres hommes Illustres. Quant aux Comedies elles traitoient du mesnage des Champs, du commerce du monde; & de telles autres choses domestiques & familiares, ou qui touchoient les euenemens de la vie humaine. Sitost que la Comedie estoit acheuée, les Acteurs s'alloient asseoir en leur place, chacun selon sa qualité: Au reste les Intermedes n'en estoient ny sales, ny vils, ny abiets. Car lon n'y

traitoit que de choses graues , honnestes , & sententieuses , ioint que ceux qui auoient le mieux fait , & recité leurs vers de meilleure grace , receuoient pour prix des ioyaux , & d'autres presens , qui valoient beaucoup.

Quant à leurs vers ils en faisoient de courts & de longs , où ils obseruoient la mesure des syllabes , & s'en seruoient ordinairement en des matieres d'amour , avec des tons differents , comme ie pense auoir dit cy-deuant. A quoy i'adiouste qu'ils souloient aussi escrire en vers les faits memorables de leurs Roys , & des autres fameux Yncas , comme aussi les grandes actions de leurs principaux Curacas ; Ce qu'ils enseignoient par tradition à leurs descédans , afin de leur remettre en memoire les vertus de leurs Predecesseurs , & les induire à les imiter. En ces vers , qu'ils ne faisoient pas longs , afin de les pouuoir retenir plus facilement , ils n'ysoient d'aucunes consonantes , & ils ressembloient pour l'ordinaire à cette sorte de poésie que l'on appelle en Espagnol *Redondilla* , qui est vne espece de balade ou de Rondeau. Il me souuient à ce propos d'une chanson amoureuse , ne contenant que quatre vers , qu'il est à propos que j'allegue icy , pour monstrier avec quel art ils abregioient leurs pensées , quelques grossieres qu'elles fussent. Or ce qu'ils faisoient ainsi leurs vers courts en des suiets d'amour , estoit afin qu'on les peust chanter plus aisément sur la Fluste. Je voudrois bien par mesme moyen marquer icy leurs points & leurs notes en façon de tablature d'Orgue , si ie ne in-

*Voicy les vers de la chanson dont il est que-
 stion.*

| | | |
|--------------|-------------------|---------------------|
| Caylla Llapi | } C'est à dire, { | <i>Au Chant</i> |
| Punnunqui | | <i>Tu dormiras.</i> |
| Chaupituta | | <i>A la minuit</i> |
| Samufac. | | <i>Je viendray.</i> |

Où il faut remarquer qu'il eust plus proprement dit *viendray*, sans vser du pronom, *Je*, faisant trois syllabes du verbe, comme c'est la coustume des Indiens de ne point nommer la personne, mais bien de la comprendre dans le Verbe pour la mesure du vers. I'obmets, que les Yncas, qui estoient Poëtes, qu'ils appelloient *Harauec*, c'est à dire *inuenteurs*, en composoient de plusieurs autres manieres. Surquoy ie rapporteray que dans les memoires du Reuerend Pere Blas Valera i'ay trouué des vers d'une autre sorte, qu'il appelle spondaïques, qui sont tous de quatre syllabes, pour en marquer la difference d'auéc ceux-cy, où quelquesfois il n'y en a que trois. En ces vers, qui sont escrits en Indien, & qu'il a traduits en Latin, il est traité de l'Astrologie. Car ses paroles font voir, que les Poëtes Yncas qui les ont composez, ont voulu Philosopher sur les causes secondes que Dieu a mises en la Region de l'air, comme sont le Tonnerre, l'Esclair, la Foudre, la Gresse, la Neige, la Pluye.

la Pluye, côme ils le donnent à entendre par les mesmes vers que nous examinerons cy-apres. Ils les ont cōposez sans doute sur le suiet d'une fable qu'ils tiennent par tradition, qui est la suiivante. Ils disent que le Souuerain Createur de toutes choses, a mis dans le Ciel la fille d'un Roy, qui tient en main une cruche pleine d'eau, pour la respandre icy bas toutes les fois que la terre en a besoing. A cela ils adioustent, qu'un sien frere casse cette cruche quand il en est temps, & que du bruit qu'elle fait quand on la rompt, se forment les Tonnerres, les Foudres, & les Esclairs. Et d'autant que les effets de telles choses, appartiennēt à des hommes, qui sont pour l'ordinaire plus farouches que les femmes, ils veulent aussi que ce soient eux qui les produisent; comme au contraire ils font causer à la femme, la Gresse, la Pluye, & la Neige, pource qu'elle est d'une complexion plus delicate, & plus tendre que le malle. Cette fable presuppōsee, ils tiennent qu'un de leurs Yncas, qui estoit grand Poëte, & grand Astrologue, composa ces vers pour louer les excellentes vertus de cette Dame, que Dieu luy auoit données pour en faire part aux creatures d'icy-bas. Le P. Blas Valera dit auoir trouuē cette fable & ces vers parmi les neuds & les Comptes de certaines Annales fort anciennes, & denotées par des filets de diuerses couleurs; Qu'au reste il auoit appris la tradition ou le secret de l'un & de l'autre de ceux qui auoient la charge de ces neuds, & de tenir compte des années historiques; & que s'estant d'abbord estonné de ce que la

connoissance de leurs Amautas alloit si auant, il auoit escrit & retenu ces vers là pour les donner au public. De moy ie ne doute point que cette fable ne fust introduite parmy eux, & mesme ie me souuiens de l'auoir ouye assez souuent en mon enfance, avec plusieurs autres contes semblables que mes parens me souloient faire. Dequoy ie ne daignois point leur demander la signification, pource qu'estant ieune ie ne considerois pas les choses de si près. Et d'autant que tout le monde n'entend pas l'Indien ny le Latin, ie me suis aduisé de mettre ces vers en nostre vulgaire, m'arrestant plustost à la signification de ma langue maternelle que de la Latine. Car avec ce que ie n'y suis pas bien sçauant, i'acquis ce peu de connoissance que i'en ay à trauers les armes & les cheuaux, ou parmy la poudre & les harquebuses, au temps que la guerre estoit le plus allumée en mon pays, à quoy sans mêtir ie me suis plus estudié que ie n'ay fait aux Sciences. Le R. P. Blas Valera a imité en son Latin les quatre syllabes du langage Indien en chaque vers; dequoy ie confesse qu'il s'est mieux acquitté que moy, pource qu'il est impossible d'observer cela dans la traduction Espagnole, à cause qu'il faut donner toute entiere la signification des paroles Indiennes, dont les vnes ont plus de syllabes, & les autres en ont moins. *Rusta* est vn mot particulierement affecté aux filles du sang Royal, d'autant que pour dire vne fille du commun, ils vsent du nom *Taxque*, & appellent *China* vne seruante ordinaire. Quant au verbe *Yllapanrac*, sa signification

comprend celle de trois autres verbes, qui sont tonner, esclairer & foudroyer. Ce que le P. Valera a compris en deux vers; pource que le precedét qui est *Cununnunun* signifie *aller fracassant*. Ce qu'il n'a pas voulu traduire ainsi, pour mieux expliquer les trois significations du verbe *Yllapantac*. *Vna* signifie eau, *Para* pleuvoir, *Chechi*, gresler, *Riti*, neiger, & *Pacha Camac*, Celuy qui est à l'Vniuers ce que l'ame est au corps *Viracocha* est le nom d'un de leurs nouveaux Dieux, de qui nous verrons cy-apres l'histoire assez amplement. Bref *Chura* signifie mettre, & *Cama* donner ame, vie, estre, & substance; ce que nous monsturons, par les vers suiuaus, que nous mettrons icy en trois Langues, sans sortir de la signification du langage Indien, ny sans nous artester à la transposition des paroles.

| | | |
|----------------------|------------------------|---|
| <i>Cumac Nusta</i> | <i>Pulchra Nympha</i> | <i>Belle fille,</i> |
| <i>Torallayquin</i> | <i>Frater tuus</i> | <i>Ton frere pluuieux</i> |
| <i>Puynnuy quita</i> | <i>Vnam tuam</i> | <i>Rompt maintenant</i> |
| <i>Paquir Cayan</i> | <i>Nunc infringit:</i> | <i>Ta petite cruche;</i> |
| <i>Hina mantara</i> | <i>Cuius ictus</i> | <i>Et c'est pour cela</i> |
| <i>Cununnunun</i> | <i>Tonat, fulget,</i> | <i>Qu'il tône, qu'il esclaire,</i> |
| <i>Yllapantac</i> | <i>Fulminatque:</i> | <i>Et que la foudre tombe.</i> |
| <i>Canri Nusta</i> | <i>Sed tu Nympha</i> | <i>Toy fille Royale</i> |
| <i>Vnuy quita</i> | <i>Tuam Limpham.</i> | <i>No^d donneras par la pluie</i> |
| <i>Para munqui</i> | <i>Fundens pluis</i> | <i>Tes belles eaux.</i> |
| <i>May nimpiri</i> | <i>Interdumque.</i> | <i>Quelquesfois aussi</i> |
| <i>Chicimunqui</i> | <i>Grandinem seu</i> | <i>Tu fais gresler sur nous,</i> |
| <i>Riti munqui</i> | <i>Ni quem mittis;</i> | <i>Et neiger de mesme.</i> |

| | | |
|--------------------|---------------------|-----------------------------------|
| <i>Pacha rurac</i> | <i>Mundi faCTOR</i> | <i>Celuy qui a fait le monde,</i> |
| <i>Pachacamac</i> | <i>Pachacamac</i> | <i>Le Dieu qui l'anime,</i> |
| <i>Viracocha</i> | <i>Viracocha</i> | <i>Le grand Viracocha</i> |
| <i>Cayhinapac</i> | <i>Ad hoc munus</i> | <i>T'a donné l'ame,</i> |
| <i>Churasunqui</i> | <i>Te suffecit</i> | <i>Pour faire cette charge</i> |
| <i>Camasunqui</i> | <i>Ac præfecit.</i> | <i>Où il t'a establie.</i> |

Voila quels estoient ces vers, que j'ay bien voulu mettre icy pour enrichir mon Histoire. Car l'on peut asseurer sans flatterie, que tous les esclits du R. Pere Blas Valera, duquel ie les ay tirez, estoient comme autant de perles, & de pierres precieuses, si bien que si mon pays n'en a pas esté embelly, ie n'en puis dire autre chose, sinon qu'il ne la pas merité. L'on m'a dit depuis que les Mestiz s'addonnent fort maintenant à composer de ces vers en Indien, & de plusieurs autres sortes, dont ils tirent les matieres des choses diuines & des humaines, ce qu'il plaist à Dieu faire tourner à sa plus grande gloire.

De ce que j'ay rapporté cy-deuant l'on peut inferer sans doute, que les Yncas du Peru n'estoient que bien peu versez aux sciēces dōt il a esté parlé, & qu'ils en eussent peu transmettre peu à peu la cognoissance des vns aux autres, & se la laisser hereditaire, comme ont fait les premiers Philosophes & les Astrologues, s'ils eussent eu l'vsage des lettres. Or la Philosophie morale fut celle de toutes les Sciences à laquelle ils s'estudierent le plus; soit qu'il fust question de l'apprendre par la Theorie, ou de la reduire en pra-

tique par l'exacte obseruation de leurs coustumes & de leurs Loix. Car ils ne se peinoient pas seulement à sçauoir comment les Sujets se deuoient traiter l'un l'autre suiuant la Loy naturelle, mais encore à connoistre comment il leur falloit obeyr au Roy, & comment le seruir, & l'adorer; Ils apprenoient par mesme moyen quel estoit le deuoir des Superieurs, principalement du Roy enuers ses Sujets, & de quelle sorte il deuoit gouverner le Curacas, & recognoistre leurs bons seruices. Et d'autant qu'ils reduisoient à tout coup cette Science en pratique, il se trouua qu'à la fin ils la mirent au plus haut point où elle sçauroit iamais estre. Car ils s'y auançoient tous les iours de bien en mieux, & en acqueroient la perfection par l'experience qu'ils en faisoient. Ce qui ne leur arriuoit point en toutes les autres sciences, pource qu'ils ne pouuoient les manier si materiellement que la Morale. D'ailleurs ils ne s'esleuoient point assez hautement à la speculation, qui est requise pour en acquérir la cognoissance, ne s'arrestant qu'à la vie & à la Loy naturelle, comme gens qui se portoient plus d'inclination à ne faire point de mal, qu'à sçauoir du bien. Ce qui n'empeschoit pas toutesfois, qu'ils ne fussent veritablement dignes de l'Eloge que leur donne Pedro de Cieça de Leon, au 33. Chapitre de son Liure, où parlant des Yncas, & de leur Gouvernement *Il faut aduoüer, dit-il, qu'ils ont fait de si grandes choses, & estably parmy leurs Sujets une si bonne police, qu'il se trouuera peu de gens qui se puissent vanter legitimement d'auoir eu de l'aduantage sur eux de ce costé*

272 LE COMMENTAIRE ROYAL,
là, &c. Aquoy se rapporte encore le jugemēt que fait
d'eux & de ceux de la Mexique, le R. P. Ioseph Aco-
sta au premier de son sixiesme liure, où il dit en leur
faueur les paroles suiuanes.

*Après auoir traité de ce qui regarde la Religion dont sou-
loient vser les Indiens, c'est mon dessein d'escrire en ce Liure leur
Gouuernement, leur Police, & leurs Coustumes; & de le fai-
re à deux fins differentes. La premiere pour destruire la fausse
opinion de ceux qui tiennent ces peuples pour brutaux, iusques à
dire, qu'ils ont si peu d'esprit & d'entendement, qu'à peine ils
meritent d'estre appelez hommes. Cependant, comme ils sont
dans cet abus, cela est cause qu'ils leur font quantité d'offenses
notables, & que ne les ayant en aucune sorte de consideration,
il s'en faut bien peu qu'ils ne s'en seruent, comme ils font des
bestes. Dequoy ie ne puis dire autre chose, sinon que cet abus
n'est pas moins pernicieux qu'il est commun, comme le scauent
assez ceux qui avec quelque peu de zele & de discretion, ont con-
uersé parmy-eux vn assez long-temps, pour cognoistre la portée
de leur esprit, & qui ont pris garde au peu d'estime qu'en font
ces presomptueux, qui pensent scauoir beaucoup, & qui toutes-
fois sont pour l'ordinaire les plus ignorans, quelque bonne opi-
nion qu'ils ayent d'eux mesmes. Mais pour destruire les fonde-
mens de cette presumption, ie ne voy point de meilleur moyen que
de donner à entendre quelle estoit la methode, ou quel le procedé
dont ils vsaient en leur façon de viure ordinaire; en laquelle bien
qu'ils eussent plusieurs choses sans fondement, & qui tenoient
de la barbarie, ils en auoient aussi d'autres excellentes, & dignes
d'estre admirées. Par où l'on peut voir facilement, qu'ils sont na-
turellement capables des bonnes instructions, & qu'en certaines
choses ils ont de l'aduantage sur nous. Que si l'on m'allegue qu'il y*

auoit parmy eux vn confus meſlange d'abus & de fautes remarquables, ie reſpondray à cela, que ce n'eſt pas dequoy il faut ſ'eſtonner à mon aduis, puis que les Legiſlateurs, & les Philoſophes les plus rafinez de l'antiquité, ſans en excepter ny Lycurgue, ny Platon, ſont quelquesfois ſuiets à faillir. A quoy i'adiouſteray que dans les plus ſages Republiques du Monde, comme en la Romaine, & en celle d'Athenes, ſe remarquent diuers deſfaits, qui ſont infames & ridicules. Que ſi l'on venoit à faire vn parallele de l'Eſtat des Yncas, & des peuples de la Mexique, avecque les Grecs ou les Romains, ie m'affeure qu'on donneroit l'aduantage à ces premiers en matiere de gouuernement Politique. Mais d'autant que nous ne conſiderons pas ces choſes de près, & que nous entrons la force à la main dans les Contrées des Indiens, nous ne daignons les examiner, ny leur donner audience, & nous ſeruons d'eux comme d'une chaffe que nous aurions priſe pour noſtre vſage en quelque lieu montagneux. Mais les hommes ſages & bien-aduiſez, qui ſçauent penetrer plus auant dans le ſecret de ces peuples, & dans leur ancienne façon de viure, en iugent bien autrement, & ne peuuent ſ'eſtonner aſſez du merueilleux reiglement & du bon ordre qu'il y auoit entre eux, &c. Ce que ie viens de rapporter eſt tiré du R. P. Ioseph Acoſta, l'autorité duquel eſt ſi receuable, qu'elle doit ſuffire, ce me ſemble, pour confirmer tout ce que nous auons dit iuſques icy, & que nous dirons deſormais des Yncas, de leurs Loix & de leur gouuernement. Or ce ne fut pas vne des moindres preuues de leur eſprit, d'auoir ſçeu inuenter en vers & en proſe quantité de fables ſuccinctes, ſoit qu'ils le fiſſent, pour y comprendre pluſieurs belles moralitez, ou pour y conſeruer quelque tra-

274 LE COMMENTAIRE ROYAL,
dition qu'ils auoient eüe, ou de leur Idolatrie, ou
des beaux faits de leurs Roys, ou des autres hommes
Illustres; à cause dequoy la plus part des Espagnols
n'appellent point telles choses des fables, mais bien
de veritables Histoires, pour estre en quelque fa-
çon conformes à la verité; Comme au contraire il y
en a d'autres qui les tiennent pour des cōtes faits
à plaisir; bien qu'à dire le vray, ils s'imaginent que
ce soient des mensonges mal inuentez, pource qu'ils
n'en sçauent pas l'Allegorie; Non que ie veuille de-
saduoir pourtant, qu'il n'y ayt quantité de ces fa-
bles, qui sont tout à fait absurdes, & deshonestes,
dont nous auons rapporté quelques-vnes, en at-
tendant qu'en la suite de cette Histoire nous en ex-
pliquions d'autres, qui seront sans doute meilleures,
& plus vray semblables.

*Du peu d'Outils qu'auoient les Artisans
Indiens.*

C H A P. XXVIII.



Pres auoir declaré quelles estoient les
cognoissances, & quel l'esprit des Philo-
sophes & des Poëtes de cette ancien-
ne Gentilité, touchant les Arts & les
Sciences, il sera bon que nous rapportions en suite
le peu d'adresse des Artisans en leurs mestiers or-
dinaires, afin de monstrier par-là combien estoient
miserables

miserables les Indiens, & comme ils manquoient entierement des choses qui sont necessaires à l'usage de la vie. Commençant donc par les gens de Forge, ie diray que bien qu'il y en eust vn fort grand nombre parmy eux, & qu'ils ne cessassent de travailler, si est ce qu'ils n'auoient pas l'esprit de mettre en œuvre le fer, non plus que les autres metaux. Cela procedoit, à mon aduis, de ce qu'encore qu'ils eussent plusieurs mines de fer, qu'ils appelloient *Quillay*, ils ne les sçauoient pas tirer neantmoins, tellement qu'au lieu d'en auoir des outils pour leur travail ordinaire, ils en faisoient de certaines pierres fort dures, iaunastres, & vertes, qu'ils polissoient à force de les frotter ensemble, & les tenoient en fort grande estime, pource qu'elles estoient rares. Ils ne sçauoient non plus faire des marteaux, ny les emmancher, & vsoient en leur place de certains outils faits d'un alliage de cuiure & de leton. Ces outils sont tous quarrez, les vns grands autant qu'ils les peuvent empoigner avecque la main, dont ils vsent pour la barterie la plus forte, les autres moyens, les autres petits, & les autres vn peu longs, & ceux-cy sont les plus propres pour travailler sur les choses qu'ils veulent faire concaues. Ils les tiennent à la main, comme si c'estoient des pierres, & en frappent à force de bras les matieres qu'ils ont à mettre en œuvre. Ils ne sçauoient faire ny limes ny burins, ny mesme des soufflets, propres à la forge. Car quand ils vouloient fondre quelque metal, ils le faisoient à force de souffler, vsant pour cet effet de certains

276 LE COMMENTAIRE ROYAL,
tuyaux de cuiure, longs de demy-aulne les vns plus,
& les autres moins, selon que la fonte estoit ou grande ou petite. Ces tuyaux alloient en retressissant par l'un des bouts, où ils ne laissoient qu'un petit trou, afin que le soufflé en sortist plus fort, & plus ramassé. Quand ils auoient quelque fonte à faire, ils estoient ensemble dix ou douze iours, & se tenoient alentour du feu, qu'ils souffloient à pleine bouche avec leur tuyaux, côme ils font encore aujourd'huy, sans qu'on ayt peu leur faire changer cette coustume. Ils n'auoient aucun usage de pincettes, ny de tenailles, pour retirer le metal du feu. Ce qu'ils faisoient avec vn baston ou vne verge de cuiure, & le iettoient sur vn monceau de terre humectée, où ils le remuoient de tous costez, iusques à ce qu'il estoit froid & maniable. Or bien qu'il n'y eust rien de si grossier que leur maniere de traualler, si ne laissoient-ils pas pour tout cela de faire des ouurages merueilleux, comme nous verrons cy-apres, principalement quand il estoit question de creuser profondement quelque chose. Et d'autant que l'experience & la raison naturelle leur apprenoient que la fumée des metaux estoit dommageable à la santé, ils faisoient tousiours leurs fontes grandes ou petites à descouuert, c'est à dire aux places publiques, & iamais dans les maisons. Les Charpentiers de ce pays-là estoient encore moins accommodez d'outils que les forgerons, veu qu'au lieu de ce grand nombre de ferremens qu'ont accoustumé d'auoir les Artisans de par deça, ceux du Peru, n'auoient que la hache, & la

doloire, qui estoient de cuire. Ils ne cognoissoient ny la sie, ny le ciseau, ny les autres outils de Charpenterie, & ne sçauoient faire par consequent ny coffres ny portes; mais ils couppoient simplement le bois, & le blanchissoient à force de le ratisser, pour l'employer aux bastimens. Les forgerons, qui ne trouuailloient ordinairement qu'en cuire, & en fonte, leur fournissoient des haches & des essettes. Ils ne souloient point vser de cloux, ny d'aucuns ferremets pour faire tenir la charpenterie, mais ils la lioient de certaines attaches faites de ionc, dont ils se seruoient comme nous faisons icy de l'osier. Quant aux Mafsons, ils n'auoient pour tous outils à tailler les pierres, que certains caillous noirs, par eux appelez *Hihuana*, avec lesquels ils les escachoient, plustost qu'ils ne les tailloient. Que s'il estoit question de hausser les pierres, ou de les baisser, ils n'auoient pour cela ny gruë ny autre machine, & le faisoient à force de bras; Et toutesfois, avec ces incommoditez ils faisoient de si beaux bastimens, qu'il ne seroit pas possible de le croire, si les relations des Espagnols, & les mazures qui en sont restées iusques icy, ne le confirmoient euidentement. Ils se seruoient en lieu de ciseaux & d'aiguilles de certaines espines fort longues, qui naissent dans le pays; Si bien que l'ouvrage qu'ils en faisoient se pouuoit plustost appeller rauauderie que non pas cousture. De ces mesmes espines ils en souloient faire des peignes pour s'agencer les cheueux. Quant à leurs miroirs, les Dames de sang Royal en auoient d'argent poly, & les

278 LE COMMENTAIRE ROYAL,
femmes du commun n'en vsoient point d'autres
que de leton ou de cuiure, pource que l'vsage de l'ar-
gent leur estoit deffendu, pour les raisons qui seront
cy apres alleguées. Les hommes tenoient pour in-
famie de se regarder dans le miroir, disant que cela
n'appartenoit proprement qu'aux femmes; Et voila
comme ayant faute de la plus-part des choses, qui
sont necessaires à la vie humaine, ils en faisoient sup-
pleer d'autres à leur deffaut; Où il sera bon de re-
marquer qu'encore qu'ils ne soient guere inuentifs
d'eux mesmes, cela n'empesche pas qu'ils ne sça-
chent grandement bien imiter tout ce qu'ils voyent,
comme il s'est veu par l'experience de ce qu'ils
ont appris des Espagnols en la Mecanique; iusques
là mesme qu'ils ont de l'aduantage sur eux en certai-
nes choses. Or il est certain qu'ils ne seroient pas
moins capables des sciences que des mestiers, si l'on
prenoit la peine de leur en donner la cognoissance.
Dequoy sert de preuue bien euidente la merueilleu-
se adresse qu'ils ont plusieurs fois monstrée dans
les Comedies, qu'ils ont représentées en diuers lieux.
Car il est aduenu assez souuent que plusieurs bons
Religieux de diuers Ordres, principalement les Pe-
res de la Compagnie de Iesus, pour les rendre affe-
ctionnez au mystere du nostre Redemption, leur en
ont fait représenter quelques-vnes sur le theatre. Ce
qu'ils ont fait sans doute, pour auoir sceu, que ce peu-
ple souloit ioüer des Comedies au temps des Roys
Yncas; Ioint qu'ils les cognoissoient doüez d'un
esprit souple, & d'une memoire propre à retenir tout

ce qu'on leur monsteroit. Cela fit aduifer vn Pere de la mesme Compagnie de composer vne piece à la louange de la glorieuse Vierge Marie, qu'il escriuit en la langue qu'ils appellent *Aymara*, qui est differente du langage de ceux du Peru. L'argument en estoit tiré de ces paroles du 3. Liure de sa Genese. *Je mettray de l'inimitié entre toy & la femme, &c. Elle mesme t'escrasera le chef.* Cette piece fut représentée par des ieunes Indiens, dans vne ville appelée *Sulli*, & à *Potosy* fut recité vn Dialogue de la Foy, où se trouuerent plus de douze mille personnes. A quoy i'adiouste que dans *Cozco* il s'en recita vn autre de l'enfant Iesus, en la presence de tous les plus grands de la ville, & vne autre encore, en celle qu'ils appellent *Ciudad de los Reyes*, ou, *la ville des Roys*. Ce qui fut fait en la presence de tous les Officiers de la Chancellerie, & d'un grand nombre de Noblesse & de gens du pays. Le tres-sainct Sacrement de l'Autel estoit le suiet de ce Dialogue, composé en Espagnol, & en la langue generale du Peru. De jeunes garçons Indiens, qui en furent les Acteurs, ioüerent chacun leur personnage, avec tant de grace, de bien-seance & de modestie, qu'il n'y eust celuy de la compagnie, qui n'en fust rauy d'admiration. Outre plus ils chanterent certains Hymnes si melodieusement, que plusieurs Espagnols en respondirent des larmes de ioye, tant ils estoient aysez de voir la grace, & le bon esprit de ces petits Indiens. Tellement que dès-lors ils commencerent à changer l'opinion qu'ils auoient eüe par le passé, s'imaginant que ces peu-

280 LE COMMENTAIRE ROYAL,
ples estoient grossiers, & incapables de toute civi-
lité. Quand on leur a donné par escrit le Role qu'ils
ont a iouïr, il s'en vont trouuer les Espagnols, qui
sont ou Prestres, ou Seculiers, ou mesme des Prin-
cipaux, & les prient de leur lire quatre ou cinq
fois chèque vers, pour le retenir par cœur; Et afin
qu'il ne leur eschape de la memoire qu'ils ont fort
bonne, ils repetent plusieurs fois chèque parole,
qu'ils marquent d'un petit caillou, ou d'un grain
d'une certaine semence qu'ils appellent *Chuy*, qui est
de diuerses couleurs. De sorte que par ces marques
ils retiennēt les paroles qu'on leur a dites, & appren-
nent ainsi leur Role fort aysemēt & en peu de temps,
à cause du merueilleux soing qu'ils y apportent; A
quoy les Espagnols s'employent tres-volōtiers, & quel-
ques graues qu'ils soient, ils ne desdaignent iamais
d'instruire ces petits garçons; Au contraire il les
caressent, & sont bien ayfés de lire leurs vers, sça-
chant bien à quelle fin ils le demandent. Par où l'on
peut voir, qu'encore que les Indiens du Peru ne
soient point propres à inuenter, si est-ce qu'ils sont
tres-habiles à imiter, & à retenir ce qu'on leur ensei-
gne. Dequoy pouuoit rendre vne preuue irrepro-
chable le Docteur Iean Cuellas, natif de Medina
del Campo, & Chanoine de l'Eglise de Cozco. Cēt
homme de bien se donnoit la peine de lire la Gram-
maire aux Mestiz, qui estoient fils des Gentils-hom-
mes, & des plus riches de cette ville. Ce qu'il faisoit
charitablement, & pour n'esconduire les Escoliers
qui l'en prioient. Car il y auoit cinq ou six mois qu'ils

discontinuoient leur estude par la faute de cinq Precepteurs, qui leur monstroient, & qui les auoient quittez; Ce qui n'estoit qu'un pur effet de leur auarice, pource qu'ils en trouuoient le gain trop petit, combien que chaque Escolier leur donnast par mois la valeur de douze ducats; ce qu'ils estimoient peu de chose, pource que tous les Escoliers ensemble n'estoient qu'environ dix-huict. Il me souuient qu'entre les autres il y auoit un Indien Ynca, qu'on nommoit Philippe, qui pour estre fort habile à lire & à escrire donna suiet à Pedro Sanchez, prestre fort riche, & homme d'honneur, de luy apprendre la Grammaire, où il profita si bien qu'en fort peu de temps il se rendit le meilleur Escolier de tous les Mestiz. Que si de hazard leur Precepteur les quittoit, ils ne laissoient pas d'aller à l'Escole iusques à ce qu'il en venoit un autre, qui les instruisoit par des principes differents, & leur faisoit oublier tout ce que les autres leur auoient monstre, disant que la methode n'en valoit rien. Cependant ils ne pouuoient pas beaucoup profiter à changer ainsi de Maistres. Ce qui dura un assez long-temps, iusques à ce que cet honnestre Chanoine dont j'ay parlé, les prit sous sa charge, & leur monstra deux ans durant la langue Latine dans les plus grandes violences de la guerre, qui pour lors estoit si fort embrasée dans le pays, à cause des soulleuements de Dom Sebastien de Castille, & de François Hernandez Giron, qu'à peine un feu estoit amorry, qu'il s'en allumoit un autre encore pire, & plus difficile à esteindre. Durant les

282 LE COMMENTAIRE ROYAL,
quelles choses, ce bon Chanoine voyant le merueil-
leux profit que ses disciples faisoient en la Grammai-
re, & la grande disposition qu'ils auoient aux autres
sciences, dont ils manquoient, pource qu'il n'y auoit
personne qui prit la peine de les instruire; il se plai-
gnoit à tout coup de voir perdre de si bons esprits; &
s'adressant à eux, ô mes enfans, leur disoit-il, que
i'ay de regret qu'il n'y ayt vne douzaine de vous dans
les Escoles de Salamanque! Ce que i'ay bien voulu
rapporter icy, pour monstre que les Indiens sont
fort habiles, & capables de retenir tout ce qu'on
leur monstre; comme pareillement les Mestiz leurs
parens, qui n'ont pas moins d'esprit qu'eux. Mais
quelque peine que se donnast ce mesme Chanoine,
si luy fut-il impossible d'apprendre à ses Escoliers
la perfection de la langue Latine, pour n'auoir eu
moyen de supporter long-temps le trauail de quatre
leçons, qu'il luy falloit faire par iour, outre le temps
qu'il employoit à l'Eglise. Tellement que ceux d'au-
iourd'huy peuuent bien rendre graces à Dieu de ce
qu'il leur a enuoyé les Iesuites, qui d'un si grand pays
en ont fait vn Seminaire de toute sorte de sciences,
& de bonnes instructions. Cela suffira pour mainte-
nant touchant cette matiere, que nous laisserons à
part, pour reuenir à la succession des Roys Yncas, &
au recit de leurs Conquestes.

Fin du second Livre.

LE



LE
COMMENTAIRE
ROYAL
 DES YNCAS.

LIVRE III.

Où il est traité de la vie & des faits du quatriesme Roy
 Mayta Capac ; du premier Pont du Peru, qui fut fait de
 clayes d'osier, & de l'estonnement qu'il causa. De la vie &
 des Conquestes du cinquiesme Roy, appelé Capac Yupan-
 qui, & d'un autre Pont de jonc & de paille, qu'il fit faire
 sur le grand Canal ; Avec vne description de la maison du
 Soleil, de son Temple, & de ses grandes richesses.

*Ceux de Tiahuanacu se rendent à Mayta Capac
 quatriesme Inca, & des bastimens qu'il
 trouua dans le pays.*

CHAPITRE I.



'Ynca Mayta Capac (le nom duquel n'a pas
 besoing d'explication, puis que *Mayta* ne
 signifie rien que ce soit en la langue genera-
 le du pays, & que nous auons desia montré ce que

N

284 LE COMMENTAIRE ROYAL,
veut dire *Capac*) ayant fait la pompe funebre de son
Pere, & pris possession solemnelle de son Royaume, le
fût visiter par tout, comme Prince Souuerain & Roy
absolu. Car bien que du viuant de son Pere, il en eust
fait la visite par deux fois, si est-ce qu'estant comme
en tutelle durant sa minorité, il ne pouuoit ny con-
noistre des affaires de son Estat, ny mesme y pour-
uoir & donner des graces, si ce n'estoit en la presence
& du consentement de ceux de son Conseil, qui par
le deuoir de leur charge estoient obligez d'ordon-
ner sur les Requestes que faisoient ses Suiets, de pro-
noncer les Edicts, & de pouruoir aux graces que le
Prince deuoit faire, desquelles routesfois il ne pou-
uoit disposer, combien qu'il fust successeur, & legi-
time heritier de la Couronne, sinon en cas qu'il fust
en âge capable de gouvernement, car telle estoit
la Loy du Royaume. Comme il fut donc déclaré
Maieur, & hors de tutelle, il s'aduisa d'aller faire vne
visite generale dans ses Prouinces, sçachant comme
il a esté desia dit, que telle reueuë estoit la chose du
monde, dont les vassaux s'estimoient le plus obligez
à leur Prince, & qu'ils tenoient à singuliere faueur.
Ce fût donc en partie pour cela; & en partie aussi
pour monstrier sa generosité, sa magnificence, & son
affection enuers ce peuple, qu'il entreprit de faire
cette visite, en laquelle il fit de grandes largesses aux
Curacas, & à tout le reste de ses Suiets.

Après qu'il l'eust acheuée, il tourna ses pensées
& ses desseins au principal but qu'auoient les Roys,
Yncas, qui estoit d'attirer à leur Religion ces peu-

ples barbares; couurant par ce moyen d'un specieux pretexte d'Idolatrie l'ambition qu'ils auoient d'estendre bien loing les bornes de leur Empire. Or soit qu'il le fist pour l'un ou pour l'autre, ou pour tous les deux ensemble, ny ayant rien de mal-aysé à ceux qui ont la puissance en main; tant y a qu'il fit leuée de gens de guerre, iusques au nombre de douze mille hommes. Puis si tost que le Printemps fut venu, & qu'il eust pourueu à son Armée, dont il donna la conduite à quatre Maistres de Camp, sans y comprendre les Officiers, & les autres Capitaines, il se mit à la Campagne, & s'en alla iusques au Canal du grand Marefcage de Titicaca. Car tout ce qu'il y auoit d'estenduë en la Prouince de Collao estant un pays plat, la conqueste luy en sembloit plus facile que de toute autre Contrée, outre que les habitans estoient d'un naturel grandement souple, & docile.

Comme il fut près du Canal, il fit faire de grands Radeaux pour le passage de son Armée; puis il enuoya sommer tous ceux des premieres villes, y obseruant les formalitez accoustumées, qu'il n'est pas besoing de repeter tant de fois. Les Indiens obeïrent incontinent à ceux qui vindrent de sa part, induits à cela par les merueilles qu'ils auoient ouï dire des Yncas. Mais entre les autres villes qui se rangerent à son Empire, il n'y en eust point de plus remarquable que celle de *Tiahuanacu*, de qui ie trouue à propos que nous disions icy quelque chose, & particulièrement de ses grands & incroyables bastimens.

Le plus admirable chef d'œuvre de tout ce pays est vn Costau, ou si vous voulez, vn Tertre fait de main d'homme, qui est si haut qu'il n'est pas possible de le croire. Les Indiens, qui en la structure de ce môt, semblent auoir voulu imiter la Nature, pour empescher que ces prodigieuses terrasses amoncellées les vnes sur les autres ne s'escoulassent, y auoient mis pour fondemens de grandes masses de pierre, fort bien cimentées, sans qu'on peust sçauoir à qu'elle fin ils auoient fait ce merueilleux bastiment. D'un autre costé assez loing de là se voyoiēt deux grands Geants taillez en pierre. Ils auoient des habillemens qui leur traïsnoient iusques à terre, & vn bonnet à la teste, le tout vsé par le temps, & qui sentoit son antiquité. Là se remarquoit encore vne muraille fort longue, & les pierres de laquelle estoient si grandes, qu'on ne pouuoit comprendre, comment les forces humaines auoient esté capables de les transporter, estant veritable qu'en cette estenduë de terre il n'y auoit que bien loing de là ny carrieres ny rochers, d'où l'on peust auoir tiré toute cette enorme masse de pierre. L'on y voyoit aussi en d'autres endroits quantité de bastimens extraordinaires, entre lesquels estoient remarquables de grandes portes dressées en diuers lieux, & dont la plus-part estoient en leur entier, n'y ayant aux quatre coings qu'une seule pierre en la structure de chacune. Que si quelque chose en augmentoit la merueille, c'estoit de les voir presque toutes posées sur des pierres d'une grandeur incroyable. Car il se trouua

qu'il y en auoit de trente pieds de longueur, de quinze de large, & de six de front. Toutes lesquelles pierres avecque les portes estoient d'une seule piece, sans qu'il fust possible de s'imaginer avec quels outils elles pouuoient auoir esté taillées; outre qu'il est bien à croire qu'il falloit de necessité qu'elles fussent incomparablement plus grandes, auant qu'estre mises en œuvre.

Ceux du pays disent, que tous ces bastimens & autres semblables, dont il n'y a rien par escrit, furent faits auant le Regne des Yncas, lesquels à l'imitation de ceux-cy, firent bastir la forteresse de Cozco, dont nous parlerons cy-apres. Ils tiennent au reste par la tradition qu'ils en ont eüe de pere en fils, que toutes ces merueilles se firent en vne nuit, sans sçauoir qui en fut l'Architecte. Quoy qu'il en soit, à bien cōsiderer ces bastimens l'on trouue qu'ils sont demeurez imparfaits, comme autant de commencemens de ce que les fondateurs auoient intention de faire. Tout ce que ie viens de dire est tiré de Pedro de Cieça de Leon, qui a remarqué ces particularitez au cent cinquiesme Chapitre de la description qu'il a faite du Peru, & de ses Prouinces, où il parle assez au long de ces edifices, & de plusieurs autres, que nous ne touchons que succinctement. A quoy toutesfois, ie suis d'auis d'adiouster vne Relation que m'a enuoyé vn mien compagnon d'Escole nommé Diego d'Alcobaca, que ie puis proprement appeller mon frere, puis que nous sommes naiz tous deux dans vne mesme maison, & que son Pere m'a esleué.

Entre les autres memoires que i'ay eus de luy, touchant mon pays, il me souuient qu'en vn endroit où il parle de ces admirables bastimens de Tiahuanacu, il dit ces paroles. *Parmy plusieurs antiquitez dignes de merueille, qui se voyent en vne Prouince du pays de Collao appelée Tiabuanacu, il y en a vne qui est bien digne, se me semble, de la memoire des hommes. Elle est tout contre le Lac que les Espagnols appellent Chucuytu, & dont le nom propre est, Chuquiuitu. Là se voyent des edifices fort grands, & entre les autres vne Cour de quinze brasses en quarré, & de deux estages de hauteur. En l'un des costez de cette place il y a vne Salle de quarante cinq pieds de longueur, & de ving-deux de largeur couuerte de chaume, comme sont les logemens de la maison du Soleil, que vous auez veuz en cette ville de Cozco. La place, ou la basse Cour, dont ie viens de parler, ensemble les murailles, la salle, le plancher, le toict, & les portes, sont tous d'une seule piece: ce qui est vn chef d'œuvre merueilleux, qu'on a pris & taillé dans vn grand Rocher. Les murailles de la basse cour ont trois quarts d'aune d'espoisseur, & bien que le toict de la Salle soit de pierre, il semble toutes fois estre de chaume. Ce que les Indiens ont fait exprès, afin de le faire mieux ressembler à leurs autres logemens, qu'ils ont accoustumé de couvrir de paille. Le Marefcage ou le Lac, ioint vn des bords de la muraille, & ceux du pays tiennent que ces bastimens sont dediez au Createur de l'Vniuers. Il y a là tout contre quantité d'autres pierres mises en œuvre, qui representent diuerses figures d'hommes & de femmes, faites si au naturel, qu'on les diroit estre en vie. Les vnes tiennent des vases en main, comme si elles vouloient boire, les autres sont assises, les autres debout, & les autres semblent vouloir passer vn ruisseau, qui coule à trauers ce Bastiment. Auec-*

que cela il s'y voit des Statues qui representent des femmes, & des enfans qu'elles ont à leur sein, ou à leur costé, ou qui les tiennent par le pan de la robbe, sans y en comprendre plusieurs autres de toute façon. Les Indiens d'aujourd'huy tiennent que ceux de ce temps-là furent transformez en ces Statues, pour les enormes pechez par eux commis, & particulièrement pour avoir lapidé vn homme qui passoit par cette Prouince. Voila ce qu'en dit Diego d'Alcobaça, qui a esté Vicaire & Predicateur en plusieurs Prouinces de ce Royaume. Car ses Superieurs l'enuoyoient en diuers endroits du pays, à cause qu'estant Mestiz natif de Cozco, il sçauoit mieux cette langue que les autres, & faisoit par consequent plus de fruit.

*De la Reduction de Hatunpacassa, ensemble de
la Conqueste de Cacyauri.*

C H A P. II.

POur reuenir à l'Ynca Mayta Capac, il faut sçauoir que par le mesme moyen que nous auons dit cy-deuant, qu'il gaigna sans resistance la plus-part des Prouinces; il conquist aussi celle de Hatunpacassa, qui est tout ce pays qu'on trouue à main gauche du costé du grand Canal. De vous dire maintenant, si ce fut tout à coup, ou en plusieurs iours, c'est ce qui m'est impossible, veu les differentes opinions, & les contrarietez des Indiens. Toutesfois ils tiennent la plus-part que

290 LE COMMENTAIRE ROYAL,
les Yncas s'enalloient gaignant peu à peu ces Contrées, & que par mesme moyen ils prenoient le soin de cultiuer & d'instruire les habitâs. D'autres neantmoins sont d'opinion, qu'ils ne faisoient cela qu'au commencement, quand ils n'auoient point encore la puissance en main, & que lors qu'ils se virent assez de forces, ils se mirent à conquerir tout ce qu'ils pourroient gagner de pays. Mais de quelque façon qu'on le prenne, tant s'en faut que ie trouue à propos d'en dire icy mon aduis, qu'au contraire il est meilleur de n'en parler pas, pour n'ennuyer le Lecteur, en repetant trop souuent les mesmes choses. Cela estant, ie me contenteray icy de parler des Pays conquis par chacun de ces Roys, dont les voyages furent differents, aussi bien que leurs Conquestes. Il faut donc sçauoir que l'Ynca Mayta Capac, continuant celle qu'il auoit commencé de faire, arriua près d'un lieu appellé *Cacyauri*, où il y auoit quantité de maisons champestres, esloignées les vnes des autres, sans aucun ordre, ny sans apparence de ville, & tenuës par de petits Seigneurs, qui se faisoient obeyr aux autres. Ceux-cy n'eurent pas plustost aduis que l'Ynca s'en alloit à eux pour les conquerir, qu'ils s'assemblerent entre-eux sur vne montagne qui est en cette frontiere, haute d'un bon quart de lieüe, & arrondie en pilon. Pource que tout ce pays est vne rase campagne, reserué ce mont, les Indiens le tenoient pour vne chose sacrée à cause de sa beauté, iulques-là mesme qu'ils l'adoroient & y faisoient des sacrifices. Ils s'y retirerent donc comme en vn azyle, afin
que

que cette montagne, qu'ils tenoient pour vne Diuinité leur fust tutelaire, & les desliurast de leurs ennemis. Si tost qu'ils furent en haut, ils s'aduiferent d'y faire vn fort, pour le bastiment duquel l'on tient que les hommes donnerent la pierre, & que les femmes s'obligerent à fournir tout ce qu'il faudroit de gazons, pour acheuer plus promptement ce trauail. Ils s'y retrencherent donc avecque leurs femmes & leurs enfans, qui estoient en fort grand nombre, & y mirent le plus de prouisions & de viures, qu'ils en peurent recouurer.

L'Ynca leur enuoya des gens exprés pour leur faire les sommations ordinaires, & leur dire de sa part, qu'il n'estoit point venu là pour leur oster leurs biens ny leurs vies, mais pour leur faire part des graces & des faueurs que le Soleil vouloit qu'il fit à tout le peuple des Indes; Et partant qu'ils ne fussent point si mal-aduisez que de mespriser ses enfans, ny d'vser de resistance contre-eux qui estoient inuincibles; veu que le Soleil leur Pere ne manquoit iamais de leur ayder en tous leurs combats, & en toutes leurs conquestes; qu'au reste il falloit qu'ils l'adorassent & le tinssent pour leur Dieu. Voila ce que l'Ynca enuoya dire plusieurs fois à ces Indiens, qui sans s'esmouuoir de cette proposition, s'y opposerent directemēt, disant pour response, Que leur maniere de viure leur sembloit si bonne, qu'ils n'en vouloient point receuoir d'autre; Qu'ils auoient desja leurs Dieux tous acquis, & particulièrement ce haut Mont où ils s'estoient fortifiez, le secours du-

292 LE COMMENTAIRE ROYAL,
quel leur seroit fauorable à ce besoing; Surquoy ils
conclurent. Que les Yncas s'en allassent à la bonne
heure instruire d'autres gens qu'eux, qui ne vou-
loient point resolutement changer de Loy, ny de
vie.

L'Ynca les voyant ainsi obstinez, n'en voulut point
venir à vne bataille: mais trouua meilleur d'essayer
à les auoir ou par flatterie, ou par famine, en cas
qu'il ne les peust reduire autrement. Il diuisa pour
cét effet son armée en quatre, pour les assieger de
tous les costez de la Montagne. Eux cependant per-
sisterent plusieurs iours en leur opiniastrété, & se
tindrent prests à resister aux gens de l'Ynca, s'ils les
venoient attaquer dans leur fort. A la fin, voyant
qu'ils ne faisoient point mine de les combattre, ils
l'imputerent à crainte, & à lascheté, & en deuin-
drent plus temeraires de iour en iour; iusques là
mesme qu'ils firent plusieurs sorties sur leurs enne-
mis. Mais eux qui ne vouloient point passer l'ordre
qu'ils auoient du Roy ne faisoient seulement que se
deffendre, si bien qu'il en demeuroit tousiours quel-
ques-vns sur la place, principalement du costé des
Collas, qui par vne brutalité plustost que par vn
effet de courage se precipitoient dans le gros de leurs
ennemis, & y laissoient la vie. Lon tient que dés lors
il courut vn bruit parmy les Indiens de Collao, & que
ces peuples le semerent depuis par tout le Royaume,
qu'en vn certain iour, auquel ces Indiens ainsi assie-
gez firent vne sortie contre les gens de l'Ynca, les
traits & les pierres qu'ils tirerent sur leurs ennemis se

tournerent contre eux mesmes , & qu'ainsi plusieurs Collas y furent tuez de leurs propres armes. Ce qui fut sans doute vne fable bien plaisante ; que nous expliquerons cy-apres , à cause que ce fut vne des choses qu'ils reuererent le plus. Cependant le sanglant massacre qui se fit ce iour là des assiegez , fut cause qu'ils se rendirent, & particulièrement les Curacas , qui se repentans de leur obstination , assemblerent leurs gens par troupes , avecque dessein de s'en aller demander pardon à l'Ynca , pour preuenir le chastiment qui leur pouuoit arriuer. En cette reduction les enfans marcherent tous les premiers avecque leurs meres apres eux ; puis les vieillards, les Soldats, les Capitaines , & les Curacas , qui auoient les mains liées , & la corde au col , en signe qu'ils meritoient la mort , pour auoir esté si temeraires que de prendre les armes contre les enfans du Soleil. Par mesme moyen ils s'y en allerent tous pied nud , coustume qui parmy les Indiens estoit vne grande marque d'humilité , par laquelle ils vouloient donner à entendre que la personne qu'ils reueroient , auoit ie ne sçay quoy de maiestueux & de diuin.

*Du pardon octroyé aux Collas par l'Ynca Mayta
Capac, avecque l'explication de la fable
cy-deuant rapportée.*

C H A P. III.



Pres que les Collas se furent prosternerz deuant l'Ynca, ils l'adorerent comme fils du Soleil avecque de grandes acclamations; en suite dequoy les Curacas en particulier se presenterent à luy, & avec la veneration & le religieux respect dont ils auoient accoustumé d'vser entre-eux, ils luy dirent qu'ils supplioient tres-humblement sa Majesté de leur pardonner, & que s'il luy plaisoit qu'ils mourussent, ils tiendroient pour bié-heureuse leur mort, pourueu qu'il sauuât la vie à leurs Soldats, qui en cette resistance n'auoient peché que par leur mauuais exemple. Par mesme moyen ils le prierent de faire grace aux vieillards, aux femmes & aux enfans, disant qu'ils estoient innocens, & qu'il n'y auoit qu'eux de coupables, à cause dequoy ils s'offroient volontairement à payer pour tous.

L'Ynca les receut, assis en son Thrône, & enuironné de ses gens de guerre; Puis ayant donné Audience aux Curacas, il commanda qu'on leur desliaist les mains, & qu'on eust à leur oster les cordes qu'ils s'estoient mises au col. Par où il tesmoigna

qu'il leur faisoit grace, & qu'il leur donnoit la vie & la liberté. Apres tout cela il se mit à leur remonstrer en termes doux & courtois, Qu'il n'estoit point là venu pour leur oster leurs biens ny leurs vies, mais plustost pour les enrichir, & leur apprendre à viure selon la raison & la loy naturelle; Qu'il leur falloit pour cét effet quitter leurs fausses Idoles, & adorer pour Dieu le Soleil, auquel ils auoient obligation de la grace qu'il leur faisoit; Que par son exprés commandement, sans autre dessein que de leur faire du bien, il les remettoit dans leurs terres, avecque la mesme prééminence qu'ils auoient auparauant sur leurs Sujets. A quoy il adiouta pour conclusion, qu'eux & leurs descendans cognoistroient la verité de son dire par l'experience qu'ils en feroient; puis que le Soleil l'auoit ainsi commandé; & partant qu'il s'en retournassent en leurs maisons, pour y prendre vn particulier soing de leur santé, & d'obeyr aux commandemens qui leur seroient faits pour leur commun bien. Leur ayant dit ces paroles, il leur donna de nouuelles assurances de sa bonté, & de la grace qu'il leur faisoit, en ce qu'il voulut que les Curacas au nom de tous leurs gens luy vinssent accoler le genoüil droit, pour leur faire voir qu'il les auoüoit pour siens, puis qu'il leur souffroit cela. Aussi tindrent-ils cette faueur pour inestimable, & d'autant plus grande, qu'ils ne pouuoient sans commettre vn sacrilege, toucher à la personne de l'Ynca, qui estoit vn de leurs Dieux, sinon en cas qu'ils fussent de sang Royal, ou qu'ils en eussent la permis-

296 LE COMMENTAIRE ROYAL,
sion de luy. Comme ils virent donc par ces démon-
strations de bonté, combien grande estoit enuers
eux la clémence de ce Roy, ils se creurent tout à fait
exempts du chastiment qu'ils apprehendoient; &
alors les Curacas se prosternants derechef à terre,
promirent à l'Ynca qu'ils tascheroient à l'aduenir de
luy estre bons, & fidelles Sujets. A quoy ils adiouste-
rent qu'un si grand Roy faisoit bien paroistre, & par
ses paroles & par ses actions qu'il estoit vray fils du
Soleil, & particulièrement en ce qu'il obligeoit de
la plus haute faueur du monde, des personnes qui
par leur rebellion auoient merité la mort.

Quant à l'explication de la fable cy-deuant dite,
que les Yncas font passer pour vne Histoire, l'on
tient qu'elle est telle; Que les Capitaines de l'Ynca
lassés de voir que la temerité des Collas s'augmen-
toit de iour en iour, commanderent secretement à
leurs gens de guerre, qu'au premier choc que les en-
nemis leur viendroient donner, ils eussent à les char-
ger tout de bon, sans les espargner, & à faire main
basse, iusques à les mettre tous à feu & à sang, s'ils
le pouuoient, pource qu'il n'estoit pas raisonnable
de souffrir plus long-temps le mespris qu'ils fai-
soient de l'Ynca. En effet cela ne fut pas plustost re-
solu, que l'execution s'en ensuiuit. Car les Collas qui
n'apprehendoient point d'iriter leurs ennemis, estâts
derechef venus pour les brauer, & les menasser à l'ac-
coustumée, furent receuz d'eux à toute rigueur, & si
mal traitez, qu'il en demeura la plus part sur la pla-
ce. Et d'autant que les gens de l'Ynca n'auoient

bataillé iufques alors qu'avec deffein de leur refifter , & non pas de les tailler en pieces , ils firent courir le bruit , qu'ils n'auoient non plus combattu ce iour-là que les autresfois ; Mais que le Soleil ne pouuant fouffrir le peu de refpect que les Collas portoient à fon Fils , auoit trouué bon que leurs propres armes fe tournaffent contre-eux , & qu'elles les chaftiaffent , puis que les Yncas ne l'auoient point voulu faire ; Ce que les Indiens , comme gens fimples , tindrent pour tres-veritable , voyant que les Yncas , eftimez Fils du Soleil , l'affeuroient ainfi. Tellement que les Amautas , qui eftoient leurs Philosophes , faifans l'allegorie de cette fable , ou de cette fourberie , dirent depuis que les Collas s'eftoient enfermez de leurs propres armes , pour ne les auoir voulu pofer , ny obeyr au commandement que l'Ynca leur en auoit fait.

*Trois Prouinces fe rendent à l'Ynca , il en con-
quefte d'autres ; fait des Colonies , & chaftie
certains peuples qui fouloient vfer de
poifon.*

C H A P. IIII.



A fable dont j'ay parlé cy-deuant , iointe à la clemence , & à la bonté de ce Prince , qui en donnoit tous les iours de nouuelles preuues à ceux qu'il faisoit fes tributaires , fut vne chofe

si puissante pour le mettre en bonne estime, que le bruit en estant semé dans toutes les villes frontieres de la Prouince appelée *Hatumpacaca*, où l'affaire s'estoit passée, l'on ne scauroit croire combien furent estonnez tous ceux qui en ouyrent parler. Cependant ces hautes merueilles gaignerent si bien les affections de tous ces peuples, que ceux des villes d'alentour se rendirent volontairement à l'Ynca Mayta Capac, qu'ils adorerent & seruirent comme Fils du Soleil. Mais entre les autres Nations, qui se soubmirent à luy, furent remarquables trois grandes Prouinces extremement riches en bestail, & fort aguerries, qu'on appelloit *Cauquicura*, *Mallama*, & *Huarina*, où se donna la sanglante bataille de *Gonzalo Pizarro*, & *Diego Conteno*. Apres que l'Ynca eut comblé de faueurs & de graces ceux qui s'estoient rendus à luy de leur bon gré, il passa le Canal du costé de *Cozco*; Puis comme il fut à *Altun Colla*, il enuoya son armée au Ponent, sous la conduite de ses quatre Maistres de Camp, ausquels il commanda de passer le desert qu'on appelle *Hatumpuna*, iusques où l'Ynca *Lloque Yupanqui* auoit estendu ses conquestes, & de reduire à son obeysfance les peuples qu'ils trouueroient au delà de ce desert, tirant vers la mer du Sud. Mais il leur recommanda sur toutes choses de n'en point venir à la derniere desconfiture avecque les ennemis, & que s'il s'en trouuoit parmy eux de si obstinez, & de si mutins qu'il ne fust pas possible de les reduire autrement que par la force des armes, & qu'en tel cas ils eussent à les laisser, pource
que

que l'euénement feroit cognoistre à ces Barbares, qu'ils y perdroient plus que les yncas n'y gaigneroient. Ayant mis cet ordre, & pourueu ses gens de munitions & de viures, les Capitaines firent marcher l'armée, & passerent la montagne neigeuse avec assez de fatigue, à cause que le chemin n'y estoit point battu, & qu'il auoit trauerfé de ce costé-là trente lieues de pays inhabité. A la fin ils arriuerent en vne Prouince appelée *Cuchuna*, dont les habitans estoient en assez bon nombre, mais tous separez, & esloignez les vns des autres. Au bruit qui leur vint de cette nouuelle armée, ils firent vn fort incontinent, & s'y retrencherent avec leurs femmes & leurs enfans. Les gens de l'ynca les assiegerent en mesme temps; & pour ne passer l'ordre qu'ils auoient eu de leur Roy, ne voulurent point battre le fort, combien qu'il fust assez foible; mais ils offrirent des conditions de paix, & d'amitié fort aduantageuses aux ennemis, qui toutesfois n'en voulurent receuoir aucunes. En cette contention entre les vns & les autres plus de cinquante iours se passerent, durant lesquels ceux de l'ynca ne manquerent point d'occasions de faire beaucoup de mal aux ennemis; mais ils ne le voulurent pas, pour ne violer leur ancienne coustume, ny les combattre mesme, non plus que les boucler, dans leur fort, si estroitement qu'ils eussent peu, afin d'observer de point en point tout ce que le Roy leur auoit enioint. Cependant ils ne laissoient pas d'auoir vn ennemy domestique qui les minoit à sçauoir la faim, qui est ordinairement cõtagieu-

300 LE COMMENTAIRE ROYAL,
se à ceux qu'on tient assiegez. Elle les trauailloit d'au-
tant plus, que pour la venuë inopinée des gens de
l'Ynca ils n'auoient pas eu loisir de faire les proui-
sions qui leur estoient necessaires; outre qu'ils se pro-
mettoient que les ennemis leueroient le siege plu-
stost qu'ils ne firēt, pour les laisser en leur obstination.
Or bien que durant cette famine qui estoit grande,
les hommes & les femmes eussent assez de courage
pour la souffrir, si est-ce qu'elle estoit insupportable
aux enfans & aux ieunes gens, qui à la façon des be-
stes s'en alloient paistre l'herbe parmy les champs,
& mesme plusieurs d'entre-eux se rendoient aux
ennemis, sans que leurs Peres les en empeschassent,
pource qu'ils aymoient bien mieux que cela fust, que
de les voir mourir de faim. Les Soldats les voyant
venir à eux, les traitoient fort doucement, iusques-
là mesme qu'avec ce qu'ils leur bailloient à manger,
ils leur donnoient des viures pour les porter à leurs Pe-
res, ausquels par ce moyen ils faisoient des offres de
paix & d'amitié mutuelle. Cepédant les ennemis, qui
se voyoient si bien traitez d'eux, & qui n'attendoient
du secours d'aucune part, demurerent tous d'accord
de se rendre volontairement, sans en venir aux con-
ditions; car ils iugerent apparemment que ceux qui
dans leur rebellion leur estoient si doux & si pitoya-
bles, le seroient encore plus, quand ils les verroient
ainsi humiliez, & soubmis à leur volonté. Ils se ren-
dirent donc à la mercy des gens de l'ynca, qui les
receurent amiablement, sans leur resmoigner d'e-
stre faschez ny de leur obstination, ny de la resisten-

ce qu'ils auoient faite. Au contraire ils leur firent de nouvelles protestations d'amitié, leur donnerent à manger, & les desabuserent de l'opinion qu'ils pouuoient auoir, disant que l'ynca Fils du Soleil ne tournoit point ses pensées à côquerir des Prouinces, pour en tyranniser les habitâs, mais plustost pour leur faire du bien, suiuant le commandement qu'il en auoit du Soleil son Pere. En effet pour les mieux asseurer de cette verité, ils leur en voulurent rendre des preuues par les presens qu'ils firent aux Principaux d'entr'eux, ausquels ils donnerent des vestemens au nom de l'ynca, & aux autres des prouisions & des viures, avec quoy ils s'en retournerent en leurs maisons fort satisfaits & contents.

Ces choses s'estant ainsi passées, les Chefs de l'Armée consulterent entre-eux sur le succès de cette conquête, & manderent des gens pour peupler deux villes de cette Prouince, qui pour sa fertilité leur sembla capable de nourrir plus de personnes qu'il n'y en auoit, outre qu'ils iugerent necessaire d'y laisser des garnisons, pour asseurer le pays, & prevenir sagement tout ce qui pourroit arriuer au preiudice de leur conquête. La nouuelle en estât venue à l'ynca, il resolut de leur enuoyer le nombre de gens qu'ils luy demandoient. Ils s'y en allerent donc avecque leurs femmes & leurs enfans, & peuplerent deux villes, dont l'une, qui estoit au bas de la montagne, où les habitans auoient basti leur fort, fut appellé *Cuchuna*, du nom de ce mesme mont, & l'autre *Moquehua*. Ces deux villes, qui sont à deux lieues

302 LE COMMENTAIRE ROYAL,
de distance, & de la Iurisdiction de Collisuyu, sont
des principales de ces Prouinces, qui en retiennent
le nom encore auourd'huy.

Or tandis que les Chefs de cette Armée de l'ynca
iettoient les fondemens des villes aux terres de ces
Barbares, & qu'à leur accoustumée ils donnoient
ordre à toutes les choses qui leur sembloient neces-
saires à les instruire & les gouuerner; Ils apprirent
que parmy ces Indiens, il y en auoit quelques-vns
qui souloient vser de poison contre leurs ennemis,
non pastant pour les tuer, que pour les defigurer
en leur visage, & les affliger en leur personne. Ce
poison estoit de cette nature, qu'il n'y auoit que ceux
de foible complexion qui en mourussent: toutesfois
les plus robustes en estoient quittes à si mauuais
marché, qu'asseurement la mort eust esté beaucoup
meilleure pour eux que la vie. Car ils la traïsnoient
dans vne perpetuelle langueur, priuez de sentiment,
estropiez de tous leurs membres, perclus de leur iu-
gement, & defigurez en leur visage, pource qu'il se
couuroit à l'instant de certaines pustules noires &
blanches, qui les rendoient si difformes, qu'on ne
les pouuoit regarder qu'avec horreur. En vn mot la
malignité de ce venin, qui agissoit dedans & dehors,
les exposoit à des peines insupportables, au grand
mescontentement de leurs parens & de leurs amis;
comme au contraire leurs ennemis, qui leur auoient
donné le poison, se plaïssoient à les voir ainsi languir,
& en estoient plus aysees en leur ame, que si l'effet en
eust esté violent. Ces Capitaines ne sceurent pas plu-

Il estoit cela, qu'ils en donnerent avertis à l'Ynca, qui leur enuoya dire, qu'ils eussent à faire bruler à petit feu tous ceux qu'on pourroit conuaincre d'auoir vie d'une cruauté si grande, & à proceder exactement en cette execution; afin qu'il ne restast à l'aduenir aucune memoire de ces meschans. Cependant ce mandement du Roy fut si agreable à ceux du pays, qu'ils en firent la recherche eux mesmes, executerent la sentence, & brulerent les delinquants tout en vie. Dequoy n'estants pas satisfaits, ils desmolirent leurs maisons, pour auoir esté la demeure de si maudites gens, ietterent au feu leurs troupeaux, desolèrent leurs possessions, & desracinerent les arbres; voulant que ces terres fussent à iamais desertes, de peur que ceux qui y rentreroient heritassent à leur dommage des meschancetez de leurs premiers Maistres. Cette seuerité mit si fort l'alarme par tout le pays, qu'à ce que disent les habitans, vne si noire malice n'y fut iamais plus pratiquée durant le regne des Yncas, iusques à ce que les Espagnols conquerent cette Contrée. Apres que les Chefs de l'armée de l'Ynca eurent fait cette punition, & pourueu aux nouuelles Colonies, aussi bien qu'au gouuernement des Nations conquises, ils s'en retournerent à Cozco, pour y rendre compte des choses qu'ils auoient faites, & y furent fort bien receus de leur Roy, qui les recompensa de leurs bons seruices.

*L'Ynca gaigne trois Prouinces , & vne bataille
sanglante.*

C H A P. V.



Velques années apres l'Ynca Mayta Capac se resolut derechef de reduire de nouvelles Prouinces à son Empire. Car l'ambition qu'auoient ces Roys d'estendre les bornes, s'augmentoit en eux de iour en iour. Ayant pour cét effet mis sur pied tout ce qu'il pût leuer de gens de guerre, & mis ordre aux prouisions necessaires pour leur entretenement, il tira droit à Puraca d'Vmasuyu, qui fut la derniere ville de la conqueste de son Ayeul, ou selon quelques vns de son Pere mesme, comme il a esté dit en son lieu. De Puraca il s'en alla vers le leuant, en vne Prouince appelée *Llaricassa*, qu'il conquist sans resistance, & les habitans de laquelle furent bien ayés de le receuoir pour leur souuerain. De là il passa outre en la Prouince nommée *Sancauan*, qu'il assuietit encore avecque la mesme facilité que l'autre ; Car la renommée qui auoit publié de toutesparts les faits memorables de l'Ayeul & du Pere de ce Prince, fut cause que ceux du pays se rendirent volontairement à luy. Où il est à remarquer que ces deux Prouinces, grandement peuplées, & fort riches en bestail, ont plus de cinquante lieues de longueur ; Ioint que d'vtr

costé elles en ont trête de largeur, & vingt de l'autre. Ayant ainsi réduit ces nouveaux Sujets, & mis ordre, comme c'estoit sa coustume, tant aux choses qui regardoient leur Idolatrie, qu'à celles de leur gouvernement, il s'en alla en la Prouince appelée Pacaça, dont les habitans se rendirent à luy comme les autres, sans vsfer de resistance, ny sans qu'il fust besoing d'en venir à vne bataille, puis que tous d'un commun accord luy obeïssioient, & le tenoient pour Fils du Soleil.

Cette Prouince, qui est fort grande, & où il y a plusieurs villes, fait vne partie de celle qui fut gaignée, comme nous auons dit, par l'Ynca Lloque Yupanqui, tellement que ces deux yncas, tant le Pere que le Fils, en acheuerent la conqueste. Ce dernier en estant venu à bout gaigna le chemin Royal d'Vmasuyu, d'où ils s'en alla camper tout auprès d'une ville qu'on appelle Huaychu. Là il fut aduertý qu'un peu plus auant il y auoit de grosses troupes leuées, en intention de luy faire la guerre. Pour tout cela neantmoins il ne laissa pas de passer outre, & d'aller en queste apres ses ennemis, qui se presenterent pour luy deffendre le passage d'une riuiera qu'ils appellent *Huychu*. Pour ce mesme effet se mirent à la campagne treize ou quatorze mille Indiens, tous gens de guerre diuersement appelez, bien que neantmoins ils fussent tous compris sous le nom de Colla. Alors l'Ynca, de qui le dessein n'estoit pas tant de leur donner bataille, que de continuer sa conqueste, comme il auoit fait iusques alors, enuoya souuent aux enne-

mis des hommes exprés, pour leur faire de sa part plusieurs belles offres de bien-veillance & de paix. Mais au lieu de les accepter elles ne faisoient qu'accroistre plus fort de iour en iour leur effronterie, & leur temerité. Car ils se faisoient accroire que toutes ces conditions que l'Ynca leur offroit, & ce qu'il différoit d'en venir aux mains, estoient des effets de crainte. Tellement qu'enflés de cette vaine presumption, ils passoient par troupes en diuers endroits de la riuere, & s'en alloient iusques au Camp de l'Ynca, où ils attaquoient ses gens insolemment. Luy cependant, qui vouloit espargner le sang des vns & des autres, faisoit son possible pour attirer les ennemis par douceur, & souffroit leurs brauades avec tant de patience, que ses gens commençoient desia de l'en reprendre, disant qu'il n'estoit pas bien seant à la Maiesté du Fils du Soleil de laisser impunie l'audace de ces Barbares, & que cela ne se pouuoit sans se faire mespriser à l'aduenir, ny sans diminuer beaucoup de l'estime qu'il auoit gagnée par le passé.

Toute la réponse que l'Ynca faisoit là dessus, afin d'adoucir le mescontentement des siens, estoit que pour obeyr au Soleil son Pere, qui desiroit qu'il eust esgard au commun bien des Indiens, il ne vouloit point d'abbord essayer de les auoir par les armes, mais laisser escouler vn peu de temps sans leur liurer le combat, pour voir s'il ne naistroit point en eux quelque cognoissance du bien qu'il leur vouloit faire. Il les entretenoit de ces langages vn assez long-temps,

temps, sans vouloir iamaïs permettre à ses Capitaines d'en venir aux mains avec les ennemis. Mais enfin vaincu par leur insolence, qui estoit insupportable, & par l'importunité des siens, il commanda qu'on les chargeast; si bien que ses gens, qui ne demandoient pas mieux, donnerent incontinent sur les ennemis. Alors ces barbares voyât que ceux qu'ils auoient si fort prouoquez au combat, estoient sur le point de le donner, s'y presenterent avecque beaucoup de courage & de promptitude; & commencerent à chamailler d'une façon bien estrange, les vns pour deffendre leur liberté, & persister en la resolution qu'ils auoient prise de ne point s'assuierir à l'Ynca, quelque Fils du Soleil qu'ils se dist estre, & les autres pour chastier l'insolence dont-ils auoient usé contre leur Roy. Il y fut combattu de part & d'autre, avec beaucoup d'obstination, & fort peu de preuoyance, principalement du costé des Collas, qui en hommes insensibles se iettoient brutalement à trauers les armes des ennemis, & s'exposoit ainsi aux coups, au lieu de les preuenir, comme gens barbares & desesperez, qui n'auoient ny ordre ny discipline; ce qui fut cause qu'il en demeura plusieurs des leurs sur la place. Le iour fut employé tout entier en ce combat obstiné, où l'Ynca fit tout le deuoir qu'on scauroit dire de bon Soldat & d'excellent Capitaine, soit qu'il fallust attaquer, ou faire retraite, & encourager les gens à la victoire.

Ceux de Huaychu se rendent à l'Ynca, qui leur pardonne.

C H A P. VI.



N la bataille dont nous venons de parler furent mis à mort plus de six mille Collas, à ce que disent leurs Descendans, pour auoir combattu pesse-messe & confusement ; Comme au contraire du costé des Yncas il n'y en eut qu'environ cinq cens de tuez, à cause de leur bon ordre, & de l'exacte discipline qu'ils obseruoient. L'obscurité de la nuit ayant separé les vns & les autres, ils firent retraite en leurs logemens, où les Collas sentant les douleurs de leurs blesseures, qui s'estoient desia refroidies, & voyant le nombre des morts, commencerent de prendre courage, sans sçauoir ny à quoy se resoudre, ny quel conseil ils deuoient prendre. Car ils n'auoient ny des forces à suffisance, pour se deliurer de leurs ennemis par les armes, ny le moyen de s'eschapper d'eux par aucun endroit, veu que les passages estoient pris de toutes parts. Que s'il leur prenoit enuie de recourir à la clemence de l'Ynca, ils s'en estimoient indignes pour leur insolence insupportable, & pour auoir mesprisé les conditions aduantageuses qu'il leur auoit fait offrir tant de fois.

Dans cette confusion de doutes & de pensées, ils ne trouuerent point de voye plus assurée que de s'en rapporter au iugement des plus vieux, qui furent d'auis de se rendre, disant qu'il valoit mieux tard que iamais, & que s'ils inuoquoient la clemence du Prince, qu'ils auoient offensé, il leur pardonneroit sans doute, à l'imitation de ses Predecesseurs, qui auoient tousiours vsé de misericorde & de compassion enuers les rebelles. Cette resolution prise entre eux; le lendemain si tost qu'il fut iour ils se mirent tous au plus mauuais equipage qu'ils peurent. Car les Soldats à demy-nuds, sans auoir ny la teste couuerte, ny les pieds non plus, ensemble les Capitaines & les principaux d'entre-eux s'estants fait lier les mains, s'en allerent au logement de l'Ynca, & se presenterent deuant la porte, les yeux tous baignez de larmes, sans luy oser dire aucun mot. Mais enfin voyant qu'il les receuoit courtoisement, ils se prosternerent à genoux, & luy dirent qu'ils n'estoient point là venus pour implorer sa misericorde, sçachant bien que leur obstination & leur ingratitude les en rendoiét indignes, mais seulement pour le supplier de commander à ses gens de guerre qu'ils eussent à se ietter sur eux, & à les passer au fil de l'espee, pour seruir d'exemple aux autres, & leur apprendre à n'estre rebelles comme eux au Fils du Soleil.

L'Ynca les ayant ouys voulut qu'un de ses Capitaines leur dit de sa part; Que le Soleil son Pere ne l'auoit point enuoyé au pays des Indiens pour les mettre à mort, mais pour leur faire du bien, & les

310 LE COMMENTAIRE ROYAL,
tirer de leur brutale façon de viure, en leur apprenant à cognoistre ce grand Luminaire qui estoit leur Dieu, & que par mesme moyen il vouloit qu'il leur imposast de bonnes Loix, afin qu'à l'aduenir ils vécussent en vrayes hommes; Et partant que pour s'acquitter de ce commandement, il s'en alloit de Prouince en Prouince, pour attirer au seruice du Soleil tout ce qu'il y trouuoit d'habitans, sans qu'il eust aucunement besoing d'eux; A cause dequoy comme fils qu'il estoit d'un si bon Pere, il leur pardonnoit, & les laissoit viure, encores qu'ils ne le méritassent pas; Qu'au reste ils pouuoient iuger de l'effet de leur rebellion par le rigoureux chastiment que le Soleil son Pere auoit fait de leurs gens, ce qui leur deuoit apprendre à estre plus sages à l'aduenir, & à luy rendre obeissance, afin de viure heureux & contents par les biens-faits qu'ils en receuoient. Leur ayant fait dire ces paroles, il commanda qu'on eust à leur donner des habits, & à penser leurs blessures, les obligeant par toute sorte de bon traitement à recognoistre la faute qu'ils auoient commise. Ainsi les Indiens bien aysez d'en estre quittes à si bon marché, s'en retournerent en leurs maisons, publiant par tout que leur rebellion estoit cause de leur mal, & qu'ils ne deuoient leur vie qu'à la clemence de l'Ynca.

*De la reduction de plusieurs Villes à l'obeyssance
de l'Ynca ; & du premier Pont qu'il
fit faire.*

C H A P. VII.



A nouvelle d'une si sanglante
desroute fût incontînât semée par
toute cette frontiere, & on la prit
pour vne punition que le Soleil
auoit faite de ces Indiens rebelles,
pour n'auoir voulu ny obeyr aux
Yncas, qui estoient ses enfans, ny
receuoir ses biens-faits. Cependant cela fut cause
que plusieurs villes, qui tenoient sur pied des gens
de guerre, pour s'en seruir à resister à l'Ynca, les
congedierent, & qu'au bruit de sa clemence & de
son bon naturel les habitâs le furent trouuer, luy de-
manderent pardon, & le prierent de les vouloir ad-
uoier pour ses tres-humbles Sujets. L'Ynca les re-
ceut fort courtoisement, leur fit des presens, & leur
donna des habits. Dequoy ils furent si contents,
que pour recognoissance de ces biens-faits, ils se mi-
rent à publier de toutes parts, que les Yncas estoient
vrais Fils du Soleil.

De cette façon les villes qui vers le Midy tirant du
costé des Charcas, s'estendent depuis *Huaychu*, ius-
ques à *Callamarca*, où il y a trente lieues de chemin

312 LE COMMENTAIRE ROYAL;
se soubmirent toutes à l'Empire & à l'obeïssance de
l'Ynca. Apres les auoir conquises il passa outre; &
par le mesme chemin Royal des Charcas, & de
Callamarca, il s'en alla droit à Caracollo, faisant
tributaires toutes les villes qui se voyent des deux
costez du grand chemin, iusques au Marescage de
Paria. De là il rebroussa vers le Leuant droit au
pays des Antis, & arriua en la vallée que l'on appelle
auiourd'huy *Chuquiapu*, c'est à dire en la langue ge-
nerale du pays *Lance principale*, ou *Lance de Capitaine*.
En tout ce destroit il fit peupler plusieurs villes de
quantité d'Indiens venus des autres Prouinces,
pource qu'il cognut que ces vallées estoient plus
chaudes que toutes les autres Prouinces qui sont
comprises sous le nom de Colla, & par consequent
plus propres pour y semer du Mayz, & en recueillir
en abondance.

Continuant son chemin vers le Leuant, de la
vallée de Caracata il alla ioindre la grande Monta-
gne neigeuse, qui est au pays des Antis, peuples
esloignez de plus de trente lieuës du grand chemin
d'*Vmasuyu*. Apres auoir passé trois années en ce
voyage, durant lesquelles il adiousta plusieurs villes
à son Empire, imposa des Loix aux habitans, & mit
ordre à leur gouuernement, il s'en retourna dans
Cozco, où il fut receu de son peuple avec de gran-
des demonstrations de ioye, & des applaudissemens
vniuersels. Là s'estant reposé deux ou trois ans, il fit
des preparatifs pour le Prin-temps suiuant, & pour-
ueut abondamment aux munitions & aux viures

qu'il iugea necessaires à faire vne nouuelle conquēte, la grandeur de son courage ne pouuant souffrir qu'il demeurast sans rien faire. Or pource qu'il auoit dessein de s'en aller au Ponent de Cozco, vers le pays qu'on appelle *Contisuyu*, qui contient plusieurs Prouinces de large estenduë; & qu'il luy falloit tra-uerfer la grande riuiera d'Apurimac; il s'aduifa pour cēt effet d'y ietter vn Pont, pour donner passage à son armée: & voyant que les gens ne sçauoient de qu'elle façon s'y prendre, il leur en donna l'in-uention luy-mesme, apres en auoir communiqué avec quelques Indiens des plus ingenieux du pays. Et d'autant que ceux qui ont escrit du Peru demeurent bien d'accord qu'il y a des Ponts, sans que toutesfois ils disent de quelle maniere ils sont faits, il me semble fort à propos d'en faire icy la peinture, tāt en faueur de ceux qui n'en ont point veu de semblables, qu'à cause que ce fut icy le premier Pont d'ozier qui se fit dans le Peru, par l'expres commandement des Yncas.

Pour faire vn de ces Ponts, les Indiens amassent vne grande quantité d'vn certain ozier, qui n'est pas si gros, ny si tendre que celuy d'Espagne, & en font premierement vne maniere de clisse de la longueur dont ils veulent que soit le Pont; puis sur la mesure de celle-cy, de plusieurs autres clisses, qu'ils attachent l'vne à l'autre, au nombre de ving-sept, ils en formēt vne claye; qui est à peu près de l'espaisseur du corps d'vn homme, & en font iusques à cinq. Pour les passer de l'autre costé de la riuiera, il y a des In-


314 LE COMMENTAIRE ROYAL,
diens, qui se mettent à la nage; ou sur des radeaux,
dequoy ils viennent à bout de cette sorte. Ils atta-
chent plusieurs petites cordes assez desliées à vn ca-
ble, qui est gros comme le bras, & fait d'un certain
chanure que les Indiens appellent *Chahuan*. A ce
mesme cable ils lient les grosses clisses avec les pe-
tites cordes, si bien que de plusieurs Indiens qu'ils
font chacun en tient vne, & ainsi tous ensemble à
force de bras les tirent à l'autre bord. Les ayant pas-
sées toutes cinq, ils les esleuent sur deux estençons
assez hauts, faits des pierres de quelque rocher qu'ils
trouuent commodement; ou bien à faute de cela, ils
fot ces pilotis d'une autre pierre, qui n'est pas moins
forte que celle d'un roc, comme il se void par le
Pont d'Apurimac, qui est au grand chemin de Coz-
co, lequel a vn estençon de pierre de roc, & l'autre
de maçonnerie. Ces pilotis du costé de la terre sont
creux, & appuyez par les costez de fortes murail-
les. Or en ce qu'il y a de creux d'une muraille à l'au-
tre à trauers chèque estençon, sont mises par ordre
cinq ou six planches fort espais, où aboutissent les
grosses clayes d'ozier, afin que par le moyen de ces
arcs-boutans le Pont soit fortifié, & qu'une si pesan-
te masse ne s'escroule point par sa propre pesanteur,
qui est fort grande. Le plancher de ce Pont est fait
de trois grosses clayes, dont nous auons parlé cy-de-
uant, & les autres y sont mises pour appuys des deux
costez. Le Pont a quelques deux aulnes de lar-
geur, & les clisses, qui luy seruent de plancher sont
couuertes de pieces de bois, d'environ la grosseur
d'un

d'un bras, fort proprement agencées mises chacun en son ordre, & attachées aux clisses, afin de les conserver, & empêcher qu'elles ne viennent si tost à se rompre: Sur ce plancher ils mettent encore quantité de ramée, ou de branches d'arbre entrelassées, afin que les bestes de charge qui ont à passer par là aient le pied plus assuré, & qu'elles ne viennent point à glisser. Dequoy ils se seruent pareillement, pour fortifier le Pont des deux costez de sa largeur, où de cette mesme ramée ils font comme vne maniere de muraille pour la commodité des passans. Le Pont d'Apurimac, qui est le plus grand de tous ceux du Peru a quelques deux cens pas de longueur; non que ie le veuille assurer pour l'auoir mesuré, mais pour l'auoir ouy dire en Espagne à quantité de gens qui ont passé par dessus. J'ay veu plusieurs Espagnols, qui ne daignoient mettre pied à terre, quand il le falloit passer, & mesme qui galoppoient dessus, soit qu'ils le fissent par galanterie, ou pour en paroistre plus hardis, combien qu'à dire le vray il y eust en cela vn peu de temerité. Toute cette grande machine n'estoit composée que de trois clayes, ou clisses, entassées l'une sur l'autre, & ne laissoit pas d'estre si merueilleuse, qu'il ne seroit pas possible de le croire, si l'on ne l'auoit veu. Il y a de l'apparence qu'on aura tousiours entretenu ce pont, pour la commodité des passans, si ce n'est que le temps l'ayt, à la fin desmoly, comme plusieurs autres, que les Espagnols trouuerent en ces contrées, bien plus grande que celuy-cy. Au temps des Roys Yncas, ce Pont se

316 LE COMMENTAIRE ROYAL,
renouuelloit tous les ans, & ceux des Prouinces fron-
tières, en faisoient les reparations, fournissant les
materiaux, ausquels ils estoient taxez, selon les
moyens des habitans de châque Prouince; ce qui
s'obserue encore aujourd'huy.

*Au bruit de ce Pont, plusieurs Nations se redui-
sent, & se rengent volontairement
sous l'obeïssance de l'Ynca.*

C H A P. VIII.

 Ynca ne sceut pas plustost que le Pont estoit
acheué, qu'il fit marcher son Armée, qui
estoit composée de douze mille hommes,
& conduite par des Capitaines aguerris, & fort ex-
perimentez. Auecque ces troupes, il marcha iusques
au Pont, où il trouua vne bonne garde de Soldats,
prests à le deffendre, en cas que les ennemis y vou-
lussent mettre le feu; A quoy toutesfois ils ne pen-
soient nullement. Car ils n'estoient pas moins eslon-
nez de l'estrange nouveauté de cette Machine, qu'ils
estoint desireux de recevoir pour leur maistre le
Prince qui l'auoit faite. Aussi est-il vray qu'en ce
temps là, & auant que les Espagnols passassent en
ces contrées, les Indiens du Peru estoient si niays &
si credules, qu'il ne falloit que la moindre nouveau-
té, pour leur faire appeller diuins & Fils du Soleil
ceux qui en estoient les auteurs, qu'ils recognois-

soient incontinant pour leurs Souuerains. Confor-
 mement à cela ie diray que rien ne les obligea tant à
 tenir les Espagnols pour Dieux, & à s'assuiettir à
 leur Empire en leur premiere conqueste, que de les
 voir combattre sur des cheuaux, qui leur sembloient
 estre des animaux farouches & indomptables; & s'ai-
 der si adroitement des armes à feu, qu'ils tuoient
 leurs ennemis de deux à trois cens pas. Ces deux cho-
 ses principalement, laissant les autres à part, furent
 cause qu'ils les tindrent pour Fils du Soleil, & qu'ils
 se rendirent avec peu de resistance; Ce qui fust sans
 doute vn effet de l'admiration que leur apporta la
 nouueauté; comme il leur arriue encore aujour-
 d'huy, toutes les fois que les Espagnols exposent au
 iour quelque chose qu'ils n'ont point encore veüe,
 comme des moulins à moudre du bled, des bœufs
 dressez au labourage, des Ponts faits en voultres, &
 en arcades sur les riuieres, qui leur semblent suspen-
 dus en l'air, & ainsi des autres nouueautez qu'ils
 voyent de iour en iour, qui leur font dire en faueur
 des Espagnols, qu'ils meritent d'estre seruis par les
 Indiens. Côme ils estoient d'oc beaucoup plus credu-
 les au temps de Mayta Capac, ce nouveau Pont leur
 fut vn si haut suiet d'admiration, qu'il ne fallut que
 cela pour reduire plusieurs Prouinces de cette fron-
 tiere, & leur faire receuoir l'Ynca sans luy resister.
 La principale de ces Prouinces fut celle qu'ils appel-
 lent *Chumpiwillca*, au destroit de Cuntisuyu, qui a
 vingt lieues de long, & douze de large. Ils se rendi-
 rent donc à l'Ynca de leur bon gré, tant pour le bruit

318 LE COMMENTAIRE ROYAL;
que l'on faisoit courir, qu'il estoit Fils du Soleil, que pour la merueille de ce chef-d'œuvre nouveau, ne pouuant croire que telles choses peussent estre faites par d'autres personnes, que par des hommes venus du Ciel. Il ne trouua de la resistance qu'en la seule ville de *Villili*, d'où les habitans sortirent, & se retrancherent dans vn fort qu'ils firent exprés. L'ynca les tint assiegez de tous costez, pour empescher que pas vn d'eux ne sortist, & les fit sommer d'un autre costé, avec la clemence & la bonté qui luy estoient ordinaires. En effet les assiegés ne tindrent que dix ou douze iours, à la fin desquels ils se renderent à luy, qui leur pardonna. Puis laissant cette Province paisible, il tira vers le desert de *Cuntisuyu*, qui a seize lieuës de trauerse, dont il en trouua trois, où le pays estoit si marescageux, & si mauuais, qu'il arresta son Armée, & l'empescha de marcher.

Mais pour surmonter par l'art la nature de ce lieu, de plusieurs pierres grandes & petites, où l'on entremesloit des mottes de terre, il en fit faire vne chaussée, où luy-mesme trauailla, soit qu'il fust question de donner l'ordre à ses gens, ou de leur ayder à leuer les grosses pierres, qui estoient necessaires à ce trauail. Tellement que par son exemple il les rendit si habilles à l'œuvre, qu'en peu de iours ils acheuerent cette chaussée, qui auoit six aulnes de large, & deux de hauteur. Les Indiens de la frontiere l'ont tenuë, & la tiennent encore auourd'huy en grande veneration, tant pour la commodité qu'ils en retirerent, que pource qu'elle leur espargne beaucoup de

chemin, & de peine; ce qu'ils ne pouuoient esuiter auparavant, à cause que ce lieu estoit, comme j'ay dit, de part & d'autre, fort marescageux, & remply de bouë. Pour cela mesme ils sont aujourd'huy tellement soigneux des reparations de cette chaussée, qu'une pierre n'est pas plustost tombée, qu'ils en remettent une autre en sa place; A quoy chèque nation s'employoit en particulier, & traualloit punctuellement à l'endroit qu'elle estoit obligée de reparer, si bien que cette œuvre sembloit tousiours estre neufue. Ce qu'ils obseruoient encore en toutes les autres reparations, qui se faisoient pour la commodité du public, qu'ils partageoient par familles, ou par feux, si l'œuvre estoit petite; ou bien par villes, ou par Prouinces, si elle estoit grande, comme sont les Ponts, les Fortereffes, les Maisons Royales, & ainsi du reste; où il est à remarquer que les gazons ou les mottes de terre sont grandement propres aux chaussées, pource qu'entremeslées ensemble, elles leur seruent de ciment, & les fortifient.

L'Ynca gaigne plusieurs autres Prouinces, & meurt paisible dans son Royaume.

CHAP. IX.



Pres que la chaussée fut faite, l'Ynca Mayta Capac passa outre, & entra dans vne Prouince appelée *Allia*, où s'assemblerent plusieurs Indiens de toute cette contrée, avecque dessein de luy deffendre le passage de certains costaux extremement rudes, & où il est si mal aysé de monter, qu'ils font horreur à ceux qui passent par là, sans crainte d'aucuns ennemis, & qui sont par consequent fort redoutables à ceux qui en ont plusieurs en teste. Toutesfois quelques dangereux qu'ils fussent l'Ynca trouua moyen de s'y comporter avecque tant de conseil, de prudence, & d'adresse militaire, qu'encore que ceux de la frontiere s'y opposassent, si ne laissa-t'il pas de leur resister courageusement; de telle sorte qu'il gaigna tousiours pays, & qu'en cette resistance il y en eut plusieurs de tuez de part & d'autre. Mais enfin comme les ennemis virent qu'au lieu de gaigner, ils perdoient de iour en iour, & qu'en ces lieux presque inaccessibles, ils ne pouuoient faire teste aux gens du Roy, ils dirent tous d'un accord, qu'il falloit asseurement que les Yncas fussent vrayes Fils du Soleil, puis qu'ils se montroient ainsi inuinci-

bles dans les dangers. Se laissant doncques surprendre à cette vaine creance, apres auoir résisté plus de deux mois, à la fin du commun consentement de toute la Prouince, ils receurent l'Ynca pour leur souuerain Seigneur, & luy iurerent obeïssance en qualité de bons & de fidelles Sujets.

De cette façon l'Ynca victorieux & triomphant fit son entrée en la principale ville nommée Allca, d'où il passa en d'autres grandes Prouinces appelées Taurisma, Cotahuaci, Pumatampu, & Parihuana-Cocha comme qui diroit *le Lac aux Passereaux*, pource qu'en vn endroit du desert de cette Prouince il ya vn fort grand Lac, & qu'au langage de l'Ynca, ils nomment *Cocha* la Mer, ou vn Marefcage, & *Parihuana* les passereaux, & autres oyseaux de ce genre, si bien que de ces deux noms ils n'en font qu'vn, disant *Parihuana-Cocha*, quand ils veulent denoter cette Prouince, qui est grande, fertile & abondante en or; Où il faut remarquer que les Espagnols ont accoustumé de la nommer par syncope *Parin-Cocha*. Quant au mot *Pumatampu*, il est aussi composé, à sçauoir de *Puma*, & de *Tampu*, dont l'vn signifie *Lion*, & l'autre *Depost*, comme qui diroit, *le depost du Lion*, ou possible plus à propos *le repaire*, nom qui fut apparemment imposé à ce lieu, pource qu'il est à croire, que là mesme il y eust autresfois quelque effroyable Lionne, ou possible d'autant qu'en cette Prouince il ya plus de Lions qu'en pas vne autre.

De Parihuana-Cocha l'Ynca passa outre, & trauersa le Desert de Coropuna, où se void vne belle &

322 LE COMMENTAIRE ROYAL,
haute Pyramide de neige, que les Indiens ont accoustumé d'appeller *Huaca*, c'est à dire *merueilleuse* comme elle l'est en effet; à cause de quoy les habitans de cette frontiere, comme gens superstitieux, & de peu d'esprit, luy faisoient des Sacrifices & l'adoroient pour son extreme beauté. Ayant trauersé le desert, il entra dans la Prouince appelée *Aruni*, d'où il alla plus auant en vn autre lieu nommé *Collahua*, qui s'estend iusques à la vallée d'*Arequipa*, laquelle à ce qu'en dit le R. P. Blas Valera, signifie *Trompette esclatante*.

Toutes ces Prouinces & ces Nations furent reduites sous l'obeissance de l'Ynca Mayta Capac, & ce fut avec beaucoup de douceur & de facilité que les habitans se rangerent à son Empire. Car au bruit qui courut incontinant des grandes choses qu'il auoit faites au passage de la montagne d'*Allca*, qui est effroyable, & pleine de precipices, ils furent bien aysez d'estre ses Sujets, comme le croyant inuincible, & vray Fils du Soleil. L'Ynca s'arresta en chacune de ces Prouinces, durant tout le temps qu'il iugea necessaire, pour y establir la paix, & le bon gouuernement. Or d'autant qu'il trouua despeuplée la vallée d'*Arequipa*, & qu'à bien considerer la fertilité du pays, & le bon temperament de l'air il le iugea fort habitable, il y enuoya pour cét effet quantité d'Indiens, de ceux qu'il auoit cōquis. Pour les mieux inciter à s'en aller peupler cette vallée, il leur remonstra que ce pays ne seroit pas moins agreable qu'*vile* à ceux qui s'y en iroient demeurer, mais particulièrement


lièrement aux gens de leur Nation. Aussi arriua-t'il par ses persuasions que pour la commodité de cette vallée, il tira plus de trois mille familles de leurs maisons pour les y enuoyer. De sorte qu'avec ces gens il fonda quatre ou cinq villes, dont il en nomma vne *Chimpa*, & l'autre *Sucahuaya*; puis si tost qu'il y eust laissé des Gouverneurs & tels autres Officiers qu'il iugea necessaires à les instruire & les policer, il s'en retourna dans Cozco, ayant employé à cette conqueste trois ans tous entiers, durant lesquels dans le seul destroit appellé Cantisuyu, il conquit vne estendue de pays qui auoit bien près de 90. lieues de longueur, dix ou douze de largeur, à le prendre d'un costé, & quinze de l'autre, toute laquelle estendue estoit contigue à celle qu'il auoit gaignée, & soubmise à son Empire.

Il fut receu dans Cozco avec de grandes solemnitez, tellement qu'en la magnifique entrée qui luy fut faite, il ne se parla que de resiouissances, de fettes, de dances & de chansons, qui furent composées à la louange de ses beaux-faits. Luy cependant ayant reconnu de son costé le seruice de ses Capitaines, & de ses autres gens de guerre, congedia son armée, & se contentant de ce qu'il auoit conquis iusques alors, resolut de se reposer de tant de trauaux endurez par le passé. Il fit dessein par mesme moyen de ne tourner ses pensées qu'à faire des Loix, pour le bon gouuernement de son Royaume, avec vn soing tres-particulier de conseruer le bon droit des pauvres, des Orphelins, & des Veufues à quoy certes il

324 LE COMMENTAIRE ROYAL,
employa tout le reste de sa vie. L'on ne sçait pas au
vray de combien de temps elle fut ; mais quant à son
regne, l'on tient qu'il égala celuy de ses Predeces-
seurs, & qu'il fut d'environ trente années, bien que
l'on n'asseure au vray ny l'un ny l'autre. Quoy qu'il en
soit, il mourut plein de trophées, & de conquestes,
dont il se rendit fameux en temps de paix & de guer-
re. Tous ses Sujets, qui durant sa vie le cherirent &
l'estimerent grandement, le regreterent beaucoup
aussi apres sa mort, & en porterent le deuil vn an tout
entier comme c'estoit la coustume. Il laissa pour he-
ritier vniuersel Capac Yupanqui son fils aîné, qu'il
auoit eu de Mama Cuca sa femme & sa sœur. Outre
ce Prince il eust plusieurs autres fils & filles, tant de
ceux qu'ils disoient estre sortis de sang legitime, que
de ces autres qui ne l'estoient pas.

*Capac Yupanqui cinquieme Roy, gaigne plu-
sieurs Prouinces, & se les assuiettit à
Cuntisuyu.*

C H A P. X.

 I tost que l'Ynca fut mort, Capac Yupan-
qui son heritier legitime, de qui nous auons
expliqué le nom conformement à celuy de
ses Predecesseurs, prit la bordure de couleur, mar-
que de la souueraineté, & de la possession qu'il pre-
noit de l'Empire de son Pere. En ayant fait la pom-

pe funebre, il se mit à visiter toutes les terres de l'estenduë de ses Estats, & s'en alla de Prouince en Prouince s'enquerant des deportemens des Gouverneurs & des Officiers. Il employa deux ans à cette visite, apres laquelle il s'en retourna vers Cozco. A son arriuée il fit leuée de gens de guerre, & de grands preparatifs pour l'année suiuite. Car son dessein estoit de s'en aller à de nouvelles conquestes du costé de Cuntisuyu, qui est au Ponent de Cozco, où il sçauoit y auoir plusieurs grandes Prouinces extrêmement bien peuplées. Pour s'y en aller plus commodement, il commanda que sur la grande riuiera d'Apurimac, au Parage qu'on appelle *Huacachaca*, l'on eust à faire vn autre Pont plus bas que celuy d'Accha. Ce qui fut executé en diligence, & mesme on le fit plus long que le precedent, à cause qu'en cét endroit la riuiera y est plus large qu'ailleurs.

L'Ynca sortit donc de Cozco suiuy d'vne armée de vingt mille hommes, avec laquelle il arriua droit au Pont, qui est à huit lieuës de la ville. Le chemin qu'il tint est si raboteux & si difficile, que le seul Costau par où il faut passer necessairement pour aller à la riuiera, a prés de trois lieuës de descente, à le prendre perpendiculairement, bien qu'il n'ait pas demy lieuë de hauteur; & quant à sa montée de l'autre costé du fleuve, elle est aussi de trois lieuës. Au passage de ce Pont il entra dans vne belle Prouince appellée *Ynahuara*, qui a maintenant plus de trente villes, sans qu'on puisse sçauoir combien elle en auoit alors. Les habitans de celle qu'on nomme *Piri*, se rendirent à

326 LE COMMENTAIRE ROYAL,
luy d'abbord en qualité de Vassaux & de Tributaires,
& n'est pas à croire avec combien de zele & d'affec-
tion ils le firent. Car en mesme temps qu'ils eurent
aduis de sa venue, ceux de tous âges & de tout sexe
furent au deuant de luy avec des chants d'allegresse,
& des acclamations vniuerselles. L'Ynca les receut
de mesme avec vn grand applaudissement, leur don-
na des Robbes, & leur fit quantité d'autres presens
selon la coustume de sa Cour. Cependant les habi-
tans de Piti enuoyerent des hommes exprés à ceux
des autres villes de leur frôtiere, & de la mesme Na-
tion Yanahuara, leur donnant aduis par eux de la
venue de l'Ynca, & comme ils l'auoient receu pour
leur Roy. Dequoy l'effet fut si aduantageux pour
luy, qu'à leur exemple les autres Curacas se range-
rent à son Empire de leur bon gré, & firent de mes-
me que ceux de Piti.

L'Ynca les receut comme les premiers, les com-
blant de faueurs & de caresses ; Puis pour les obli-
ger dauantage, il voulut voir toutes les villes de ce
pays à vingt lieues de longueur, & quinze de large.
Cela fait, de la Prouince d'yanahuara, il entra dans
celle d'Aymara, & trouua entre l'vne & l'autre vn
desert de quinze lieues de trauerse. De l'autre costé
de ce desert, en vne grande montagne appelée Mu-
canca, il fit rencontre d'vn grand nombre de gens
de guerre, qui s'estoiét là ramassez, pour luy deffen-
dre le passage, & l'empescher d'entrer en leur Pro-
uince, qui a plus de trente lieues de longueur, & plus
de quinze de large; ioint qu'elle est grandement ri-

che en Minieres d'or, d'argent, & de plomb, abondante en bestail, & peuplée d'un bon nombre d'habitans en toutes les villes, dont il y en auoit plus de quatre-vingts auant cette reduction. L'Ynca fit camper son armée au pied de la montagne, pour disputer le passage à ses ennemis, lesquels comme gens Barbares & sans discipline auoient abandonné leurs villes, & pris possession de cette Montagne, comme d'une forteresse, sans considerer qu'ils s'y estoient engagez comme dans un Clos. L'Ynca laissa passer plusieurs iours, sans vouloir ny leur donner bataille, ny leur faire d'autre mal que couper chemin aux viures, afin de les reduire à serendre par le moyen de la faim. A quoy d'un autre costé il les inuitoit à l'amiable.

Il se passa plus d'un mois en cette contention entre les vns & les autres, iusqu'à ce qu'en fin les Indiens rebelles violentés par la famine qui les pressoit de toutes parts, enuoyerent des hommes à l'Ynca, pour luy dire ; Qu'ils estoient prests à le receuoir pour Roy, & l'adorer pour Fils du Soleil, si comme tel il leur donnoit sa parole, qu'aussi-tost qu'ils se seroient rendus à luy, il assuietiroit la Prouince d'Vmasuyu, dont les habitans leurs voisins, hommes extrêmement aguerris, les traitoient si cruellement, qu'ils s'en venoient les persecuter iusques aux portes de leurs maisons, où ils rauageoient leurs pasturages, & leur faisoient une infinité d'autres maux. A quoy ils adiouterent, que pour le mesme suiet, ils auoient eu souuent guerre contre-eux, leurs voleries & les

328 LE COMMENTAIRE ROYAL,
meurtres qu'ils faisoient leur estant insupportables,
sans que ce desordre se fût calmé que pour vn temps,
pource que l'inhumanité de ces peuples attiroit de
iour en iour de nouuelles seditions; Et partant qu'a-
yant à estre ses Suiets, ils le prioient tres. humble-
ment de les desliurer de si mauuais voisins, puis qu'à
cette condition ils estoient contents de se rendre à
luy, & de le receuoir pour leur Prince.


L'Ynca leur fit sçauoir son intention par la bou-
che d'un de ses Capitaines, qui leur dit de sa part,
Qu'il n'estoit là venu qu'avecque dessein de soulager
les oppressez, & d'instruire tous ces peuples Barba-
res en la vraye Loy qu'ils deuoient suiure, leur appre-
nant à viure en vrais hommes, & non pas en bestes,
& à cognoistre le vray Dieu, qui estoit le Soleil.
Qu'au reste, puis qu'en qualité d'ynca il luy appar-
tenoit d'empescher les violences & les iniures, com-
me pareillement de rager les Indiens à la raison, il ne
falloit pas qu'ils se missent en peine d'une chose à la-
quelle il se croyoit obligé par le deuoir de sa charge,
& qu'ainsi il acceptoit bien l'offre qu'ils luy faisoient
d'estre ses Sujets, mais non pas la condition qu'ils
luy presentotent, d'autant que ce n'estoit pas à eux à
luy imposer des Loix, mais bien à les receuoir du
Fils du Soleil, à la volonté duquel ils deuoient re-
mettre leurs differents, leurs diuisions, & leurs guer-
res, puis qu'il sçauoit bien ce qu'il auoit à faire.

Les Ambassadeurs furent renuoyez avec cette res-
ponse, si bien que le iour d'apres tous les Indiens,
hommes, femmes, & enfans, qui s'estoient retirez

sur cette Montagne iusques au nombre de trente mille personnes, dont il y en auoit plus de douze mille de combattans, vindrent trouuer l'Ynca, pour se rendre ses tributaires & ses Vassaux. En cette ceremonie les habitans de chèque ville se diuiserent par troupes, & s'estant mis à genoux à leur accoustumée, le reconnurent pour Roy, & pour marque de cela luy presenterent de l'or, de l'argent, du plomb, & tout ce qu'ils pouuoient auoir en leur possession. L'Ynca les ayant receus avec beaucoup de clemence, commanda qu'on leur donnast à manger, pour ce qu'ils estoient tous affamez, & qu'on les pourueust de viures abondamment, pour se pouuoir retirer dans leur villes, sans souffrir de l'incommodité par le chemin. Surquoy il leur commanda qu'ils s'en allassent en leurs maisons.

L'Ynca s'assuiettit les Aymaras, pardonne aux Curacas, & met des bornes à leurs frontieres.

C H A P. XI.

 Pres que l'Ynca eut ainsi renuoyé ces nouueaux Sujets, il s'en alla en vne des villes de la mesme Prouince qu'on appelloit *Huquirça*, qui a pour le iourd'huy plus de mille feux. Mais auparauant qu'y arriuer, il enuoya dire de sa part aux Casiques d'*Vmasuyu*, qu'ils

eussent à comparoistre deuant luy, lequel comme Fils du Soleil vouloit appaiser les differents, qu'ils auoient auecque ceux d'*Aymara*, pour le droit des Pasturages, & qu'au surplus il les attendoit à *Huquirça*, pour leur imposer des Loix & des ordonnances, afin qu'à l'aduenir ils eussent à viure en hommes raisonnables, & non pas à s'entre tuer brutalement pour les pasturages de leurs troupeaux, puis qu'on sçauoit bien que les vns & les autres auoient abondamment dequoy les repaistre en leur pays. Les Curacas d'*Vmasuyu* s'estants assemblez pour faire vne cōmune responce, puis que le commandement leur auoit esté fait en commun, dirent resoluement, qu'ils n'auoient que faire d'aller trouuer l'*Ynca* où il estoit, & que si luy-mesme auoit bēsoing d'eux, qu'il les vint chercher en leur pays, où ils l'attendoient les armes en main; Qu'ils ne sçauoient point au reste s'il estoit Fils du Soleil, ou bien s'il ne l'estoit pas; Qu'ils ne cognoissoient ny ne vouloient cognoistre cēt Astre pour leur Dieu; Qu'ils auoient desia leurs Deitez tutelaires, dont ils se tenoient pour contents, sans en vouloir d'autres; Qu'il imposast des Loix tout à son ayse à ceux qui les voudroient obseruer, & que pour eux ils n'en sçauoient point de meilleures que de s'acquérir par les armes ce dequoy ils auoient besoing; Que par elles mesmes ils emportoient de pleine force ce qu'on leur refusoit ouuertement, & deffendoient leur pays de la violence de ceux qui s'en alloient les importuner, comme ils s'asseuroient de le faire voir à l'*Ynca*, au
 champ.

champ de bataille, en qualité de vaillants Soldats.

L'ynca Capac Yupanqui, & ses Maistres de Camp, ayant bien considéré cette responce de ceux d'Vmasfuyu, conclurent ensemble, qu'il falloit donner dans leurs villes le plus promptement qu'il seroit possible, afin que les prenant au depourueu ils eussent moyen de chastier leur temerité, plus par la terreur des armes, que par vn desir de s'en seruir à leur nuire. Car comme il a esté dit cy-deuant, le premier Ynca Manco Capac fit cette Loy generale, qu'il voulut estre obseruée de tous les Roys ses Descendans, Qu'aux conquestes qu'ils feroient à l'aduenir, ils n'eussent point à respandre du sang qu'aux dernieres extremitez, & qu'ils essayassent de gaigner les Indiens par caresses & par biens-faits. Qu'au demeurant s'ils se comportoient de cette sorte, asseurement ils se feroient aymer de leurs Vassaux, qu'ils auroient conquis par amour; comme au contraire ils leur feroient tousiours odieux, s'ils les auoient par la force. Ainsi l'ynca Capac Yupanqui voyant bien qu'il luy falloit garder cette Loy pour l'accroissement & la conseruation de son Royaume, fit tenir prests huit mille hommes des plus aguerris de son armée, avec lesquels marchant iour & nuict, il netarda guerre à se rendre en la Prouince d'Vmasfuyu, dont les habitans ne l'attendoient pas d'un mois, à cause du grand attirail de son armée, & des obstacles qu'ils se figuroient. Comme ils le virent donc arriué si soudainement au milieu de leur pays avecque des gens d'élite, outre le renfort qu'il auoit en l'arriere gar-

332 LE COMMENTAIRE ROYAL,
de ; l'apparence leur faisant croire qu'ils ne pour-
roient se r'allier si habillement , ny s'armer si tost
pour leur deffense , que l'Yncan'eust moyen aupa-
rauant de mettre le feu dans leurs maisons , ils se re-
pentirent de la mauuaise responce qu'ils luy auoient
rendue. Ce qui fut cause qu'ils mirent les armes bas ;
Alors les Curacas accourus en diligence de toutes
parts , firent implorer sa misericorde & sa clemence,
par des gens qu'ils enuoyerent exprés , puis ils s'y en
allerent en personne , les suppliant de leur pardon-
ner , puis qu'ils le recognoissoient pour Fils du So-
leil , & qu'estant Fils d'un si grand Pere ils se promet-
toient qu'il les receuroit pour ses Vassaux ; surquoy
ils luy protesterent de le seruir fidèlement.

En effet les Curacas trouuerent en luy vn procé-
dé tout à fait contraire à l'apprehension qu'ils en
auoient. Car au lieu de leur faire trancher la teste
comme ils se l'imaginoient , il les receut avec beau-
coup de clemence , leur faisant dire , Que dans la
barbarie , où ils viuoient , sans estre instruits de per-
sonne , il ne s'estonnoit point s'ils ne sçauoient ny la
Religion qu'ils deuoient suiure , ny comment viure
moralement. Qu'au surplus il estoit bien asseuré que
lors qu'ils auroient vne fois gousté le bon ordre , &
le gouuernement des Roys ses Predecesseurs , ils se-
roient fort aysez d'estre ses Vassaux & se porteroiét
asseurement au mespris de leurs Idoles , quand ils
auroient recognu les grands biens qu'eux & tout le
monde receuoient du Soleil son Pere ; Que pour ce
suiet ils le deuoient tenir pour leur Dieu , au lieu

d'en adorer d'autres, qu'ils disoient estre les tutelaires de leur pays, puis que ces faux Dieux, qu'ils recognoissoient sous des figures d'animaux vils & immondes, estoient plus dignes de mespris que d'adoration: & partant qu'il leur commandoit de luy obeïr en tout, & par tout, & de faire à l'aduenir ce que luy mesme ou ses Gouverneurs leur commanderoient tant pour le fait de la Religion, que de l'observation des Loix, veu que l'un & l'autre procedoient de leur Pere le Soleil.

Les Curacas respondirent avec beaucoup d'humilité, Qu'ils luy promettoient de n'adorer iamais d'autre Dieu que son Pere le Soleil, n'y de n'observer non plus d'autres Loix que celles qu'il leur imposeroit, bien asseurez qu'ils estoient par les choses qu'ils en auoient veuës & ouyes, qu'elles se rapportoient toutes au proffit & au commun bien de ses Sujets. Cependant l'Ynca les voulant fauoriser s'aduisa de s'en aller en vne des principales villes de cette Prouince, qu'on appelloit *Chirirqui*; Là s'estât informé de l'estat des pasturages d'où procedoiēt leurs differends, & leurs guerres, & considerant exactement ce qu'il falloit faire de part & d'autre, il y fit mettre des bornes aux endroits qu'il iugea les plus cōuenables, afin que chāque Prouince se tint dans ses limites, sans empieter sur celles d'autrui. Comme en effet on les a tousiours tenuës depuis en grande veneration, pour auoir esté les premieres qui furent mises dans le Peru par l'ordre exprés qu'en fit l'Ynca.

Les Curacas des deux Prouinces baisèrent les

maines au Roy , & le remercièrent bien fort d'auoir fait des partages si iustes pour leur commun contentement. La chose s'estant ainsi passée, le Roy employa quelque téps à visiter ces deux Prouinces, pour leur imposer des Loix & des Ordonnances. Ce qu'il n'eust pas plustost fait, qu'il prit resolution de s'en retourner à Cozco, & de ne point passer outre en sa conquête, bien qu'il le peust faire facilement, à cause du bon succez qu'il auoit eu iusques alors, & de la prosperité de ses armes. Ainsi l'Ynca Capac Yupanqui s'en alla avecque ses gens de guerre en la Capitale de son Empire, où il fit son entrée en maniere de triomphe. Car les principaux Curacas, & les plus nobles des trois Prouinces nouvellement gaignées, accompagnerent le Roy iusques dans sa ville Imperiale, & le porterent sur leurs espaules dans vne chaire à bras toute d'or, pour monstrier par-là qu'il les auoit soubmis à son Empire. En ce triomphe ses Capitaines estoient tout à l'entour de sa chaire, & les gens de guerre marchaient deuant, selon l'ordre qu'il leur auoit donné. Ils estoient diuisez par escadrons, & ceux de chaque Prouince rangez par ordre, selon le temps auquel l'Ynca les auoit conquis ; de telle sorte que les premiers reduits estoient les plus proches de sa personne, & les derniers en estoient les plus esloignez ; Ce qui fut fait au grand contentement de tous les Bourgeois de Cozco, qui allerent solemnellement au deuant de luy, avecque des dances, & des chansons, comme c'estoit leur coustume.

*L'Ynca enuoye à la Conqueste des Quechuas , qui
se reduisent volontairement.*

CHAP. XII.



'Ynca employa quatre ans entiers, à pouruoir au bon gouuernement de ses Sujets; Mais enfin ne trouuant pas à propos de passer vn si long-temps dans les delices de la paix, sans donner de l'exercice à ses Soldats, il commanda qu'on eust vn soing particulier de faire prouision de viures & d'armes, & que ses gens de guerre se tinssent prests pour l'année suiuite. Si tost que ce temps-là fut venu, il choisit pour General de son armée vn sien frere appellé *Auqui Titu*, & fit Maistres de Camp quatre Yncas de ses plus proches Parens, hommes experimentez aux affaires de la paix & de la guerre. Leur ayant donné la charge de cinq mille hommes, il leur recommanda toutes choses, & particulièrement d'estendre plus auant la conqueste qu'il auoit faite dans le destroit de Cuntisuyu. Puis, pour donner vn bon commencement à cette entreprise, il fut avec eux iusques au Pont de *huacachaca*, d'où il rebroussa chemin vers Cozco, apres que par l'exemple des yncas ses Predecesseurs, il les eust encouragez à la conqueste des Indiens.

Si tost qu'il s'en fut allé, le General de l'armée, & ses Maistres de Camp passerent outre, & entrèrent dans vne Prouince appelée *Cotapampa*. Le Seigneur de ce pays s'en vint aussi tost au deuant d'eux, accompagné d'un sien parent, à qui appartenoit aussi vne autre Prouince ditte *Cotanera*, toutes deux de la nation quel'on nommoit *Quechua*. Par mesme moyen les Caciques sçachant que l'Ynca leur enuoyoit vne Armée, s'assemblerent d'un commun accord, afin de le receuoir volontairement pour leur souuerain Seigneur, y ayant desia long-temps qu'ils le desiroient. Avec cette resolution ils furent tous au deuant de luy accompagnez d'un grand nombre de gens, qui s'en alloient dansant, & chantant. A son abbord le receuant avec de grandes demonstrations de plaisir & d'allegresse; *Tu sois le bien-venu*, luy dirent-ils, *Ynca Apa* (qui signifient General) *pour nous donner vn estre nouveau, & vne nouvelle qualité, en nous faisant seruiteurs & Vassaux du Fils du Soleil; A cause dequoy nous t'adorons comme son frere, & te faisons sçauoir pour chose certaine que si tu ne fusses venu si promptement nous reduire au seruice de l'Ynca, nous estions tous resolus de nous en aller à Cozcol l'année suivante, & de nous donner au Roy, pour le prier de nous faire du nombre de ses Sujets; Car il faut aduoüer que les grandes choses qu'on nous raconte tous les iours de ces enfans du Soleil, & les hautes merueilles qu'ils ont faites en temps de paix & de guerre, nous rendent si affectionnez & si ardents à le seruir en qualité de Vassaux, que chèque iour nous semble vne année. Or ce que nous desirons encore d'estre à luy, est pour nous affranchir des cruantez & des tyrannies que nous*

font tous les iours les Nations Chanca Hancobuallu, & les autres qui leur sont voisins. Ce qui continuë depuis le temps de nos Ayeuls iusques au nostre, durant lequel ils ont gagné sur nous beaucoup de pays. Dequoy n'estants pas contents ils nous font auourd'huy plusieurs maux, & nous oppriment de toutes parts ; ce qui nous fait souhaitter avec passion l'Empire des Yncas pour nous mettre à couuert de leurs cruantez. Le Soleil ton Pere te veuille garder & conseruer, puis que tu as si bien sçeu pouruoir à l'accomplissement de nos desirs. Apres auoir ainsi parlé à l'ynca, & fait le compliment à leur mode, tant à luy mesme, qu'aux Maistres de Camp, ils leur presenterent quantité d'or pour l'enuoyer à leur nouveau Roy. Il faut remarquer icy qu'apres la guerre de Gonçalo Picarro, le Gouuernement de la Prouince de Cotapampa escheut à Dom Pedro Louys de Cobrera, natif de Seuille, & celuy de Cotanera, ensemble la Prouince de Huamampallpa furent sous la charge de Garcillassa de la Vega mon Seigneur; Ce qui fut le second departement qui se fit dans le Peru; car quant au premier, il en sera parlé si auant en son lieu.

Le General Auqui Titu, & les Capitaines leur respondirent, qu'ils agreoient fort les bonnes intentions qu'ils auoient eües par le passé, & les offres qu'ils leur faisoient à present de leur seruice, y adioustant qu'ils ne manqueroient pas de rendre bon compte à sa Maiesté de chaque parole qu'ils leur auoient ditte, afin qu'il leur tesmoignast le bon gré qu'il leur en sçauoit, comme c'estoit sa coustume de reconnoistre tousiours les choses qui concernoient

son seruice. Les Curacas furent extremement ayſes de ce que leurs paroles & leurs bonnes volontez deuoient venir à la cognoiſſance de l'Ynca. Si bien que de iour en iour ils ſe fortifioient dans le deſir qu'ils auoient de le ſeruir, & faiſoient avec beaucoup de plaifir tout ce que le General & ſes Capitaines leur commandoient. Eux cependant, ayant pourueu, comme c'eſtoit leur couſtume, au bon ordre de ces deux Prouinces, paſſerent outre dans celle de *Huamampallpa*, qu'ils aſſuiettirent ſans reſiſtence d'aucun, ny ſans qu'il fuſt beſoing d'en venir aux mains. Cela fait, ils paſſerent la Riuiere d'Amancay en deux ou trois endroits, par où elle coule dans ces Prouinces, qui ſe ioignants tous enſemble forment vn peu plus auant le celebre fleuve qu'on nomme *Amancay*.

Vn des bras de cette Riuiere paſſe par *Chuquinca*, où ſe donna la bataille des François Hernandez Giron avec le Mareſchal Dom Alonſo d'Aluaro. Ce fût encore en cette meſme riuiere qu'aduint quelques années auparauant vne autre bataille entre Dom Diego d'Almagro, & le meſme Mareſchal au grand preiudice de Dom Alonſo d'Aluaro, qui fut vaincu en ces deux iournées, comme il ſera dit plus amplement en ſon lieu, ſi Dieu nous fait la grace d'y arriuer. Ainſi les Yncas continuant leurs Conqueſtes, aſſuiettirent les Prouinces des deux coſtez de la riuiere d'Amancay, qui ſont en grand nombre, fort abondantes en or & en beſtail, & toutes conte-nues ſous le nom appellatif de *Quechua*.

*Les Capitaines de l'Ynca gagnent un grand Pays,
qui est dans un fonds, le long de la coste
de ceste mer, & de la punition pareux
faite des Sodomites.*

C H A P. XIII.



Pres que les Capitaines de l'Ynca eurent mis tout l'ordre necessaire au Gouuernement des Prouinces qu'ils auoient conquises, ils passerent le desert de Huallaripa, qui est vne montagne extremement fameuse, à cause de l'or qu'on en tire en abondance. L'ayant trauersée par vn endroit de trente cinq lieuës, ils descendirent en vn fonds, qui est la coste de cette mer; Les Indiens l'appellent *Yunca*, c'est à dire *terre chaudeuse*, & comprennent sous ce nom plusieurs vallons qui se voyent en cette coste; comme les Espagnols encore nomment vallée, ou fonds de terre toute l'estendue de ce pays qui est arrosé par les Riuieres, qui prenant leur source de ces Montagnes, se vont rendre dans la mer. Cette seule Contrée est habitée en toute la coste; Car si l'on excepte les lieux par où la Riuiere passe, toute autre terre y est inhabitable, pource qu'elle est sablonneuse, & tellement infertile, qu'elle ne produit ny herbe ny autre chose qui soit profitable à la vie.

Dans le Parage où furent ces Capitaines en costoyant cette pleine, se voit la fameuse vallée de *Hacari*, qui est de large estenduë, grandement fertile, & si bien peuplée, qu'elle eut autresfois plus de vingt mille Indiens, que les Yncas assuiettirent facilement. De la vallée de *Hacari*, ils passerent plus auant dans les lieux qu'ils nomment *Vuinna*, *Camana*, *Carauilli*, *Picta*, *Quellca*, & ainsi des autres vallons, que l'on trouue le long de la coste Nord-Sud, & qui ont quelques soixante lieuës de longueur. Tous ces vallons que ie viens de nommer, ont plus de vingt lieuës en long, à le prendre depuis le haut de la montagne iusques à la mer, & en large ils ont ou plus ou moins d'estenduë des deux costez, selon que l'eau y est ou grande, ou petite. Il faut remarquer icy qu'en cette coste il y a des Riuieres que les Indiens empeschent de s'engolfer dans la mer, à cause qu'ils les destournent de leur source, pour arroser leurs vergers, & leurs terres labourables. Le General Auqui Titu, & ses Maistres de Camp ayant reduit toutes ces vallées au seruice de leur Roy, sans qu'il fut besoing d'en venir aux armes, luy rendirent compte de tout ce qui s'estoit passé. Mais ils l'aduiferent sur tout, qu'apres s'estre bien enquis de leur maniere de viure, de leurs ceremonies, & de leurs Dieux, qui n'estoient autres que les poissons qu'ils tuoient, ils auoient trouué qu'en quelques-vnes de ces Contrées les habitans s'addonnoient secrettement à l'abominable vice de Sodomie, & par mesme moyen ils l'aduertirent que de ce costé-là il n'y auoit plus de

pays à conquerir, d'autant que cette coste se trouuoit iointe à ces autres terres tirant vers le Sud.

L'Ynca fut grandement ayse de cette conqueſte de ſes gens, & particulièrement de ce qu'elle n'auoit pas eſté ſanglante. Surquoy il leur enuoya dire qu'ils ſ'en reuiſſent à Cozco, ſi toſt qu'à leur accouſtumée, ils auroient mis ordre au gouuernement de ces Prouinces. Mais ſur toutes choſes il leur recommanda en particulier de faire vne exacte recherche des Sodomites, & de condamner au feu ceux qui en ſeroient manifeſtement conuaincus, ou meſme tenus pour tels, deſſus des moindres indices. Il voulut auſſi que l'exécution en fuſt faite publiquement, & que leurs maiſons fuſſent brulées, leurs arbres deſracinés, & leurs poſſeſſions deſmolies, afin qu'il ne reſtaſt aucune memoire d'une choſe ſi abominable. De plus il leur ordonna de faire de tres expreſſes inhibitions, à ce qu'ils n'euffent à l'aduenir à ſ'abandonner à vn crime ſi enorme, ſur peine qu'en cas de contrauention toute vne ville porteroit la peine d'un ſeul habitant qui en ſeroit trouué coupable, & que toutes les maiſons ſeroient brulées.

Cette ordonnance fut executée de point en point ſelon le deſir de l'Ynca, & la punition ſ'en fit au grand eſtonnement de tous les habitans de ces vallées. Auſſi eſt-il veritable que les Yncas & leurs Deſcendans eurent ſi fort en horreur cét execrable peché, que le nom meſme leur en eſtoit odieux. Que ſi de hazard il arriuoit à quelque Bourgeois de Cozco d'auoir querelle, & d'appeller ſodomite ſon en-


342 LE COMMENTAIRE ROYAL,
nemy, on le tenoit pour infame; & durant plusieurs
iours tous les Indiens n'en faisoient non plus d'estat
que d'un homme de neant, pour auoir eu ce vilain
nom à la bouche.

Après que le General & ses Maistres de Camp eu-
rent satisfait ponctuellement aux commandemens
de l'Ynca, ils s'en retournerent tous à Cozco, où ils
furent receus en triomphe, & comblez de recom-
penses & de faueurs signalées. Quelques années
après, l'Ynca Capac Yupanqui s'aduisa de faire vne
nouuelle conquête, & d'estendre les bornes de son
Empire du costé de Collasuyu, d'autant qu'en ces
deux conquêtes precedentes ses gens n'estoient
point sortis de l'enclos qu'on appelle Cuntisuyu.
Pour venir à bout de cette entreprise, il fit tenir
prests vingt mille Soldats d'élite, afin de sortir en
campagne avec eux l'année suiuite. Mais tandis que
ses gens de guerre faisoient leurs preparatifs, il mit
ordre à son Estat, & aux choses qu'il iugea necessai-
res à les gouuerner. En suite dequoy il y establit
Lieutenant son frere *Auqui Titu*, auquel il donna
pour Conseillers les quatre Maistres de Camp, qui
l'auoient accompagné au voyage precedent. Il ne
voulut point mener de Capitaines avec luy qui ne
fussent Yncas, & en fit luy-mesme le choix, d'autant
que par ce moyen ceux des autres Nations ne pou-
uoient auoir de commandement dans son armée.
Et bien que les Soldats qui venoient de diuerses Pro-
uinces eussent des Capitaines de leur Nation, si est-
ce qu'aussi-tost qu'ils arriuoient à l'armée du Roy,

l'on donnoit à châque Capitaine estranger vn ynca pour Superieur , aux commandemens duquel il falloit qu'il obeist , comme n'estant que son Lieutenant en matiere de milice. De cette façon il se trouuoit que toute l'armée estoit sous la conduite des Yncas , sans qu'on ostant à ceux des autres Nations leurs charges particulieres , de peur que cela ne les des-obligeast, ou qu'ils ne le tinssent pour vn affront. Car les Yncas auoient cette coustume de ne rien faire contre le contentement des Curacas , & des Prouinces de châque Nation , pourueu toutesfois qu'ils ne choquassent point en cela leurs Loix ny leurs ordonnances. De sorte que par cet effet de clemence , & par cette merueilleuse douceur dont ils vsoient en leur gouuernement , ils obligeoient les Indiens à les seruir habilement , & avec affection. Voila quels furent les preparatifs de l'Ynca , pour s'en aller à la guerre , où il voulut que le Prince son heritier le suiuit, combien qu'il fust en bas âge , afin qu'il s'accoustumast de bonne heure à la discipline militaire.

*Deux grands Curacas se rendent tributaires de
l'Ynca apres l'auoir fait Arbitre de
leurs differends.*

C H A P. XIV.

 I tost que le temps de partir fut venu, l'Ynca Capac Yupanqui sortit de Cozco, & tira droit au Marefcage de Paria, où le Roy son Pere auoit borné ses conquestes. Le long du chemin son armée se grossit tousiours par l'ayde de ses Ministres, qui en passant pays prenoient avec eux les Soldats qui auoient eu commandement de s'enir prests en châce Prouince. Cependant, pour obliger particulièrement ces Nations, il estoit soigneux de visiter toutes les villes qu'il trouuoit aux deux costez de son chemin; Et que les habitans attribuoient à vne si haute faueur, qu'aujourd'huy mesme on reuere la memoire de certains lieux, où ils tiennent que les yncas se sont arrestez iadis, soit pour y faire monstre publique, ou pour establir des Edits en quelque ville, ou pour leur octroyer quelque grace, ou pour se reposer en passant chemin; Et ce qu'ils respectent ainsi ces lieux n'est qu'à cause que leurs Roys les ont honorez de leur presence.

Si tost que l'Ynca fut arriué au Lac de Paria, il essaya de reduire à son obeissance les villes qu'il trouua en cette frontiere, dont les habitans se rendirent

à luy, les vns pour les bonnes nouvelles qu'on leur auoit dites des Yncas, & les autres pour n'auoir de quoy luy resister. Durant le progrez de ses conquestes, des Ambassadeurs vindrent à luy de la part de deux grands Capitaines, qui dans le destroit que nous appellons Collasuyu, se faisoient vne cruelle guerre l'un à l'autre. Pour mieux entendre cette Histoire, il faut sçauoir que ces deux grands Curacas estoient descendus de deux renommez Chefs de guerre, qui s'estoient autresfois souleuez dans ces Prouinces, chacun pour son interest, & auoient gagné quantité de Villes, faisant tributaires tous ceux qui les habitoient. Mais enfin leurs Conquestes n'estant pas capables de satisfaire à leur ambition, ils tournerent leurs armes l'un contre l'autre, comme la coustume de ceux qui regnent, est de ne pouoir souffrir de compagnons. Ils se firent donc vne cruelle guerre, où tantost l'un auoit du bon, & tantost l'autre du pire, bien que neantmoins il se deffendissent tous deux fort vaillamment durant tout le temps qu'ils vesquirent. Apres leur mort ils laisserent hereditaire cette querelle à leurs Descendans, qui ne furent pas moins obstinez que leurs predecesseurs à la deffendre & la soustenir, ce qui dura iusques au temps de l'ynca Capac Yupanqui.

A la fin comme ils eurent bien consideré que la continuelle guerre qu'ils se faisoient les auoit plusieurs fois presque reduits aux dernieres extremitez; de peur qu'ils eurent de se ruyner tout à fait, pource qu'ils s'estoient tousiours trouuez esgaux & en va-

346 LE COMMENTAIRE ROYAL,
leur & en force, ils demeurèrent d'accord par l'ad-
uis de leurs Parens & de leurs Capitaines, de faire
arbitre de leur querelle l'Ynca Capac Yupanqui, &
d'en passer par où il voudroit, afin de terminer ainsi
leurs animositez & leurs differends. Or la chose du
monde qu'il les obligea le plus à cét accord, fut le
bruit qui couroit de toutes parts de la probité des
Yncas, les merueilles desquels, & les grandes cho-
ses qu'ils diloient auoir esté faites en leur faueur par
leur Pere le Soleil estoient si bien publiées parmy
toutes ces Nations, qu'il n'y auoit celuy qui ne desi-
raist passionnement de le cognoistre. L'un de ces Sei-
gneurs s'appelloit *Cari*, & l'autre *Chipana*, noms dont
ils auoient herité de pere en fils, pour se remettre
en memoire les belles actions de leurs Predeces-
seurs, qui auoient esté fort valeureux, comme le re-
marque Pedro de Cieça de Leon au centiesme Cha-
pitre de son Liure, où il descriit succinctement cette
Histoire, bien que toutesfois il n'en parle que long-
temps apres qu'elle fust arriüée, nommant l'un de
ces Curacas *Cari*, & l'autre *Capana*. Comme ils sceu-
rent donc que l'Ynca s'en venoit conquerir leurs
Prouinces, ils luy enuoyerent des Ambassadeurs
pour luy raconter le suiet de leur querelle, & le prie-
rét par mesme moyen de leur permettre de luy aller
baïser les mains, pour luy faire vne plus ample rela-
tion de leur differend, afin qu'il pleust à sa Maïesté
les accorder; Qu'au reste ils protestoient à l'Ynca de
s'en rapporter entierement à luy, puis que tout le
monde le croyant estre fils du Soleil, ils ne pouuoient
attendre

attendre de luy qu'un bon succez de cette affaire, & qu'il la traiteroit avec tant d'équité, qu'ils seroient à l'aduenir tousiours bien ensemble.

L'Ynca n'eust pas plustost donné audience à ces Ambassadeurs, qu'il leur respondit, Que les Curacas eussent à venir à la bonne heure quand ils voudroient, & qu'il se promettoit de les accorder, veu que les maximes & les Loix qu'il leur donneroit pour cet effet, seroient purement fondées sur l'ordonnance de son Pere le Soleil, avec qui il consulteroient de cette affaire; afin que ce qu'il establiroit là dessus eust plus de poids & d'authorité. Cette response pleut grandement aux Curacas, qui peu de iours apres s'en allerent droit à Paria où estoit le Roy, & y entrerent tous deux par differents endroits, comme ils en estoient demeurez d'accord. Si tost qu'ils se virent deuant le Roy, sans que l'un voulut gagner l'aduantage sur l'autre, Cari qui auoit ses terres plus proches de l'Ynca que n'estoient celles de Chipana, se mit à parler au nom de tous deux, & à l'entretenir amplement du suiet & du progres de leur differend. Tantost il dist que la cause en procedoit de l'enuie qu'ils se portoient l'un à l'autre, à raison de leurs victoires, & tantost il aduoia que c'estoit un pur effet de leur commune ambition, qui les incitoit obstinement à se quereller ainsi pour leurs conquestes, & partant qu'il supplioit tres-humblement sa Majesté de les vouloir accorder, & d'ordonner là dessus ce que bon luy sembleroit, puis qu'aussi bien ils estoient tous deux lassez de s'estre fait si long-temps

348 LE COMMENTAIRE ROYAL,
la guerre. L'Ynca les ayant accueillis avec sa cour-
toisie ordinaire, voulut qu'ils demeurassent quel-
ques iours en son Camp, & leur donna deux Capi-
taines Yncas des plus anciens, pour les instruire sur
les Loix fondamentales de la nature, dont les Yn-
cas auoient accoustumé de se seruir au gouuerne-
ment de leur Royaume. En quoy leur intention
n'estoit autre que de maintenir en paix leurs Suiets,
& de faire en sorte qu'ils ne s'offensassent ny en leurs
biens, ny en leur honneur. Et d'autant que leur que-
relle estoit fondée sur le fait de leur iurisdiction, &
des bornes de leurs terres, il deputa deux Yncas de
ses parens, pour se porter sur les lieux, avec com-
mission expresse de s'enquerir exactement de cette
affaire dans les Prouinces des Curacas, & d'appren-
dre l'origine de la guerre qu'ils se faisoient. Apres
qu'on l'en eut amplement instruit, & qu'il eut pris
l'aduis de ses Conseillers, il fit appeller les Curacas,
& leur dit en peu de paroles, Que le Soleil son Pere
leur commandoit de viure en paix, d'observer les
Loix que les Yncas leur auoient apprises, & de pour-
uoir à la commune conseruation, & à l'accroisse-
ment de leurs Vassaux; Dequoy ils ne pourroient ia-
mais venir à bout tant qu'ils seroient en querelle,
puisque la guerre seruiroit tousiours à les destruire,
plustost qu'à les aduancer. Il leur dit en suite, qu'ils
prinssent bien garde que tandis qu'ils seroient mal
ensemble, d'autres Curacas ne se souleuaissent con-
tre-eux; que les trouuant foibles, ils n'enuahissent
leurs Estats, & qu'ainsi ils ne bannissent entiere-

ment du mode la glorieuse memoire de leurs Ancestres, au lieu qu'il ne la pouvoient mieux cōserver que par vne paix mutuelle. Leur ayant dit toutes ces choses, il leur marqua les endroits où il falloit qu'ils missent des bornes à leurs terres, & les conservassent en leur entier ; Surquoy il conclud que le Soleil qui estoit leur Dieu, le vouloit ainsi ; afin qu'à l'aduenir ils se maintinssent en bonne paix, & que luy mesme le confirmoit, sur peine en cas de contrauention de chastier rigoureusement celuy qui violeroit cette ordonnance, puis qu'ils l'auoient choisi pour Arbitre de leur differend.

Les Curacas luy respondirent, qu'ils obeïroient entierement à sa Majesté, & que pour la grande inclination qu'ils auoient à son seruice, ils se comporteroient en vray amis. En effet ces deux Caciques vescurent depuis fort paisiblement, & se rendirent conformes aux Loix de l'Ynca, chacun d'eux essayant d'imiter sa maniere de viure au gouuernement de sa Cour, & de tout son Royaume, ensemble cette admirable clemence dont il vsoit à la guerre, & la iustice qu'il rendoit à tous generalement, sans souffrir qu'il fust fait le moindre tort à personne. Mais sur tout ils remarquerent particulièrement son admirable douceur, & la grande esgalité qu'il auoit obseruée au partage de leurs terres. Toutes lesquelles choses bien considerées furent cause que par l'auis de leurs parens, & de leurs Sujets, ils resolurent entr'eux de se mettre sous la protection de l'Ynca, & de se rendre ses tributaires. Ce qu'ils iugerent encore fort

50 LE COMMENTAIRE ROYAL,
à propos, pource qu'ils virent que son Empire estoit
fort proche de leurs Estats, & qu'il estoit à la veille
de les auoir par la force, puis qu'ils ne pouuoient
luy resister, si bien qu'ils aymerent beaucoup mieux
se soumettre à luy de leur bon gré que par con-
trainte; afin de ne perdre le merite qu'auoient ac-
coustumé de gagner tous ceux qui procedoient en-
uers luy de cette sorte. Comme ils en furent donc
demeurez d'accord, ils s'en allerent à l'Ynca, auquel
ils dirent, qu'ils supplioient tres-humblement sa Ma-
jesté de les receuoir à son seruice, puis qu'ils vouloiēt
estre ses Vassaux, & les creatures du Fils du Soleil;
Que dès l'heure presente ils mettoient leurs Estats
en sa protection, & qu'il luy pleust y enuoyer des
Gouuerneurs & des Ministres, pour instruire ses
nouveaux Sujets, & leur apprendre les choses qu'il
leur faudroit faire pour son seruice.

La responce que l'Ynca leur fit, fût qu'il auoit
pour tres-agreable leur bonne volonté, & qu'à l'ad-
uenir il ne manqueroit de leur en rendre des tesmoi-
gnages aux occasions. En suite de cela il fit donner
de ses propres robbes aux Caciques, & à leurs parens
il en donna d'autres qui n'estoient pas de si haut prix;
Outre qu'il leur fit quantité d'autres faueurs fort
considerables, & qui contenterent grandement les
Curacas. De cette façon il soubmît à son Empire
beaucoup de villes & de Prouinces, que ces deux Ca-
ciques possedoient dans le Destroit de Collasuyu,
les plus remarquables desquelles estoient *Poco-ata*
Muru-muru, *Maccha*, *Caracara*, ensemble tout le pays

qui du costé du Levant s'estend iusques à la Montagne neigeuse des Antis, & pareillemēt tout ce grand desert qui se borne de la Prouince qu'on nomme *Tapacri*, & que les Espagnols appellent *Tapacari*, qui est vne solitude si vaste, qu'il y a plus de trente lieuës à trauerser ; Et toutesfois quelque froide qu'elle soit, & despeuplée d'habitans, si ne laisse-t'elle pas d'estre fort considerable, à cause de ses bons pasturages, qui font qu'elle est pleine d'un grand nombre de bestail, tant sauuage qu'appriuoisé. Mais sur tout il y a en ce mesme lieu plusieurs belles sources, dont l'eau est si chaude, qu'il est impossible d'y tenir la main par l'espace d'un *Aue Maria* tant seulement. L'on apperçoit de loing cette source par la vapeur qui en sort ; ce qui procede de ce qu'elle est toute sulphureuse ; Où il faut remarquer qu'entre ces fontaines chaudes, il y en a dont l'eau est grandement froide, & fort bonne à boire ; Joint que des vnes & des autres se forme la riuiera qu'ils appellent *Cochapampa*.

Après auoir passé le grand desert, où sont ces fontaines, l'on arriue à vn costau, qui a sept lieuës de descente, iusques à la Prouince de *Tapacri*, qui fut le premier departement qu'eust dans le Peru Garcilasso de la Vega mon bon Seigneur. Ce pays est extrêmement fertile, & fort peuplé de gens & de bestail, ayant plus de vingt lieuës de long, & plus de douze de large. La fameuse Prouince de *Cotapampa* est à huit lieuës de-là, & toute la vallée ensemble en a trente de long & quatre de large, avec vne fa-

352 LE COMMENTAIRE ROYAL,
meuse Riuiere qui passe au milieu. Ces deux Prouin-
ces estoient comprises en la reduction que firent
de leurs Estats les deux Curacas, Cari, & Chipana,
comme il a esté dit cy-deuant, par le moyen de la-
quelle ces Curacas agrandirent leurs Estats de soi-
xante lieües de pays. Et d'autant que la Prouince de
Cochapampa est extremement bonne & fertile, ce
fut pour cela que l'an 1566. les Espagnols y peuple-
rent vne assez belle ville, qu'ils appellerent *S. Pierre
de Cardenna* qui eut pour fondateur. le Capitaine
Louys Osorio, natif de Burgos.

En suite de ces Conquestes l'Ynca trouua bon que
deux Maistres de Camp de ceux qu'il auoit avecque
luy s'en allassent aux Estats de ces Curacas, & y me-
nassent les officiers necessaires pour l'instruction, &
le gouuernement de ses nouueaux Sujets. A quoy
il n'eust pas plustost mis ordre, que se contentant
pour cette année de la Conqueste qu'il venoit de
faire, qui estoit plus grande qu'il n'auoit esperé, il
s'en retourna droit à Cozco, menant avec soy les
deux Caciques, pour leur faire voir la Capitale de ses
Estats, & les y traiter splendidement. A leur arriuée
ils y furent receus avecque beaucoup d'honneur &
de resiouissance publique, pource que l'Ynca l'or-
donna ainsi; Ce qui dura quelques iours, à la fin des-
quels il leur permit de s'en retourner en leur pays,
où ils s'en allerent, extrememét satisfaits des graces
& des faueurs qu'ils auoient receuës. Mais sur tout
auant leur partement il leur dit qu'ils eussent à se
tenir prests pour la conqueste qu'il se proposoit

d'aller faire des Indiens qui estoient de l'autre costé du pays.

L'Ynca fait faire vn Pont de Chaume & de Ionc sur le Canal du Lac de Titicaca, & rend tributaires les Indiens de Chayanta.

CHAP. XV.



L'Ynca Capac Yupanqui bien ayse de ce qu'on estoit venu à bout si heureusement du Pont de *Huacachaca*, qui fut fait sur la Riuere d'Apurimac, commanda qu'on en fit vn autre au Canal du Lac de Titicaca, pource qu'il auoit dessein de s'en aller promptement à la conqueste des Prouinces de Collasuyu, que les Yncas pouuoient faire reüssir facilement, d'autant que c'estoit tout pays plat, & où l'on pouuoit commodement mettre vne armée en campagne, à cause dequoy ils n'eurent iamais de repos qu'ils n'eussent conquis toute cette Contrée. Le Pont de Huacachaca, & tous les autres du Peru sont faits de clayes & de clisses d'ozier, comme i'ay dit cy-deuant, horsmis celuy cy que les Espagnols appellent pour l'ordinaire *le Pont du Canal*, qui est de Ionc, de Chaume, & d'autres materiaux semblables. Il flotte sur l'eau comme celuy de Seuille qui est fait de plusieurs bacs attachez ensemble, &

non pas suspendu en l'air, comme cét autre qui est de clayes d'ozier, dont nous auons desia parlé. Par tout le Peru croist vne espece de chaume ou de paille grandement douce, & fort maniable, que les Indiens appellent *Ychu*, & en couurent leurs maisons. Mais sur tout celle qui vient de Collao est particulièrement estimée, pour estre fort propre à engraisser le bestail. De ce chaume les Collas font ordinairement des panniers & des corbeilles, comme pareillement des *Patacas*, qui sont comme de petits coffres, ensemble des cables & autres cordages. Outre cette maniere de chaume, il croist au Marefcage de Titicaca, vne grande quantité de jonc & de glayeul que les Indiens des Prouinces, qui ont la charge des ponts, ont accoustumé de couper lors qu'il en est temps, afin de le trouuer sec quand ils s'en veulent seruir. Pour cét effet de cette espece de chaume dont nous venons de parler, ils en font quatre cables gros comme la cuisse, dont ils en iettent deux sur l'eau d'un bord à l'autre de cette riuere, qui en surface, semble dormir, bien que par dedans le courant en soit imperueux, comme l'affirment plusieurs qui en ont fait l'experience. Sur ces cables ils mettent en lieu de barques de grands faisceaux de jonc & de chaume, qui sont de la grosseur d'un bœuf, & qu'ils attachent aux cables le mieux qu'ils peuuent. Cela fait ils iettent sur ces faisceaux les autres deux cables, & les lient fortemēt, afin que l'un le renforce par l'autre. Or pour empescher que ces cables ne se rompent si tost à force d'estre foulez, ils y iettent

par

par dessus quantité d'autres faisseaux de jonc & de paille, qui sont liez ensemble par ordre, & attachez à ces mêmes cables. Les Espagnols n'ont ces petits faisseaux *la chauffee du Pont*, qui est de treize à quatorze pieds de large, & qui d'un bord à l'autre a bien cent cinquante pas de long; Par où l'on peut voir qu'il faut nécessairement qu'on employe une prodigieuse quantité de jonc & de chaume pour achever une si grande machine. Or il est à remarquer que de six en six mois ils renouvellent ce Pont, ou pour mieux dire ils le refont tout de neuf, pource que les matériaux qu'ils y ont employez ne peuvent plus servir, n'estant que de jonc & de paille, qui sont des choses par trop fragiles; Et c'est pour cela qu'afin d'asseurer le Pont, ils le renouvellent ainsi, avant que les cables viennent à se rompre, & qu'ils achevent de se pourrir.

L'œuvre de ce Pont, comme celle des autres grandes machines, estoit partagée au temps des Incas entre les Prouinces frontieres, chacune desquelles sçauoit quelle quantité de matériaux il luy falloit fournir. De sorte que les tenants prests d'une année à l'autre, ils faisoient le pont en peu de temps. Les deux bouts des cables en estoient comme les fondemens, qu'ils enfonçoient dans la terre, sans les attacher à des pilotis de pierre, soit qu'ils le fissent pource qu'ils le iugeoient plus commode, ou possible à cause qu'ils en changioient l'assiette tantost plus haut, & tantost plus bas; de quoy ils venoient à bout en fort peu de temps. Si tost que l'Ynca fut aduert

356 LE COMMENTAIRE ROYAL,
qu'on auoit acheué ce Pont, il sortit de Cozco avec
le Prince son heritier, & s'en alla iusques à *Tapacri*, & à
Cochapampa, qui estoient les dernieres Prouinces des
Caciques, *Cari* & *Chepana*. Les ayant trouué prests
à son seruice, & leurs gens de guerre aussi, ils parti-
rent ensemble de *Cochapampa*, d'où ils furent à
Chayanta, & marcherent trente lieuës dans vn pays
si desert & si desolé, qu'il n'y a pas vn ponce de terre
qui ne soit en friche. En cette solitude, qui est toute
pleine de rochers, s'engendre vne espece de char-
don assez commun par tout le Peru, qui a des espi-
nes aussi longues que les doigts de la main, qui ser-
uent aux Indiennes d'aiguilles à coudre. Comme ils
eurent passé le desert, ils entrerent dans la Prouince
de *Chayanta*, qui a vingt lieuës de long, & presque
autant de large. A son arriüée la premiere chose
que fit l'Ynca fut de commander au Prince qu'il eust
à leur enuoyer des hommes exprés, pour leur faire
les sommations accoustumées.

Quand il fut question de respondre aux proposi-
tions de ces Deputez, il se trouua que les Indiens de
Chayanta furent d'opinion differente. Car les vns
disoient qu'il estoit fort iuste de receuoir pour Sei-
gneur le Fils du Soleil, & d'observer ses Loix, puis
qu'estant faites par le Soleil mesme, il falloit croire
qu'elles seroient douces, vtils, & fauorables aux
Vassaux, sans que l'Ynca les rapportast à son inte-
rest particulier. Les autres tout au contraire remon-
strerent, qu'ils n'auoient aucunement besoing ny de
Roy, ny de nouvelles Loix; qu'ils en auoient desia

de fort bonnes , puis que leurs Predecesseurs les auoient obseruées , & qu'ils se tenoient pour contents de leurs Dieux , sans se mettre en peine d'aucune sorte de nouveauté en matiere de Religion , & de police. Qu'au reste ils ne trouuoient rien de pire en cela que de s'affuiettir à la volonté d'un homme, qui apres leur auoir bien presché la Religion , & la sainteté ne les auroit pas plustost assuietis , qu'il leur imposeroit telles Loix qu'il voudroit , qui n'auroient pour but que son profit particulier , & la ruïne generale de ses Suiets. Surquoy ils concludoient qu'ils se passeroient fort bien d'esprouer ces maux , & qu'ainsi il leur falloit conseruer leur liberté à quelque prix que ce fust, leur en deust il couster la vie.

Ils furent quelques iours en ce differend , l'un de ces partys s'imaginant tousiours que son opinion l'emporteroit sur celle de l'autre. mais enfin des deux extremités où ils estoient , ils entrerent en vne moderation , quand ils vindrent à considerer les forces de l'Ynca , & ce qu'on disoit de toutes parts de ses iustes Loix , & de sa probité merueilleuse à gouverner ses Estats. Ils respondirent doncques aux deputez , comme s'ils se fussent monstrez neutres , sans nier absolument ce dont ils estoient requis , ny sans l'accorder aussi. De cette façon , tenant vn milieu entre les deux , composé de deux aduis differents , ils dirent franchement qu'ils seroient bien aises de recevoir l'Ynca pour leur Roy & leur souuerain Seigneur , apres qu'il leur auroit fait sçauoir si les Loix qu'il pretendoit leur donner , seroient vtils ou dom-

358 LE COMMENTAIRE ROYAL,
mageables; & partant qu'ils le supplioient tres-hum-
blement de permettre qu'il y eust vne trefue des
deux costez, tandis qu'on les instrueroit en la con-
noissance de ses Loix, durant lequel temps ils de-
meuroient d'accord que l'Ynca entraist dans leur
Prouince avec son Armée, pourueu qu'il leur don-
nast sa parole qu'il en sortiroit & les laisseroit en leur
liberté, en cas que ses Loix ne les contentassent;
Comme au contraire s'ils les trouuoient aussi bon-
nes qu'il disoit, ils luy promettoient de l'adorer à
l'heure mesme comme Fils du Soleil, & de le reco-
gnoistre pour souuerain Seigneur.

L'Yncaleur fit respódre à cela, qu'il l'acceptoit cette
conditió, & qu'écóre qu'il les peust auoir à force d'ar-
mes, il ne le vouloit pas neantmoins, ny s'esloigner
de l'exemple de ses Predecesseurs, qui estoit de s'as-
fuiettir les peuples par amour & non par la force;
Qu'au surplus il leur donnoit sa parole & sa foy, de
les laisser en pleine liberté, quand mesme ils ne vou-
droient pas adorer le Soleil son Pere, ny obseruer ses
Loix, pource qu'il se promettoit qu'apres les auoir
bien considerées il les aymeroient passionnement,
tant s'en faut qu'ils les deussent auoir en horreur; &
qu'il leur desplairoit de ne les auoir cognuës plu-
sieurs siecles auparauant.

Sur cette promesse l'Ynca entra dans Chayata, où
il fut receu avec beaucoup de respect & de ueneratió,
mais non pas avec tant d'allegresse, & de contente-
ment que luy en auoient resmoigné les peuples des
autres Prouinces. Car comme ceux-cy ne scauoient

pas à quoy tout cela deuoit reüssir, ils furent longtemps en branle entre l'esperance & la crainte; iusques à ce qu'enfin quelques-vns des plus anciens Conseillers de l'ynca, & des plus aduisez Capitaines de son armée, furent par luy deputez en la compagnie du Prince son heritier, afin de les instruire en leurs Loix. Ceux-cy en la presence du Prince, lequel y assista quelques iours, firent sçauoir à ces Indiens en quoy principalement consistoit leur Idolatrie, & quel estoit le gouuernement de leur Republique; ce qu'ils leurs demonstrent à diuerses fois, iusques à ce qu'ils le comprissent. Alors ayant bien considéré ces Loix, & pris garde qu'elles se rapportoient toutes à leur honneur & à leur commun profit, ils dirent d'un commun consentement, que le Soleil & les yncas ses enfans, qui donnoient aux hommes vne si douce façon de viure, meritoient d'estre adorez & tenus pour Dieux, iusques là mesme que l'Empire de toute la terre leur appartenoit legitimelement, à cause dequoy ils promettoient de garder particulièrement leurs ordonnances, & de quitter leurs Idoles, leurs ceremonies, & leur ancienne façon de viure. Ce qu'ils n'eurent pas plustost protesté deuant le Prince, qu'ils l'adorerent à la place du Soleil son Pere, & de l'ynca Capac yupanqui.

Après qu'ils luy en eurent fait serment, ils le confirmerēt par des solemnitez accoustumées, qui estoient des danses & des chants d'allegresse. Avec cela ils se firent voir en public mieux parez que de coustume, & se mirēt à dire des chansons composées à la louan-

360 LE COMMENTAIRE ROYAL,
ge du Soleil, des Yncas, de leurs bonnes Loix, & de
leur iuste gouuernement. Ce qu'ils firent general-
lement avec toute la demonstration d'amour, de
bien-veillance, & de bonne volonté qu'on pour-
roit imaginer.

*De l'Industrie qu'auoient les Indiens à passer les
Riuieres, & à faire leurs pesches.*

CHAP. XVI.



Pres auoir parlé cy - deuant des deux
Ponts differents que firent faire les
yncas pour passer l'eau, dont l'un estoit
de clisses d'ozier, & l'autre de jonc &
de chaume, il ne sera pas hors de pro-
pos que nous rapportions icy quelques autres inuen-
tions qu'ils auoient pour le mesme effet. Car on ne
faisoit guere de ponts qu'aux grands passages, à cau-
se que les frais en estoient excessifs. Et d'autant que
tout ce pays estoit de large estenduë & qu'il y auoit
plusieurs riuieres; Cela fut cause que les Indiens s'ad-
uiserent de plusieurs choses pour les passer, selon que
la dispositio en estoit diuerse, & qu'ils en firēt de mes-
me pour aller sur mer, combien qu'ils ne nauigua-
sent pas beaucoup. Car ils n'auoient pas l'industrie
comme ceux de la Floride, des Isles de Barlouente,
& de la terre ferme de faire de ces chaloupes qu'ils
appellent *Piragas* & *Canoas*. Possible aussi ne le

pouuoient ils pas, pource qu'au Peru il n'y a point de bois qui soit propre pour cela. Car bien qu'il soit veritable qu'en ce pays-là il y a des arbres fort gros, ils n'en sont pas neantmoins si commodes, pource que le bois en est pesant comme du fer; ce qui est cause qu'ils se seruent pour le mesme effet d'un autre maniere de bois qui est gros comme la cuisse, & leger comme du figuier, dont le meilleur, à ce que disoient les Indiens, se trouuoit dans les Prouinces de Quito, d'où ils le transportoient sur toutes les riuieres, par l'ordonnance de l'Ynca. De ce mesme bois ils en faisoient des Radeaux grands & petits, de cinq ou de sept pieces assez longues attachées ensemble, & la plus longue desquelles estoit celle du milieu. Les premieres collaterales estoient plus longues, les secondes plus courtes, & les troisiemes encore plus. Afin que de cette façon ces Radeaux fussent plus propres à coupper l'eau, qu'ils ne l'eussent esté, si on les eust fait de pieces égales; ils auoient la mesme forme à la poupe qu'à la proue, & pour les tirer de part & d'autre, on y attachoit deux cordes; ce que les passagers faisoient quelques fois eux-mesmes, à faute de ceux qui auoient accoustumé de les passer. Je me souuiens à ce propos d'auoir esté sur ces Radeaux au temps des Yncas, & suis certain que les Indiens les auoient en grande veneration.

Outre ces Radeaux ils se seruent en lieu de barques d'une autre inuention fort plaisante. Car ils prennent un faisseau de jonc de la grosseur d'un bœuf,

qu'ils attachent le plus fort qu'ils peuuent, & le fagonnent de telle sorte, que depuis le milieu iusques au bout il est fait en pointe, côme si c'estoit la proüe d'une barque, afin de mieux coupper l'eau: par mesme moyen il va tousiours eslargissant des deux tiers en arriere, & le dessus en est plat, où ils mettent telle charge qu'ils veulent. Pour gouverner vne de ces barques, il ne faut qu'un seul Indien, qui pour cét effet se met au bout de la poupe, où les bras & les cuisses luy seruent d'auirons, se laissant porter au fil de l'eau; il est vray que si la riuiera est impetueuse, il aborde cent ou deux cens pas plus bas que le lieu d'où il est party. Quand ils passent quelqu'un ils le font coucher tout de son long sur le batteau, ayant la teste appuyée sur le battelier, qui luy recommande sur tout de se tenir ferme aux cordes de la barque, sans leuer la teste, ny ouurir les yeux pour regarder aucune chose. Je me souuiens d'auoir autrefois passé de mesme vne impetueuse riuiera (aussi tels batteaux ne vont ordinairement que sur vne eau dont le courant est fort grand) où pour l'extreme soing que se donnoit le battelier, de m'empescher de hausser la teste, & d'ouurir les yeux, il me prit enuie de faire l'un & l'autre. Car estant fort ieune ie me vy saisy d'une si grande apprehension, qu'il me sembloit à tout coup que la terre s'esleuoit, ou que le Ciel tomboit. Côme ie voulus donc voirs'il n'y auoit point là d'enchantement, ou si ie n'estois point en vn nouveau mode; lors que ie iugeay à peu près que nous estions au milieu de la Riuiera, ie leuay la

teste,

teste, pour regarder l'eau, & alors il me sembla veritablement que nous tombions du haut des nuës; Ce qui procedoit sans doute de ce que la teste me tournoit à cause du grand courant de la riuiera, qui emportoit le bateau avec vne impetuosité du tout estrange, tellement que la peur qui me saisit plus qu'auparauant, me fit derechef fermer les yeux, & confesser que le battelier auoit raison de recommander à ceux qui passoient, de s'empescher de les ouurir.

Ils font aussi vne autre maniere de Radeaux de plusieurs grandes Calabasses entieres, & bien attachées l'une à l'autre de la longueur d'une aulne & demie en quarré, ou bien plus ou moins, selon qu'il en est besoing. Au deuant de ce Radeau l'Indien qui en a la conduite, se met à la nage pour le tenir avec sa charge, iusques à ce qu'il ayt trauersé la riuiera, ou le bras de mer qu'il veut passer. Que si la necessité le requert, il a derriere luy vn, ou deux Indiens qui nagent aussi, & seruent à repousser le Radeau. Et d'autant qu'on ne peut aller là dessus, non plus que dans les bateaux de jonc, sur les plus grandes Riuieres, à cause de leur impetuosité, & des escueils, qui s'y trouuent; Ioint qu'il n'y a point de lieu propre pour demeurer ou pour aborder facilement, ils suppléent à ce deffaut de la façon qui s'ensuit. Du haut d'un rocher ils iettēt à l'autre bord vn cable fort gros, fait de cette maniere de chanvre qu'ils appellent *Chahuar*, & l'attachent à de gros arbres, ou à de forts rochers. A ce cable est liée à vne vergue grosse com-

364 LE COMMENTAIRE ROYAL,
me le bras , vne grande corbeille faite d'ozier où
peuvent estre assez commodement trois ou quatre
personnes. Ainsi par le moyen de deux cordes dont
elle est liée par les deux bouts, les Indiens passent la
Riuere d'un bord à l'autre. Et d'autant que le cable
est fort long, & par consequent plus mal ayse à ma-
nier, à cause des secouffes qu'il fait au dessus de l'eau,
il est besoing pour cét effet de faire glisser peu à peu
iusques au milieu cette corbeille flotante, pource
qu'elle ne penchant pas également, elle pourroit cou-
ler à fonds, ce qu'ils empeschent ingenieuse-
ment en la tirant à force de bras. Il y a pour cét effet
des Indiens que les Prouinces voisines ont accoustu-
mé d'enuoyer, chacune à son tour, pour passer la Ri-
uiere aux voyageurs sans prendre rien d'eux, ius-
ques là mesme que les passans aydent quelquesfois
à tirer les cordes, ou se tenant debout dans la
corbeille, ils empoignent le cable, & passent
tous seuls eux-mesmes, sans que personne les ayde.
Je me souuiés d'auoir ainsi traictté deux ou trois fois
en vn temps, auquel j'estois à peine hors d'enfance, si
bien que les Indiens me portoient sur leurs espauls
le long du chemin. Dans ces mesmes corbeilles ils
passoient assez souuēt du bestail, combien que ce fust
en petite quantité, & avec beaucoup de travail. Ce
quine doit s'entēdre que des brebis, des moutons, des
chèvres & des pourceaux, & ainsi des moindres ani-
maux. Car pour les plus grands, tels que sont les
cheuaux, les mulers, les bœufs, & les vaches, ils ne
les abandonnent point dans ces corbeilles, à cause de

leur pesanteur qui les pourroit faire couler à fonds; Ce qui est cause qu'ils les destournent par les ponts, ou les menent par les lieux, où ils iugent que le gué n'est point dangereux. Il faut remarquer icy que cette maniere de traict ou de passage n'est point sur les grands chemins, mais bien aux particuliers, & aux lieux destournez, par où l'on va d'une ville à l'autre, ce qu'ils appellent Vruya.

Les Indiens de toute la coste du Peru, ont accoustumé de faire leurs pesches sur la mer dans les batteaux de jonc & de chaume, tels que nous les auons descrits cy-deuant, iusques à les faire entrer à quatre cinq & six lieues dans la mer, pource qu'elle est fort calme en cette coste, & que les moindres chaloupes y peuuent passer. Il est vray que lors qu'il est question de traicter de grands fardeaux, ils ne les fient point sur des batteaux si fragiles, mais en ont d'autres faits de bois. Quand ils veulent faire leurs pesches, ils se mettent à genoux en l'un des bouts du faisseau de chaume fait en forme de chaloupe, où ils vôt voguans avec une maniere de roseau ou de canne fort grosse, longue d'une toise, & qui est couppee en deux. Car il est certain qu'en ce pays là il y en a qui ne sont pas moins grosses que la cuisse, comme nous dirons plus amplement cy-apres. Lors qu'ils veulent aller sur l'eau, ils prennent cette canne à deux mains dont l'une la tiét par un bout, & l'autre par le milieu, & ce qu'elle est creuse rend cette maniere d'auiron, plus fort à voguer sur l'eau; Ce qu'ils font alternativement d'une main à l'autre, tantost à droit, tan-

366 LE COMMENTAIRE ROYAL,
tost à gauche, changeant de main d'un costé & d'autre, si habilement qu'il n'est pas possible de le croire. En quoy certes ce qu'il y a de plus admirable en leur maniere de pescher & de nauiguer, est de voir que lors qu'un de ces batteaux est au fil de l'eau, il vogue avec tant de vitesse, qu'un cheual de poste ne le scauroit suiure en l'un des costez de la riue. Ils peschent avec des crocs certains poissons, qui sont de la grosseur d'un homme, & cette pesche est à peu près semblable à celle que les Biscayns ont accoustumé de faire des balaines. Ils attachent à ce croc vne corde assez deliée, que les Mariniers appellent vn Bollandin, qui a vingt, trente, ou quarante brasses de longueur. Si tost que le pescheur a frappé le poisson de dessus sa chaloupe, où il se tient comme à cheual, il ne cesse de luy donner la chasse, iusques à ce qu'il n'a plus de cordeau, & alors comme il le tient tousiours ferme par l'un des bouts, il tire à soy peu à peu le poisson, qui fend l'eau avec tant de vitesse, qu'on diroit de loing que cest quelque oyseau qui vole à fleur des vagues. Luy cependant ne perd point tēps, & n'abandonne iamais sa pesche, si bien qu'à la fin le poisson lassé aborde le batteau, & tombe entre les mains de celuy qui le poursuit. Ils souloient pescher encore avec des rets & des hameçons. Mais cette pesche qu'ils ne faisoient point en compagnie, ne pouuoit pas estre grande, puis que leurs rets estoient forts petits, veu que leurs hameçons ne valoient rien, à cause qu'ils n'auoient pas l'esprit d'en faire d'acier ny de fer, qu'ils appellent *Quillay*, quoy qu'ils en euf-

sent des mines. Ils ne mettent point de voile à leurs batteaux de jonc & de chaume, pource qu'ils ne sont pas assez forts pour en supporter vne; Ioint que ie ne pense pas qu'ils peussent aller si bien ny si viste à la voile qu'à l'auiron, & en vsent neantmoins aux chaloupes faites de bois, quand ils ont à faire quelque traict. Voila de quelle façon les Indiens du Peru souloient nauiguer, & de quelle sorte de batteaux ils se seruoient à passer la mer, & les Riuieres impetueuses. L'vsage en estoit encore de mon temps, & il est à croire qu'il n'est point perdu maintenant, pource que ces gens là, qui n'ont pas l'esprit de se seruir des commoditez de leur pays, n'aspirent point à des choses plus grandes que celles qu'ils tiennent hereditaires. Dequoy ie ne parleray pas dauantage, pour en auoir descrit les particularitez plus au long, au sixiesme liure de mon Histoire de la Floride, où i'ay fait mention des Canos, dont les habitâs de cette contrée ont accoustumé d'vsfer à passer les Riuieres, lesquelles y sont fort impetueuses. Reuenons maintenant à la continuation des Conquestes de l'Ynca Capac Yupanqui.

*De la Reduction de cinq grandes Prouinces, sans
y comprendre les autres moindres.*

C H A P. XVII.



Ynca sortit de Chayanta, apres qu'il y eut laissé en garnison de bons hommes de guerre, & les officiers qu'il iugea necessaires pour conseruer les habitans dans leurs biens, & les instruire en son Idolatrie. Cela fait il s'en alla aux autres lieux, qui sont en cette frontiere appelée Charca, qui est vn nom sous lequel sont comprises plusieurs Prouinces differentes de Langue & de Nation, & qui sont toutes du destroit de Collasuyu. Les principales se nomment Tutara, Sipisipi, & Chacui. L'obmers qu'au leuant de celle cy, qui s'estend iusques aux Antis, il y en a d'autres qu'ils appellent Chamuru, où naist l'herbe qu'ils nomment Cuca, bien que toutesfois elle ne soit pas si bonne que celle qui croist en la Contrée de Cozco, sans y comprendre la Prouince de Sacaca, & plusieurs autres semblables, dont ie ne parleray point pour eiter la prolixité, & que l'Ynca enuoya sommer à l'accoustumée. Cependant ces peuples, qui sçauoient desia bien ce qui s'estoit passé à Chayanta, respondirent presque tous d'une mesme sorte, ou du moins avec

peu de difference des vns aux autres. Leur response fut, qu'ils s'estimoient bien-heureux d'adorer le Soleil, & de tenir l'Ynca son Fils pour leur souverain Seigneur; Qu'ayant desia vne cognoissance asseurée de ses Loix & de son bon gouvernement, ils le supplioient de les recevoir sous sa protection: Qu'ils luy offroient leurs biens & leurs vies, & qu'il luy pleust enuoyer à la Conqueste des autres peuples leurs voisins, afin qu'ils ne leur fissent la guerre, & ne les traitassent point mal à l'aduenir, pour auoir quitté leurs anciennes Idoles, afin de suiure d'autre Loix, & vne nouvelle Religion.

L'Ynca leur fit respondre, qu'en matiere de la conqueste de leurs voisins, ils n'auoient seulement qu'à luy laisser faire; qu'il ne manqueroit pas d'y apporter tous les soins necessaires pour la commodité des Vassaux; & qu'aureste, ils ne deuoient point se donner l'alarme, ny entrer en apprehension, pour s'estre mis en la suiuetion de l'Ynca, ny pour auoir receu ses Loix; veu qu'il estoit certain qu'ils seroient bien-aysez de les suiure; puis qu'elles venoient du Soleil, si tost que les vns & les autres les auroient experimentées. A ces responses il n'y eut aucune contradiction du costé des habitans, qui tous d'un commun accord, receurent l'Ynca dans leurs Provinces, où il ne se passa rien digne de memoire, ny qui merite que nous en fassions icy la relation. L'Ynca employa deux ans à cette Conqueste, ou trois, selon quelques vns; puis y ayant laissé ce qu'il y falloit de garnisons, pour empescher que ceux des fron-

370 LE COMMENTAIRE ROYAL,
tieres ne troublassent ses nouveaux Sujets, il s'en retourna à Cozco, & visita le long du chemin les villes & les Prouinces, selon que la commodité le luy permit en passant pays. Il voulut par mesme moyen que son fils s'en allast par vn autre costé, faire la reueuë de ses Vassaux, pource qu'ils tenoient à singuliere faueur de voir dans leurs villes les Roys & les Princes, qu'ils recognoissoient pour leurs souuerains Seigneurs.

L'Ynca fut receu dans Cozco avec de grandes acclamations, & des tesmoignages euidens de l'allegresse publique. Il y fit son entrée, ayant à l'entour de luy ses Capitaines, deuant lesquels marchoient les Curacas, qui estoient venus de ces Prouinces nouvellement conquises, avec dessein de voir la Capitale de ce grand Empire. Le Prince Ynca Roca y fut receu aussi quelques iours apres, avec les mesmes applaudissemens, que le Roy son Pere auoit eus de ses Sujets, qui honorerent sa presence de dances & de chansons, composées à la loüange de ses beaux faits, & de ses victoires. En suite de tout cecy, l'Ynca congedia ses Capitaines, apres les auoir bien recompensez; Et pour luy il demeura dans Cozco, où il vacqua le mieux qu'il luy fut possible au gouuernement de ses Royaumes, & de ses Prouinces. Les bornes du costé du Sud en estoient à plus de cent & huit lieuës de Cozco, iusques à *Tatyra* & *Chaqui*, & deuers le Ponant, elles aboutissoient à la mer du Sud, où d'un costé il y a plus de soixante lieuës de la ville, & de l'autre plus de quatre vingts. Du Leuant de
Cozco

Cozco, elles se terminoient par la Riviere de *Paucar-tampa*, à treize lieuës de Cozco tout droit à l'Oest, Et vers Suest il auoit conquis iusques à *Collanaya*, c'est à dire quarante lieuës de pays, depuis la ville de Cozco. Cela fut cause qu'il ne voulut point pour l'heure penser à d'autres conquestes, se contentant de celles qu'il venoit de faire, & de les conseruer equitablement au proffit de ses Vassaux; Comme en effet il y sceut si bien vacquer, qu'il se maintint durant plusieurs années en bonne paix, & en pleine tranquillité. Auecque cela il essaya de rendre illustre la maison du Soleil, & des Vierges esleuées à son seruice, que le premier Ynca Manco Capac auoit fondées; & fit faire par mesme moyen diuers bastimens dans la ville, & dehors aussi en plusieurs Prouinces; où ils estoient necessaires pour leur accroissement & leur commun bien. Par mesme moyen il commanda que l'on fit de grands Canaux, pour arroser les terres labourables, & pareillement plusieurs Ponts sur les Riuieres, pour la seureté des passans; Joint qu'il inuenta de nouueaux chemins, pour aller d'une Prouince à l'autre; afin que de cette façon ceux de son Empire eussent dequoy communiquer ensemble plus aysement. Il fit en vn mot tout ce qui luy sembla necessaire à l'vtilité de ses Sujets, comme aussi à sa grandeur, & à sa Majesté propre.

*Le Prince Ynca Roca reduit à son obeïssance
plusieurs grandes Prouinces mediterranees , & maritimes.*

CHAP. XVIII.



N ces exercices & autres semblables, l'Ynca passa fort heureusement six ou sept années, à la fin desquelles il se resolut de reprendre l'exercice militaire, pour agrandir son Empire. Il voulut pour cét effet que vingt mille hommes de guerre, & quatre Maistres de Camp des plus experimentez, s'en allassent avec le Prince Ynca Roca son fils, iusques à *Chincasuyu*, qui est au septention de Cozco. Car de ce costé-là les Yncas n'auoient point estendu les bornes de leur Empire plus loing que le lieu, où le premier Ynca Manco Capac les auoit marquées ; à sçauoir iusques à *Rimactampu*, qui est à sept lieuës de Cozco. Possible aussi qu'ils n'auoient daigné se mettre en peine de conquerir ce pays, pource qu'il estoit rude & fort mal peuplé.

Le Prince partit donc de Cozco, & gagna la Riviere d'Apurimac, qu'il trajeta dans de grandes barques qu'on luy auoit apprestées. Et d'autant que tout ce pays estoit fort desert, il passa outre iusques à *Curahuacy* & *Amancay*, à dixhuiët lieuës de la ville, où trouuant peu d'Indiens en cette frontiere, il luy

fut facile de les reduire. De la Prouince d'*Amancay* qui est à main gauche du grand chemin par où l'on va de Cozco à *Rimac*, il passa le desert que l'on appelle *Cochacassa*, qui en ce parage a vingt-deux lieues de trauerie, & entra dans *Sura*, qui est vne Prouince grandement peuplée, fertile en or & en bestail, & où les habitans le recognurent pour leur Souuerain. De celieu-là, il tira vers *Apucara*, où il fut reconnu tout de mesme, sans que personne s'y opposast. Or ce que toutes ces Prouinces se rendoient à luy avec tant de facilité, procedoit de la grâde inimitié qu'elles auoient les vnes contre les autres. Tellement que dans leurs partialitez, & leurs diuisions, elles n'estoient nullement capables de resistance.

De la Prouince d'*Apucara* il passa en celle de *Rucana* qui est diuisée en deux, dont l'une s'appella *Rucana*, & l'autre *Hatunrucana*, qui signifie *Rucana la grande*. Il fut receu avec de grands applaudissemens de ceux du Pays, qui sont gens dispos & de bonne mine. De là prenant le fonds de la coste de la mer, que les Espagnols appellent *Los llanos*, ou le plat pays, il arriua en la premiere vallée de ce Parage, que l'on nomme *Nanasca*, comme qui diroit *la desolée*, sans qu'on puisse sçauoir au vray pourquoy on luy donne ce nom, si ce n'est apparemment, pour quelque fleau qui luy fut possible enuoyé. En cette vallée, que les Espagnols appellent par corruption *Lanasca*, ceux du pays receurent l'Ynca de leur bon gré, & luy obeïrent entierement. Il en arriua de mesme des autres vallées qui depuis *Nanasca* s'estendent iusques à *Arequipa*, le

long de la Coste, ayant plus de quatre-vingts lieuës de longueur, & enuiron quatorze ou quinze de large. Les principales de ces vallées sont *Hacari*, & *Camata*, où il y auoit bien pour lors quelques vingt mille habitans. Car pour les autres vallons, qu'on appelle *Alticu*, *Veuna*, *Atiquipa*, & *Quelca*, qui sont petits, & par consequent moins considerables, il fut tres-facile au Prince Ynca Roca de les reduire, pource qu'ils n'auoient point ce qu'il leur faillloit de forces pour luy resister; loint qu'ils estoient despourueus de munitions, & que chacune des moindres vallées n'auoit qu'un foible Seigneur. Que si les plus grandes en auoient plusieurs, ils estoient tousiours en querelle entre-eux; si bien que leur propres partialitez, & leurs diuisions les rendoient inhabiles à la resistance des forces estrangeres.

Auant que passer outre, ie raconteray icy vn estrange fait qui aduint dans la vallée de *Hacari*, vn peu apres que les Espagnols l'eurent gagnée, ce que nous ne laisserons pas de dire, bien que nous anticipions le temps de leur conqueste. Il y auoit deux *Curacas* en cette Contrée, qui n'estoient point encore baptisez, & entre lesquels suruindrent de si grands differends sur les bornes de leurs terres, qu'à la fin il s'ensuiuit vne bataille, où il en demeura de part & d'autre quantité de morts & de blesez. Cependant les Gouverneurs Espagnols deputerent vn Commissaire par deuers eux, pour leur rendre Iustice, & les remettre si bien ensemble, qu'à l'aduenir ils n'eussent plus de querelles. Comme en effet

ce Commissaire partagea ces bornes, selon qu'il aduifa pour le mieux; & enuoya dire aux Curacas que desormais ils fussent amis, & qu'ils vécussent en bonne paix; aussi le promirent-ils, ou du moins ils en firent semblant. L'un d'eux neantmoins qui se sentit offensé d'un tel partage, se resolut d'en tirer raison, & de se vanger secrettement de son ennemy sous vn specieux pretexte de s'estre reconcilié avecque luy. Voila donc que le mesme iour auquel cét accord se deuoit faire, ils mangerent tous deux ensemble, comme s'ils eussent esté bons amis. Mais apres le repas, le Curaca, qui en vouloit à l'autre, se leua de table, & prit deux vases en main, pour boire à la santé de son amy pretendu, comme les Indiens ont accoustumé de faire. Et d'autant que l'un des vases estoit empoisonné, soit que celuy qu'il inuitoit s'en doutast, pour le luy auoir veu chager de la main, ou qu'il n'eust pas suiet de se fier à luy, tant y a que se doutant de ce qui en arriua; *Donne moy cét autre vase,* luy dit-il, *si tu veux que ie te fasse raison;* Alors le Curaca pour ne rendre sa lascheté visible, changea le vase d'une main à l'autre, de telle sorte qu'ayant pris le breuuage empoisonné, il en creua deux ou trois heures apres; ce qui aduint par la force du venin, & pour le desplaisir qu'il eust de voir qu'il se faisoit mourir luy-mesme dans le dessein qu'il auoit d'oster la vie à son ennemy.

*Des Colonies enuoyées dans le pays, & de la mort
de l'Ynca Capac Yupanqui.*

C H A P. XIX.



Pres toutes ces conquestes , le Roy s'aduifa de tirer de Nanasca des Yncas Indiens de cette Nation , pour les faire aller demeurer sur la Riuiere d'Apurimac , qui deuers le chemin Royal par où l'on va de Cozco à Rimac , passe par vn pays si chaud , que les Indiens de la Montagne , comme gens qui sont en vn climat froid , ou temperé , ne peuuent viure parmy des chaleurs si violentes , sans tomber malades incontinant ; tellement qu'ils en meurent la plus-part du temps. Pour donner ordre à cela, les Yncas, comme i'ay desia dit , qui vouloient enuoyer des Colonies d'une Prouince à l'autre , ce qu'ils appellent *Mitmac* , prenoient tousiours garde que les pays fussent d'un mesme temperament , sçachant bien que les habitans mouroient aussi-tost , si d'un lieu chaud on les enuoyoit en vne Contrée froide , si bien que pour la mesme raison , il estoit defendu de mettre les Montaignards dans le plat pays. L'ynca donc s'aduifa de preuenir ce danger , voulant que les Indiens d'un climat chaud , s'en allassent peupler des terres qui estoient pareillement chaleureuses. Et toutesfois il n'y en enuoya qu'un petit nom-


bre , à cause qu'il n'y auoit pas beaucoup de pays à peupler. Ce qui procedoit sans doute de ce que le lóg de la riuiera d'Apurimac, qui passe à trauers de hautes & rudes Montagnes, la plus part du terroir estoit sterile ; à raison dequoy s'il estoit fertile en quelques endroits , l'Ynca s'aduisa de le faire cultiuer , & de mettre cette terre en iardinages & en vergers , pour ce qu'aux deux costez de cette fameuse Riuiera se cueilloient des fruiçts exquis & delicieux.

Après que le Prince ynca Roca eut fait tout cela, & pourueu à l'accoustumée au gouuernement des Prouinces qu'il auoit nouuellement conquises il retourna droit à Cozco , où il fut grandement bien receu de son Pere , & de tous ceux de sa Cour. Alors il congedia les Capitaines & les Soldats , qu'il recompensa dignement des seruices qu'ils luy auoient rendus à la guerre. Et d'autant que l'ynca Capac Yupanqui se sentoit affoibly de vieillesse, & qu'il desiroit de iouyr paisiblement de ses Conquestes, il se resolut de n'en aller point faire d'autres , si bien qu'il vescu ainsi quelques années dans vn grand calme , & eut beaucoup de soing de pouruoir au commun bien de ses Vassaux, qui de leur costé se monstroient zelez, & habiles à executer de poinçt en poinçt tout ce qui regardoit le seruice de l'ynca, soit qu'il fust question de contribuer à l'enrichissement de la maison du Soleil, ou aux autres bastimens publics , dont l'on en faisoit les vns par l'expres commandement de l'ynca, & les Indiens inuentoient les autres, pour l'embellissement , & la commodité de chaque Prouince.

L'Ynca Capac Yupanqui ayant fait les choses qui ont esté dites, mourut au milieu de la tranquillité qu'il auoit sagement establie. Comme c'estoit vn Prince vaillant, & tout à fait digne du nom *Capac*, que les Indiens estimoient si fort, il fut aussi grandement regretté de tous ses Sujets, qui luy tesmoignerent par leurs larmes, combien cette perte leur estoit sensible. Son corps fut embaumé, & mis avec ses Ancestres. Il laissa pour successeur l'ynca Roca, son fils aîné, qu'il auoit eu de Coya Mama Curyll pay, sa femme, & sa sœur, sans y comprendre ses autres enfans tant legitimes que bastards, dôt ie ne parleray point icy, pource qu'on n'en sçait pas le nombre au vray. L'on tient neantmoins, qu'il y en eust plus de quatre vingts; dequoy certes l'on ne s'estonnera pas, si l'on considere que la plus-part de ces yncas ont eu les vns cent, & deux cens fils, ou filles, & les autres iusques à trois cens.

Description du Temple du Soleil, & de ses grandes Richesses.

CHAP. XX.

 Vne des principales Idoles qu'eurent les Roys yncas & leurs Vassaux, fut la ville Imperiale de Cozco. Car les Indiens l'adoroient, comme vne chose sacrée, tant pour auoir esté fondée par le premier ynca Manco Capac,

Capac, apres vn grand nombre de victoires & de conquestes, qu'à cause qu'elle estoit comme la Cour & la maison des Yncas leurs Dieux; où il est à remarquer qu'en leur maniere d'adoration, ils se gouvernoient de telle sorte, qu'ils la demonstroient aux moindres choses. Car s'il aduenoit qu'en quelque chemin se rencontraissent ensemble deux Indiens, dont l'un fust de Cozco, & l'autre s'y en allast, ils se rendoient alors des deuoirs & des respects, ou plus, ou moins, selon qu'ils estoient ou natifs, ou habitans, ou plus proches de cette ville; ce qu'ils obseruoient encore en matiere des semences, des legumes, & des autres choses qu'ils transportoient de Cozco. Car bien qu'elles ne fussent pas meilleures que celles qui venoient d'ailleurs, si ne laissoient-ils pas d'en faire plus d'estime, pour estre venuës de cette ville, qu'ils n'en faisoient des marchandises & des denrées de routes les autres Prouinces; d'où l'on peut iuger combien ils estoient respectueux en matiere des choses de plus haute consequence. Comme ils auoient donc cette ville en grande veneration, cela fut cause que les Roys de cet Empire l'embellirent le mieux qu'ils peurent de maisons Royales, & d'autres bastimens magnifiques, dont ils en firent la plus-part pour eux, comme il sera remarqué plus particulierement en la description que nous ferons de quelques-vnes de ces maisons. De tous lesquels bastimens celuy qu'ils estimerent le plus, fut le Temple du Soleil, qu'ils comblèrent d'incroyables richesses, chacun des Yncas faisant à l'enuy à qui sur-

380 LE COMMENTAIRE ROYAL,
passeroit son Predecesseur en cette magnificence.
Comme les grandeurs de cette Maison sont au des-
sus de la creance humaine, ie n'oserois presque pas
les rapporter icy, n'estoit que les Historiens Espa-
gnols, qui ont escrit du Peru, en demeurent d'accord
auecque moy: Mais ny les choses qu'ils en ont dit-
tes, ny celles que ie pourrois adiouster, ne sont pas
capables d'exprimer ce qui en est, ny de le deduire
entierement. L'on attribue la gloire du bastiment de
ce Temple au Roy Ynca Yupanqui, Ayeul de Huay-
na Capac, non pour en auoir esté le fondateur, veu
que le premier Ynca le fonda, mais pour l'auoir mis
dans l'esclat, & dans le comble des richesses, où le
trouuerent les Espagnols.

Pour venir maintenant à la description du Tem-
ple du Soleil, où est auiourd'huy l'Eglise de S. Do-
minique, faite d'une certaine terre extremement
belle, i'en laisseray la grandeur & la largeur à part,
pour ne la pouuoir dire precisement, & passeray
aux autres particularitez. Son grand Autel (nom-
mons le ainsi, afin de nous expliquer, combien que
ces Indiens ne sceussent ce que c'estoit que d'Autel)
estoit du costé de l'Orient, & le toit de bois fort
espaiz, couuert de chaume par dessus, pource qu'ils
n'auoienc point parmy eux l'usage de la thuille ny de
la brique. Les quatre murailles du Temple à les pren-
dre du haut en bas, estoient toutes lambrissées de
plaques d'or. Sur le grand Autel se voyoit la figu-
re du Soleil, faite de mesme sur vne plaque d'or,
plus massiue au double que les autres. Cette figure,

qui estoit toute d'une piece, avoit le visage rond, environné de rayons & de flammes, tout de mesme que les Peintres ont accoustumé de la représenter. Elle estoit si grande, qu'elle s'estendoit presque d'une muraille à l'autre, où ne se voyoit que cette seule Idole ; pource que ces Indiens n'en avoient point d'autre, ny en ce Temple, ny ailleurs, & n'adoroient pour tous Dieux que le Soleil, combien qu'il s'en trouve assez qui sont d'opinion contraire.

Quand les Espagnols entrerent en cette ville, cette figure du Soleil escheut par le sort à Maneco Serra de Lequicano, Gentilhomme Castillan, des premiers de cette conqueste, que j'ay autresfois cognu ; & que ie laissay plein de vie, quand ie m'en allay en Espagne. Comme il se plaisoit à toute sorte de jeux, voyant que cette figure l'embarassoit pour estre trop grande, il luy prit fantaisie de la iouer ; tellement qu'il la perdit dans une nuit ; Ce qui donna lieu à ce proverbe rapporté par le R. P. Ioseph Acosta. *Il iouë le Soleil avant qu'il soit iour.* Cela fut cause que le President de cette ville voyant combien son fils estoit porté au jeu, le fit Preuost ordinaire un an durant, pour l'empescher de iouer, & luy donner de l'occupation ; Comme en effet il s'en acquitta si bien, & se rendit ponctuel en l'exercice de sa charge, comme il ne tenoit qu'à luy qu'il ne le fit, pour avoir toutes les belles qualitez qui sont requises à un Cauallier, qu'il ne mania point de cartes toute cette année ; ce qui obligea les habitans de l'honorer des charges publiques en suite de celle-cy. De sorte que son occupa-

tion ordinaire luy fit si bien oublier le ieu, qu'il l'eut tousiours depuis en horreur, se ressouenant des miseres & des grandes incommoditez qu'il luy auoit causées; par où l'on peut voir clairement que le vice s'entretient par l'oyfieté, & la vertu par le trauail. Pour reuenir maintenant à nostre Histoire, nous dirons que par cét eschantillon, qui escheut en partage à ce Gentilhomme, l'on peut iuger à peu près, combien estoit grand le thresor que les Espagnols trouuerent en ce Temple, & dans tout l'enclos de la ville. Aux deux costez de l'Image du Soleil estoient les corps de leurs Roys deffuncts, tous rangez par ordre selon leur ancienneté, comme Fils du Soleil, & embaumez de telle sorte, sans qu'on peust sçauoir comment, qu'ils paroissent estre en vie. Ils estoient assis en des throsnes d'or, esleuez sur des plaques de mesme metal, & auoient le visage tourné vers le bas du Temple, n'y ayant qu'un seul Huayna Capac, qui eust cét aduantage particulier par dessus les autres, d'estre directement opposé à la figure du Soleil, comme le plus cher de ses enfans, qui durant sa vie auoit merité qu'on l'adorast pour Dieu, à cause de ses vertus eminentes, & des qualitez dignes d'un grand Roy, qui en son bas âge auoit commencé d'esclatter en luy. Mais le malheur voulut pour les Espagnols, qu'à leur arriuée les Indiens cacherent ces corps avec tout le reste du thresor, sans qu'on peust sçauoir depuis ce qu'ils estoient deuenus, si ce n'est qu'en l'an 1559. le licentié Polo en descouurit cinq, à sçauoir trois corps de Roys, & deux de Roynes.

La principale porte du Temple, estoit tournée du costé du Nord, côme elle l'est encore à present, outre qu'il y en auoit plusieurs autres moindres, pour le seruice du Temple ; toutes lesquelles portes estoient couuertes de lames d'or. De plus à l'entour des murailles de ce Temple, estoit remarquable vne plaque d'or, qui auoit plus d'une aulne de largeur, qui l'environnoit en forme de couronne, ou de guirlande.

Du Cloistre du Temple, & des logemens particuliers, consacrez à la Lune, aux Estoilles, au Tonnerre, à l'Esclair, & à l'Arc-en-Ciel.

C H A P. XXI.



Costé du Temple se voyoit vn Cloistre à quatre faces, & en sa plus haute enceinte vne guirlande de fin or, de la largeur d'une aulne, comme cette autre que i'ay cy-deuant descrite. Pour memoire de celle-cy, les Espagnols y en firent mettre vne de fer blanc, de mesme largeur que la precedente, que i'y laissay à mon partement, pource qu'on n'auoit point encore abbatu l'enclos des murailles. Tout à l'entour de ce Cloistre, il y auoit cinq grands pauillons en quarré, couuerts en forme de pyramide. Le premier estoit dedié pour seruir de logement à la Lune, femme du Soleil, & celuy-cy estoit le plus proche de la grande

Chapelle du Temple, ayant ses portes & son enclos, tous couuerts de plaques d'argent, afin de donner à cognoistre par la couleur blanche que c'estoit le logement de la Lune, la figure de laquelle estoit depeinte comme celle du Soleil, sur vne plaque d'argent, si ce n'est qu'elle auoit le visage d'une femme. C'estoit-là que ces Idolatres s'en alloient faire leurs vœux à la Lune, & se recommander à elle, qu'ils croyoient estre la sœur & la femme du Soleil, comme aussi la mere de leurs Yncas, & de tous leurs descendans; à cause dequoy ils la souloient nommer *Mama Qullia*, c'est à dire, *la Mere Lune*, & ne luy offroient point de sacrifices comme au Soleil. Aux deux costez de cette figure, estoient les corps des Roynes deffunctes, rangez par ordre, selon leur ancienneté. La mesme *Mama Oello*, Mere de Huayna Capac, auoit la face tournée du costé de la Lune, par vn aduantage particulier par dessus les autres, pour auoir esté Mere d'un si digne fils.

Le logement le plus proche de la Lune estoit celui de Venus, des Pleyades, & de routes les autres Estoilles en general. Ils appelloient *Chasca* l'astre de Venus, pour monstrier par là qu'il auoit les cheveux longs & crepus, ioint qu'ils l'honoroient extremement, pource qu'ils le croyoient estre Page du Soleil, qu'ils disoient aller tantost deuant luy & tantost apres. Ils respectoient fort aussi les Pleyades, pour l'estrange disposition de ces Estoilles, qui leur sembloient toutes égales en leur grandeur. Quant aux autres Estoilles en general, ils les appelloient les

seruantes de la Lune, à raison dequoy ils leur donnerent vn logement auprès de leur Dame, afin qu'elles la peussent seruir plus commodement, pource qu'ils croyoient que les Estoilles estoient au Ciel, pour le seruice de la Lune, & non du Soleil, à cause qu'ils les voyoient de nuict, & non pas de iour.

Ce logement estoit couuert de plaques d'argent, comme celui de la Lune, & son grand Portail aussi. Quant à son toit, il sembloit représenter vn Ciel, pource qu'il estoit semé d'estoilles grandes & petites. Le troisieme logement proche de ce dernier estoit dedié à l'Esclair, au Tonnerre, & à la Foudre; Où il est à remarquer, qu'ils comprenoient toutes ces trois choses ensemble sous le nom *Yllapa*, dont ils distinguoient les significations par le moyen du verbe qu'ils y adioustoient. Comme par exemple quand ils disoient *amez vous ven Yllapa*: ils entendoient parler de l'Esclair, & par ces mots *amez vous ouy Yllapa*: ils comprenoient le Tonnerre, tout de mesme que pour denotter la Foudre, ils souloient dire, *Yllapa* est tombé en tel endroit, où il a fait tel dommage, &c.

Ils ne tenoient point ces trois pour Dieux, mais pour valets du Soleil, & en auoient la mesme opinion que l'ancienne Gentilité peut auoir eüe de la Foudre, la prenant pour vn instrument de la Iustice de Iupiter. A raison de toutes ces choses, les Yncas dōnerent vn logemēt tout lambrissé d'or à l'Esclair, au Tonnerre, & à la Foudre, qui leur sembloient estre les seruiteurs domestiques du Soleil; Et voila

386 LE COMMENTAIRE ROYAL,
pourquoy ils les logeoient dans sa propre maison. Ils
ne représenterent pas vn de ces trois par aucune Image
de relief ny de platte peinture. Et d'autant qu'ils
ne les pouuoient peindre au naturel, à quoy principalement
ils s'estudioient en toutes leurs images, ils
s'aduiferent de les honorer du nom *Yllapa*. Les Historiens
Espagnols n'ont peu comprendre iusques icy la signification
de ce nom, par où quelques-vns d'entre-eux ont voulu dire
que cela s'entendoit d'un Dieu trine & vn, comme si de ce
costé-là ils eussent voulu mettre leur Idolatrie en
parallèle, avec nostre sainte Religion. En quoy certes
ils se sont grandement abusez, & en ce qu'en d'autres
choses où il y auoit encore moins d'apparence, ils
ont cherché des symboles de la tres-sainte Trinité,
expliquant à leur mode les noms du pays, & attribuant
aux Indiens vne creance qu'ils ne s'estoient iamais
imaginée. Mais pour moy, ie n'escriis rien icy, comme
i'ay dit autresfois, que ie n'aye appris en mes plus
tendres années, & veu de mes propres yeux, ou du
moins ouy dire à mes Aneestres. Et d'autant que i'ay
déclaré cy-deuant ce qu'ils croyoient du Tonnerre,
ce me seroit vne superfluité de le repeter icy.

Ils dedierent à l'Arc en-Ciel le quatriesme loge-
ment, pource qu'ils trouuerent qu'il procedoit du
Soleil; ce qui obligea les Roys Yncas à le prendre
pour leur deuise, à cause du Pere dont ils disoient
estre descendus. Ce logement estoit tout enrichy
d'or, & dessus les plaques de ce metal se voyoit re-
présenté au naturel, avec toutes ses couleurs en
l'une

l'une des faces du bastimēt la figure de l'Arc-en-Ciel, qui estoit si grande, qu'elle s'estendoit d'une muraille à l'autre. Ils appelloient cēt Arc *Cuychu*, & l'avoient fort en veneration. Que s'ils le voyoient paroistre en l'air, ils fermoient la bouche aussi-tost, & y portoient la main deuant, pource qu'ils s'imaginoient que s'ils l'ouvroient tant soit peu, leurs dents en feroient pourries & gâtées. Or ce n'estoit pas en cela seulement qu'ils se monstroient sots & ridicules, mais en plusieurs autres choses tout à fait absurdes, qu'ils mettoient en auant, sans sçauoir pourquoy. Le cinquiesme & dernier logement estoit celui du grand Sacrificateur, & des autres Prestres, qui assistoient au seruice du Temple, & qui deuoient tous estre de la race du sang Royal des Yncas. Cēt appartement neantmoins n'estoit destiné ny pour y manger, ny pour y dormir, mais seruoit comme d'une sale pour y donner audience, & y consulter des sacrifices qu'il falloit faire; comme pareillement de toutes les autres choses qui concernoient le seruice du Temple, & ce logement comme les autres, estoit enrichy d'or depuis le haut iusques en bas.

*Du nom du grand Prestre, & des autres endroits
de la maison du Soleil.*

C H A P. XXII.



Es Espagnols appellent par corruption leur grand Prestre *Vilao-ma*, au lieu de dire *Villac-Vmu*, qui est vn nom composé du verbe *Villa*, qui signifie *proferer*, & du nom *Vmu*, qui est le mesme que Deuin ou Sorcier. Le mot de *Villac* avec vn C. est vn participe du present; Que si l'on y adioust le nom *Vmu*, c'est côme qui diroit, le Deuin ou le Sorcier, qui dit ou qui profere, sans que toutesfois il specifie la chose; voulant donner à entendre qu'il declaroit au peuple ce dequoy il consultoit avec le Soleil, en qualité de grád Prestre, & ce que le Soleil luy cōmandoit de dire à ces Idolatres, selon la doctrine de leurs fables, & les fourberies que le diable leur racôtoit par la bouche de leurs Idoles. En vn mot luy-mesme, comme leur Pontife, leur declaroit les choses qu'il deuinoit par le moyen des Augures, des Sacrifices, & de semblables superstitions, qu'ils auoient entre eux. Et d'autant qu'ils n'auoient point de nom propre pour dire Prestre, ils le composoient des mesmes choses que souloient faire les Prestres.

Je me souviens d'avoir veu trois de ces maisons, dont le toit & les murailles estoient encore en leur entier, sans qu'il y manquast que les plaques d'or & d'argent. Quant aux autres deux, qui estoient les logemens de la Lune & des Estoilles, on les avoit desia desmolies. Dans les murailles de ce logement, qui regardoient le Cloistre, il y avoit par dehors en chaque face quatre grandes Niches faites en forme de Tabernacle, le tout de terre cuite, comme le reste du bastiment. Elles avoient leurs moussures par dehors, & par le dedans elles estoient couvertes de lames d'or iusques au bas. Aux angles de ces moussures estoient enchassées plusieurs pierres fines, principalement des Esmeraudes, & des Turquoises, d'autant qu'en ce pays-là, il n'y avoit point de Rubis ny de Diamants. Aux iours de feste consacrez au Soleil, l'Ynca s'alloit asseoir tantost en l'un de ces Tabernacles, & tantost en l'autre, selon que la solemnité le requeroit.

J'ay veu autresfois quantité de trous sur les moussures des pierres de ces Tabernacles, en la Faciade qui regardoit l'Orient. Celles des Angles aboutissoient aux deux extremittez, & les autres du Tabernacle ne se faisoient remarquer que sur la muraille. J'ay ouy dire aux Indiens, & aux Prestres de cette maison, que là mesme souloient estre anciennement sur des lames d'or, les enchassures & les charons de la pierrerie. Les pavillons, les Tabernacles, & mesme les portes par où l'on alloit au Cloistre, estoient douze de nombre, horsmis les logemens de la Lune,

390 LE COMMENTAIRE ROYAL,
& des Estoilles, & les autres deux estoient lambrif-
sez d'argent, afin de mieux ressembler au naturel de
ce qu'ils representoient.

Outre les cinq grands Pauillons dont nous ve-
nons de parler, il y auoit dans la maison du Soleil
plusieurs autres logemens pour les Prestres, & les
seruiteurs domestiques, qui estoient du nombre des
Yncas, qu'on appelloit priuilegiez. Car là dedans
ne pouuoit entrer aucun Indien, quelque grand Sei-
gneur qu'il fust, s'il n'estoit Ynca. Les Dames n'y
entroient non plus, non pas mesme les filles, ny les
femmes du Roy. Les Prestres seruoient dans le Tem-
ple par semaines, qu'ils souloient compter par les
quartiers de la Lune, durant lequel temps ils s'abste-
noient de leurs femmes, & ne sortoient du Tem-
ple, ny iour ny nuit.

Les Indiens qui seruoient dans le Temple en qua-
lité de valets, comme les Portiers, les Balleyeurs, les
Cuisiniers, les Sommelliers, les Valets de garde-
robe, & ceux qui auoient le soing des joyaux, ou de
faire porter du bois & de l'eau, & de pourvoir à tou-
tes les autres choses necessaires pour le seruice du
temple, estoient de la mesme Nation, & des mes-
mes Villes que ces autres, qui seruoient dans la mai-
son du Roy; Car il y auoit des villes particulierement
obligées à donner des Officiers, pour la maison de
l'Ynca, & pour celle du Soleil. Où il faut remarquer
qu'en ces deux maisons, pour la mutuelle relation du
Pere au Fils, il n'y auoit aucune difference de seruice
en chose quelconque, si ce n'est qu'en celle du So-

leil, les femmes ne seruoient point, & que dans le Palais de l'Ynca l'on ne faisoit aucuns sacrifices; mais quant au reste tout y estoit égal, & en grandeur & en Maïesté.

Des lieux destinez à faire leurs Sacrifices, & où il falloit qu'ils se missent pied nud; Avec vne description de leurs fontaines.

CHAP. XXIII.



Es lieux où l'on souloit faire les Sacrifices estoient conformes à leur solemnité. Car l'on en faisoit les vns en certaines places, & les autres en diuers endroits, qui dans la maison du Soleil estoient dediez pour des festes particulieres, selon la deuotion ou l'obligation des Yncas. Les Sacrifices generaux de la principale feste du Soleil appelée *Raymi*, se faisoient en la grande place de la ville; & les autres, qui n'estoient pas si celebres, au Paruis du temple, où les habitants de toutes les Prouinces & des Nations du Royaume auoient accoustumé de danser, & de se resiouyr solemnellement. Il falloit de necessité qu'en ce lieu là ils se missent pied nud, pource que c'estoient les bornes prescrites pour s'y deschausser, auant qu'entrer dans le temple, comme nous demonstrerons cy-apres.

Pour cét effet il est necessaire de sçauoir, qu'au sor-

tir de la grande place de Cozco, l'on trouue trois principales ruës, par où l'on va Nord-Sud, iusques au temple. La premiere est celle où coule vn ruisseau qui est dans la ville. La seconde cette autre qu'on appelloit de mon temps *la ruë de la prison*, à cause que les Espagnols y en auoient vne, qu'ils ont changée depuis, à ce qu'on m'a dit; Et la troisieme celle par où l'on va en ce mesme quartier, comme l'on sort du Carrefour de cette place. A quoy i'adiouste qu'il y a vne autre ruë qui est plus au Leuant de ces trois, qu'on appelle maintenant du nom de saint Augustin. Par toutes ces quatre ruës les Indiens s'en alloient au temple du Soleil. Mais la principale ruë, & qui meine plus droit que les autres iusques à la porte du temple, est celle qu'on nomme *la ruë de la prison*, qui aboutit à la grande place. Aussi estoit ce par là qu'ils alloient ordinairement au temple, pour y adorer le Soleil, & luy faire des vœux, des Sacrifices, des offrandes. A trauers ces quatre ruës, il y en a vne autre qui va du Ponant au Leuant, en ce mesme endroit où est la Riuere, ou plustost le ruyseau, iusques à la ruë de saint Augustin. Celle-cy estoit comme vne borne, où ceux qui alloient au temple se mettoient pied nud, car autrement il leur estoit defendu de passer outre. Où il est à remarquer, que depuis les bornes de cette ruë, iusques à la porte du temple, il y a plus de deux cens pas. Ces mesmes limites se remarquoient au Leuant, au Ponant, & au Midy du temple, où il falloit que chascun se chauffast, auant que faire ses deuotions. Pour reue-

nir maintenant à l'embellissement de ce lieu, il faut sçauoir qu'en la maison du Soleil, il y auoit cinq fontaines, qu'ô y voyoit couler par diuers endroits. Leurs tuyaux estoient d'or, & leur bassins, les vns de pierre, les autres d'or, & les autres d'argent, où ils souloient lauer les choses sacrifiées, selon l'importance du Sacrifice, & la solemnité de la feste. Pour moy ie n'ay veu qu'une de ces fontaines, qui seruoit pour arroser le jardin de ce Conuent, soit que le temps eust tary la source des autres, ou que pour ne la connoistre on l'eust laissé perdre; ce qui est à mon aduis la raison la plus vray-semblable de toutes. Surquoy ie diray qu'il me souuient d'auoir veu cette derniere fontaine estre six ou sept mois sans couler, au grand preiudice de ce jardin, qui deperit à faute d'eau; ce qui fascha fort ceux du Conuent, & mesme les habitans de la ville, pource qu'il ne se trouua personne parmy eux, qui peust trouuer la source de cette fontaine, ny dire au vray d'où elle venoit.

La cause pourquoy elle se perdit, fut que du costé du Ponant de cette maison; l'eau couloit par dessous terre, & s'alloit ioindre au ruisseau, qui court par le milieu de la ville. Et d'autant que les tuyaux de cette fontaine se conseruoient par le moyen d'un Aqueduc de maçonnerie, & qui estoit bien paué, de peur que les courants ne ruinaissent ce bastiment, qui s'estendoit plus d'un quart de lieuë hors la ville; comme les Espagnols en negligerent le soing, il s'en alla tout à fait en ruïne. Ce qui proceda sans doute de ce que les courans de ces ruisseaux, qui sont fort

394 LE COMMENTAIRE ROYAL,
rapides, sapperent insensiblement cét Aqueduc, iuf-
ques au paué.

L'an 1558. l'impetuofité de ce ruiſſeau acheua de rompre les tuyaux de cette fontaine, qu'elle combla tout à fait, ſi bien que la ſource s'en tarit, & le jardin demeura ſec, ſans qu'on pût diſcerner les endroits où les tuyaux pouuoient eſtre. Car quelque peine que prirent les Religieux du Soleil pour en deſcou-
rir l'endroit, ſi n'en peurent ils iamais venir à bout. Et d'autant que pour trouuer ces tuyaux, il falloit de neceſſité abbattre des maiſons, & fouïller bien auant dans la terre, pource que la fontaine eſtoit haute; cō-
me il ne ſe trouua perſonne parmy eux, qui euſt aſſez d'inuention pour reüſſir en cela, ils laiſſerent tarir cette fontaine, auſſi bien que les autres, qui eſtoient dans la maiſon du Soleil. Par où l'on peut voir com-
bien peu de tradition ont pour le iourd'huy les In-
diens de ce qui touche l'antiquité, veu que tant ſeule-
mēt depuis quarante deux ans en ça, ils ont laiſſé per-
dre vne choſe ſi neceſſaire, à ſçauoir l'eau, que leurs
deuanciers auoiēt attirée dans le Palais du Soleil leur
Dieu. Dequoy ie m'eſtonne d'autant plus, qu'il me
ſemble que la tradition de tout cecy, deuoit paſſer
des principaux du pays à leurs ſucceſſeurs, & de leurs
Preſtres aux autres, afin de ne tomber en vne ſem-
blable faute. Mais d'un autre coſté il eſt veritable
que ceux-cy eſtans deſia morts en ce temps-là, &
pareillement les Preſtres, qui en cette Republique
auoiēt le ſoing & la charge des choſes qu'ils croyoiēt
eſtre ſacrées, & qui appartenoiēt à l'honneur & au
ſeruiſſe

seruice des Temples, cette relation vint à manquer comme plusieurs autres, dont les Indiens ne sçauent point rendre compte. Que si par les neuds de leurs tributs, ou dans le departement des Offices de la maison de leur Roy, ou par leurs annales ils pouuoient s'esclaircir des choses profanes, ie m'estonne fort comme ils n'en faisoient de mesme des sacrées, & particulièrement de ces fontaines; dequoy ie ne puis rendre d'autre raison, sinon que les Maistres de leurs comptes, & ceux qui leur tenoient lieu d'Historiens, qui auoient la charge de conseruer la memoire des plus grandes choses, l'ont laissé perdre peu à peu par la reuolution du temps, comme elle se perd encore tous les iours, à cause que leur maniere de supputer est maintenant autre qu'elle n'estoit anciennement, & qu'il en est de mesme de l'Histoire moderne de ces contrées.

Du jardin d'or, & des autres richesses du Temple, à l'imitation desquelles il y auoit plusieurs grands thresors dans cet Empire.

C H A P. XXIV.

POur reuenir à la fontaine que nous auons cy-deuât quittée, il faut sçauoir que six ou sept mois apres qu'elle fut tarie, il arriua de bonne fortune que de jeunes garçons Indiens, qui se iouoient auprès du ruisseau de Cozco,

descourirent vn de tuyaux rompu par où l'eau sortoit. A l'heure mesme la nouueauté de la chose fit qu'ils en appellerent d'autres, pour voir cela, si bien que les Espagnols en eurent aduis, & se doubterent par coniecture que c'estoit vn tuyau de la fontaine du Conuent, pource qu'il estoit assez proche de là. Dequoy s'estans plus particulierement esclairs par la trace des tuyaux, qu'ils descourirent, ils en donnerent aduis aux Religieux, qui en furent extrêmement ayfés, & les refirent de nouueau, mais non pas si bien qu'ils estoient auparauât. De cette façon ils attirerent l'eau derechef dans leur jardin, sans se mettre en peine d'où elle venoit, ny par où elle passoit. Il est vray qu'ils ne le pouuoient descourir que bien difficilement, à cause que les tuyaux estoient bien auant enseuelis dans la terre.

Ce jardin, qui sert maintenant à donner des herbes à ceux du Conuent, estoit au temps des Yncas tout d'or & d'argent, côme ces autres qui se voyoient dans les Palais de leurs Roys, où il y auoit quantité d'herbes, de fleurs, de plantes, & d'arbres de diuerses sortes, comme aussi plusieurs animaux, grands, & petits, sauuages, & appriuoisez, sans y comprendre les Couleuvres, les Lescards, les Limaçons & autres reptiles. Là mesme estoient representez naïvement, & mis en leur place, selon la nature de chaque chose, des papillons & des oyseaux de toutes les sortes, pour l'embellissement de ce lieu.

Auecque cela il y auoit vn grand champ semé de Mayz, de Quinoa, & d'autres legumes. Là mesme

se voyoient des arbres, les fruiçts desquels estoient tous d'or, & d'argent, faits au naturel. I'obmets qu'en la maison du Roy il y auoit des lingots d'or & d'argent amoncelés l'un sur l'autre, comme si c'eust esté du bois, & pareillement de grandes figures d'hommes, de femmes, & d'enfans, comme aussi plusieurs greniers qu'ils appellent *Pirua*, dont les grains estoient de pur or, le tout pour l'ornement, & pour vne plus grande Maiesté de la maison du Soleil leur Dieu. Car en toutes ses festes principales qu'on solemnisoit à châque année, on luy offroit vne grande quantité d'or & d'argent, qu'ils employoient à l'embellissement de sa maison, & pour cela mesme ils inuentoient tous les iours de nouvelles magnificences. A quoy s'employoient sans cesse tous les Orfevres dediez pour le seruice du Soleil, qui s'estudioient à l'enuy, à représenter & contrefaire au naturel les choses dont nous venons de parler. Outre cela ils faisoient vne infinité de vaisselle pour le seruice du Temple, comme des pots, des vases, des chaudrons, & ainsi des autres vstencilles. Bref il n'y auoit en toute cette maison aucuns outils qui ne fussent d'or & d'argent, iusques aux hoyaux & aux besches des iardins, tellement que ce n'estoit pas sans raison qu'ils appelloient tout l'enclos du Temple, & du Palais du Soleil *Caricancha*, c'est à dire *Magasin d'or*. A la ressemblance de ce Temple de la ville de Cozco, estoient faits tous les autres Temples, qui se voyoient en diuerses Prouinces de ce Royaume, de plusieurs desquels, & des maisons de

leurs Religieuses qu'ils appelloient les Vierges choisies, il est parlé dans le liure de Pedro de Cieça de Leon, où il fait vne description de tout le pays. Or bien qu'il y represente châce Prouince, comme dans vn tableau, si est ce qu'il ne traite pas de toutes les maisons ny de tous les Temples de cét Empire, mais de ceux-là seulement que l'on rencontre le long du chemin qu'ils appellent Royal, sans parler de ceux que l'on void dans les vastes Prouinces, qui sont aux deux costez des grands chemins. Je n'en parleray non plus moy mesme, afin de n'estre prolix; loint qu'il n'y a pas d'apparence que i'en fasse icy mention, l'ayant desia fait du principal Temple, à la semblence duquel estoient bastis tous les autres.

Châce Curaca taschoit de tout son possible d'embellir le Temple du Soleil, selon l'abondance d'or & d'argent, qu'il auoit en son pays. Ce qu'ils faisoient tous en general, tant pour l'honneur & le seruice de leur Dieu, que par vne maniere de flatterie enuers leurs Roys, qui se picquoient du haut tiltre de Fils du Soleil, plus que d'aucune chose du monde; à cause dequoy tous les Temples de ces Prouinces estoient couverts de lames d'or & d'argent, aussi bien que celui de Cozco.

Les plus proches parents des Curacas estoient Prestres dans les Temples du Soleil. Quant au premier d'entre eux en châce Prouince, tel sans comparaison qu'est l'Euesque parmy nous, il falloit qu'il fust Ynca du sang Royal, afin que les Sacrifices que l'on faisoit au Soleil, fussent conformes aux coustu-

mes, & aux ceremonies de Cozco, non pas aux superstitions que l'on souloit faire en quelques Provinces, qui furent deffenduës par les Yncas. Telle estoit l'abominable coustume qu'ils auoient entre-eux de sacrifier des hommes, des femmes, & des enfans, de manger de la chair humaine, & ainsi des autres barbaries pratiquées, comme nous auons dit, par ces premiers Gentils.

Pour empescher donc que les Suiets ne tournassent leur esprit à ces abominations, ils estoient obligez de n'esleuer à la charge de grand Prestre qu'un Ynca du sang Royal; ce qu'ils faisoient encore afin que les suiets mesmes en fussent plus honorez. Car ils se prisoient grandement d'auoir des Yncas pour Superieurs, tant en matiere des dignitez de leur Religion, que des charges militaires, afin d'estre comme les membres de ceux qu'on leur donnoit pour Chefs; & voila pour ce qui est des grandes richesses de ce Temple, dont ie me contente d'auoir rapporté le principal, laissant à dire le reste à ceux qui en sçauront remarquer les particularitez mieux que moy.

*Du fameux Temple de Titicaca, & de quelques
contes fabuleux de ces Indiens.*

C H A P. XXV.



Ntre les Temples les plus fameux qui dans le Peru furent dediez au Soleil, & qui en richesses & en ornemens d'or & d'argent estoient à peu près comparables à celuy de Cozco, il y en eust vn fort celebre en l'Isle appellée *Titicaca*, qui signifie *Montagne de plomb*, pource qu'il est composé de *Tiri*, qui est le mesme que *plomb*, & de *Caca*, nom qui se prend pour vne Montagne, si l'on prononce ces deux syllabes du fonds du gosier, pource que le proferant à la façon des Espagnols ils signifie oncle de mere. Le Lac de *Titicaca*, où est cette Isle, apris d'elle mesme son nom propre. Elle est esloignée de la terre forme vn peu plus que de deux traits de harquebuse, & a cinq ou six mille pas de circuit. Ce fut là, du moins les Yncas le tiennent ainsi, que le Soleil voulut que s'arrestassent ses deux enfans, dont l'vn estoit vn fils, & l'autre vne fille, quand il les enuoya sur terre pour instruire en la vie ciuile ces peuples barbares; A laquelle fable ils en adioustent vne autre qu'ils prennent de bien plus loing. Car ils disent qu'incontinent apres le deluge, les beaux rayons du Soleil furent veus en cette Isle, & en ce grand Lac

premier qu'en tout autre lieu. Il est si profond & si grand qu'en certains endroits, il a 48. huit brasses de fonds, & quatre-vingts lieues de circuit. Il a cela de propre de ne souffrir qu'aucuns batteaux y nagent; Dequoy le R. P. Blas Valera, recherchant la cause, il dit qu'elle procede de ce qu'il y a quantité d'une certaine pierre, qu'on appelle *Himan*, ce que ie ne rechercheray pas plus auant, & m'en tiendray à son opinion.

Le premier Ynca Manco Capac voyant que la foy qu'on adioustoit à cette ancienne fable, autorisoit sa fourberie, & que les Indiens tenoient pour des lieux sacrez, ce Lac & cette Isle, eust recours à l'invention, à la souplesse, & à l'industrie de son bon esprit, pour en faire vne seconde, disant que luy & sa femme estoient enfans du Soleil, & que son Pere les auoit enuoyez exprés en cette Isle, afin que de ce lieu là ils s'en allassent par tout le monde instruire ces peuples, comme nous l'auons amplement démontré au commencement de cette Histoire. Cependant les Yncas Amautas, qui estoient les Philosophes, & les Sages de leur Republique, réduisoient la premiere fable à la seconde, prenant l'une & l'autre pour vne maniere de prophetie. Ils disoient donc que le Soleil auoit esclairé cette Isle auant que tout autre lieu, pour donner à entendre qu'en ce mesme endroit, il feroit arrester ses deux premiers enfans, pour instruire ces peuples là, & leur donner vne claire cognoissance des plus hauts mysteres, en les tirant de leur brutalité, pour leur apprendre à viure

humainement , comme ils auoient fait depuis le regne des Yncas. Par ces inuentions & autres semblables , ils persuaderent aux Indiens qu'ils estoient fils du Soleil , & le confirmerent par les grands biens qu'ils firent aux hommes. Tellement que ces deux fables , si ingenieusement inuentées , furent cause que les Yncas , & tous ceux de leur Empire , tindrent cette Isle pour vn lieu sacré ; & que pour marque de leur veneration , ils y firent bastir à l'honneur du Soleil vn Temple si riche , qu'il estoit couuert de toutes parts de lames d'or. Là tous ceux des Prouinces fuietes à l'Ynca , s'en alloient à chèque année faire de riches offrandes d'or , d'argent , & de pierrerie , en recognoissance & action de graces , pour les grands biens que le Soleil leur auoit faits en ce lieu. L'on faisoit dans ce Temple le mesme seruice qu'en celuy de Cozco , & l'on tient qu'en cette Isle il y auoit vne si grande quantité d'offrandes d'or & d'argent , qui consistoient en vstencilles , & en meubles precieux , qu'à ce que disent les Indiens , la merueille en est au dessus des paroles. Le R. P. Blas Valera , parlant des prodigieuses richesses de ce Temple , qui s'y voyoient entassées par monceaux , dit que les Indiens appelez *Mitmac* dont on auoit enuoyé vne Colonie à *Copacauano* , l'auoient asseuré que de l'or , & de l'argent , qui estoit resté des offrandes faites en cette Isle , l'on en pouuoit bastir vn autre temple depuis les fondemens iusques au toict , sans vn meslange d'autre matiere. A quoy il adiousté , que les Indiens ietterent tous ces thresors dans le Lac , si tost qu'ils apprirent

que les

que les Espagnols abbordez en ces contrées, enuahissoient tout ce qu'ils y trouuoient de richesses.

A ce conte est encore semblable cét autre, à sçauoir qu'en la vallée d'Orco, qui est à six lieuës de Cozco, du costé du Sud, il y a vn petit Lac d'environ demy lieuë de circuit, grandement profond, & enuironné de hautes Montagnes, où l'on tient qu'austost que les Indiens furent aduertis de l'arriuée des Espagnols au Peru, ils y ieterent dedans la plupart des thresors de Cozco, entre lesquels estoit remarquable vne grande chaisne d'or, que Huayna Capac auoit fait faire, comme nous dirons quád il en fera temps; Ce qui fut cause qu'au bruit qui couroit de cecy, il se trouua douze ou treize marchands Espagnols, habitans de Cozco, qui firent vne compagnie entre eux à perte, ou à gain, pour espuisser tout le Lac, afin d'en tirer ce thresor. Pour cét effet ils y ietterent la sonde, & trouuerent qu'il auoit vingt-trois ou vingt-quatre brasses d'eau, sans ce qu'il y auoit beaucoup de vase. Afin d'en venir à bout plus aysement, ils s'aduiferent de faire vne mine du costé de l'Orient de cè Lac, par où passe la riuierè Yucay, à cause qu'en cét endroit le terrain y est plus bas que le Lac, & qu'ainsi l'eau pouuoit auoir son courant plus libre, & en estre plus aysement mise à sec; Ce qu'ils ne pouuoient faire par les autres endroits, pource qu'ils sont tous enuironnez de montagnes, ny mener à bout cette entreprise si aysement par au-

Ecc.

cune autre inuention que par celle de la mine. Ils commencerent donc de mettre la main à l'œuvre l'an mil cinq cens cinquante sept, avecque de grandes esperances de s'enrichir par le moyen de ce thresor. Mais apres auoir sappé le terrain à plus de cinquante pas de la montagne, quand il fut question d'abbattre vne grande masse de roc, ils trouuerent qu'en vain ils s'efforçoient de la rompre, pource que c'estoit de la pierre à feu, d'où ils tiroient plus d'estincelles qu'ils ne brisoient de caillous; Ce qui fut cause qu'ayant beaucoup dissipé d'argent à vne entreprise si temeraire, ils la quitterent enfin, quand ils virent qu'ils n'y perdoient que leur temps, & leurs esperances. Comme ils estoient apres ce trauail, i'entray dans la fondriere qu'ils auoient faite; ce qui a possible donné lieu au commun bruit qui a tousiours couru depuis, à sçauoir qu'à l'arriuée des Espagnols les Indiens cacherent vne infinité de thresors dans les Lacs, & dans les Cauernes, sans qu'il ayt apparence de les pouuoir iamais recouurer.

Outre les magnifiques ornemens de ce Temple dont nous venons de parler, les Indiens enrichirent grandement toute cette Isle, pour estre à ce qu'ils disent, la premiere terre, où leurs Ancestres venus du Ciel auoient mis le pied. Pour la rendre plus agreable à la veüe, ils l'applanirēt le mieux qu'il leur fut possible, en abbattirent les rochers, & y firent transporter de loing quantité de terre grasse & fer-

tile, afin d'y faire croistre du Mayz, pource qu'il ne s'en cueilloit point en toute cette Contrée, à cause de la froideur du climat. Ils en semerent en abondance sur ces pieces de terre ; & d'autres legumes pareillement. De maniere qu'à force de cultiver le terroir, ils recueilloient de ces grains, bien que ce ne fust qu'en petite quantité, & les enuoyoient aussi-tost au Roy, comme vne chose sacrée. Ils en portoiēt vne partie au Temple du Soleil, & en enuoyoit l'autre aux *Vierges choisies*, qui estoient les Religieuses de Cozco, avec charge expresse d'en faire ainsi la distribution d'une année à l'autre aux Couvents & aux Temples du Royaume ; afin qu'ils peussent tous auoir part à ces grains, qu'ils tenoient leur estre enuoyez du Ciel. Ils les semoient aux jardins des Temples du Soleil, & des maisons de ces Religieuses, dans les Prouinces où il y en auoit, & la recolte qui s'en faisoit, estoit distribuée de ville en ville. Dauantage ils en mettoient dans les greniers du Soleil, comme aussi en ceux du Roy, & dans les magasins publics, croyant que ces grains, comme diuins, estoient capables de conseruer le pain, qu'on y gardoit ordinairement pour la nourriture des habitans, en cas de famine, ou mesme de l'augmenter, & d'empescher qu'il ne se gatast. Tellement que si quelque Indien pouuoit auoir vn seul grain de ce Mayz, ou de telle autre semence, qui fust venu de cette Isle, pour le mettre dans ses greniers, il croyoit pour chose certaine, que de sa vie il n'auroit

466 LE COMMENTAIRE ROYAL;
faute de pain; si grande estoit la superstition de ces
peuples en matiere des choses où leurs yncas estoient
mellez, quelques petites & peu importantes qu'el-
les fussent.

Fin du troisieme Liure.



LE
COMMENTAIRE
ROYAL
 DES YNCAS.

LIVRE IV.

Où il est traité des Vierges, ou des Religieuses consacrées au Soleil; Des Loix expressement faites contre ceux qui les violoiēt; Du mariage des Indiens en general; De celui du Prince en particulier; Des conditions requises pour heriter du Royaume; De la nourriture des enfāns; De la vie d'Yncaroca sixiesme Roy, où sont comprises ses Conquestes, ses fondations, & ses dicts memorables; De celle du septiesme Roy Yahuar Huacac, & d'un estrange Fantosme, qui s'apparut au Prince son fils.

De la maison des Religieuses, ou des Vierges dédiées au Soleil.

CHAPITRE I.

Quelques Payens que fussent les Roys Yncas, si ne laissoient ils pas d'auoir en leur Religion des choses fort grandes, & dignes de la consideration des hommes. L'une des principales

E e e iij

408 LE COMMENTAIRE ROYAL,
estoit la profession que faisoient d'une perpetuelle virginité les filles qui se vouioient au seruice du Soleil. Elles viuoient pour cét effet retirées du commerce du monde, en plusieurs maisons basties exprés dans ce grand Empire. Mais pour mieux entendre qui estoient ces filles, & à quoy elles s'occupoient, il faut que nous en marquions icy toutes les particularitez, pource que les Historiens Espagnols, qui traitent de cette matiere, passent legerement par dessus, comme le chat sur la braise, ainsi que dit le proverbe. Nous commencerons donc par la maison qui estoit dans Cozco, & en parlerons particulièrement, pource que toutes les autres du Peru furent faites depuis sur le modelle de celle-cy.

Pour bien comprendre cela, il faut sçauoir qu'il y auoit dans cette ville vn quartier qu'on nommoit *Acllahua*, c'est à dire, la *Maison des Estoilles*. L'on appelle de ce nom tout cét enclos qui est entre les deux ruës, par où au sortir de la grande place l'on s'en va droit au Conuent de saint Dominique, qui souloit estre iadis la maison du Soleil. L'une de ces ruës du costé du Nord, est à la main gauche de la grande Eglise, & ie me souuiens fort bien que celle-cy estoit la plus marchande de toutes, au temps, que ie sortis de cette ville, qui fut l'an 1560. Quant à l'autre, elle est directement opposée au milieu de la place, où la prison estoit autresfois, & aboutit vers le Nord, au mesme Conuent de saint Dominique. Ainsi la facade de cette maison estoit située entre les deux ruës dont ie viens de parler, vis à vis de la grande place, &

le derriere s'estendoit iusques à la ruë qu'on trouue à trauers , si lon va de l'Orient au Ponant. De maniere que ce Palais estoit comme vne Isle entre la place & les trois ruës. A quoy i'adiouste qu'entre celles mesmes , & le Temple du Soleil , il y auoit vne autre Isle de maisons de large estenduë , & deuant le temple vne place extremement grande. Par où l'on peut voir clairement combien est fausse la relation qu'ont eüe ces Historiens , qui disent que ces Vierges esleuës estoient dans le temple du Soleil , comme des Prestresses qui assistoient à ceux qui sacrifioient , quand il falloit faire les ceremonies ; Mais il est bon à voir qu'ils se trompent , si l'on considere la grande distance qu'il y auoit d'une maison à l'autre ; Ioint que la principale intention des Roys Yncas estoit qu'il n'entraist point d'hommes dans la maison de ces Religieuses , ny point de femmes dans celle du Soleil. On l'appelloit ordinairement *la maison des Esleuës* , pource qu'on en faisoit election , selon qu'elles estoient belles , ou de bonne naissance , outre qu'elles deuoient estre Vierges , & que pour mieux s'en asseurer ils les choisissoient de huit ans en bas.

Or d'autant que les Vierges de cette maison de Cozco , estoient dediées pour estre femmes du Soleil , il falloit qu'elles fussent de son mesme sang , c'est à dire filles des Yncas , legitiment descenduës du Roy , ou de ses parens. Car celles qui estoient conceuës du meslange d'un sang estrange , c'est à sçauoir les bastardes , ne pouuoient entrer dans cette

410 LE COMMENTAIRE ROYAL,
maison de Cozco , dont nous parlons. Surquoy ils
alleguoient pour leurs raisons, qu'il n'estoit non plus
permis de mettre au seruice du Soleil vne bastarde,
qu'une femme corrompue. Car si le Soleil deuoit auoir
des enfans, comme ils se l'imaginoient, il n'estoit pas
raisonnable, disoient-ils, qu'il y eust en eux vn con-
fus meslange de sang diuin & humain, & voila pour-
quoy ils concludoient, qu'il falloit que ces Vierges
fussent legitimes, & du propre sang du Soleil.

Dans cette maison il y auoit pour l'ordinaire plus
de quinze cens Religieuses, sans que le nombre en
fust limité. Celles d'entre elles qui estoient âgées
viuoient dans la mesme profession où elles auoient
vieilly, comme y estant entrées aux mesmes condi-
tions que les autres. Ils les appelloient *Mama cuna*,
tant à cause de leur âge, que de l'office qu'elles fai-
soient. Que si l'on explique ce mot au pied de la
lettre, il signifie proprement vne Matrone. Mais si
on luy donne sa signification toute entiere, c'est le
mesme que si l'on disoit vne femme qui a le soing de
faire l'office de Mere, estant comme il est, composé
de *Mama*, qui signifie Mere, & de la particule *Cuna*,
qui en sa composition a la mesme signification que
nous auons ditte, ioint qu'elle en a plusieurs au-
tres, selon les diuerfes compositions qu'elle re-
çoit. Ce nom leur estoit aussi fort conuenable, veu
que les vnes faisoient l'office d'Abbeses, & que les
autres estoient données pour Gouvernantes aux No-
uices, pour les instruire au culte diuin de leur Ido-
latric, & aux exercices manuels, comme à filer, à
tistre,

tistre, & à coudre. Bref les vnes auoient le soing de garder la porte, & les autres de donner ordre aux necessitez de la maison, selon le besoing qu'en auoient les Religieuses, qui estoient abondamment pourueüs de tout ce qu'il leur falloit, & cela se tiroit du domaine du Soleil, de qui elles estoient femmes.

Des statuts des Vierges esleues, & de leurs exercices.

CHAP. II.



Es Religieuses viuoient tousiours enfermées, & dans vne perpetuelle virginité. Elles n'auoient ny Tour ny Parloir, ny autre tel lieu, & ne voyoient ny homme ny femme, si ce n'est qu'elles s'entretenoiēt ensemble les vnes avecque les autres. La raison qu'elles alleguoient là dessus, estoit que les femmes du Soleil ne deuoient point estre communes, ny se faire voir à personne. Ce qu'elles obseruoient si estroitement, que l'Ynca mesme s'abstenoit de iouyr du priuilege de les aller visiter, bien qu'il le peust faire, & parler à elles comme Roy qu'il estoit; & il est bien à croire qu'il s'en empeschoit, afin de ranger les autres à son exemple, & leur oster la hardiesse d'aspirer à vn semblable priuilege, tellement qu'il n'y auoit que la Coya, c'est à dire la Royne & ses filles.

qui eussent permission d'entrer dans ce grand enclos, & parler à ces enfermées soit qu'elles fussent ieunes ou vieilles. Ainsi quand le Roy vouloit sçauoir comment elles se portoient, & si elles n'auoient point besoing de quelque chose, il prenoit le soing de les enuoyer visiter par la Roynie mesme, & par les Princesses ses filles. Je me souuiens d'auoir veu cette maison en son entier : car les Indiens n'espargnant que celle-cy, ensemble celle du Soleil, & quatre grands logemens, où souloient demeurer autrefois les Yncas, bruslerent les autres maisons de la ville, lors que tous en general se souleuerent contre la Nation Espagnole. Que s'ils respecterent ainsi ces maisons, ce fut pource que l'une auoit esté au Soleil leur Dieu, l'autre à ses femmes, & les autres à leurs Roys. A trauers ce vaste bastiment estoit sur tout remarquable vne petite ruë en forme de gallerie, où deux personnes pouuoient aller de front, & où a main droite & à gauche se voyoient plusieurs logemens dans lesquels trouuilloient ordinairement les femmes qui estoient destinées pour le seruice de cette maison. En chacune de ces loges il y auoit vne Portiere, fort soigneuse de s'acquitter de sa charge; & au dernier appartement qui se voyoit au bout de la ruë, où personne n'entroit, estoient logées les femmes du Soleil. Cette maison auoit sa principale porte, qu'on n'ouuroit iamais qu'à la Roynie & aux filles, qu'on vouloit receuoir Religieuses.

A l'entrée de la ruë, où estoit la porte du seruice de la maison, il y auoit ordinairement vingt Portiers,

pour faire tenir ou porter eux mesmes iusques à la seconde porte, les choses qui deuoient ou entrer dans le logis, ou bien en sortir. Ils ne pouuoient toutesfois aller plus auant que la seconde porte, sur peine de la vie, quand mesme le commandement leur en fust venu de la part des Religieuses, ny elles le leur commander sur la mesme peine.

Il y auoit là dedans pour le seruice des Religieuses & de toute la maison cinq cens ieunes Damoiselles, qui deuoient estre toutes Vierges, & filles des Yncas, iouissants du priuilege que le premier Ynca donna iadis à ceux qu'il soubmit à son Empire, sans qu'il fust besoing qu'elles fussent de sang Royal, d'autant qu'elles entroient dans cette maison comme seruantes, & non pas pour estre femmes du Soleil. Ces filles auoient aussi leurs *Mamacunas*, ou leurs Gouuernantes, qui faisoient profession de virginité & les instruisoient en ce qu'il falloit qu'elles fissent. Ces *Mamacunas*, comme i'ay dit cy-deuant, auoient vieilly dans la maison, & on les honoroit de ce nom, & de cette charge, à cause de leur âge, comme si on leur eust voulu dire par là qu'elles estoient Meres, & capables de gouverner le Conuent. Au partage que firent les Espagnols des maisons Royales, pour y demeurer apres auoir gaigné la ville de Cozco, la moitié de ce Conuent escheut à Pierre de Barco, de qui nous parlerons cy-apres, & l'autre moitié au Licencié de Gama, que i'ay connu en mon enfance; ce qui tomba depuis en la possession de Diego Ortez de

Guzman, natif de Seuille, que ie laiffay en vie, quand ie m'en allay en Espagne.

Le principal exercice des femmes du Soleil, estoit de filer, de tistre, & de faire tout ce que l'Ynca & la Coya sa femme legitime auoient d'habillemens sur leur personne, ioint qu'elles en faisoient de mesme de tous les autres vestemens les plus fins, qu'on souloit offrir en sacrifice au Soleil. L'Ynca portoit d'ordinaire pour habillemēt de teste vne maniere de cordon qu'on appelloit *Llautu*, de la largeur du poulce, & d'une forme presque quarrée, faisant quatre ou cinq tours sur la teste, & pareillement la bordure de couleur, qui ioignoit d'une temple à l'autre.

Quant à son habillement, c'estoit vne Camisole qui luy alloit iusques aux genoux, appelée *Vncu* de ceux du pays, & des Espagnols *Cusma*; ce qui n'est pas vn mot de la langue generale, mais plustost de quelque Prouince particuliere. Ils portoient en lieu de manteau vne maniere de casaque nommée *Yacolla*. Les mesmes Religieuses faisoient pour l'Ynca vne maniere de bourse quarrée, qu'il souloit porter comme en escharpe, attachée à vn cordon fort bien travaillé, de la largeur de deux doigts. Ces bourses qu'ils appelloient *Chuspa*, ne seruiēt qu'à y mettre de l'herbe *Cuca*, que les Indiens ont accoustumé de mascher, & qui pour lors n'estoit pas si commune que maintenant, n'estant permis qu'au seul Ynca d'en manger, ou du moins qu'à ses Parents, & à quelques Curacas, ausquels le Roy en enuoyoit tous les ans de pleins paniers par vne faueur tres particuliere.

Elles faisoient encore certaines petites bordures appellées *Paycha*, meslées de jaune & de rouge, attachées à vn cordon de la longueur d'une aulne, & qui n'estoient point pour l'Ynca, mais pour ses proches parens, qu'elles portoient sur la teste, d'où par les deux extremités elles aboutissoient à la temple droite.

*Du religieux respect qu'ils portoient aux choses
que les Vierges esleuës auoient faites ; Et
de la punition de celles qui pechoient
contre leur honneur.*

CHAP. III.



Es Vierges Esleuës faisoient de leur main quantité de ces choses que nous auons dittes, pour l'usage & le seruice de leur Mary le Soleil. Et d'autant que cét Astre, qu'elles tenoient pour leur Dieu, ne pouuoit receuoir de leur part ces beaux ornemens, ny s'en esquiper, elles les enuoyoit à l'Ynca, comme à son fils legitime, & à son vray heritier, afin qu'il luy pleust se parer de ces liurées ; Aussi les receuoit-il comme des choses sacrées, si bien que luy-mesme, & tous ses suiets les auoient en plus grande veneration que les Grecs & les Romains n'eurent iamais les Statuës de Iunon, de

Venus, & de Pallas. Car ces nouueaux Gentils plus impertinents que les anciens, adoroient avec vn religieux respect, & vne grande veneration tout ce qu'en leur fausse religion ils tenoient pour diuin & sacré. A quoy certes ils se croyoient obligez, d'autant que ces choses qu'ils reueroient si fort, estoient faites de la main des Coyas, femmes du Soleil, & pour le Soleil mesme, outre que ces femmes estoient de son sang. Aussi l'Ynca ne les pouuoit donner à pas vn autre, qui ne fust de sang royal & son parent, pour ce, disoient-ils, que c'estoit vn sacrilege d'employer les choses diuines à l'usage des personnes humaines. Pour cette consideration, quelque seruice que les Curacas, & les plus fameux Capitaines eussent rendus au Roy, s'ils n'estoient sortis de son sang, il ne leur pouuoit faire present de ces vestemens, sans violer ses propres Loix. Il est vray neantmoins, qu'il luy estoit permis d'en donner d'autres tels que nous dirons cy-apres aux Curacas, aux Viceroyz aux Gouverneurs, & aux Capitaines, ce qui leur tenoit lieu d'une faueur signalée.

Outre les choses dont nous venons de parler, ces Religieuses estoient obligées de temps en temps de faire le pain qu'ils appelloient *Cancu*, pour les sacrifices qu'ils offroient au Soleil, en les plus grandes festes qu'on nommoit *Raymi*, & *Citua*. Elles faisoient le mesme d'une certaine liqueur que l'Ynca & ses parens souloient boire à ces iours de feste & l'appelloient *Aca*, prononçant la derniere syllabe du fonds du gosier; Car quand on la prononce selon les let-

tres Espagnoles elle signifie *excrement*. Toute la vaisselle de cette maison , iusques aux murailles , aux chaudrons , & aux vases, estoit d'or & d'argent, comme celle de la maison du Soleil , pource que c'estoient ses femmes qui s'en seruoient, & qui le meritoient pour leur naissance & leur qualité. Il y auoit de mesme vn iardin, de quiles arbres, les plantes, les herbes, les fleurs, les oyseaux, & les autres animaux estoient tous d'or, & d'argent, faits au naturel comme ceux du Temple du Soleil.

Les Religieuses de la ville de Cozco, s'occupoient particulièrement aux choses que nous auons dittes; Car pour tout le reste il estoit conforme à la vie & à la conseruation de certaines femmes, qui viuoient tousiours enfermées, & gardoient vne virginité perpetuelle. Que si de hazard parmy vn si grand nombre de Religieuses, il s'en trouuoit quelqu'une qui vint à faillir contre son honneur, il y auoit vne Loy qui vouloit qu'elle fust enterrée toute viue, & son galand pendu. Et d'autant qu'ils estimoient peu de chose de faire mourir vn seul homme, pour vne faute si grande qu'estoit celle de violer vne fille dediée au Soleil leur Dieu, & le Pere de leurs Roys, il falloit par la mesme Loy qu'avec le delinquant la femme, ses enfans, ses seruiteurs, ses parens, & de plus tous les habitans de la ville où il demeueroit, iusques aux enfans qui estoient à la mamelle en portaissent la peine tous ensemble. Pour cet effet ils desmolissoient la ville & y semoient de la pierre, si bien que toute son estendue demeueroit deserte, desolée, mau-

dites & excommuniée, pour marque de ce que cette ville auoit engendré vn si detestable enfant; à cause dequoy ils essayoient d'empescher que ce terroir ne fust foulé de personne, non pas mesmes des bestes, s'il estoit possible. Voila ce qu'ordonnoit cette Loy, qui toutesfois ne fut iamais executée; pource qu'il ne se trouua iamais aucun dans le pays qui fust conuaincu d'auoir failly à l'encontre; Où il est à remarquer, comme nous auons dit autresfois, que les Indiens du Peru estoient les peuples du monde les plus soigneux d'observer leurs Loix, principalement en matiere de Religion & de Royauté, tellement que si quelqu'un les violoit, il estoit puny, côme l'on dit, au pied de la lettre, c'est à dire sans aucune remission, quand il n'eust fait que tuer vn chien. Car les yncas ne faisoient iamais des Loix, pour estonner leurs Sujets tant seulement; mais pour les leur faire observer de poinct en poinct, si bien que la punition estoit infallible à ceux qui les violient.

Qu'il y

*Qu'il y auoit plusieurs autres maisons de Vierges
esleuës ; Avec vne preuue particuliere
de la Loy contre les Religieuses des-
bauchées.*

C H A P. IV.



Out ce que nous auons dit iusques icy se
doit entendre tant seulemēt de la maison
les Religieuses de Cozco dediées au So-
leil, à l'imitation de laquelle il y en auoit
plusieurs autres aux principales Prouinces de tout le
Royaume, que l'Ynca y faisoit bastir, par vne grace
speciale, & vn priuilege particulier. Dans ces mai-
sons on y receuoit toute sorte de filles, soit qu'elles
fussent de sang royal, & legitimes, ou mesmes ba-
stardes, & neës d'un sang estranger. L'on y admettoit
encore par vne faueur bien grande les filles des Sei-
gneurs qui auoient quelques Vassaux, & mesme
celles des moindres Bourgeois, pourueu qu'elles
fussent belles. Car sous cette condition elles estoient
destinées pour filles, ou pour Maistresses de l'Ynca,
mais non pas du Soleil. Ce qu'elles tenoient à singu-
liere faueur, & s'estimoient bien heureuses d'estre
filles d'un si bel Astre. Aussi auoit on accoustumé de
les garder avec le mesme soing que celles qui luy
estoient dediées. Car elles auoient, comme les au-
tres, des Damoiselles qui les seruoient, & leur en-

tretenement aux despens du Roy, pource qu'elles estoient ses femmes. Auecque cela, elles s'occupoient pour l'ordinaire, comme les Vierges du Soleil, à filer, à tistre, & à faire quantité de robbes pour la personne de l'Ynca, se donnant le mesme employ que les autres, dont nous auons parlé cy-deuant. De tous ces ouurages de leur main, l'Ynca en faisoit part à ceux de son sang, comme pareillement aux Curacas, aux Capitaines les plus signalez, & à toutes les autres personnes qu'il vouloit obliger, & fauoriser, sans que le droit & la bienseance l'empeschassent de faire des presens à qui bon luy sembloit, à cause que ces vestemens estoient de la façon de ses femmes, & non pas de celles du Soleil, & faites pour luy mesme, non pour son Pere.

Ces femmes auoient de mesme leurs *Mamacunas*, ou leurs Gouuernantes, comme celles de Cozco, & pour le dire en vn mot, il n'y auoit que cette seule difference, entre les vnes & les autres, que celles de Cozco deuoient estre legitimes, de sang Royal, & viure tousiours enfermées, qui estoient des conditions necessaires pour estre femmes du Soleil, au lieu qu'aux autres maisons du Royaume, pouuoient entrer des filles de toutes conditions, pourueu qu'elles fussent belles & Vierges, à cause qu'on les voüoit à l'Ynca, à qui on les liuroit à sa premiere demande, tellement que s'il les trouuoit belles, & à son gré, il les retenoit pour ses Maistresses.

Ceux qui entreprenoient sur l'honneur des femmes de l'Ynca estoient punis avec la mesme rigueur

que les adulteres des Vierges esleuës, dediées au service du Soleil. La Loy le vouloit ainsi, pource que l'offence estoit vne mesme chose; bien que toutes-fois l'execution ne s'en ensuiuit iamais, pour ne s'estre trouué personne qui fust coupable d'un si grand crime. Pour confirmation de ce que nous disons touchant la Loy rigoureuse faite contre les adulteres, commis ou par les femmes du Soleil, ou par celles de l'ynca; Augustin de Carate, intendant des finances du roy, parlant des causes de la mort violente d'Atahualpa au septiesme chapitre de son second liure, dit ces mesmes paroles, que ie rapporteray icy, pource qu'elles sont du suiet de mon Histoire. L'on tira des coniectures de cette affaire de la bouche mesme de Filipillo, qui n'en parla toutes-fois que selon le dessein qu'il auoit dans l'ame; Quoy qu'il en soit, l'on ne sceut iamais s'esclaircir de la verité du fait, si ce n'est que les apparences firent croire qu'il falloit necessairement que ce fust l'un des deux, à sçauoir ou que cét Indien ayât de l'amour pour vne des femmes d'Atabalipa, qui en auoit desia ouy parler, le voulut faire mourir, afin de iouyr avec plus de secreté de la chose aymée. De quoy ce Prince fit sa plainte au Gouverneur, disant que ny sa prison ny toutes ses infortunes du passé, ny les derniers supplices de la mort ne luy seroient iamais si sensibles que l'affront qu'il auoit receu de cét Indien, tenu de tous pour un homme de neant. Ce qui luy desplaisoit d'autant plus, que ce courage lasche sçauoit assez, que par la Loy generale du pays, celui qui se trouuoit conuaincu d'adultere, ou mesme qui auoit eu dessein de le commettre, estoit bruslé tout en vie; avec que la femme par luy desbauchée: ce qui sembloit estre peu de chose à comparaison du reste. Car l'on en exterminoit la race, &

toutes les dependences, iusques à faire mourir les pere & mere, les enfans, les freres, & les plus proches parens, ensemble tous les troupeaux de l'adultere, ioint que le pays, duquel il estoit natif en esproouoit la punition, pource qu'on le desoloit, & que d'une terre habitée l'on en faisoit vn desert, où l'on semoit quantité de sel; & qu'avec cela tous les arbres du lieu estoient desracinez, & toutes les maisons de la ville desmolies, sans y comprendre plusieurs autres chastiments fort grands, qui se faisoient pour expier vn crime si detestable, &c. Voila ce qu'en dit Augustin de Carate, qui par ces paroles tesmoigne assez d'auoir eu vne entiere relation de la rigueur de cette Loy; En ayant escrit ce que ie dis, i'ay esté extrêmement ayse de me seruir de son autorité pour fortifier mon dire. Car bien que tous les autres Historiens en parlent, si est-ce qu'ils n'en disent autre chose, sinon qu'on faisoit mourir les coupables, sans specifier qu'on executoit à mort ceux qui luy estoient parens, & mesme qu'on exterminoit tous les habitans de sa ville, iusques à tuer le bestail, desraciner les arbres, desoler les terres, & les semer de pierre ou de sel. La Loy le vouloit ainsi, pour monstrier l'enormité de l'offense, comme fit le pauvre Yncac Atahualpa, disant que cét affront luy desplaisoit plus que sa prison, ny que les autres aduersitez quand mesme il luy eust fallu perdre la vie.

Celles qu'on auoit vne fois choisies pour estre Maistresses du Roy, comme corrompuës qu'elles estoient, ne pouuoient s'en retourner chez elles, & seruoient dans le Palais en qualité de Dames, ou de femmes de chambre de la Roynne. Ce qu'elles fai-

soient, iusques à ce qu'on leur permit de s'en retourner en leur pays, où elles estoient comblées de biens, & seruies avec vn religieux respect, pource que ceux de leur Nation renoient à tres-grand honneur d'auoir vne femme de l'Ynca. Quant à ces autres que le Roy ne daignoit prendre pour ses Maistresses, elles gardoient la maison, iusques à ce qu'elles commençoient de venir sur l'âge, & alors il leur estoit permis de s'en retourner en leur pays, où elles estoient seruies, comme nous auons dit, ou bien elles demouroient dans leurs maisons tout le reste de leur vie.

*Du seruice, & des ornemens des Vierges choisies,
qui n'estoient données pour femmes
à personne.*

C H A P. V.



Pres que le Roy estoit mort, ses Maistresses estoient honorées par son successeur du nom de *Mamacuna*, pource qu'elles estoient destinées pour estre les Gouuernantes des Maistresses de l'Ynca nouveau, qu'elles instruisoient comme les belles meres ont accoustumé d'instruire leurs brus. Châcune de ses maisons auoit son Gouverneur particulier, qui deuoit estre Ynca, comme aussi son Maistre d'Hostel, son Intendant, & tous les autres Officiers, necessaires pour le seruice des femmes du

roy, qu'on appelloit de ce nom, combien qu'elles fussent ses Maistresses, afin d'en parler plus honnestement. En toutes les maisons des filles choisies pour le plaisir de l'Ynca, la vaisselle, & les autres vtencilles estoient tous d'or & d'argent, comme ceux qui se voyoient en la maison des femmes du Soleil, en son fameux Temple, & dans les maisons royales ainsi que nous monstrerons cy apres. Car pour le dire en vn mot il est tres-certain que toutes les richesses d'or, d'argent, & de pierrerie, que l'on tiroit de ce grand Empire, n'estoient employées qu'à l'ornement, & au seruice des Temples du Soleil, dont il y en auoit plusieurs, & des maisons des Vierges choisies, qui par consequent estoient aussi en grand nombre; comme pareillement à la somptuosité, & à la magnificéce des Palais du Roy. Quant aux Seigneurs particuliers, de qui plusieurs Vassaux releuoient, ils n'auoient pour toute vaisselle d'or ou d'argent, que les vases ordinaires dont ils se seruoient à boire, encore falloit il qu'ils ne passassent pas le nombre limité par l'Ynca, conformément au priuilege qu'ils en auoient; Pour tout le reste on l'employoit aux habits, & aux ornemens necessaires à celebrer leur principales & plus solempnelles festes.

De dire maintenant, que des maisons de ces filles par eux choisies, ils en tiroient quelques-vnes pour les marier aux Curacas, ou aux plus renommez Capitaines, & aux autres Officiers de la Couronne, qui pour auoir bien seruy l'Ynca les receuoient de sa propre main, pour recompense de leurs belles actions;

c'est asseurement vne pure extrauagance, née de la fausse relation que celuy qui l'a escrit ainsi en peut auoir eüe. Car il est certain qu'apres que ces filles estoient vne fois admises pour femmes de l'Ynca, il n'estoit aucunement permis de les raualler de leur condition, ny de les donner à vn particulier, de peur qu'on ne dit à l'aduenir, vne telle fut femme de l'Ynca; Comme en effet à le considerer à leur mode, c'eust esté profaner les choses sacrées; car ils appelloient de ce nom tout ce qui estoit dedié pour le seruice de l'Ynca, & particulièrement ses femmes, pour l'estroite vnion qu'elles auoient avec luy, tellement qu'ils n'auoient garde de souffrir que de femmes de l'Ynca elles le deuissent d'un particulier: Aussi est-il vray-semblable, que si en matiere des choses les moins importantes, ils ne permettoient iamais que l'on fit tort à personne, ils le souffriroient encore moins en celle-cy, qui estoit d'une si haute importance, qu'elles eussent mieux aimé sans doute estre esclaués de l'Ynca, que femmes des Curacas, ou des grands Seigneurs du pays. Car bien que le nom d'esclau ne fust point connu parmy les Peruuïens, si est-ce qu'en cas que les Maistresses de l'Ynca l'eussent esté de leur Prince, ils n'auroient pas laissé de les reuerer comme vne chose sacrée, au lieu que les femmes des Seigneurs n'estoiēt non plus estimées que les communes, à comparaisō de celles du Roy. Aussi comme ces considerations estoient fortes, les Indiens se rendoient grandement soigneux de n'y point faillir, & les obseruoient d'autant plus reli-

Des femmes dont l'Ynca souloit gratifier les Curacas, & les autres grands Seigneurs.

CHAP. VI.



Vire ce que ie viens de dire, il est veritable que les Yncas donnoient eux mesmes des fêmes à ceux qui par leurs seruices auoient bien mérité de luy, tels qu'estoient les Curacas, les Capitaines, & leurs semblables. Ces femmes estoient filles d'autres grands Seigneurs, que l'Ynca choissoit, pour les donner de sa main à ceux qui l'auoient bien seruy dans les occasions; où il faut remarquer que le Pere de qui l'on demandoit la fille ne s'en estimoit pas moins honoré, que celuy à qui on la donoit en mariage, pourueu que l'Ynca demeurast d'accord d'en gratifier vn sien seruiteur. Car en matiere de cela, & de toute autre chose, l'on ne prisoit pas tant le don, quelque grand qu'il fust, pour sa propre valeur, que pour auoir esté fait de la main de l'Ynca, ce qu'ils tenoient pour vne chose diuine.

L'Ynca marioit encore, combien que fort rarement, les bastardes de sang royal aux Curacas Seigneurs des grandes Prouinces, tant pour recompense de

se de leurs bons seruices, que pour les obliger à luy estre fides; d'où l'on peut conclure qu'ayant tât de femmes à donner, il n'estoit nullement besoing qu'il les tirast du nombre de celles qu'on luy auoit dediées dans les maisons dont nous venons de parler. Car s'il eüst fait telle chose, elle eüst tourné sans doute à son propre mespris, comme aussi au deshonneur de sa Religion, & de la femme qu'il eüst donnée, qui estoiet des maximes qu'ils tenoiét pour inuiolables. Aussi est-il vray, comme nous auons dit, que les legitimes pouuant estre femmes du Soleil, ou de l'Ynca, (de qui les Maistresses estoient pour l'ordinaire de sang royal) ou elles mesme espouser vn autre ynca legitime, en cas que le precedent fust mort; qu'en ces trois degrez de choses, ils ne sortoiēt iamais hors des bornes de ce qu'ils tenoient pour diuin, & ne souffroient pas qu'un homme mortel espousast vne femme de leur race, qu'ils croyoient estre diuine; Et voila pourquoy, puis que les bastardes degeneroient de leur fausse diuinité, ce n'estoit point leur faire tort que de les donner pour femmes aux grands Seigneurs du pays.

Hhh

*De quelques autres femmes qui ne se marioient
iamais, & particulièrement des Veuves.*

CHAP. VII.



Pres auoir parlé assez amplement de celles qui entroient dans des Monasteres pour y faire profession d'une virginité perpetuelle, ie diray en suite qu'il y en auoit aussi plusieurs autres de sang royal, à qui leurs maisons seruoient d'un cloistre, où elles viuoient fort retirées, & taschoient de s'acquiter du vœu qu'elles auoient fait d'estre tousiours Vierges. Que si de hazard elles sortoient quelquesfois, ce n'estoit que pour aller visiter leurs plus proches parentes, quand elles estoient indisposées, ou en mal d'enfant, ou bien lors qu'il estoit question de couper les cheveux à leurs aînez, ou de leur donner un nom. La chasteté de ces femmes, & leur honneste façon de viure les faisoient tenir en si grande veneration, que par excellence on les appelloit *Oello*; qui estoit un nom consacré dans leur detestable Idolatrie. Il ne falloit pas au reste que leur chasteté fust feinte, mais tres-veritable. Car si contre le vœu de leur vaine Religion ils descouuroient qu'il y eust de la fourberie, celles qui auoient failly estoient bruslées toutes en vie, ou iettées dans la fosse aux Lions. Ie me souuiens d'auoir connu en son extreme vieillesse, vne de ces femmes qu'on

nommoit *Oello*, qui ne s'estoit iamais mariée. Elle visitoit quelquesfois ma Mere, de qui elle estoit tante, à ce qu'on me disoit. Comme elle auoit tousiours chastement vescu, ils l'auoient tous en si grande veneration, qu'ils luy donnoiēt le haut-bout, en quelque lieu que ce fût, & particulièrement ma Mere, qui luy cedoit en tout, tant à cause de la parenté, que de l'âge qu'elle auoit tousiours passé honorablement.

Il ne faut pas oublier icy l'honneste façon de viure des veufues, qui ne sortoient point durant la premiere année de leur veufuage. Que si elles n'auoient point d'enfans, on les voyoit rarement se remarier, ou si elles en auoient, elles passoient leur vie dans vne continence perpetuelle, & ne s'engageoiēt plus au mariage. Cette vertu les mettoit si fort dans l'estime de tout le monde, qu'il y auoit des Loix & des ordonnances expresses, qui vouloient que les terres des veufues fussent plustost labourées, que celles des Curacas, ny de l'Ynca mesme, sans y comprendre plusieurs autres grands priuileges qu'elles auoient. L'adiouste à cecy, que les Indiens espousoient bien rarement des veufues, s'ils ne l'estoient eux mesmes, pource qu'ils croyoient degenerer de leur condition, si ayans vescu en garçons, ils prenoient vne femme qui eust esté desia mariée; Et voilà, ce me semble, les plus remarquables choses que l'on scauroit de dire l'honnesteté des filles, des femmes, & des veufues Indiennes.

*Des leurs Mariages ; ensemble de leur Mes-
nage.*

C H A P. VIII.



Ous auons, ce me semble, assez am-
plement traité de la maison du Soleil,
& des Religieuses qui luy estoient con-
sacrées. Disons maintenant de quelle
sorte on auoit accoustumé de se ma-
rier en tous les Royaumes, & en toutes les Prouin-
ces suiettes à l'Ynca. Il faut sçauoir pour cét effet
qu'à chaque année, ou bien de deux en deux
ans, le Roy faisoit assembler à certain temps tout
ce qu'il y auoit de filles & de garçons de sa race, qui
estoient à marier dedans la ville de Cozco. Les filles
ne deuoient estre âgées que de dix-huict à vingt
ans, ny les garçons que de vingt-quatre en bas. Car
ils ne leur permettoient point de se marier plustost,
pource disoient-ils qu'afin de bien gouverner leur
maison, il falloit qu'ils eussent l'âge & le iugement
requis, & que c'estoit vne pure extrauagance de les
engager plus ieunes.

Quand il estoit question de les marier, l'Ynca se
mettoit au milieu d'eux, qui se tenoient proches les
vns des autres, & les appelloit par leur nom, puis les
prenant par la main, il leur faisoit donner la foy mu-
tuelle, & les remettoit entre les mains des parens;

Alors les nouveaux mariez s'en alloient en la maison du pere de l'espoux , & la nopce se faisoit trois ou quatre iours durant , ou dauantage, si bon leur sembloit , parmy les parens qui leur estoient les plus proches. Ces filles ainsi mariées s'appelloient par apres les femmes legitimes, ou bien *les femmes liurées* de la main de l'Ynca ; nom qu'ils leur donnoient, afin de leur faire plus d'honneur. Apres que l'Ynca auoit ioint ensemble de ce lien les personnes de sa race, le lendemain des Ministres deputez pour cét effet marioient avec le mesme ordre les autres ieunes hommes, fils des habitans de la ville, obseruant la diuision des quartiers qu'on appelloit *Cozco la haute*, & *Cozco la basse*, dont nous auons parlé assez au long au commencement de cette Histoire.

Les maisons destinées pour la demeure des Yncas nouvellement mariez, estoient faites par les Indiens des Prouinces, ausquels par le deuoir de leur charge il appartenoit d'y pouruoir, conformément à la distribution qui estoit faite de chaque chose. Quant aux meubles ou aux vtenfilles de la maison, les parens ayant accoustumé d'y donner ordre, chacun apportoit sa piece de mesnage. Ce qu'ils faisoient entre eux fort ponctuellement, sans vser en leur mariages ny de sacrifices, ny d'autres ceremonies. Que si quelques Historiens Espagnols ont dit qu'ils y obseruoient d'autres particularitez, c'est qu'ils n'ont pas sceu distinguer les Prouinces où telles choses se faisoient, separement les vns des autres ; tellement qu'on peut bien dire qu'à faute d'auoir esté in-

432 LE COMMENTAIRE ROYAL,
instruits en ces matieres, ils ont attribué en commun aux Yncas les coustumes inciuiles & barbares qu'auoient desia plusieurs Prouinces auant qu'ils en fussent Maistres, sans considerer que tant s'en faut qu'elles fussent particulieres aux Yncas, qu'au contraire à leur aduenement à la Couronne, ils les oste-
rent aux Indiens, & leur deffendirent d'en vser, s'ils ne vouloient encourir de grandes peines qu'ils leur imposèrent.

Voila quelle methode obseruoient les Yncas en ces mariages; suiuant laquelle châque Gouverneur & châque Curaca estoit obligé par le deuoir de sa charge, de pouruoir les garçons & les filles, qui estoient à marier dans sa Prouince. Car il falloit que les Curacas assistassent en personne à tels mariages, ou qu'ils les fissent eux mesmes, comme Seigneurs & Peres de la Patrie. En quoy certes il faut remarquer que les Yncas ne tyrannisoient iamais aucun Curaca en matiere des priuileges de sa Iurisdiction; Et que si eux mesmes se trouuoient aux mariages que le Curaca faisoit ce n'estoit pas avec dessein d'y adiouster ou d'en retrancher aucune chose, mais bien pour les approuuer seulement au nom du Roy.

S'il y auoit entre les Bourgeois quelque nouveau marié, c'estoit aux communautez de châque ville à luy faire sa maison, & aux plus proches parens à luy fournir des meubles pour son mesnage; Ceux d'une Prouince, ou d'une ville, ne pouuoient se marier en l'autre, mais il falloit qu'ils s'alliassent tous dans leurs villes, & parmy des personnes de leur parenté,

comme les anciennes tributs d'Israël. Ce qu'ils faisoient tout exprés, afin que par le meslange des vns avec les autres, ils ne confondissent les Nations ny les lignées. Ils en exceptoient les sœurs neantmoins; & tous les habitans d'une ville, ou mesme d'une Prouince, se disoient parens, pourueu qu'ils fussent d'une mesme nation, & qu'ils parlassent une mesme langue. I'adiouste à cecy, qu'il leur estoit deffendu d'aller viure d'une Prouince, d'une ville, ou d'un quartier à l'autre, pource qu'ils ne pouuoient confondre les Decuries, qui estoient faites par les Bourgeois; Ioint que c'estoient les Communautéz qui donnoient ordre aux maisons; Ce qu'ils ne deuoient faire plus d'une fois, encore falloit-il que ce fust dans leur quartier, & du consentement de leurs parens.

Des raisons pour lesquelles ils marioient à sa propre sœur le Prince heritier de la Couronne.

C H A P. IX.



Yant monstrecy-deuant quels estoiet en general les mariages des Indiens, il est à propos que nous parlions en particulier de celuy du Prince, heritier de ce grand Empire. Il faut donc sçauoir, que depuis le premier ynca tous ses Successeurs

firent passer en coustume, & tindrent pour inuiolable la Loy qui vouloit que l'heritier du Royaume se mariaſt avecque ſa ſœur ainſée, conceüe d'un legitime mariage, & c'estoit cette femme qu'ils appelloient entr'eux la *Coya*, c'est à dire la Royne, ou l'Imperatrice.

L'ainſné des freres estoit l'heritier legitime de la Couronne, & se marioit à l'exemple du premier Ynca Manco Capac, & de ſa femme Mama Oello Huaco, qui pour mieux authoriser cette Loy s'aduiferent de dire à ce peuple, qu'ils estoient enfans du Soleil, & de la Lune; Comme en effet ceux d'entre les Indiens qui estoient leurs Vassaux, ou mesme qui ne l'estoient pas, le creurent ainſi. Pour mieux confirmer cette extrauagance, ils mirent en auant vne autre chose aussi impertinente que la premiere, qui fut de soustenir, comme nous auons monſtré ailleurs, que la Lune estoit ſœur & femme du Soleil, & que les Yncas tiroient leur naiſſance de tous les deux. Pour cette raison, afin de ne rien faire qu'à l'imitation du Soleil, les premiers Yncas ſes fils, ordonnerent par vne Loy qu'ils firent exprés, que l'ainſné de l'Ynca ſuiuant l'un & l'autre exemple se mariroit avec ſa propre ſœur de pere & de mere; Ordinairement aussi à faute de ſœur legitime, ils marioiēt le Prince heritier avec la parente la plus proche de la tyge royale, ſoit qu'elle fuſt ſa couſine, ſa ſœur, ſa niepce, ou ſa tante, & qu'à faute d'homme, elle peuſt heriter du Royaume, comme c'est la couſtume d'Eſpagne.

Si le Prince n'auoit aucuns enfans de la premiere sœur, il espousoit la seconde, ou bien la troisieme, iusques à ce qu'il en auoit. Ce qui estoit vne Loy, & vne coustume qu'ils fondoient sur les exemples raportez cy-dessus. Ils alleguoient pour raison, que puisque le Soleil auoit espousé sa sœur, & fait le mariage de ses deux premiers enfans, la raison vouloit que l'on gardast ce mesme ordre en la personne des aînez du Roy. Ils le faisoient encore pour conseruer pur & net le sang du Soleil, dont ils disoient qu'il ne falloit point faire vn meslange avecque le sang humain, car ils appelloient ainsi tout autre sang que celuy des Yncas. En suite de cette raison ils en alleguoient vne autre, à sçauoir qu'ils marioient les Princes avec leurs sœurs, afin que le Royaume échut à l'heritier, tant du costé du pere que de la mere; à faute dequoy, ils tenoient que le Prince degeneroit de par la mere du pretendu heritage, & voila dans quel poinct de rigueur ils mettoient le droit de la succession, en matiere de Royauté.


Pour confirmer toutes ces maximes, ils disoient encore, qu'il ne falloit pas souffrir qu'aucune femme fust honorée du tiltre de Roïne, s'il ne luy appartenoit par droit legitime, plustost que par alliance avecque le Roy, n'y ayant pas d'apparence, que puis qu'elle n'estoit point de soy-mesme capable de tenir le Sceptre; les autres de meilleure naissance qu'elle, la seruissent, & l'adorassent.

Outre leur femme legitime, ces Roys auoient plusieurs Maistresses pour l'ordinaire, dont les vnes

436 LE COMMENTAIRE ROYAL,
estoyent estrangeres, & les autres leurs parentes dans
le quatriesme degré, & mesme dehors. Ils tenoient
pour legitimes les enfans qu'ils auoient de leurs pa-
rentes, pource qu'ils n'estoyent point dans le meslan-
ge d'un sang estrangier, les Yncas & les Roys de cette
Nation estimants sur toutes choses cette pureté de
sang ; que tous les autres de la tige royale prisoient
aussi grandement. Les enfans que les Yncas auoient
eus des estrangeres, ne passoient que pour bastards.
Car bien qu'ils les respectassent pour estre de nais-
sance Royale, ils ne le faisoient pas neantmoins avec
la mesme veneration qu'ils deferoient à ceux du sang
royal, tellement qu'ils adoroient ceux-cy comme
des Dieux, & les autres comme des hommes. D'où
il faut conclure que le Roy ynca auoit trois sortes
d'enfans, à sçauoir ceux de sa femme, destinez, com-
me legitimes, à la succession du Royaume, ceux de
ses parentes, qui estoient de sang legitime, & les
bastards naiz des estrangeres.

*Des differentes manieres d'heritier du Royau-
me.*

C H A P. X.

 L y auoit vne Loy entre eux qui vouloit
qu'à faute d'auoir des enfans de la femme
legitime, l'ainné de ceux qui estoit legiti-
mement sorty du sang des Yncas, peust heriter du

Royaume ; comme fit Manca ynca Hualcar , ainsi qu'il sera dit en son lieu à quoy les autres pouvoient paruenir encore successiuent , pourueu qu'ils ne fussent point bastards ; Et en cas qu'il n'y en eust point de sang legitime , la succession apparenait au plus proche parent legitiment conceu.

Ce fut à cause de cette Loy qu'Atahualpa fit mettre à mort ceux du sang Royal de tous les deux sexes , pour l'apprehension qu'il auoit qu'estant bastard on ne luy ostant le Royaume par luy vsuré , & qu'on ne le donnast à quelqu'un des legitimes. Or afin qu'il y eust plusieurs enfans de sang legitime , tous ceux de naissance royale dans le quatriesme degré , se marioient avec leurs parentes , la seule sœur reseruée , pource qu'autre que le Roy ne la pouuoit espouser. L'aîné heritoit tousiours du Royaume , si bien que cette succession ne manqua iamais dans tous les regnes des douze Princes qui tindrent le sceptre , iusques à ce qu'il vint entre les mains des Espagnols. Quant aux Curacas , qui commandoient à vn nombre de Vassaux , il y auoit diuers moyens d'heriter de leurs Estats. Car en certaines Prouinces , l'heritage n'appartenait qu'aux aînez , tellement qu'ils y succedoiēt ainsi de pere en fils. En d'autres les Sujets acceptoient pour leur Seigneur celuy de tous les enfans qu'ils aymoient le plus , à cause de sa vertu , & de son humeur affable ; ce qui deuoit , à mon aduis , s'appeller election plustost qu'heritage ; En quoy certes il me semble qu'ils se seruoient de cette Loy comme d'un frein , pour mettre à la raison les

438 LE COMMENTAIRE ROYAL,
fils du Curaca, & les empescher de faire des actions tyranniques, l'intention des Vassaux estant que chacun de ses enfans se rendist digne de l'heritage de son pere par les belles qualités de son ame, & qu'ainsi le recognoissant pour vertueux, ils fussent tous obligez de le demander pour leur Seigneur.

En quelques Prouinces le droit d'aisnesse autorisoit celuy de l'heritage, de telle sorte qu'au pere deffunct succedoit le fils aîné, le second à l'aîné, le troisieme au second, & ainsi des autres. Que si tous les freres venoient à mourir, en tel cas la succession retournoit au fils de l'aîné, du second, ou du troisieme, & de cette façon ils ne manquoient iamais d'heritier ny de successeur. Cette maniere de succession particuliere aux Curacas, a esté cause qu'un certain Historien Espagnol, pour ne l'auoir bien entendue, s'est grandement abusé, quand il a dit, que par la coustume vniuersellement receüe au Peru, non seulement à l'esgard des Caciques, mais du Roy mesme, les freres du Prince heritoient de la Couronne, & en suite leurs enfans, selon leur rang & leur droit d'ancienneté; Ce qui n'auoit point de lieu en la personne des Yncas, mais en celle des Curacas tant seulement, comme il a esté dit cy dessus.

Pour reuenir maintenant aux trois differentes Loix ou coustumes introduittes en diuerses Prouinces, pour heriter du bien des Seigneurs, qui commandoient à des Vassaux, ce ne furent nullement les Yncas qui les establirent, attendu que leurs Loix & leurs ordonnances estoient communes, & genera-

les par tout le Royaume. Aussi est-il vray que les Curacas obseruoient desia ces Loix deuant l'Empire des Yncas. Les ayant conquis depuis , comme ils ne leur osterent point leurs Estats, ils n'abolirent non plus leurs anciennes coustumes , & les laisserent viure à leur mode, pourueu qu'ils ne fissent rien qui fust contraire à ce qu'ils leur commandoient. Je diray bien dauantage , c'est qu'ils confirmerent plusieurs de leurs institutions , qui leur semblerent fort bonnes , & particulièrement celle qui vouloit que l'heritage appartint à celuy des enfãs , qui estoit le plus vertueux , & le mieux aymé ; Coustume qui leur semblant fort louïable fut approuuée de tous, iusques-là mesme , qu'ils ordonnerent qu'on eust à l'obseruer inuiolablement aux lieux où l'on en souloit d'en vser. Ce qui fut cause qu'un de leurs Roys se voulut seruir de cette Loy des Curacas contre le mauuais naturel , & la desobeissance du Prince son fils aîné , comme il sera dit en son lieu. Je rapporteray à ce propos ce qui aduint à Sutcunca, ville que j'ay veüe, qui est en la Prouince des Quechuas, à quarante lieuës de Cozco, deuers le Ponent. Le Curaca de cette ville nommé Dom Garcia se voyant proche de sa fin , fit appeller quatre garçons qu'il auoit, & avec eux tous les Gentilshommes , ausquels il dit par forme de testament & de derniere volonté, qu'ils se souuinssent sur toutes choses d'obseruer de poinct en poinct la sainte & sacrée Loy de Iesus-Christ, qu'ils auoient nouuellement receüe ; de rendre de continuelles graces à Dieu qui la leur auoit

440 LE COMMENTAIRE ROYAL,
enuoyée; de seruir & respecter les Espagnols, qui les
instruisoient, & d'aymer leur Maistre avec ten-
dresse, puis que leur bonne fortune vouloit qu'ils
l'eussent pour Seigneur. A ces dernieres paroles il
adiousta les suiuanes. Vous sçavez, leur dit-il, que
c'est la coustume du pays de prendre pour heritier
celuy des enfans du Curaca, qui est le plus vertueux,
& le mieux aymé de tous les Suiets. Cela estant, ie
veux que mon successeur ayt toutes ces qualitez, &
que si vous recognoissez qu'il n'en soit pourueu apres
que vous en aurez fait election, vous ayez à le des-
heriter, pour en mettre vn autre à sa place, selon qu'il
vous semblera plus propre à vostre conseruation, & à
vostre cōmun-bien, que ie prefere aux interelts par-
ticuliers de mes enfans; & voila ce que dit ce Cura-
ca, au rapport qu'en fit depuis le Prestre, qui l'assista
en cette derniere fin, & qui ouyt les instructions par
luy faites à ses enfans.

Des ceremonies qu'ils obseruoient à sevrer les enfans, à leur couper les cheveux, & à leur donner un nom.

CHAP. XI.



Es Yncas souloient faire de grandes festes, & se resiouyr d'une façon extraordinaire, quand ils sevroient leurs enfans aïsnez; mais en matiere des filles ou des cadets, il s'en falloit de beaucoup que la solemnité n'en fust si grande que des premiers, pource que le droit d'aïnesse, principalement des masles, estoit en grande estime parmy les Yncas, à l'imitation desquels tous leurs suijs le prisoient aussi grandement.

Ils sevroient les enfans à deux ans, & leur coupoient les premiers cheveux, avec lesquels ils estoient venus au monde; Car auparauant ce temps-là ils n'y touchoient pas, & ne leur donnoient point le nom propre qu'ils deuoient auoir. Quand il estoit question de faire cette ceremonie, tous les parens s'assembloient exprés, & celuy qu'on auoit esleu pour Parrain, donnoit le premier coup de ciseau à son filleul, & toutes fois on peut appeller ciseaux certains rasoirs faits de pierre à feu, dont ils vsoient pour cet effet, les Indiens n'ayant pas encore l'inuention des

442 LE COMMENTAIRE ROYAL,
ciseaux, dont nous auons accoustumé de nous seruir.
Après le parrain, tous les autres suiuiuent à leur tour,
& chacun selon son âge, ou sa qualité, couppoit le
poil à l'enfant; qu'ils n'auoient pas plustost râlé à leur
mode, que tous d'un commun accord luy imposoiēt
un nom, & luy offroient les presens qu'ils auoient à
luy faire, à sçauoir les vns des habillemens, les au-
tres du bestail, les autres des armes de diuerses sortes,
& quelques-vns des vases d'or & d'argent, propres à
boire, lesquels toutesfois on ne presentoit qu'à ceux
d'extraction royale. Car les petites gens n'en pou-
uoient vser que par un particulier priuilege.

Après auoir fait ces presens, ils se mettoient à
boire d'autant; autrement la feste n'eust pas esté
bonne, & à danser aux chansons iusques à la nuit.
Ce qui duroit trois ou quatre iours, tant du plus, que
du moins, selon que l'enfant estoit bien apparenté.
Ils obseruoient presque le mesme quād ils sevroient
le Prince heritier, & luy coupoient les cheveux; si ce
n'est que la solemnité en estoit royale, & qu'ils pre-
noient pour parrain le souuerain Prestre du Soleil.
Alors les Curacas de tout le royaume, ou en pro-
pre personne, ou par leurs Ambassadeurs, accou-
roient tous à cette feste, qui ne duroit pas moins de
vingt iours, & faisoient au Prince de grands presens,
d'or, d'argent, de pierrrie, & de tout ce qu'ils
auoient de meilleur en leurs Prouinces.

Or comme l'ordinaire des Sujets est de se ranger à
l'imitation du Chef; les Curacas, & generalement
tous ceux du Peru en faisoient de mesme, chacun
selon

selon son rang, & sa qualité, ce qui estoit vne de leurs festes les plus solempnelles. En suite de tout cecy, il sera bon que ceux qui sont curieux des langues, soient aduertis que la generale du Peru a deux noms pour dire fils, dont l'un est *Churi*, & l'autre *Huakua*, l'un exprimé par le pere, & l'autre par la mere tant seulement. Où il est à remarquer que ce nom se doit escrire sans les H. H. chacune des quatre voyelles estant prononcée à part-foy aux deux diphtongues *vaua*, à quoy ie me suis aduisé d'adiouster H. H. afin que deux syllabes n'en soient formées. L'un & l'autre de ces noms sont le mesme que fils, comprenant en eux tous les deux sexes, & les deux nombres, avecque tant de rigueur, que les pere & mere ne les peuuent changer, à moins que de prendre le masle pour la femelle, & la femelle pour le masle. Quand ils veulent distinguer les sexes, ils y adioustent les noms qui signifient le masle ou la femelle, & lors qu'ils veulent dire fils, ou au pluriel ou au singulier, le pere vse du mot *Churi*, & la mere de celuy de *vaua*. Les freres ont quatre noms differents, pour s'appeller l'un l'autre. Quand l'homme dit à l'homme *Huanque*, cela signifie frere, & quand la femme dit à la femme *Nanna*, cela signifie sœur. Que si le frere disoit à la sœur *Nanna*, il changeroit le sexe du masle; comme au contraire si la sœur disoit au frere *Huanque*, elle chageroit celuy de la femelle: le frere appelle donc la sœur *Pana*, qui signifie sœur, & la sœur nomme le frere *Tora*, qui signifie frere; tellement que ny vn frere ne peut dire ce mot à l'autre, bien qu'il

soit le mesme que frere; pource que ce seroit se faire femme, ny vne sœur non plus ne peut appeller *Pana* vne autre sœur; bien que ce mot la denote, d'autant que ce seroit se faire homme. D'où il faut inferer necessairement qu'ils ont des noms d'une mesme signification, & d'un mesme genre, les vns propres aux hommes, & les autres aux femmes, sans qu'ils les puissent changer, sur peine de prendre un sexe pour l'autre: Et voila ce que j'ay bien voulu remarquer icy, d'autant que c'est une chose qui ne me semble pas moins cōsiderable, que necessaire à ceux qui veulent instruire les Indiens en nostre sainte Religion, sans se rendre ridicules par les barbarismes qu'ils pourroient faire autrement; A cause de quoy les Religieux qui sont par delà, & particulièrement ceux de la Compagnie de Iesus, s'estudient fort à cette langue, afin de pouvoir avec plus de facilité apprendre la doctrine Chrestienne à ces Gentils, comme nous auons dit au commencement de cēt ouurage.

De l'austerité avec laquelle ils esleuoient leurs enfans.

C H A P. XII.

Les esleuoient leurs enfans le moins delicatement qu'il leur estoit possible. Ce qui s'obseruoit indifferemment en la personne des Yncas, & de leurs Suiets, ou riches, ou pauvres. Si tost que l'enfant estoit venu au monde, ils le lauoient d'eau froide, & l'enveloppoient ainsi dans ses langes; Ce qu'ils continuoient tous les matins, apres auoir laissé la plus part du temps cette eau au serain. Si la mere vouloit caresser extraordinairement son enfant, elle prenoit de l'eau en sa bouche, & luy en iettoit par tout le corps; horsmis sur le sommet de la teste, où elles ne touchoient iamais. Que si l'on demandoit à ces peuples, quelle chose les obligeoit à cela, ils respondoient qu'ils le faisoient à dessein, pour accoustumer leurs enfans au froid & à la fatigue, & leur renforcer les membres. Ils laissoient passer plus de trois mois, sans leur envelopper les bras; pource disoient-ils, que cela n'eust seruy qu'à les affoiblir; De plus ils les tenoient ordinairement dās leur berceau, qui estoit vne maniere de banc de quatre pieds, dont il y en auoit vn plus court que les autres, afin de les pouuoir bercer plus facilement. Le liēt où ils couchoient l'enfant estoit vne

446 LE COMMENTAIRE ROYAL,
maniere de rets assez grosse , d'otils l'enueloppoient
de tous les deux costez du berceau, pour l'empescher
de tomber.

En quelque temps que ce fust, & mesme quand il
falloit donner à tetter , les meres ne prenoient
point les enfans entre leurs bras , pource , disoient-
elles , qu'ils n'en vouloient iamais bouger , depuis
qu'on les accoustumoit à cela, & qu'on pouuoit diffi-
cilement les faire demeurer dans le berceau. Lors
qu'une mere vouloit donner la mamelle à son en-
fant, elle se couchoit sur luy , & l'alaittoit trois fois
le iour, à sçauoir au matin, à midy, & au soir, hors
lequel temps , elle ne luy donnoit iamais le tetin,
& aymoît mieux le laisser crier, que de luy faire
prendre l'habitude de tetter tout le iour. Toutes les
femmes du pays obseruoient le mesme, & disoient
pour leur raison, que cette coustume les rendoit vi-
lains & suiets à vomir, qu'ils en deuenoient glou-
tons, quand ils estoient grands, & que l'experience
monstroit cela par l'exemple des bestes mesmes, qui
n'alaittoient leurs petits qu'à certaines heures du
iour, & non pas toute la nuit. Quelque grâde Dame
que fust vne mere, elle mesme esleuoit son enfant,
& ne le mettoit point à nourrisse, si quelque indispo-
sition particuliere ne l'y obligeoit, durant lequel
temps elle s'abstenoit de voir son mary, pource, di-
soit-elle, que la compagnie de l'homme corrom-
poit le lait de la mere, & rendoit l'enfant ethique,
ou comme nous disons, le faisoit venir en chartre.
Pour denoter cette indisposition des enfans, ils

uſoient du mot *Ayuſca*, participe du preterit, qui ſignifie proprement *vn enfant changé pour vn autre*; Ce qui paſſoit en prouerbe parmy les ieunes gens, quand ils vouloient dire que leurs Maistreffes ne les fauoriſoient pas tant que leurs Riuaux. Mais il eſtoit deſſendu de dire ce mot à vn homme marié, pource qu'il eſtoit du nombre des cinq, qu'on ne pouuoit proferer impunement. Je diray à ce propos, qu'il me ſouuient d'auoir autrefois connu vne Palla de ſang royal, qui ne pouuant eſleuer vne ſienne fille, fut contrainte de la donner à vne nourriſſe, qui pour s'eſtre laiſſée engroſſir durant cette nourriture, fut cauſe que l'enfant deuiat ethique de telle ſorte, qu'il n'auoit que les os & la peau. Cependât la mere voyât ſa fille *ayuſca*, ou en chartre, ſe fit reuenir le laiët à force de fomentations, & de cataplaſmes, qu'elle ſ'appliqua, l'ayant perdu au bout de huiët mois; & fit ſi bien qu'elle acheua de nourrir ſa fille, & la remiſt en ſanté, ſans qu'elle vouluſt depuis ſe fier à pas vne nourriſſe, ſ'accommodant à cette maxime, que le laiët d'une mere donne la vie à l'enfant.

Quand vne mere auoit du laiët à ſuffiſance, pour nourrir ſon enſat, elle ne luy donoit iamais à mâger qu'apres l'auoir ſevré, diſant que tout autre aliment meſlé au laiët ne faiſoit que le corrópre, & qu'alterer la ſanté du nourriſſon. Que ſi elle iugeoit à peu près qu'il fuſt temps de le tirer du berceau; pour s'exempter de l'auoir touſiours ſur les bras, elle faiſoit vn creux dans la terre, où elle le mettoit debout iuſques au ſein, & l'environnoit de vieux drappeaux

448 LE COMMENTAIRE ROYAL,
pour estre plus mollement, luy donnant diuers
ioüets pour l'amuser, & ainsi elle le laissoit ioüer
sans le prendre iamais entre ses bras, quand c'eust
esté mesme l'enfant du plus grand Seigneur du
Royaume.

Quand l'enfant commençoit à se traïner sur les
pieds, il falloit qu'il prit le tectin à genoux du mieux
qu'il pouuoit, sans que la mere le souffrit iamais en
son giron; Que s'il vouloit l'autre mamelle, elle la
luy monstroït, afin qu'il l'a prit, sans le receuoir en-
tre ses bras. Si tost qu'une femme estoit accouchée,
elle n'vsoit point d'autre delicateſſe, ny enuers soy-
mesme, ny enuers son enfant, sinon qu'elle le la-
uoit d'eau froide, apres s'en estre lauée elle mesme,
puis elle se mettoit à faire son meſnage, comme si
elle ne fut point accouchée. A quoy i'adiouſte qu'il
n'y auoit perſonne qui aydaſt les femmes en cela, &
que si quelqu'une ſe meſſoit de les aſſiſter en l'enfan-
tement, elle paſſoit pluſtoſt pour ſorciere, que pour
ſage femme; Et voila de quelle ſorte les Indiennes
auoient accouſtumé de traiter leurs accouchées,
& de nourrir leurs enfans, ſans qu'il y euſt diſtin-
ction ny des riches aux pauures, ny des nobles aux
roturiers.

De la maniere de viure, & de l'exercice des femmes mariées.

CHAP. XIII.



Depuis qu'une femme estoit une fois mariée, la plus-part du temps elle ne bougeoit de sa maison, où elles'occupoit à filer, & à tistre de la laine & du cotton; à sçauoir de la laine aux contrées froides, & du cotton aux pays chauds. Or ce que chascune filoit & tissoit ainsi, estoit tant pour son usage particulier, que de son mary & de ses enfans. Elles cousoient rarement, pource qu'il n'y auoit pas beaucoup de coustures aux habillemens ny des hommes ny des femmes. Toute leur tissure, ou de cotton, ou de laine, estoit retorse; & toute leur toille, à quatre lizieres, sans qu'ils l'ourdissent iamais que de la largeur qu'ils iugeoient necessaire à peu près, pour faire des mantes ou des chemisettes. Leurs vestemens n'estoient point coupez, mais on les tiroit du mestier tous d'une piece, pource qu'auant qu'en ourdir la toille, on leur donnoit plus ou moins la largeur & la longueur qu'il falloit qu'ils eussent.

Il n'y auoit parmy ces Indiens ny tailleurs, ny cordonniers, ny chaufferiers, pource qu'ils sçauoient fort bien se passer de plusieurs choses, que le luxe plustost que la necessité semble auoir introduites

450 LE COMMENTAIRE ROYAL,
parmy nous. Les femmes se donnoient le soing des
vestemens de leur famille, & les hommes l'auoient
de la fournir de chaussure. Car, comme nous dirons
ailleurs, il falloit qu'ils en sceussent le mestier, quand
on les armoit Cheualliers. Et bien que les Yncas du
sang royal, comme aussi les Curacas, & les plus ri-
ches du pays, eussent des valets qui trauailloient à ce-
la pour eux, si ne laissoient-ils pas de s'y exercer de
temps en temps, & de forger toute sorte d'armes,
que leur profession les obligeoit de sçauoir faire,
pource que la coustume du pays, dont ils se pic-
quoient plus que de chose du monde, les incitoit à
cela.

Les hommes & les femmes trauailloient à l'enuy à
la campagne, où les vns aydoient aux autres à bien
cultiuer la terre. En quelques Prouinces fort esloi-
gnées de Cozco, dont le terroir n'estoit pas encore
bien labourable, les femmes auoient cette coustume
de trauailler aux terres des Yncas, tandis que
leurs maris demeuroient à la maison, où ils s'occup-
poient à filer & à tistre; En quoy toutesfois ie n'en-
tends parler que de l'estenduë de cette Cour, & des
Nations qui l'imitoient, qui estoient presque toutes
suiettes à l'Empire de l'Ynca: Car pour le regard
des autres, ie les trouue si barbares, qu'elles ne val-
lent pas la peine qu'on en parle. Les Indiennes ay-
moient si fort à filer, & se plaisoient si peu à perdre
le temps, que soit que des villages d'alentour de
Cozco, ellès s'en allassent à la ville, ou que d'un
quartier à l'autre elles fissent des visites, elles portoiēt
toufiours.

rousiours dequoy s'occupper & à filer & à tordre,
 dont ils faisoient l'un le long du chemin, comme le
 plus facile, & l'autre en compagnie, dans les mai-
 sons des personnes de leur cognoissance. Il est vray
 neantmoins que cette coustume de s'en aller ainfi
 filant par les chemins n'appartenoit qu'aux petites
 gens; Car quant aux Pallas, qui estoient de sang
 royal, quand elles auoient à visiter quelque person-
 ne de leur cognoissance, elles faisoient porter leurs
 quenouïllées par leurs Damoiselles; si bien que de
 cette façon, & celles qui visitoient, & qui estoient
 visitées, trouuailloient de compagnie, & s'empes-
 choient d'estre oyssiues. Leurs fuseaux sont faits d'une
 maniere de canne ou de roseau, comme en Espa-
 gne ils sont de fer, avec leur pefon, sans estre vuidez
 par la pointe. Elles attachent avec un lasset leur filas-
 se, ou leur quenouïllée, qu'elles font la plus large
 qu'il leur est possible, & la tirent avec les deux pre-
 miers doigts de la main gauche, pour l'aiuster au fu-
 seau. C'est de cette mesme main, qu'elles soustien-
 nent la quenouïlle, qui n'a de longueur qu'un quart
 d'aulne, & se seruent des deux mains pour tirer plus
 subtilement la laine ou le cotton, sans en porter les
 doigts à la bouche: Aussi n'en est-il pas besoing, pour-
 ce qu'elles ne manient point de lin; du moins de
 mon temps elles n'en filoient aucun. Et d'aurant que
 c'est leur coustume d'aller assez lentement en beson-
 gne, comme ie pense auoir dit ailleurs, ce n'est pas
 merueille, si en matiere de filer, ces femmes n'ad-
 uancent pas beaucoup leur travail.

Des visites des Indiennes. De quelle façon elles refaisoient leurs habillements ; Et comment on souffroit les femmes publiques.

C H A P. XIV.

S'Il aduenoit qu'une femme, qui n'estoit ny de la condition des Pallas, ny mariée à vn Curaca, Seigneur de plusieurs Vassaux, s'en allast visiter vne Palla, c'est à dire vne Dame de sang royal, elle ne portoit point avec soy aucune besogne à faire, mais incontinent apres les premieres paroles du compliment qu'elle faisoit en cette visite, ou plustost en cette adoration; si grandes estoient les submissions qu'on souloit rendre à la Palla, elle la prioit de luy donner dequoy trauailler, pour luy faire cognoistre par là, qu'elle ne la visitoit point en qualité de son égale, mais comme sa tres-humble seruante. Alors la Palla par vne faueur bien signalée, essayoit de la contenter en sa demande, & luy donnoit quelque chose à faire de son propre ouurage, ou de celuy de ses filles, pour ne la mettre au rang de celles qui la seruoient; Ce qui estoit vne des plus grandes graces que peult receuoir la personne qui alloit en visite, voyant que la Palla l'auoit mise au pair avec elle, ou avecque ses filles. Cette mesme correspondance de courtoisie & d'honnesteté, se pratiquoit entre les autres fêmes,

& parmy les hommes en tout ce Royaume, où les inferieurs faisoient leur possible, pour se rendre agreables à ceux dont ils releuoient, & les Superieurs aussi obligeoiēt leurs Suiets de plusieurs faueurs, à le prédre depuis l'Ynca, qui estoit leur Roy, iusques aux moindres Bergeres, qu'ils appelloient *Llamamicher*.

Cette loüable coustume qu'auoient les Indiennes de se visiter ainsi, & de porter leurs ouurages, afin de ne demeurer oyssiues, seruit d'imitation aux Espagnoles de Cozco, qui obseruerent le mesme, iusques au temps de Francisco Hernandez Giron, qui dans les mouuemens de la guerre abolit cette vertu, comme c'est l'ordinaire d'une jurisdiction tyrannique de ruyner de fonds en comble toutes les bonnes coustumes. Je rapporteray icy, en suite des visites & de l'ouurage des Indiennes, de quelle façon les gens du commun ont accoustumé de rappiecer leurs habillemens. S'il arriue fortuitement qu'ils se deschi rent par le moyen d'un accroc, ou qu'une flamme che tombant dessus, il s'y fasse quelque trou; pour en reparer le deffaut, ils se seruent d'une certaine aiguille faite d'une espine, car ils n'en ont aucune de metal, où ils passent une aiguillée de fil de mesme couleur que la robbe, & à force de l'auster, & de coudre d'un bout à l'autre, pour couvrir ce qui est rompu, ils le rentrent si proprement, qu'il semble qu'il n'y ait iamais eu de trou, fust il de la largeur de la main. Pour en venir à bout plus facilement, & rendre la toile égale par les deux bouts, ils se seruent en lieu de mestier d'une callebasse coupée par le milieu, ou bien

de la circóferáce d'un pot de terre, ce qui passoit parmy eux pour vne inuention de rappiecer leurs habits, si belle, & si excellente; qu'ils se mocquoient d'ordinaire des Espagnols, pource qu'ils les leur voyoiét racoustrer tout autrement, à cause que la tissure estoit differente de celle des Indiens. Il faut remarquer encore, que pour s'apprester à manger, ils auoient dans leurs maisons en lieu de foyer certains fours d'argille, ou grands, ou petits, selon les moyens qu'auoit le Maistre du logis. Ils y mettoient le feu par l'ouuerture ordinaire, & au dessus du four ils en faisoient deux ou trois, tant du plus, que du moins, pour y mettre cuire dans des pots de terre les viandes qu'ils vouloient assaisonner. Or ce qu'ils vsoient de cette inuention, estoit pour mesnager le bois, au contraire des Espagnols, qui leur donnoient de quoy s'estonner en ce qu'en leur maniere de faire la cuisine, ils voyoient qu'ils en perdoient beaucoup, & le laissoient brusler inutilement.

En suite de tout cecy, il reste à parler des femmes publiques, que les Yncas souloient souffrir en leurs terres, pour obuier à de plus grands maux. Elles demouroient à la campagne, chacune à part soy, dans de chetiues Cabannes, & ne pouuoient entrer dans les villes, de peur que leur communication n'attirast la perte des femmes de bien. Ils les appellent vulgairement *Pampauruna*, nom qui signifie & leur demeure, & leur façon de viure, composé qu'il est de *Pampa*, c'est à dire plaine, & de *Runa*, qui au singulier signifie vn homme ou vne femme, & au pluriel

plusieurs gens ensemble. Tellement que si l'on vient à joindre ces deux mots, l'on trouuera que *Pampauruna* denote des gens qui viuent à la campagne, ou bien *des femmes de place*; par où ils vouloient donner à entendre que comme vne place est publique, & destinée pour receuoir tous ceux qui s'y en veulent aller, ces femmes l'estoient de mesme, & se prostituoient à tous venans. Les hommes les traitoient avec beaucoup de mespris, & il estoit deffendu aux fêmes de parler à elles, sur peine de porter le mesme nom, pour vne marque d'infamie, & avec cela d'estre rasees en public, & repudiées de leurs maris, si elles en auoient. En vn mot, pour les inmolier à la honte publique, ils ne les nommoient iamais autrement que *Pampauruna*, qui signifie putain.

Ynca Roca conqveste plusieurs Nations dont les plus remarquables estoient les Chancas, & la Prouince de Hanco-Huallu.

C H A P. XV.



Pres la mort de ce dernier Ynca, le Roy Ynca Roca son fils, le nom duquel, selon l'explication qu'en donne Blas Valera, que nous auons cy-deuant rapportée, signifie *vn Prince prudent*, prit la bordure de couleur à son aduenement à la Couronne; & ayant rendu les derniers deuoirs à

456 LE COMMENTAIRE ROYAL,
son pere par vne pompe funebre qu'il fit solemnelle-
ment, il passa les trois premieres années de son re-
gne, à visiter son pays. Par mesme moyen il leua
des gens de guerre, pour conquerir de nouveaux
lieux, du costé de *Chinchafuya*, qui est au Septentrion
de Cozco. Auecque cela il fit faire vn Pont sur la ri-
uiere d'Apurimac, qui est au chemin Royal de Coz-
co, tirant vers la ville des Roys. Car il luy sembla que
ce seroit vne chose indigne de sa Maiesté, s'il falloit
que son armée passast cette riuere sur des radeaux,
côme elle auoit fait au temps de son pere, qui s'estoit
desisté de faire vn Pont, pour n'auoir encore assu-
ietty les Prouinces de cette frontiere, qui estoient
maintenant deffous l'Empire de l'Ynca son fils.

Ayant fait ce Pont, il sortit de Cozco avec vingt
mille hômes de guerre, & quatre Maistres de Camp.
L'ordre qu'il tint en son armée fut de faire passer sur
le nouveau Pont tous les gens de guerre, dont il fist
vn escadron, & mit trois hommes à chaque file.
Après auoir marché quelque temps, il entra dans le
vallon qu'ils appellent *Amanca*, c'est à dire lys, à
cause du grand nombre de ces fleurs, qui naissent
dans cette vallée. Elles sont differentes des *lys* d'Es-
pagne, & en forme & en odeur, pource que la fleur
Amanca est faite en façon de cloche, ioint qu'elle a
la tige verte, & qu'avec ce qu'elle est fort lissée, elle
n'a ny feüilles, ny odeur, si bien que les Espagnols ne
luy ont donné le nom de lys, qu'à cause de ces deux
couleurs, qui sont le blanc & le verd. *D'Amanca* il
laissa à main droite la haute montagne neigeuse,

entre laquelle & le grand chemin, il soubmit à son Empire ce peu de villes qu'il y trouua, dont les habitans sont des Nations appellées *Tacmara*, & *Quinnalla*. De-là il passa à *Cochacaga*, où il mit quelques gens en garnison, puis à *Curampa*, où il trouua fort peu de gens, qu'il assuiettit facilement; & de *Curampa* il tira vers la grande Prouince appellée *Antahuaylla*, dont les habitans s'estendent d'une main à l'autre à costé du chemin royal de seize à dixsept lieues. Ces peuples appelez *Chancas* sont grandement riches, & fort aguerris; Aussi se ventent-ils d'estre sortis de la race d'un Lion, à cause dequoy ils tiennent cet animal come un Dieu & mesme ils l'adorent. Auant que les Roys Yncas les eussent conquis, en leurs principales festes, ils souloient produire en public vingt-quatre ieunes Indiens, esquippez de la mesme façon qu'on a de coustume de peindre Hercule, c'est à dire couuerts de la peau d'un Lion, de qui la teste leur seruoit comme de tymbre, coustume qu'ils obseruerent encore depuis, & ie me souuiens de les auoir veus ainsi habillez dans *Cozco*, le iour de la feste du tres-sainct Sacrement de l'Autel.

Sous le nom de *Chanca* sont comprises plusieurs autres Nations, comme celles qu'ils appellent *Hanco Huallu*, *Vtunsullu*, *Vramarca*, *Vilca*, & ainsi de leurs semblables, qui se vantēt d'estre sorties de diuers peres; à sçauoir les vnes d'une fontaine, les autres d'un Lac, & les autres d'une haute Colline, chāque peuple tenāt pour Dieu celuy qu'il croyoit estre son pere, iusques à luy sacrifier pour une marque d'adoration.

Les predecesseurs de ces peuples, venus de terres lointaines, conquièrent diuers pays, auant qu'arriuer en la Prouince d'*Antahuaylla*, qu'ils gaignerent à force d'armes, en chasserent les anciens habitans, & firent resserrer en leurs Prouinces les Quechuas, qu'ils rendirent leurs tributaires. Et d'autât qu'apres auoir fait toutes ces choses, dont leurs descendans se vantent encore aujourd'huy, ils traitoient leurs Suiets tyranniquement, cela fut cause que sur l'aduis qu'en eut le Roy Ynca Roca, il se resolut de les aller voir, pour les mettre à la raison. Comme il fut donc arriué aux confins de la Prouince d'*Antahuaylla*, il enuoya faire aux *Chancas* les sommations accoustumées, pour les reduire à se soubmettre au Fils du Soleil, ou à prendre les armes pour se deffendre de luy. Cette proposition estant faite aux *Chancas*, ils s'assemblerēt pour y respondre, & mirent l'affaire en deliberation, où les aduis furent differents; Car les vns disoient qu'il estoit raisonnable de recognoistre l'Ynca pour leur souuerain Seigneur; puis qu'il portoit le tiltre de Fils du Soleil: les autres tout au contraire, à sçauoir ceux qui se croyoient descendus d'un Lion, s'opiniastroient à soustenir, qu'il n'y auoit pas d'apparence qu'eux qui commandoient à tant de Vassaux, & qui venoient d'une si bonne race, s'assuiettissent à une domination estrangere; Qu'ils n'estoient pas gens à croire que l'Ynca fust Fils du Soleil; Que leur genealogie & les beaux-faits des *Chancas* leurs deuanciers leur deuoient apprendre à s'estimer plus glorieux de soubmettre les autres peuples à leur

Empire,

Empire, que de se faire tributaires de l'Ynca; Qu'au reste ils n'auoient pas fait encore la derniere preuue de la valeur de leurs bras, & qu'il valoit bien mieux resister à l'Ynca, que luy obeyr laschement, & se rendre à luy à la premiere semonce, au lieu de deployer à la campagne leurs enseignes victorieuses, & prendre les armes en gens de bien.

Plusieurs iours se passerent en ces differends qu'eurent les *Chancas*, durant lesquels les vns trouuoient bon de receuoir l'Ynca pour leur Souuerain, & les autres s'y opposoient directement, sans se pouuoir accorder. Cependant l'Ynca n'en fut pas plustost aduertty, qu'il se resolut d'entrer dans leur Prouince à main armée, afin de les estonner, de peur qu'vsant de clemence & de douceur enuers eux, ils n'en deuinssent plus temeraires, & que rendus insolens par les victoires gagnées, ils n'entreprissent sur luy quelque chose qui l'obligeast à leur faire vne cruelle guerre, & à les punir à toute rigueur. Voila donc qu'il commanda tout aussi-tost à ses Maistres de Camp d'entrer en la Prouince d'*Antahuaylla*, & enuoya par mesme moyen vn de ses hommes aux *Chancas*, avec commission expresse de leur dire de sa part, qu'ils eussent à faire l'vn des deux, à sçauoir à le recognoistre pour Roy, ou à tenir pour certain qu'il les feroit tous passer par le fil de l'espée, pour n'estre plus resolu de souffrir la rebellion que iusques alors ils luy auoient telmoignée. Ces paroles, qui leur furent dites de la part de l'Ynca, les estonnèrent si fort, que voyant qu'en son armée s'alloit rendre.

460 LE COMMENTAIRE ROYAL,
quantité de *Quechuas* & d'autres Nations, qu'ils auoient offensées par le passé, ils rauallerent leur orgueil, & fleschirent sous le ioug des *Yncas*, plus pour la peur qu'ils auoient de ses armes, & de la vengeance de leurs ennemis, que pour l'amour de ses Loix & de son gouvernement; de sorte que sans marchander plus long-temps, ils luy firent dire qu'ils estoient prests à luy obeir, & à faire de point en point ce qu'il leur commanderoit, comme gens qui se soubmettoient à ses ordonnances; mais quelques offres qu'ils luy fissent, elles ne diminuerent point la haine secrette qu'ils auoient dans l'ame, comme nous verrons cy-apres.

Après que l'*Ynca* eust ainsi conquis ceux d'*Antahuaylla*, & laissé dans leur Prouince les Ministres qu'il iugea necessaires pour les ranger au deuoir, il passa outre en sa conqueste iusques au pays que l'on appelle *Vramarca*, & autrement *Chanca* qui a son estendue assez petite, mais dont les habitans ont de grands courages, & sont naturellement fort aguerris. Aussi ne se rendirent-ils point sans resistance, & il est à croire que s'ils eussent eu les forces égales au cœur; ils ne se fussent point possible, si tost soubmis à l'obeissance des *Yncas*, enuers lesquels les Indiens de ces Contrées ne se monstrent pas si enclins ny si souples, que ceux des Prouinces de *Cuntisuyu*, & de *Collasuyu*, tellement que ce ne fut qu'à contre cœur que ces habitans d'*Vramarca* reconnurent enfin vne puissance estrangere. Au sortir d'*Vramarca* l'*Ynca* entra dans la Prouince que les Indiens appellent *Hanco*

hualla, ou *Vilca*, & les Espagnols *Villcas*, peuples qui n'eurent pas moins de regret de se rendre, qu'en auoient eu leurs voisins. Car ces Nations du nombre des Chancas auoient conquis d'autres Prouinces à force d'armes, & gaignoient de iour en iour de nouvelles terres, avec vn excés d'ambition, qu'ils accompagnoient d'une superbe du tout desreglée, & d'une tyrannie insupportable à leurs Sujets. Mais le Roy ynca Roca, sceut fort bien reprimer l'un & l'autre, & les rendit souples à ses commandemens, dequoy ils s'affligerent fort en leur ame, où ils conceurent depuis vne hayne secrette contre leur nouveau Prince. En ces deux Prouinces, les habitans fouloient sacrifier des enfans à leurs Dieux en leurs festes principales. Ce qu'estant venu en la cognoissance de l'ynca, il leur persuada par vn discours qu'il leur fit d'adorer le Soleil pour leur Dieu, & de se despouiller de cette inhumanité qui leur estoit naturelle. Pour les y porter dauantage, & les empescher d'y recheoir à l'aduenir, il fit vne Loy, qu'il prononça de sa propre bouche, afin de la faire mieux observer; par laquelle il les assura, que pour vn enfant qu'ils sacrifieroient, il les feroit tous passer au fil de l'espée; & peupleuroit leur pays d'autres habitans, qui ne seroient pas si barbares qu'eux, & ne tueroient point des innocens, enuers lesquels ils tesmoigneroient auoir plus de bon naturel, que leurs propres peres n'en auoient. Or combien que ces paroles fussent sensibles à ces Barbares, si ne consentirent-ils qu'à regret à quitter leur abomination, pource que

le Diable leur auoit mis dans l'esprit que cette coutume d'immoler des enfans luy estoit le sacrifice le plus agreable de tous.

De Villca il prit son chemin à main gauche deuers le Ponant, iusques à la coste de la mer, & se rendit en l'une de ces deux grandes Prouinces, qui porte presque le mesme nom, si ce n'est que pour y mettre vne difference on appelle la premiere *Sulla*, & la seconde *Vtumfulla*. Ces deux Prouinces contiennent plusieurs Nations, qui ont diuers noms; joint que les vnes sont mieux peuplées que les autres. Mais sans m'arrester à les deduire par le menu, il me suffira de dire, que le nombre des habitans estoit de quarante mille hommes, qui firent perdre beaucoup de temps à l'Ynca, deuant qu'en pouuoir venir à bout. Car ceux du pays, disent qu'il fut bien trois ans, pource qu'il ne voulut point les reduire à force d'armes, mais les auoir par caresses. Pendant ce temps-là, les Indiens; qui estoient plusieurs en nombre, & qui se sentoient fort aguerris, furent souvent sur le point de prendre les armes, pour resister courageusement, iusques à ce qu'enfin vaincus par le bon traitement de l'Ynca, & par l'honneste procedé, dont il vsoir enuers eux, ils se rengèrent à son seruice, embrasserent ses Loix, & receurent pour Gouverneurs ceux qu'il luy plût leur donner; ce qu'il n'eust pas plustost fait, qu'il s'en retourna victorieux à Cozco. Il est aduenü depuis qu'en ces deux Prouinces de *Sulla*, & d'*Vtumfulla*, il y a quelque trente deux ans qu'on a descouuert quelques mines d'ar-

gent, & de vis-argent, qui sont d'un grand reuenu, & fort importantes à la fonte des metaux, principalement de l'argent.

Du Prince Yahuarhuacac, & l'explication de son nom.

CHAP. XVI.



LE Roy Ynca Roca ayant employé quelques années à gouverner paisiblement ses Estats, s'aduisa de reprendre les armes, & d'enuoyer pour cet effet le Prince sô fils & son heritier, qu'on appelloit *Yahuarhuacac*, à la conquête d'*Antisuyu*, qui est au Leuant de Cozco, & assez proche de cette ville. Car de ce costé là il n'auoit pas aduancé les bornes de son Empire plus loin que la riuiera de *Pancartampu*, iusques où s'estendoit la conquête du premier Ynca Manco-Capac.

Auant que passer outre, ie trouue à propos que nous rapportions icy la signification du nom *Yahuarhuacac*, & que nous monstrions par mesme moyen pourquoy l'on appella ainsi ce Prince. Parmi les Indiens les vns en attribuent la cause à ce qu'en l'âge de trois ou quatre ans il pleura du sang, sans toutes-fois sçauoir au vray si ce fut vne seule fois ou plusieurs; Ce qui procedoit possible de quelque mal

qu'il pouuoit auoir aux yeux; & les autres disent qu'il respandit ces larmes sanglantes quand il nasquit; ce qui est, à mon aduis, vne opinion plus vray-semblable que l'autre. Il se pût faire aussi que venât au monde, il luy demeura sur le visage quelque goutte du sang de sa mere, & que ces peuples comme superstitieux, & qui se picquoient d'estre deuins, se firent à croire que c'estoient des larmes, que l'enfant respandoit. Quoy qu'il en soit, ils tindrent tous pour certain qu'il pleura du sang, & s'arrestent d'autant plus à cét accident, qu'ils le creurent arriué au Prince heritier de la Couronne; De sorte que le prenant pour vn tres-mauuais augure, ils apprehenderent fort pour luy, & se persuaderent que cela le menassoit de quelque grande infortune ou de la malediction de son Pere le Soleil, comme ils souloient dire. Voila donc quelle est l'explication du nom *Yahuarhuacac*, qui signifie *celuy qui pleure du sang*. Ce qu'il ne fit qu'en son enfance, & non pas en l'âge viril, ny pour auoir esté vaincu, ou fait prisonnier de guerre, ce qui n'arriua iamais à pas vn Ynca, hors-mis à l'infortuné Huascar, qui fut arresté par Atahualpa son frere bastard, comme il sera dit en son lieu. Il ne fut non plus changé en nourrisse ny supposé; comme vn certain Historien nous a voulu faire accroire. Car toutes ces choses sont grandement esloignées du religieux respect que les Indiens portoient à leurs Yncas, & du soing qu'en auoient leurs Gouverneurs, & les autres Ministres destinez pour le seruice, & pour la garde du Prince. Cela estant ainsi, tant s'en faut

qu'ils eussent voulu souffrir qu'on l'enleuast pour en mettre vn autre à sa place, ny qu'il y eust quelqu'un si hardy que de l'entreprendre ; qu'au contraire qui-conque l'eust imaginé tant seulement, celui-là sans doute eust creu que la terre se fust à l'instant ouuerte pour l'engloutir, & toute sa parenté, ou mesme la Prouince & la ville dont il estoit natif. Car, comme nous auons dit ailleurs, ils tenoient leurs Roys pour Dieux, & les adoroient en qualité de Fils du Soleil, avec plus de veneration que tous les anciens Gentils n'en ont iamais eu pour leurs Deitez imaginaires.

A cét Augure qu'ils tiroient des pleurs, estoit à propos semblable cette autre superstition, ou ce vain presage qu'ils souloient tirer du remuement des paupieres d'en-haut & d'em-bas. Ce qui me semble à propos d'estre remarqué icy, sur le suiet des yeux dont nous parlons. Il faut donc sçauoir que tous les Yncas, & leurs Vassaux, tenoiēt pour vn bon presage, quand la paupiere d'en-haut de l'œil gauche se mouuoit plus que l'ordinaire ; car alors ils disoient que c'estoit vn signe qu'il leur arriueroit quelque bien, qui les combleroit de contentement & de ioye. Mais si c'estoit la paupiere de l'œil droit, l'Augure leur sembloit incomparablement meilleur, & leur promettoit, à ce qu'ils disoient, des prosperitez sans nombre, & des richesses inestimables, qu'ils croyoient deuoir estre accompagnées d'un plaisir, & d'une tranquillité d'esprit qu'on ne pouuoit exprimer. Mais quant aux paupieres d'em-bas, elles leur presageoient tout le contraire, s'il arriuoit qu'elles tremblassent

466 LE COMMENTAIRE ROYAL,
plus que de coustume; Ce qui leur estoit vn indice
de tristesse, & de voir des choses qui les accableroiēt
de douleur & de misere. Que si c'estoit la paupiere
d'em-bas de l'œil gauche, ils prenoient cela pour
le pire de tous les presages qu'ils eussent iamais sceu
auoir, qui les menassoit, à ce qu'ils disoient, d'vne
infinité de larmes, & d'estre exposez à l'aduenir, à
tous les maux & à toutes les tristesses imaginables.
Ils adioustoient foy de telle sorte à ces petits acci-
dens, qu'à chāque fois que ce dernier leur arriuoit
ils s'abandonnoient aux pleurs, de mesme que s'ils se
fussent veus enuoloppez de tous les mal-heurs qui
leur pouuoient arriuer. Alors pour ne se point per-
dre, à force de pleurer les maux qu'ils n'auoient pas
encore veus, ils auoient entre-eux vne superstition
aussi ridicule, que l'Augure mesme; car ils mouil-
loient de saliuē le bout d'vne paille, qu'ils appli-
quoient à la paupiere d'em-bas en la resserrant, & di-
soient pour leur consolation que cette paille ainsi
mise, empeschoit le cours des larmes qu'ils appre-
hendoient de repandre, & deffaisoit le mauuais pre-
sage du tremblemēt de la paupiere. Ils tiroient pres-
que les mesmes coniectures du bruit des oreilles,
que ie laisse à part pour ne m'esloigner de mon suiet,
pouuant parler veritablement de l'vn & de l'autre
pour l'auoir veu.

Le Roy *Ynca Roca*, comme nous disions n'agueres,
ayant fait dessein d'enuoyer le Prince son fils à la con-
queste d'*Antisuyu*, fit tenir prests quinze mille hom-
mes de guerre, sous la conduite de trois Maistres
de Camp,

de Cáp, qu'il luy dóna pour l'accópagner, & pour luy seruir de Conseillers. Apres cela, il le fournit de toutes les munitiós qui luy estoient necessaires; avec quoy le Prince se mit en chemin iusques à la riuere de *Pancartampu*, d'où il passa outre à *Challapampa*, où il soubmit à son obeissance ce peu d'Indiens qu'il trouua en ces Contrées. De *Challapampa* il cõtinue son voyage à *Pillcapata*, & y peupla quatre villes d'autres gens que de ceux du pays. Cela fait, il s'en alla à *Hanisca*, & à *Tunu*, où les Indiens trouuerent l'herbe par eux appellée *Cuca*, qu'ils prisent si fort, comme i'ay dit cy-deuant. La terre de *Hanisca*, escheut depuis enheritage à *Garcillasso* de la Vega mon bon Seigneur, qui m'en ayant fait vne donation durant ma vie, il arriua depuis que ie la perdis pour m'en aller en Espagne. Pour entrer dans les Vallons où croist l'herbe *Cuca*, il faut passer par vn costau qu'on appelle *Cannachuary*, où il y a cinq lieuës de descente presque perpendiculaire, de maniere que si lon ne peut la regarder qu'avec effroy, à plus forte raison doit on auoir peur de monter en haut, ou de descendre par vn sentier si dangereux, par où l'on va comme serpentant, avec beaucoup de danger, de quelque costé que lon se tourne.

Des Idoles des peuples appelez Antis, & de la conqueste des Charcas.

C H A P. XVII.



N ces Prouinces des *Antis* les habitans souloient adorer pour Dieux les Tygres, & les grandes Couleures par eux appellées *Amaru*, dont les vnes sont plus grosses que la cuisse d'un homme, & longues de vingt cinq à trente pieds, & les autres beaucoup moindres. Les Indiens les adoroient toutes, à cause de leur prodigieuse grandeur. Elles ne sont point malignes, & ne font mal à personne, ce que ceux du pays attribuent à l'effet de l'enchantement d'une Magicienne, qu'ils croient les auoir ainsi appropriées, pour ce qu'auparauant elles estoient grandement farouches. Ils adoroient de mesme les Tygres, pour estre nés à la cruauté, & auoient accoustumé de dire qu'eux & les Couleures estoient natifs du pays, à raison dequoy ils meritoient d'estre adorez, & que pour eux ils estoient estrangers en ces Contrées. Vne pareille adoration estoit deferée à l'herbe par eux appellée *Cuca*, ou *Coca*, comme disent les Espagnols.

En ce voyage le Prince *Yahuarhuacac*, adiousta près de trente lieues de conqueste à son Empire, dans un pays qui n'estoit guere peuplé, & ne passa point ou-

tre, pource que les marescages, les precipices, & les montagnes, rendoient presque inaccessible cette Contrée, qui sert comme de frontiere à la Prouince qu'on appelle proprement *Anti*, d'où prend son nom toute celle d'*Antisuyu*. Apres auoir fait cette conquête, le Prince s'en retourna droit à Cozco, & deslors le Roy son pere se desista de faire d'autres voyages de guerre, pource que du costé d'*Antisuyu*, qui est au Leuant, il n'y auoit rien à conquerir, non plus qu'au Ponant, où est le pays de *Cantisuyu*, d'autant qu'en cet endroit-là son Empire aboutissoit vers la mer du Sud; de maniere qu'à le prendre ainsi, de l'Orient au Ponant, il y auoit vers le parage de Cozco plus de cent lieues de terre, & du Septentrion au Midy plus de deux cens. En toute ceste estendue les Indiens s'occupèrent à bastir de magnifiques Palais à leur Roy, comme pareillement, des iardins, & des maisons de plaifance à l'Ynca. Par mesme moyen ils prirent le soing de faire des magazins dās les grands chemins, afin d'y ferrer les munitions de guerre, & les habillements, pour l'vsage de ceux du pays.

Le Roy Ynca Roca s'estant addonné quelques années aux exercices de la paix, se resolut à la fin à vne entreprise d'importance, qui fut d'acheuer la conquête des grandes Prouinces appellées les *Charcas*, que son pere Ynca Capac Yupanqui auoit commencée au detroit de *Collasuyu*. Pour l'execution de ce dessein, il mit sur pied trente mille hommes de guerre, & fut le premier de tous les Yncas qui marcha avec

470 LE COMMENTAIRE ROYAL,
vne si grosse armée, pas vne de ses predecesseurs n'en
ayant eu de semblable. Ayant nommé six Maistres
de Camp, sans les autres Chefs, & les moindres gens
de commandement, il se mit en campagne, & laissa
pour son Lieutenant dans le Royaume le Prince
Yahuarhuacac, auquel il donna pour adioincts quatre
autres Yncas, afin qu'ils luy seruissent de Conseil-
lers.

Comme il eut mis cét ordre aux affaires de son
Estat, il sortit de Cozco par le grand chemin de Col-
lasuyu, & prit en passant toutes les troupes qu'on
tenoit prestes dans les Prouinces, avec lesquelles il
arriua aux confins de *Chuncuri*, de *Pucuna*, & de *Миуи-
миуи*, qui estoient les Prouinces les plus proches de
son Royaume. Il leur enuoya d'abbord des hommes
exprés pour leur dire de sa part, qu'il estoit là venu
pour les ranger sous l'obeïssance, & sous les Loix
de son Pere le Soleil, afin qu'ils le recogneussent
pour leur Dieu, & que par mesme moyen, ils quit-
tassent leurs Idoles faites de pierre, & de bois, se
deportans de plusieurs abus qu'ils commettoient
ordinairement contre la Loy naturelle, & contre la
vie humaine. Les habitans s'offenserent si fort de ces
langages, que ceux d'entre eux qui auoient du com-
mandement sur les autres, & qui estoient les plus
aguerris, en vindrent aux armes avec beaucoup de
furie, disant qu'on ne les pouuoit traiter avec plus
de rigueur que de les vouloir contraindre de quitter
leurs Dieux, pour adorer ceux des estrangers, & de
renoncer à leurs coustumes & à leurs propres Loix,

pour s'affuiettir à celles de l'Ynca, qui faisoit mestier d'enuahir tous les Estats, & de rendre tributaires les peuples qui ne releuoient point de luy, iusques à s'en seruir comme d'esclaues; surquoy ils conclurent, qu'ils ne deuoient point souffrir cela, mais se resoudre plustost à mourir en gens de bien, pour la deffense de leurs Dieux, de leur patrie, & de leur liberté.

Remonstrance des Vieillards aux Ieunes, qu'ils font resoudre à receuoir l'Ynca.

CHAP. XVIII.



Ces obiections des ieunes gens du pays, les Vieillards comme les plus aduisez de tous firent response; Que les difficultez qu'ils proposoient n'estoient fondées sur aucune apparence; Que pour estre proches voisins des Suiets de l'Ynca, l'experience leur auoit appris depuis quelques années, qu'il n'y auoit rien que de bon dans ses Loix, & dans son gouuernement, & qu'il souloit traiter ses Suiets comme ses propres enfans. Qu'au reste il ne conqueroit sur les Indiens; que les terres qu'il trouuoit en frische, iusques-là mesme qu'il les faisoit labourer à ses propres frais, & qu'au lieu de leur imposer vn tribut, il leur donnoit de son bien, leur partageant tout ce qu'il en auoit de reste, apres l'en-

472 LE COMMENTAIRE ROYAL,
tretienement de ses armées. Ils conclurent là dessus,
que pour preuue de leur dire, sans s'amuser à recher-
cher d'autres raisons, ils n'auoient seulement qu'à
considerer sans passion, combien estoit different l'E-
stat present des Vassaux de l'Ynca, qui se voyoient
dans le comble des richesses, des prosperitez, & de
la tranquillité; Qu'apres que les dissensions & les
querelles qu'ils souloient auoir entre-eux pour les
moindres choses seroient terminées, il arriueroit
asseurement que leurs biens en seroient plus à cou-
uert de la violence des larrons, & l'honneur de leurs
femmes plus assuré contre les efforts des adulte-
res; sans qu'il fallust mettre en doute que les riches,
& les pauvres, les grands & les petits, & tous les au-
tres en general ne fussent à l'aduenir exempts des in-
solences, & des outrages des plus puissants.

Ils adiousterent à ceey, Que ceux des Prouinces
frontieres ayant eu de veritables aduis des grands
biens que faisoit l'Ynca, s'estoient soubmis à son
Empire de leur bon gré, pour iouyr de la douceur de
son gouuernement; Qu'estants assurez de cette ve-
rité, ils feroient bien de les imiter, & qu'il valoit
beaucoup mieux appaiser l'Ynca, en luy octroyant
sa demande, que l'irriter par vn refus; Qu'il leur scau-
roit peu de gré de s'estre rendus à luy, quand il les y
auroit contraintes par les armes; Que par cette voye
ils se rendroient tout à fait indignes de ses bonnes
graces, & par consequent qu'ils les deuoient acque-
rir par l'obeyssance; Qu'en vn mot ce chemin estoit
le meilleur de tous, puis qu'il mettoit à couuert leurs

vies , leurs biens , leurs femmes , & leurs enfans ; Qu'au demeurant pour le regard de leurs Dieux, l'Ynca sembloit auoir raison de leur dire , que le Soleil meritoit beaucoup mieux que leurs Idoles , d'estre adoré de tous generalement ; & partant qu'ils ne fissent point difficulté de receuoir vn si grand Prince pour Roy , & le Soleil pour leur Dieu , puis qu'en tous les deux il n'y auoit que du proffit & de l'honneur à gagner. Par ces raisons & autres semblables , les vieillards sceurēt si bien appaiser les ieunes , que tous d'vn commun accord ils s'en allerent au deuant de l'Ynca. Les ieunes , qui le furent receuoir avec les armes à la main , luy dirent pour complimēt , qu'ils ne les portoient en qualité de bons & de fidelles Suiers , que pour le seruir en ses armées , & luy ayder à conquerir de nouuelles Prouinces ; & quant aux vieillards , ils luy firent diuers presens des fruits du pays , disant , qu'ils les luy offroient de bon cœur , en reconnaissance de ce qu'il prenoit possession de la terre qui les produisoit. L'Ynca les ayant accueillis fauorablement , commanda qu'on donnast des habillemens aux vieilles gens. Par mesme moyen il voulut que les principaux eussent de ses propres robbes , & fit habiller tous les autres à l'ordinaire. Auecque cela , pour tesmoigner aux ieunes Soldats , & aux Capitaines , combien luy plaisoient les effets de leur courage , il s'aduifa d'en receuoir cinq cens au nombre de ses autres gens de guerre ; Et afin qu'ils ne se portassent enuie entre-eux , il les fit tirer au sort , donnant à entendre aux autres , qu'il n'en pou-

uoit prendre dauantage, de peur que tout le pays ne demeurast despourueu de gens de guerre. Cepédant ses biens-faits & les faueurs signalées, comblerēt les Indiens d'vn si grand contentement, que tous pessellemelle, ieunes, & vieux, en donnerent des telmoignagēs visibles par leurs applaudissemens; puis en signe de recognoissance adressant leurs yeux & leurs voix à luy; Assëurement, se mirent-ils à dire, tu monstres bien par tes actions que tu es Fils du Soleil; Toy seul merites le nom de Roy; & ce n'est pas sans raison que l'on t'appelle Amy des pauures, puis qu'à peine auons nous eu l'honneur d'estre tes Sujets, que tu nous as comblez de biens & de recompenses. Veuille donc le Soleil ton pere te remplir à iamais de benedictions, & puisses tu commander à tous les peuples du monde, afin d'estre honoré du nom de *Capa Ynca* qui signifie souuerain Monarque, & que tes grandes vertus t'en rendent digne. Voila les vœux que ces nouueaux Sujets firent tous ensemble pour la prosperité de leur Roy ynca Roca, qu'ils adorent comme Dieu. Leur ayant donné des gens pour les instruire, il passa oultre, afin de reduire les Prouinces voisines, à sçauoir *Misqui*, *Cacaca*, *Macaca*, *Caracaca*, & ainsi des autres, iulques à *Chuquisaca*, qui est la mesme qu'on appelle maintenant *Ciudad de la plata*, ou *ville d'argent*. Bien que ces Prouinces soient differentes de langue & de Nation, si ne laissent-elles pas de porter vn mesme nom, qui est celui de *Charca*. Le Roy ynca Roca les soubmit à son obeïssance avec la mesme facilité que les autres, tellement


rellement qu'en ce voyage il estendit les bornes de ses Estats à plus de cinquante lieues de long, Nord-Sud, & autant de large Lest-ouest. Ce qu'il n'eust pas plustost acheué, & laissé, comme c'estoit l'ancienne coustume, en tous ces pays les Ministres nécessaires pour instruire ses Sujets en leur Idolatrie, & au fait du mesnage, qu'ils s'en retourna droit à Cozco, apres auoir renuoyé les Soldats aux Prouinces où il les auoit pris, & recompensé les Capitaines.

Toutes ces choses estant par luy mises à fin, il trouua bon de se reposer, & de donner du relasche à ses cōquestes, pour ne tourner ses pées qu'au gouuernement de son Royaume. A quoy il employa tout le temps qui luy resta de vie, sans qu'on puisse dire au vray combien d'années il vescu depuis. A la fin comme il eut rendu l'esprit, tous ses suiets sceurent par espreue, qu'il n'auoit en rien degeneré de la vertu de ses Ancestres, mais plustost imité en tout leurs faits glorieux, soit qu'il fust question d'accroistre les bornes de son Empire, ou de faire du bien à ses Sujets. Il fonda des Escholes publiques, où il voulut que les Amautas enseignassent les sciences dont ils auoient cognoissance. Avecque cela il fit bastir auprès d'elles son Palais Royal, comme il sera dit en son lieu, établit des Loix, & dit plusieurs sentences notables, que ie rapporteray en suite de ce Chapitre, les tirant mot à mot de ce qu'en a escrit en particulier le R. P. Blas Valera. Il fut pleuré generalement de tous ses Sujets, & embaumé selon la coustume de ces Roys. Son heritier fut Yahuarhuacac, qu'il eut

476 LE COMMENTAIRE ROYAL,
de *Mama Micay* sa sœur & sa femme, outre qu'il
laissa plusieurs autres enfans, tant bastards que legi-
times.

*De quelques Loix qu'establit le Roy Ynca Roca;
Des Escholes par luy fondées dans Cozco,
& de ses dicts memorables.*

C H A P. XIX.

 E que le R. P. Blas Valera, qui s'est mon-
stré fort exact, en la recherche des cho-
ses des Yncas, nous a laissé par escrit de
la vie de celuy-cy, est, qu'il regna pres-
que cinquante ans, durant lesquels il fit plusieurs
Loix, dont les principales furent les suiuan-
tes. Qu'il ne falloit esleuer aux sciences que les Gentilshommes, &
non pas les fils des petites gēs, de peur qu'une si haute cognoissan-
ce ne les rendit orgueilleux, & que l'Estat n'en receust quelque
dommage; Que pour leur donner dequoy s'exercer, il suffisoit
que chacun d'eux apprit le mestier de son pere; Qu'on ne deuoit
auoir aucune pitié du meurtrier, du boute-feu, du voleur, ny de
l'adultere, mais qu'il les falloit tous pendre sans remission; Et que
les enfans seroient obligez de servir leurs pere & mere iusques à
l'âge de vingt-cinq ans, auquel temps, ils trauailleroient pour le
seruice du public. L'on tient qu'il fut le premier qui fonda des
Escholes dans la ville de Cozco, afin que les Amantas y peus-
sent enseigner les sciences aux Princes Yncas, à ceux de sang
royal, & aux Gentilshommes de son Empire, non par le moyen

des lettres, car ils n'en auoient aucunes, mais bien par l'vsage & la pratique qu'ils en pourroient auoir tous les iours. Le deuoir de ces Amantas estoit de leur apprendre les ceremonies, & les preceptes de leur fausse Religion, de leur donner à entendre la raison & le fondement de leurs Loix, leur en monstrant la véritable explication; de les instruire en la Polytique, & en la Milice; de les civiliser en leurs mœurs; de leur apprendre l'Histoire & la Chronologie par le moyen des neuds dont ils auoient accoustumé d'vsfer pour tenir compte des années; de les faire parler elegantement, & de ne rien obmettre de ce qui estoit necessaire pour esleuer leur enfans, & gouverner leurs maisons. Ces mesmes Amantas, qui leur estoient en grande veneration, comme Philosophes & gens de sçauoir, s'estudioient de plus à monstrier aux ieunes Indiens ce peu qu'ils sçauoient de Poësie, de Philosophie, de Musique, & d'Astrologie. Toutes lesquelles choses furent de l'institution du Prince Ynca Roca, qui maintint tousiours depuis ces Loix, & les amplifia de beaucoup; Ioint que l'Ynca Pachacutec, qui estoit son arriere-nepueu, y en adiousta plusieurs autres. Le mesme Roy Ynca Roca auoit ordinairement ces paroles à la bouche; Que toutes les fois qu'il consideroit la grandeur, la lumiere, & la beauté du Ciel, il en tiroit cette consequence, qu'asseurement il falloit bien que le Pachacamac (c'est ainsi qu'ils appellent Dieu) fust vn Roy grandement puissant, puis qu'il auoit vne si belle demeure. Quelques fois aussi pour monstrier combien il estimoit les vertueux; S'il falloit, disoit il, que i adorasse quelqu'une des choses d'icy bas, il n'y a point de doute que i adorerois vn homme sage & discret, pource qu'il surpasse en dignité toutes les choses du monde. Aussi est-il vray qu'on ne doit point adorer, celuy qui naist au monde parmy les pleurs, qui d'enfant qu'il estoit devient homme, qui ne subsiste iamais en vn mesme estat, qui vint hier

478 LE COMMENTAIRE ROYAL,
*au monde, & qui en sort aujourdhuy, & qui ne peut ny s'ex-
empter de la mort, ny renaistre apres cette derniere fin. Tout
ce que dessus est tiré du R.P. Blas Valera.*

*De l'Ynca, surnommé Pleure-sang, septiesme
Roy du Peru. Avec vn recit de ses deffian-
ces, de ses conquestes, & de la disgrace
du Prince.*

C H A P. XX.



Pres la mort du Roy Ynca Roca, son fils
Yahuarhuacac prit possession du Royaume,
qu'il gouuerna avec beaucoup de Iustice,
de clemence, & de pieté, ne cessant de fai-
re à ses Suiets toute sorte de biens, & de caresses ima-
ginables. Son principal dessein fût de se maintenir
dans la prosperité où les Predecesseurs l'auoient mis,
sans vouloir faire la guerre à personne, ny sàs preten-
dre à de plus hautes cōquestes que celles de ses Ance-
stres. Il se tenoit ainsi dans sa condition, & ne faisoit
aucune entreprise, à cause que son nom estoit si mal-
encontreux, & qu'on luy en predisoit de si mauuai-
ses choses, qu'il n'osoit point tenter la fortune, de
peur qu'il auoit qu'irritant son Pere le Soleil, il ne luy
enuoyast, comme ils souloient dire, quelque chast-
iment qui fust cause de sa perte. Il passa quelques an-
nées en cette apprehension, durant lesquelles il

maintint la paix le mieux qu'il luy fut possible, & dās son pays, & dans les terres de ses voisins. Cependant, pour ne demeurer oyſif, il viſita deux ou trois fois ſes Royaumes, où il fit faire des baſtimens magnifiques. Sa couſtume eſtoit de bien traiter ſes Sujets, tant en general qu'en particulier, & d'auoir plus d'affection & de tendreſſe pour eux, que tous ſes Predeceſſeurs ne leur en auoient iamais teſmoigné; Ce qu'il falloit proprement nommer des effets de deſſiance & de crainte, qui le tindrent en allarme neufans durant. Mais enfin pour s'exempter du tiltre de laſche, & empeschier qu'on ne luy reprochaſt d'eſtre le ſeul Ynca, qui n'auoit daigné accroître les bornes de ſon Empire, il s'aduifa d'enuoyer vne armée de vingt mille hommes au Sud oueſt de Cozco, par de là la coſte d'Arequepa, où ſes Anceſtres auoient borné leurs victoires; Ce qu'il fit en intencion de gagner vne pointe de terre extrememēt lōgue, & qui toutes-fois n'eſtoit pas beaucoup peuplée. Il choiſit pour General de ſon armée ſon frere *Ynca Mayta*, qui depuis ce voyage ſe fit touſiours appeller *Aupu Mayta*, c'eſt à dire, le *General Mayta*. Il luy donna pour Maître de Camp, quatre Yncas, fort experimentez au fait de la guerre, où il ne voulut point aller en perſonne, combien qu'il deſiraſt fort de ſe trouuer à cette conqueſte; Mais il ne pût s'y reſoudre, pource qu'en matiere de guerre ſon deſtin luy ſembloit ſi mal-heureux, & dans les apprehenſions & les doutes, l'expoſoit à de ſi eſtranges tempeſtes, qu'à meſure que le deſir de cette entrepriſe naiſſoit en luy;

480 LE COMMENTAIRE ROYAL,
la deffiance l'en retiroit. Aussi fut ce pour cela qu'il
enuoya son frere pour Lieutenant à cette conquête,
avec d'autres Chefs qui la firent reüssir en fort peu
de temps, & adiousterent à l'Empire des Yncas tout
ce qu'il y a de pays depuis *Arequipa*, iusques à *Tacama*,
autrement *Collasuyu*, qui deuers la coste sert de fron-
tiere à toute ceste estenduë que l'on appelle aujour-
d'huy le Peru. Ce pays est assez long, mais fort estroit,
& mal peuplé; tellement que les Yncas ne furent
pas si long-temps à s'en faire Maistres, qu'à le visiter
en tous ses endroits.

Comme ils eurent acheué cette conquête, où ils
rendirent compte à l'Ynca *Yahuathuacac*, de tout ce
qu'ils auoiët fait; Les nouuelles de cette victoire luy
plûrent extremement, & luy firent tourner les pen-
sées à autre vne entreprise pl⁹ honorable & plus glo-
rieuse, qui fut de s'assuiettir certaines Prouinces du
destroit de *Collasuyu*, qu'on appelloit *Caranca*, *Vllaca*,
Ulipi, *Chicha*, & *Ampara*. Outre qu'elles estoient gran-
des, & bien peuplées, les habitans se pouuoient
vanter d'estre vaillants, & fort aguerris, à cause de-
quoy les autres Yncas ne les auoient point voulu
attaquer, ny faire cette conquête à force d'armes,
pour ne ruyner tout à fait ces Nations barbares & in-
domptables; De maniere qu'ils attendoient tou-
siours qu'ils se rangeassent d'eux-mesmes sous la
domination des Yncas, & que l'exemple de leurs
voisins, qui en trouuoient le gouuernement si doux
& si profitable, par l'experience qu'ils en faisoient,
les y attirast insensiblement.

Cependant l'entreprise que l'Ynca *Yahuarhuacac* auoit faite de conquerir ces Prouinces, ne laissoit pas de luy donner bien de la peine, & de le faire flotter entre l'esperance & la crainte. Car il se promettoit tantost que ce voyage auroit vn aussi bon succez que celuy de son frere *Apu Mayta*, & tantost ils'en des- fioit, à cause de son nom mal-encontreux, qui luy abbattoit le courage, & l'empeschoit de faire aucune entreprise, pour les dangers qu'il apprehendoit. A ces inquietudes, qui le trauailloient ainsi, & le tenoient en allarme, estoient ioints d'autres ennuis domestiques, dont les principaux procedoient des mauuais deportemens, & du cruel naturel de son fils aîné, qui deuoit heriter de ses Royaumes. Car dès son enfance il auoit commencé à dóner des preu- ues visibles de ses mauuaises inclinations, en ce qu'il faisoit mestier de tourmenter, & de battre ceux de son âge, & qu'il se mesloit dans ses actions vne cer- taine malice noire, de qui l'on ne pouuoit esperer qu'un extreme inhumanité. Or bien que l'Ynca fit tout son possible pour le corriger, sur l'esperance qu'il auoit que le iugement luy croissant avecque l'â- ge, luy feroit perdre cette premiere fougue de ieu- nesse, si est-ce que le voyant aller de mal en pis, il desespéroit tout à fait de luy, & le tenoit pour incor- rigible. Cependant il n'est pas à croire combien luy estoient sensibles toutes ces choses. Car quand il ve- noit à considerer avec combien de soing ses Prede- cesseurs s'estoient addonnez à la douceur & à la cle- mence, il luy desplaisoit extrememēt de voir que son

482 LE COMMENTAIRE ROYAL,
fils pratiquoit tout le contraire. Pour essayer donc
d'y mettre remede, il eut recours aux remonst-
rances & aux exemples des ses Ancestres, qu'il luy remit
en memoire, pour l'animer à bien faire, y adioustant
les paroles aigres, & mesme les effets particuliers
de son mescontentement. Mais quelque peine qu'il
prist, elle ne luy seruoit de rien, & il sembloit que le
ieune Prince s'estudiaist par ses actions, à ne point
faire mentir le prouerbe, qui dit, qu'il arriue rare-
ment que ceux qui sont grands de naissance quittent
les vices où ils sont enclins, & se rendent suscepi-
bles de correction. Il en donnoit vne preuue bié eu-
idente, en ce qu'il conuertissoit en poison tous les
remedes qu'on employoit pour guerir son mal, &
desraciner son inclination au vice, qui s'estoit desia
tournée en habitude. A quoy l'Ynca son Pere ne
sçachant plus quel ordre apporter, il se resolut enfin
de le disgracier tout à fait, & de le chasser, iusques-là
mesme, qu'en cas que cét exil ne le fit point sage;
pour luy apprendre à le deuenir, il luy prit enuie de
le desheriter, & de mettre à sa place vn de ses autres
enfans, qui ne degenerast point des vertus de ses
Ancestres. Il fut induit à cela par l'exemple de quel-
ques Prouinces de son Empire, où le fils qu'on ay-
moit le plus souloit auoir l'heritage, tellement que
le Roy s'aduisa de pratiquer le mesme, combien
que par le passé, l'on n'eust iamais vsé de cette ri-
gueur à l'endroit des autres Yncas. Auec ce dessein il
fit mettre hors de sa Cour & de sa maison ce mal-
heureux Prince, qui n'auoit alors que dix-neuf ans,
& voulut

& voulut qu'il fust confiné dans vn grand parc, appellé *Chita*, qui consistoit en plusieurs beaux pasturages, où ie me souuiens d'auoir esté plusieurs fois; Or d'autant qu'il y auoit là quantité de bestail consacré au Soleil, il luy ordonna pour punition de le mener paistre avec les autres Bergers. Le Prince ne pouuants'opposer à cet exil, fut contraint de s'y resoudre, & de souffrir cette disgrâce, qui estoit vn effet de son courage altier & mutin. Il se mit donc en la compagnie des autres Bergers, avec lesquels il garda les troupeaux du Soleil, & mena trois ans durant cette maniere de vie champestre, où ie suis d'auis de le laisser, iusques à ce qu'il soit temps de parler plus amplement de luy, & que les grandes choses qu'il fist depuis, nous donnent suiet de les escrire.

*De l'apparition d'un Fantosme au ieune Prince,
 Et d'un aduis qu'il luy donna pour en ad-
 uertir son Pere.*

C H A P. XXI.



Pres que l'Ynca *Yahuarhuacac* eust banny de sa presence son fils aîné, de qui l'on ne sceut pas le nom tant qu'il fut Prince, pource que celuy qu'auparuant on luy donna s'abolit avec le temps; ce qui aduint sans doute, pource que ces peuples n'ayans aucun vsage des lettres, oubloient

Ppp

facilement la plus-part des choses, qu'ils ne pouvoient se remettre en memoire que par la tradition qu'ils en auoient, il se resolut de ne faire plus la guerre. Quittant donc le soing de conquerir de nouuelles Prouinces, il tourna toutes ses pensées à gouverner paisiblement son Royaume. Cependant, il empeschoit tousiours le mieux qu'il pouuoit, que son fils ne s'eschapast, son dessein n'estant que de luy faire changer de vie. Car de conclure à le confiner dans vne prison perpetuelle, ou à le desheriter tout de bon, & mettre à sa place vn autre sien fils, toutes ces choses, à les bien considerer, luy sembloient violentes, & mal-assurées. Il les apprehendoit donc, tant pour l'importance, & la nouveauté du fait, qui estoit proprement profaner, & mesme deshonorer la diuinité des Yncas, qu'on tenoit pour Dieux, & pour enfans du Soleil, qu'à cause du peu d'apparence qu'il y auoit que ses Sujets endurent qu'il traitast avec cette rigueur le Prince son fils.

En cette apprehension qui luy donnoit sans cesse l'alarme, il passa trois ans entiers, durant lesquels tout ce qu'il y eut de memorable, fut qu'il enuoya par deux fois faire la visite de son Royaume, à quatre de ses parens, entre lesquels il partagea les Prouinces où chacun deux deuoit aller. En ce voyage ils eurent commission expresse de faire les reparations & les bastimens qu'ils iugeroient necessaires à la dignité de l'Ynca, & au commun bien de ses Sujets, tels qu'estoient les Canaux, ou les Aqueducs, les maisons Royales, les Magazins publics, les Fontai-

nes, les Ponts, les Chaussées, & ainsi des autres choses. Luy cependant n'osa point sortir de Cozco, où il employa le temps à solemniser les festes de l'année, principalement celles du Soleil, & à rendre la Justice à ses Sujets. Mais enfin comme il ne pensoit à rien moins, il arriva qu'un iour environ midy, le Prince disgracié entra tout seul dans la maison de son Pere, auquel il fist sçavoir qu'il estoit là, & qu'il auoit vne expresse Ambassade à luy faire. L'ynca bien fasché, luy enuoya dire qu'il eust à s'en retourner au lieu où il l'auoit confiné; sinon, qu'il le feroit exécuter à mort, pour auoir esté rebelle au commandement du Roy, sçachant bien qu'il n'estoit permis à personne de le violer, non pas mesme pour la moindre chose. La response que le Prince fit à ces paroles, fut qu'il n'estoit point venu là pour enfreindre son commandement, mais pour obeyr à un autre Ynca, qui estoit aussi grand Seigneur que luy, & qui l'enuoyoit pour luy dire certaines choses qui luy estoient grandement importantes; & partant que s'il desiroit de les apprendre, il luy donnât permission d'entrer, sinon, que pour s'acquitter de sa commission, il s'en retourneroit vers celui qui l'enuoyoit, auquel il rendroit compte de sa response.

L'ynca fut bien estonné d'oüyr que le Prince se disoit enuoyé par un aussi grand Seigneur que luy, & le fit entrer en mesme temps, pour apprendre que vouloient dire ces extrauagances, & qui estoit si hardy que de se seruir de son fils à faire de tels messages, sans considerer que ces nouveautez ne seroient pas

486 LE COMMENTAIRE ROYAL,
plustost descouuertes, qu'il les feroit chastier. Le Prince se voyant deuant son pere; Seigneur, luy dit-il, scache qu'aujourd'huy enuiron midy, comme ie me reposois soubs vn des rochers qui sont aux pasturages de *Chita*, sans scauoir si ie dormois ou non, tandis que pour t'obeyr i'y faisois paistre les troupeaux de nostre Pere le Soleil; voila qu'il s'est apparu à moy vn certain homme habillé d'vne estrange sorte, & d'vne mine bien differente de la nostre. Car il auoit la barbe fort longue, & vne robbe qui le couuroit iusques aux pieds, outre qu'il menoit en lesse vn animal qui m'est inconnu. S'estant mis d'abbord à parler à moy; Mon nepueu, m'a t'il dit, ie suis fils du Soleil, & frere de l'ynca Manco Capac, & de Coya Mama Oello Huaco sa femme & sa sœur, les premiers de tes Ancestres; à cause dequoy ie suis frere de ton pere, comme aussi de tous vous autres; & me nomme *Viracocha Ynca*. Or ce que ie viens icy de la part du Soleil nostre Pere, est pour te donner vn aduis de grande importance, afin que tu en aduertisses l'ynca mon frere. C'est que la plus-part des Prouinces de *Chinchafuyu*, suiuettes à son Empire, & les autres qui n'en releuent point, se sont mutinées, & ont pris les armes, avecque dessein de le precipiter de son Throsne, & de ruynér de fonds en comble la ville de Cozco Capitale de nostre Empire. Va t'en donc trouuer l'ynca mon frere, & dy luy de ma part, qu'il se tienne prest pour preuenir vn si grand mal, & y mettre le remede qu'il iugera necessaire. Pour ton particulier, scache qu'en quelque peine que tu sois

à l'aduenir, ie ne te manqueray iamais, & qu'en tes aduersitez ie t'assisteray comme vne personne qui est ma propre chair & mon sang; Et partant quelque grande affaire qui se presente, entreprends la courageusement, pourueu qu'elle soit digne de la Maiesté de ta race, & de la grandeur de ton Empire; Car pour t'en faire venir à bout, ie te seray fauorable, & te deffendray sans cesse, te donnant pour cét effet toute l'assistance qui te sera necessaire. Ayant proferé ces mots, conclud le Prince, l'Ynca Viracocha est disparu sans que ie l'aye veu depuis, & en mesme temps ie me suis mis en chemin, pour t'aduertir de ce qu'il a voulu que ie te disse.

Conseil des Yncas touchant l'apparition & l'aduis donné de la part de ce Fantosme.

C H A P. XXII.



L'Ynca *Yahuarhuacac* fût irrité si fort contre son fils, qu'au lieu d'adiouster foy à ses paroles, il luy respondit, qu'il estoit vn extrauagant, & que son humeur altiere l'auoit porté à dire effrontément les fables qu'il s'estoit imaginées, afin de les faire passer pour des reuelations de son pere le Soleil; Qu'au surplus il eust à s'en retourner bien viste à *Chita*, & à n'en sortir iamais, s'il ne vou-

488 LE COMMENTAIRE ROYAL,
loit esprouuer à son dommage les effets de sa colere.
Le Prince s'en retourna là dessus , faire l'office de
Berger, plus disgracié de son pere qu'il n'estoit aupara-
uant. Cependant les plus proches parents de l'Yn-
ca, tels qu'estoient ses freres , & ses oncles, qui se te-
noient près de sa personne, se figurerent diuerfes
choses touchant l'aduis que le Prince luy auoit don-
né; Car leur superstition ordinaire, principalement
en matiere de songes, fit qu'ils se donnerent l'allar-
me, & que pour ne le flâter, ils luy dirent; Qu'il ne
deuoit point mespriser l'aduis de l'Ynca Viracocha
son frere, Qu'il n'y auoit pas d'apparence que le Prin-
ce eust inuenté ces raisons au mespris du Soleil; Que
c'eust esté vn sacrilege de les imaginer seulement, &
à plus forte raison de les dire au Roy. Et partant qu'il
feroit bon d'examiner les paroles du Prince l'une
apres l'autre, de faire des sacrifices au Soleil; de con-
sultes les deuins, & de voir si les augures seroient ou
bons ou mauuais, pour faire les diligences requises,
& donner ordre à vne chose de telle importance.
Surquoy ils conclurent, que faire autrement seroit at-
tirer leur cômune ruyne au grand mespris du Soleil
leur Pere, qui leur enuoyoit ces aduis; loint que son
fils Viracocha s'en pourroit bien offenser, & qu'ainsi
il se trouueroit qu'ils adiousteroient faute sur faute.

Voilà le conseil que donnerent à l'Ynca tous ses
plus proches parents; Ausquels tant s'en faut qu'il
voulust adioster foy, qu'au contraire pour la gran-
de haine qu'il portoit à son fils, il leur dit pour
toute responce; Qu'il ne falloit point s'arrester au

dire d'un forcené , qui au lieu de corriger ses def-faits & son mauuais naturel , pour se rendre digne de l'amitié de son Pere , luy venoit compter de nouuelles extrauagances , pour lesquelles il meritoit d'estre desherité , comme il espéroit de le faire en peu de temps , & de mettre à sa place celuy de ses freres qui se rendoit digne imitateur de ses Ancestres , & du haut tiltre de fils du Soleil , pour sa clemence & sa probité. Il adiousta en suite , qu'il n'estoit pas raisonnable qu'un Insensé , qui par un ardent desir de vengeance ne suiuoit que les mouuemens de sa colere , entreprist luy seul de ruyner par un effet d'inhumanité tout ce que les autres yncas auoient reduit à leur Empire par leurs biens-faits , & par leur doux traitement ; Qu'il importoit plus de prédre garde à cela , pour preuenir les mal-heurs qui en pourroient arriuer , que de s'arrester aux impertinances d'un enragé ; Que ses propres discours authorisoient son effronterie , pour auoir osé dire que le message qu'il faisoit estoit de la part d'un fils du Soleil , & que pour estre sorty du lieu où il l'auoit exilé , il meritoit d'auoir la teste tranchée. La conclusion de ses paroles fut , de leur commander de ne parler iamais plus de cette affaire , mais de l'enseuelir plustost dans le silence , pource , leur dit-il , qu'on ne luy pouuoit faire un plus grand desplaisir que de l'entretenir d'un si mauuais fils , touchant lequel il sçauoit fort bien ce qu'il deuoit faire.

En effet les yncas voyant que leurs aduis deplaisoient au Roy , firent son commandement , & ne luy

496 LE COMMENTAIRE ROYAL,
parlerent plus de cela, combien qu'en leurs ames,
ils ne laissent pas d'estre tousiours en allarme, &
d'apprehender quelque euenement sinistre. Car la
coustume de ces Indiens, & de tous les autres Gen-
tils estoit d'estre fort superstitieux, sur tout en matie-
re de songes, principalement si le Roy s'y trouuoit
meslé, ou le Prince son heritier, ou bien leur souue-
rain Prestre. Aussi tenoient-ils tous ceux-cy pour
Dieux, & pour leurs plus grands oracles, ausquels les
Deuins & les Sorciers souloient demander raison de
leurs songes; afin de les expliquer, iusques-là mes-
me que si les Yncas ne vouloiēt dire ce qu'ils auoient
songé, ils en faisoient vne declaration publique.

*De la rebellion des Chancas, & de leurs ancien-
nes promesses.*

C H A P. XXIII.



Rois mois apres le songe du Prince *Viracocha Ynca* (car on l'appella tousiours ainsi, depuis qu'il eut veu ce fantosme) des nouuelles vindrent, bien qu'incertaines, que les Prouinces de *Chincasuyu* s'estoient souleuées au de là d'*Atahualla*, qui est à quarâte lieues de Cozco tirant vers le Nord. La renommée en sema le bruit confusement, & en cachette, comme c'est sa coustume en choses semblables, sans qu'il fust possible d'en sçauoir l'Auteur; Et bien qu'elle fust confirmée

confirmée par le songe qu'en auoit fait auparauant le Prince *Viracocha*, le Roy n'en fit point d'estat neantmoins, & prit cela pour vn compte fait à plaisir, pour renouueller l'apparition du Fantosme de qui l'on ne parloit plus. Voila cependant que peu de iours apres l'on ouyt dire la mesme nouuelle; Et toutesfois l'on ne laissoit pas de la mettre en doute comme auparauant, pource que les ennemis auoient fermé les passages en diligence, pour empescher qu'on ne sceust rien de leur entreprise pour le desir qu'ils auoient d'estre dans Cozco premier que les habitans fussent aduertis qu'ils s'y en alloient. Mais enfin l'on s'esclaircit de l'affaire au vray par les nouuelles qui vindrent pour la troisieme fois qui portoit, que les Nations appellées *Chanca*, *Vramarca*, *Vilca*, *Vltusulla*, *Hanco*, *Huallu*, & les autres Prouinces d'allétour s'estoient reuoltées, apres auoir mis à mort les Gouverneurs, & les Ministres que le Roy y auoit laissez, & qu'elle s'en venoit assieger la ville avec vne armée de plus de quarante mille hommes. Ces peuples estoient ceux-là mesme que nous auons dit s'estre reduits sous l'Empire du Roy Ynca, plus par l'apprehension de ses armes, que pour aucune enuie qu'ils eussent de l'auoir pour Roy, tellement que cela fut cause, comme il a esté remarqué en ce mesme endroit, qu'ils couuerēt tousiours depuis en leurs ames vne secreete animosité contre les Yncas, en attendant l'occasion de la pouuoir faire esclorre. Comme ils virent donc que l'Ynca *Yahuarhuacac*, n'estoit pas homme d'executiō, & qu'il auoit peur de son propre nom.

492 LE COMMENTAIRE ROYAL,
jointque les mauuais deportemens du Prince *Ynca Viracocha* son fils l'embarassoient grandement , & que depuis peu il couroit vn bruit parmy eux qu'il l'auoit disgracié plus qu'auparauant, sans que personne en sceust le suiet; toutes ces choses ensemble leur firent prendre leur temps , & s'ayder de cette occasion , pour tesmoigner qu'ils ne souffroient qu'à regret d'estre sous le joug de l'*Ynca*. Ainsi le plustost & le plus secretement qu'ils peurent , ils s'assemblerent de part & d'autre , & firent en sorte d'attirer à cette guerre tous leurs voisins , avec lesquels ils formerent vn corps d'armée de plus de trente mille hommes , & s'en allerent assieger *Cozco*. Les Auteurs de cette mutinerie, & ceux qui furent de cette ligue les autres Seigneurs du pays, furent trois Indiens principaux Curacas de trois grandes Prouinces de la Nation appelée *Chanca*, qui est vn nom sous lequel sont comprises plusieurs autres Nations. Le premier se nommoit *Hanco Huallu*, ieune Gentilhomme âgé d'environ vingt-six ans , le second , *Tumay Huaraca*, & le troisieme *Astu Huaraca*, qui estoient tous deux freres , & de *Hanco Huallu*. Auant le regne de l'*Ynca*, les Predecesseurs de ces trois Roytelets auoient eu tousiours guerre avec les peuples de leur frontiere, & particulieremēt avec les *Quechuas*, sous lequel nom sont comprises plusieurs Prouinces fort grandes. Et d'autant qu'il les traitoit tyranniquement , les *Quechuas* & leurs voisins furent bien aysez de se desliurer de l'insolence des *Chancas*, en se mettant sous la protection des

Yncas. Ce qu'ils firent de leur bon gré, & par amour plustost que par force ; Mais ils se laisserent enfin de cette domination de l'Ynca ; Car il leur despleur de voir qu'il arrestoit leurs heureux succez, & que de Seigneurs qu'ils estoient de plusieurs Vassaux, il les auoit rendus ses tributaires. Se reseruant donc la hayne secrette que leurs deuanciers leurs auoient laissée, ils se resolurent enfin de la mettre en euidence, & de leuer quantité d'hommes de guerre, par le moyen desquels ils se promettoient de venir à bout de l'Ynca, & de le vaincre facilement, pour ce qu'ils s'imaginoient de le prendre au depourueu, & qu'ainsi par vne seule victoire, ils pourroient se rendre maistres non seulement de leurs anciens ennemis, mais de tout l'Empire des Yncas.

Enflez de cette esperance ils firent leuée de gens, se seruant pour cet effet des suiets de l'Ynca, & de ceux qui ne l'estoient pas. Ce qui fit qu'attirez par les grandes recompenses qu'ils leur promirent, & par l'esperoir du butin, ils se laisserent persuader facilement, joint qu'il y auoit fort long-temps qu'ils tenoient les Chancas pour estre vaillants & aguerris. Ils firent General de leur armée vn valeureux Indien appellé *Hanco Huallu*, & prirent pour Maistres de Camples deux freres dont il a esté parlé cy-deuant, sans y comprendre les autres Chefs de leur Nation, avec lesquels ils s'en allerent à grandes journées assieger Cozco.

*L'Ynca sort de la ville de Cozco, qui est secourue
par le Prince.*

C H A P. XXIV.

L'Ynca Yahuarhuacac, ne se trouua iamais si confus ny si estonné qu'il le fut tout à la fois, d'estre asseuré de la venue des ennemis. Car il n'auoit peu croire que telle chose deust arriuer, veu que l'experience luy apprenoit que de toutes les Prouinces conquises par ses Predecesseurs, & soubmises à leur Empire, pas vne ne s'estoit encore reuoltée, depuis le premier Ynca Manco Capac iusques à luy, qui regnoit alors; tellement que cette assurance iointe à la haine qu'il portoit à son fils, qui luy auoit predit cette rebellion, l'empeschoit d'y adiouster foy, & de prendre l'aduis de ses parens, pource que la passion l'auengloit entierement. Comme il se vid donc maintenant reduit à ces dernieres extremitez, & qu'il n'auoit pas le temps de leuer des gens, pour s'en seruir à resister à ses ennemis, outre que la ville estoit despourueüe de garnisons pour se deffendre; en attendant du secours, il se resolut de ceder à la fureur des Rebelles, & de faire retraite à Collasuyu, où pour la fidelité des habitans ses Sujets, il se promettoit de mettre à couuert sa vie. Il s'y en alla donc avec ce dessein, suiuy d'un bien petit nombre d'Yncas, & fut iusques au

destroit de *Muyna*, qui du costé du Sud est à cinq lieuës de Cozco. Or pource qu'il estoit en doute de l'intention des ennemis, & de ce qu'ils faisoïent, il s'arresta là pour s'en asseurer, & apprendre par mesme moyen quel chemin ils auoient pris, & ce qu'ils pretendoient faire.

Cependant la ville de Cozco se trouua tout à fait abandonnée par l'absence de son Roy, sans qu'il y eust ny Chef, ny Lieutenant, qui osast parler, ny à plus forte raison entreprendre sa deffense; à cause dequoy pour preuenir le mal-heur qui les menassoit, ils s'en firent qui çà qui là en diuers endroits, selon qu'ils croyoient y pouuoir estre plus asseurez de leur vie. Comme ils s'abandonnoient ainsi à la fuite, il y en eust quelques-vns qui rencontrèrent le Prince *Viracocha*, qu'ils aduertirent de la rebellion de *Chinchasyu*, & de la retraite de l'Ynca son Pere, qu'ils luy dirent s'estre refugié à *Collasuyu*, pour auoir creu qu'il ne pouuoit apparemment resister aux ennemis, pource qu'ils le venoient prendre au despourueu.

Il fut grandement sensible au Prince d'ouyr dire que par la retraite de son Pere, la ville de Cozco estoit miserablemēt exposée à la mercy de ses ennemis. Ce qui fut cause qu'en mēme temps il y enuoya ceux là mesme qui luy auoient apporté cette nouuelle, & quelques-vns des Bergers qui luy tenoient compagnie. Par leur entremise il fit dire aux habitants, & à tous les Indiens qu'on trouuoit par les chemins, qu'ils eussent à tenir bon, & à suiure l'Ynca leur souuerain Seigneur, avec toutes les armes dont

ils se pourroient fournir ; adioustant qu'il esperoit de faire le mesme , & qu'à cette fin ils eussent à faire passer ce commandement des vns aux autres. Ayant donné cét ordre ; il courut apres son pere par des sentiers obliques , sans vouloir entrer dans la ville , & fit vne telle diligéce , qu'en fort peu de temps , il l'alla ioindre au destroit de *Muyna* , d'où il n'estoit point encore fortý. Là plein de sueur & de poudre , il se presenta deuant le Roy , avec vne lance en main , qu'il auoit prise par le chemin , & luy dit les paroles suivantes avec vne mine triste & serieuse.

Est-il bien possible , Seigneur ynca , Souuerain de cét Empire , que pour vne simple nouuelle , ou fausse , ou veritable qui t'est n'aguere venuë touchant la rebellion de quelques Vassaux , tu sois si mal conseillé que d'abandonner ta ville & ta maison , pour tourner le dos à des gens que tu n'as pas encore veus. Comment souffres-tu que la maison du Soleil ton Pere soit despourueuë de secours , & en danger d'estre foulée des ennemis ? Pourras-tu bien te resoudre à permettre qu'ils y mettent le pied , & que renouellant les abominations que tes glorieux Predecesseurs ont abolies , ils y sacrifient mal heureusement les hommes , les femmes , & les enfans , commettant dans ce lieu saint & sacré des sacrileges enormes , & des barbaries plus que brutales ? Si cela est , quel compte pourrons nous rendre des Vierges qui sont dediées au Soleil , pour le servir dans son Temple ? Comment garderont elles inuiolable la virginité qu'elles luy ont voüée ; si nous les laissons indignement à la brutalité de nos ennemis , qui en fe-

ront tout ce qu'ils voudront? Quel honneur nous reuindra-t'il d'auoir souffert lâchement tous ces desordres & ces mal-heurs, pour vn simple desir de prolonger nostre vie? Le permettre qui voudra, de moy tant s'en faut que i'y veuille consentir, qu'au contraire ie m'en vay de ce pas au deuant des ennemis, afin de me faire tailler en piéces auant que souffrir qu'ils entrent dans Cozco. Car ie ne suis pas d'aduís de voir les indignitez, ny les abominations que ces Barbares feront dans la ville Capitale de cét Empire, que le Soleil & ses enfans ont fondée. Me suiue donc qui voudra; puis que ie m'asseure qu'il ne viendra personne apres moy à qui ie n'apprenne à changer vne vie honteuse avec vne mort honorable.

Ayant acheué de parler ainsi, avec de grandes demonstrations de douleur & de tristesse, il prit le chemin de Cozco, sans vouloir ny boire ny manger, ce qui luy reüssit si à point, que les Yncas du sang Royal, qui estoient sortis avecque le Roy en la compagnie de leurs freres, de leurs nepueux, de leurs cousins, & de leurs autres parens, le suiuirent tous en mesme temps, iusques au nombre de plus de quatre mille hommes, si bien qu'il n'y eut que les vieillards inutiles à la guerre qui demeurerent avec le Roy, pour luy tenir compagnie. Ayant rencontré le long du chemin quantité de gens, qui fuyoient hors de la ville, ils les firent rebrousser, par l'aduís qu'ils leur donnerent que le Prince *Ynca Viracocha*, s'en alloit deffendre la ville & la maison de son Pere le Soleil. Dequoy les Indiens furent si contents, que tous les fugitifs y retournerent, principalement ceux qui

498 LE COMMENTAIRE ROYAL;
pouuoient estre vtils. Ainsi la parolle passant des
vns aux autres parmy ceux qui estoient à la compa-
gnie, ils se resiouirent tous extremement de sçauoir
que le Prince s'en alloit deffendre la ville, & cette
nouuelle leur fut si agreable, que leur plus grande
consolation fut de se resoudre de mourir avecque
luy. Aussi meritoit il bien qu'ils le suiussent, puis-
que son exéple estoit capable d'encourager tous les siens.

Avec cette resolution d'entrer dans Cozco, il cō-
manda que les gens qu'il s'en alloit ramassant de tou-
tes parts le suiussent en diligence. Luy cependant
passa outre, & prit le chemin de *Chinchasuyu*, par où
il sçauoit que les ennemis venoient: ce qu'il fit ex-
pres, afin de se mettre entre eux & la ville. Car son
intention n'estoit point de leur resister, sçachant
bien qu'il n'estoit pas assez fort pour eux, mais bien
de mourir en combattant vaillamment, auant que
les ennemis eussent moyen d'entrer dans la ville, &
de la profaner en hōmes victorieux & barbares, sans
porter aucun respect à la maison du Soleil; ce qui luy
desplaist plus que toutes les choses du monde. Or
pource que l'Ynca *Yahuarhuacac*, de qui nous auons
escrit la vie, ne regna que iusques icy, comme nous
verrons plus amplement, il me semble à propos de
coupper le fil de cette Histoire, pour diuiser ses actiōs
d'avec celles de son fils Ynca Viracocha, & y entre-
meler d'autres choses touchant le gouuernemēt de
cet Empire, diuersifiant l'un & l'autre, pour en faire
voir la differēce. En suite de quoy ie reuiendray aux
faits memorables du Prince Viracocha.

Fin du quatriesme Livre.



L E

COMMENTAIRE ROYAL DES YNCAS.

LIVRE V.

Où il est parlé du partage que les Indiens faisoient de leurs terres, & de la maniere de les cultiver : Du tribut qu'ils payoient à l'Ynca. De leurs armes, & de leurs munitions de guerre : Du soing qu'ils prenoient de reuestir leurs sujets, & de ne souffrir aucuns mendiens : Des Loix, & des Ordonnances par eux faites en faueur de leurs Vassaux, & de plusieurs autres choses remarquables. Avec vn recit des grandes victoires, & des actions genereuses du Prince Ynca Viracochá, huitiesme Roy du Peru : De l'infortune de son Pere, que l'on priva de l'Empire : De la fuite d'un grand Seigneur, & d'un presage de la venue des Espagnols en ces contrées.

R r r

De l'accroissement que les Yncas faisoient des terres ; Et de quelle façon ils les souloient partager à leurs Suieçts.

C H A P I T R E. I.



Vissi tost qu'un Ynca victorieux auoit conquis quelque Royaume ou quelque Prouince, & pourueut au gouuernement des villes, qu'à la nourriture des habitans, conformément à leurs Loix, & à leur Idolatrie, il donnoit ordre que les terres labourables, c'est à dire, celles qui portoient du Mayz, fussent augmentées & rendues fertiles. Il employoit pour cet effet les Ingenieurs, & les maistres des fontaines, dont il y en auoit parmy eux de fort habiles, côme il se voit encore au iourd'huy par les marques qui en sont restées. Ces Ingenieurs faisoient donc les canaux necessaires, selon le profit que l'on pouoit retirer des mesmes terres. Car il faut sçauoir que tout ce pays en a fort peu qui portent du bled, à cause de quoy ils s'employoient de tout leur possible à les deffricher & à les accroistre. Et d'autât que pour estre sous la Zone Torride, elles ont un extreme besoing d'estre arrosées, ils estoient si curieux de cela, qu'ils ne semoient iamais leur mayz ou leur bled, sans les arroser. Ils obseruoient aussi le mesme en leurs pasturages ; & par l'abondance de l'eau qu'ils tiroient de ces canaux en les ouurant, ils suppleoient au def-

faut de celle de l'Automne, n'estant pas moins soigneux de la fertilité de leurs pasturages que de leurs champs, pour le grand nombre de bestail qu'ils auoient. L'on voit encore aujourd'huy les vestiges de ces canaux, faits autresfois pour arroser les prairies, qui se perdirent par l'arriuee des Espagnols en ces pays là.

Après qu'ils auoient fait les canaux ils applanissoient les champs en forme quarree; afin qu'ils en fussent mieux arrosez. Auecque cela pour applanir plus facilement les tertres, ou les endroits raboteux, dont le terroir estoit bon, ils y faisoient des dehors ou des saillies, comme il se voit encore au iourd'huy à Cozco, & en tout le Peru. Pour venir à bout de cet ouurage, ils esleuoient trois murailles de bonne pierre, l'une par le deuant, & l'autre par les costez, qu'ils faisoient pancher en dedans, cōme toutes les murailles qu'ils ont accoustumé de bastir, afin de pouuoir plus aysemēt supporter la pesanteur de la terre, qu'ils rendoiēt esgale au mur; puis en suite de la premiere saillie, ils en faisoient vne secōde, qui estoit moindre, & vne troisieme encore plus petite. De cette façon, ils gaignoient peu à peu tout le terre, & l'applanissoient par le dehors, en façon d'escalier, iouissans ainsi du fruiēt de toute la terre, qui estoit bonne à semer, & qui pouuoit estre arrosée. Que si de hazard ils y trouuoient quelques veines de rocher, ils les ostoiēt incontinent, & les combloient de terre, afin de faire tout profiter. Les premieres saillies ou plateformes, estoient grandes selon la situation du lieu,

502 LE COMMENTAIRE ROYAL,
comme ayant ou plus ou moins d'estenduë iusques à
trois cens pas de longueur & de largeur. Les secon-
des estoient moindres, & ainsi elles alloiët tousiours
en diminuant, iusques aux dernières, qui estoient
de deux ou trois arpents à semer du mayz. Car les
Yncas se rendoient si curieux de cela, & d'accroistre le
nombre des terres labourables, qu'il arriuoit quel-
quefois qu'en diuers endroits ils faisoient venir vn
canal de quinze ou vingt lieuës, pour arroser des
champs de fort petite estenduë, de peur que le ter-
roir ne demeurast en friche.

Comme ils auoient augmenté les terres, ils pre-
noient les dimentions de toutes celles de la Prouin-
ce, qu'ils diuisoient en trois parties, dont la premiere
estoit pour le Soleil, La seconde pour le Roy, Et la
troisieme pour ceux du pays. En quoy ils prenoient
tousiours soigneusement garde, qu'en matiere de se-
mer, ils eussent tousiours du lieu de reste, plustost
que d'en auoir faute. Que si le nombre du peuple
croissoit insensiblement dans quelque Prouince, à
force de la peupler, en tel cas ils retranchoient de la
part du Soleil ou de l'Ynca, ce qu'ils iugeoient estre
necessaire aux Vassaux; D'où il s'ensuiuoit que le
Roy ne prenoit pour soy mesme, ny pour le Soleil,
que les terres qui auoient à demeurer desertes, sans
estre sous la domination d'aucun; Et pour le regard
de celles qu'on auoit rendues labourables, elles es-
toient pour la plus part annexees au domaine du
Soleil, & de l'Ynca, pource que le Roy seul y auoit
fait trauailler. Outre les champs de mayz, que l'on

souloit arroser, ils en partageoient d'autres qui n'auoient besoing que de l'eau du Ciel, & y semoient des graines & des legumes de grande importance, comme sont celles qu'ils appellent *Papa*, *Yca*, & *Annuu*. De toutes ces terres ils en donnoient le tiers aux Vassaux, & le reste au Soleil, & à l'Ynca. Et d'autant qu'elles estoient steriles, à faute d'estre arrosees, ils ne daignoient y semer qu'une ou deux fois l'annee, & les laissoient en frische à dessein, pour cultiuier les autres chacun à son tour; & ainsi l'abondance des vnes suppleoit à la sterilité des autres. Il ne se passoit point d'annee en laquelle ils ne semassent les terres, qu'ils iugeoient propres à porter du mayz, & y mettoient si bon ordre, qu'à force de les arroser, & de les fumer, comme on fait les iardins, elles produisoient tousiours: A quoy j'adiouste qu'outre le mayz, ils souloient semer vne certaine graine appelée *Quinua*, presque semblable au ris qui se cultiuoit aux pays froids.

De l'ordre qu'ils obseruoient à cultiuer leurs terres ; Et de leur commune resiouissance, quand ils labouroient celles de l'Ynca, & du Soleil.

C H A P. II.



Vandil estoit question de labourer, & de cultiuer quelques pieces de terre, ils y procedoient, comme en tout le reste, avecque l'ordre requis. Car ils labouroient premierement celles du Soleil, des Orphelins, & des Veufues, comme pareillement des personnes que la vieillesse ou la maladie rendoit inhabiles à la vie aëtiue. Et d'autant que tous ceux cy estoient mis au rang des pauvres gens, l'Ynca commandoit pour cet effet que l'on eust à labourer leurs terres. Il y auoit en chaque ville, ou en chacun de ses quartiers, si elle estoit grande, des hommes expressement deputez pour faire valoir les terres des pauvres. Ces officiers, que l'on nommoit *Lactacamayn*, c'est à dire, les Commissaires de la ville, se donnoient le soing, quand la saison le requeroit, de labourer la terre, de la semer, & de faire la recolte; puis quand il estoit nuit close, ils montoient sur des eschauguettes & sur des tours faites pour cela, où apres auoir sonné la trompette, afin qu'on les escoutast, ils proferoient ces paroles à haute voix. *C'est aujourdhuy que l'on laboure les terres des impotents ; Et voila pour-*

quoy ceux qui pretendent d'y auoir quelque interest en sont aduertis, afin qu'ils ayent à s'y trouuer. Comme en effet ceux de chaque communauté, qui par le roolle qui en auoit esté fait sçauoient en quelles terres de leurs parens, ou de leurs alliez, ils se deuoient treuuer, ne manquoient point de s'y rendre. Auecque cela chacun estoit obligé de porter sa prouision à ses propres frais & despens, & non pas des pauures à qui les terres appartenoint : Ce qu'ils faisoient tres-volontiers, alleguant pour raison que les Orphelins, les Veufues, les Vieillards, & les malades estoient assez empeschez d'eux mesmes, sans se mettre en peine d'autrui. Que si les impotens ou les pauures n'auoient ny mayz ny autres graines à semer, en tel cas on leur en souloit fournir des magazins publics, dont il sera parlé cy apres. Les terres des soldats qui s'occupoient à faire la guerre, estoient pareillement cultiuées, comme celles des Veufues, des Orphelins, & des pauures; & tandis que les maris seruoient dans les armées, à cause de leur absence, leurs femmes estoient mises au roolle des veufues, & on leur faisoit ce bien, comme à des personnes incommodées. Que s'il arriuoit qu'ils mourussent à la guerre; on prenoit alors vn soing tres-particulier de leurs enfans, & quand ils estoient en aage on les marioit aux despens du public.

Après qu'ils auoient ainsi trauaillé aux terres des pauures, ils labouroient les leurs, chacun à son tour, puis celles du Curaca, qui deuoient estre les dernieres à

506 LE COMMENTAIRE ROYAL,
labourer en chaque ville ou Prouince, ie diray à ce
propos, qu'au temps de *Huayna Capac*, il arriua en
vne ville de *Chachapuya*, qu'un Gouverneur Indien,
pour auoir proferé les terres d'un Curaca, son parent
à celles d'une pauvre veufue, fut pendu & estranglé,
comme violateur de la Loy que l'Ynca auoit establie
touchant le fait du labourage, & la potence dressée
au champ mesme du Curaca. Par l'ordonnance de
l'Ynca, il falloit que les terres de ses suiets fussent la-
bourees auant les siennes, aussi n'y manquoient ils
pas & en estoient fort soigneux, pource, disoient
ils, qu'il ne se pouuoit faire que le Roy ne fust bien
seruy quand les suiets estoient à leur ayle; Comme au
contraire s'il y auoit de la pauvreté parmy eux, ils
estoient inutiles en temps de paix & de guerre.

Les terres du Roy, & du domaine du Soleil estoient
celles qu'ils labouroient les dernieres. Quand il fal-
loit qu'ils s'occupassent à ce trauail, tous les Indiens
generalemēt s'y en alloient ensemble avec beaucoup
de resiouissance, prenant les plus beaux habits qu'ils
eussent, où esclatroyent des grandes placques d'or &
d'argent; & sur la teste ils portoyent quantité de belles
plumes. Lors qu'ils faisoient les guerrets, ce qui estoit
le trauail auquel ils se resiouissoient le plus, ils disoient
diuerſes chansons composées à la louange de leurs
Yncas, & tournoient en allegresse toute cette fati-
gue; à cause que ce qu'ils en faisoient se rapportoit
directement au seruice du Soleil & de leur Roy.

Dans l'enclos de la ville de Cozco, en ce mesme
endroit du mont où se void la Citadelle, il y auoit

vne

vne piece de terre de grand rapport , appelée *Cotcampata* , qui se peut bien voir encore si lon n'y a basti depuis. Le quartier où elle est , a pris son nom de la terre mesme qu'ils tenoient pour estre vne des principales richesses du Soleil , pour auoir esté la premiere chose qui luy fut dediée en tout l'Empire des Yncas. Il n'estoit permis qu'à ceux de sang Royal de labourer cette terre ; tellement que les seuls Yncas & les Pallas y pouuoient trauailler. Aquoy certes ils s'employoient de tout leur possible , & solemnisoient ce iour avec beaucoup de resiouissance , principalement quand ils faisoient les guerets. Car alors les Yncas se paroient de leurs principaux attours , & de leurs plus riches ioyaux. Durant ce trauail , ils laissoient à part tous les soucis , & chantoient à l'enuy , pour tesmoigner combien ils prenoient en gré leur peine. Les chansons qu'ils disoient à la loüange du Soleil & de leurs Roys , estoient toutes composées sur le mot *Haylli* , qui signifie triomphe en la langue generale du Peru , comme s'ils eussent voulu dire par là , qu'en fendant la terre ; & la desfrichant pour luy faire porter du fruit , ils s'en rendoient maistres , & triomphoient d'elle. Parmy ces chants d'allegresse , ils entremesloient les mots les plus agreables , & les plus ordinaires aux gens de guerre , & aux fidelles Amants , le tout sur le sujet de la terre qu'ils labouroient. Le mot *Haylli* estoit le refrain de tous leurs couplets , & ils le repetoient autant de fois , qu'ils le iugeoiét necessaire , pour l'accommoder à la cadence , en vn certain contre-temps qu'ils sou-

508 LE COMMENTAIRE ROYAL,
loient faire d'un bout à l'autre, afin de prendre ad-
uantage à mieux trauailler.

Ils ont ordinairement pour soc de charrue vn cer-
tain pieu de la longueur d'un bras, plat par deuant,
& rond par derriere: il a quatre doigts de large, &
vne assez bonne pointe, afin d'entrer plus auant dans
la terre. Ils l'estençonnet par le milieu avec deux
pieux attachez au principal, où l'Indien met le pied,
& ainsi à force de presser le soc, & de le fouler, il l'en-
fonce iusques à l'estençon. De cette façon, comme
ils vont par troupes, sept à sept, & huit à huit, tant
du plus que du moins, selon que le nôbre des parens
est grand ou petit; il iettent à costé des sillons de si
grâdes mottes de terre, que si l'on ne les voyoit, il ne
seroit pas possible de croire que de si foibles outils
peussent produire de tels effets. En ce trauail les fem-
mes aydent ordinairement aux hommes à soufleuer
les mottes, & à desraciner les mauuaises herbes, afin
d'auoir moins de peine à l'aduenir. Elles chantent
aussi avec eux, taschant le mieux qu'elles peuuent de
s'accorder ensemble, quand il faut repeter le mot
Haylli.

L'air de ces chansons des Indiens ayant semblé
assez agreable au Maistre de la Chapelle de l'Eglise
Cathedrale de Cozco, il me souuient que l'an mil
cinq cens cinquante vn; il s'aduisa de le mettre sur
l'Orgue, & de composer vn motet dessus, à l'hon-
neur du tres-sainct Sacrement de l'Autel, s'accom-
modant le mieux qu'il pût au chant de ce peuple.
Huit jeunes garçons Mestis, & mes compagnons

d'eschole vestus à la mode du pays, & chacun d'eux ayant en main vn soc de charruë, chanterent à la procession le *Haylli* des Indiens, tout le cœur de musique leur respondant, au grand contentement des Indiens, qui estoient ravis d'ayse & de merueille de voir que les Espagnols se seruoient de ce chant là, pour solemniser la feste de nostre Dieu, qu'ils appellent *Pachacamac*, c'est à dire, *Celuy qui donne vie à l'Vniuers.*

I'ay bien voulu rapporter les particularités qu'obseruoient les Yncas, le iour qu'ils defrischoient cette piece de terre, qui estoit dediée au Soleil, pour les auoir deux ou trois fois remarquées en mon basage; Ce que i'ay fait encore, afin que cela serue à tirer des consequéces touchât les autres festes que les Péruuiens souloient celebrer, quand ils trauailloient aux champs du Soleil & de l'Ynca, bien que ceste feste, ou pour mieux dire, cette allegresse publique, ne fust que l'ombre des autres, qu'ils solemnisoient au temps de leurs Yncas, à ce que disoient les Indiens.

Du partage des terres fait aux Indiens; Et de la methode qu'ils obseruoient à les engraisser.

C H A P. III.

ILs donnoient à châce Indien vn *Tapu*, comme qui diroit vne piece de terre, pour y semer du mayz. Il est vray que par ce mesme mot ceux de pays denotent encore vne lieue de che-

510 LE COMMENTAIRE ROYAL;
min, ioint qu'ils le font verbe, & alors il signifie *mesurer*, appellant *Tupu*, quelque mesure que ce soit, ou d'eau, ou de vin, ou d'autre liqueur, comme pareillement les grandes espingles dont les femmes ont accoustumé d'attacher leurs robes. Aquoy i'adiouste que la mesure de leurs grains a vn autre nom que celuy de *Tupu*, à sçauoir *Poccha*, contenant environ six boisseaux.

Vn *Tupu* de terre suffisoit pour la nourriture d'un homme marié, pourueu qu'il n'eust aucuns enfans: aussi tost qu'il en auoit, l'on donnoit à châce masse vn *Tupu*, & à châce fille la moitié de cette mesure tant seulement. Que si le fils de la maison se marioit, son pere luy donnoit alors la piece de terre qu'il auoit receuë pour son entretenement: Car la Loy du pays vouloit qu'il le fist ainsi, quand il le mettoit hors de la maison.

Les filles n'estoient point receuës à ce partage, pour leur tenir lieu de domaine, quand elles se marioient, mais de nourriture tant seulement; Car il suffisoit qu'on eust donné ces terres à leurs maris, sans qu'elles les possédassent; Aussi ne se mettoient ils point en peine des femmes, depuis qu'elles estoient mariées, mais bien durant qu'elles estoient filles, ou veufues, ou qu'elles n'auoient personne qui se donnast vn soing particulier de leur entretenement. Que si les peres n'auoient de quoy se passer de ces terres, ils les reseruoient entel cas: sinon, ils les rendoient à la communauté, pource qu'on ne pouuoit ny les acheter, ny les vendre. Touchant les terres qu'ils donnoient pour y semer les legumes, qu'il

n'estoit pas besoing d'arroser, ils les partageoient de mesme façó que les autres, où l'ó semoit du mayz.

Quant au partage des terres de la Noblesse, l'ordre en estoit tel, qu'aux Curacas, qui estoient Seigneurs de plusieurs Vassaux, ils en donnoient plus ou moins, selon le nombre des femmes, des enfans, des maistresses, des seruantes, & des valets qu'ils auoient. Ce qu'ils obseruoient encore, bien qu'avecque plus d'aduantage enuers les Yncas du sang Royal, entre lesquels ils partageoient les meilleures terres, sans y comprendre la part qu'ils auoient tous en commun aux possessions tant du Roy que du Soleil, comme fils de l'un, & frere de l'autre.

Ils fouloient fumer les terres, pour les rendre plus fertiles; Où il est à remarquer, qu'en tout le plat pays de Cozco, & presque en tous les lieux de montaigne, ils vsoiét pour cet effet d'excremens humains; Et d'autant qu'ils les croyoient plus propres à cela que toute autre sorte de fiét, il n'est pas à croire cobié ils estoient soigneux d'en ramasser, pour en engraisser la terre qui portoit du mayz, apres l'auoir seiché & réduit en poudre. Par tout le pays de Collao, à plus de cent cinquante lieues à la ronde, où il ne croist point de mayz, à cause de la froideur du climat, ils ont accoustumé de semer des *Papas*, & d'autres legumes, & engraisent la terre avecque du fient, pource qu'ils le croient plus propre à cela que toute autre chose.

En toute la coste de la mer depuis *Arequipa*, iusques à *Tarapaca*, où il y a plus de deux cens lieues de longueur, ils n'vsent point d'autre fient que

512 LE COMMENTAIRE ROYAL,
de l'emutiffement de certains oyseaux, qu'ils appel-
lent des *Passereaux marins*, dont il y en a vn si grand
nombre en toute la coste du Peru, qu'il n'est pas pos-
sible de les voir voler par troupes sans en estre eston-
né. Ils se nourrissent dans les isles desertes de ceste
coste, qu'ils blanchissent de telle sorte à force d'y
emurir, qu'on prendroit ce lieu de loing pour quel-
que montagne couuerte de neige. Au temps des
Roys Yncas on estoit si soigneux de la conseruation
de ces oyseaux, que lors qu'ils couuoient leurs œufs,
il n'estoit permis à personne, sur peine de la vie, d'en-
trer dans les isles où ils estoient, de peur de les effra-
yer, & de les faire sortir de leurs nids, ny de les tuer
encore moins, ou dans les isles ou dehors, sur les
mesmes peines.

L'Ynca souloit reseruer chacune de ces Isles pour
telle Prouince que bon luy sembloit: Que si l'Isle
estoit grande, il la donnoit à deux ou trois Pro-
uinces ensemble, & y faisoit mettre des bornes,
afin que ceux d'vne Prouince n'empierassent sur les
autres. Que s'il estoit question de distribuer plus par-
ticulierement ce fient, en cela ils obseruoient si bien
les limites; que sans en sortir, ils partageoient ega-
lement châce ville, & châce habitant, sans que
l'vn en peust frustrer l'autre, sur peine d'estre ex-
ecuté à mort, ny tirer des bornes prescrites que
la quantité de fient qu'on luy auoit donnée, selon
l'estenduë des terres qu'il auoit, sur peine en cas de
contrauention d'estre chastié comme voleur. On vse
aujourd'huy tout autrement qu'on ne faisoit iadis de

l'emutiffement de ces oyseaux, qui est fort propre à engraisser la terre, & à la rendre fertile.

En d'autres pays de la mesme coste, comme en la Contrée d'*Atica*, d'*Atiripa*, de *Villacori*, de *Malla*, & de *Chilca*, ils n'vsent pour tout fient à engraisser la terre, que des testes de sardines, qu'ils y sement en abondance. Dequoy les habitans de ces contrées & les autres que nous auons nommez viennent à bout avecque beaucoup de peine, pour l'extreme disette qu'ils ont d'eau, pour enarroser la campagne. Car il est certain, qu'il y a plus de sept cens lieues de coste en longueur, où il ne pleut iamais; ioint que la terre n'est arrosée d'aucunes riuieres. Elle est toute sablonneuse, & grandement chaude à cause dequoy les villes y sont la plus part proches de la mer, afin que par l'humidité du lieu les habitans y puissent plus commodement semer du mayz. Pour ce mesme effet, ils ont accoustumé d'oster tout le sable qui est par dessus la terre, & de la creuser, iusques à ce qu'ils trouuent de l'eau. Ces pieces de terre ne sont pas égales, mais plus ou moins grandes ou petites. Aux moindres on y peut semer demy boisseau de grain, & aux plus grandes trois ou quatre boisseaux. Ils ne les labourent iamais, pourée qu'elles n'en ont pas besoin. Quand ils y veulent semer, ils se seruent d'un baston assez gros & pointu par le bout, avec lequel ils font vn trou bien auant dans le sable; ou en vne proportion à peu pres esgale, ils enterrent les testes des sardines, apres y auoir mis dedans deux ou trois grains de mayz. Quelques vns neantmoins tiennēt,

que cette maniere de fumer la terre, est plustost nuisible que profitable. Mais quoy qu'il en soit, la prouidence Diuine, qui met ordre abondamment à toutes les choses du monde, ne laisse point despourueus ces Indiens; & avec ce qu'elle leur donne l'inuentio d'vser de ces oyseaux pour la fertilité du pais, à certaine saison de l'année la mer iette à bord vne si grande quantité de sardines viues, qu'ils en ont de reste, & pour leur prouision, & pour engraisser leurs champs, iusques là mesme que s'ils les vouloient ramasser toutes, ils en pourroient charger plusieurs nauires. Quelques-vns recherchant la cause pourquoy ce poisson sort de la mer en si grand nombre, disent, qu'ils le font, pour se garantir de la violence des plus grands, comme sont les Rayes, & les Baleines, qui leur font la guerre pour les manger; ce qui tourne entierement au commun profit des habitants du pays. Quand on leur demande qui a esté le premier inuenteur de semer ainsi le mayz, & de l'enseuelir dans des creux qu'ils font, ils n'en sçauent point rendre raison, tellement qu'il est à croire qu'ils l'ont appris de la necessité, qui a cela de propre de rendre ingenieux les plus grossiers. D'ailleurs y ayant fort peu de terres en tout le Peru, où l'on puisse semer du bled pour faire du pain, il est à croire que ces Indiens ont recherché toute sorte de moyens pour les rendre labourables; de maniere qu'il ne faut pas s'estonner si tous en general semoient les grains qui leur estoient necessaires pour la nourrirure de leurs familles, sans que par consequent ils eussent besoing
ny de

ny de vendre les prouisions de bouche, ny de les encherir, comme gens qui ne sçauoient ce que c'estoit, ny de disette ny de cherté.

*Du partage qu'ils faisoient de l'eau pour arroser les terres; & de la punition des fau-
neants, & des paresseux.*

C H A P. IV.



Vx terres où il y auoit peu d'eau pour les arroser, on obseruoit cette methode, comme en toutes les autres choses, d'en donner à chacun à son tour la quantité qui luy estoit necessaire, afin qu'il n'y eust entre eux aucun differend là dessus: Ce qui s'obseruoit principalement aux années de seicheresse; & lors qu'il pleuuoit le moins. Or comme l'experience leur auoit appris quelle quantité d'eau il falloit auoir pour arroser vne piece de terre, ils permettoient à chaque Indien d'arroser son champ durant les heures qu'ils iugeoient à peu près conformes pour y satisfaire abondamment; Ce qu'ils faisoient chacun à son tour, sans que le plus riche ny le plus noble fust preferé à celui qui l'estoit le moins, non pas mesme le fauory, ny le parent du Curacay ny le Ministre ou le Gouverneur d'une Prouince du Roy. Si quelqu'un se monstroient non-chalant en matiere d'arroser sa terre dans le temps qui luy estoit

516 LE COMMENTAIRE ROYAL,
prescrit, l'on en faisoit vn chastiment exemplaire, en
luy donnant publiquement trois ou quatre coups de
pierre sur les espaules; ou bien ils le fouïetoient aux
bras & aux cuisses avec des verges d'osier, & l'appel-
loient faincant & lasche: Ce qui estoit parmy eux vne
grande iniure, qu'ils exprimoient par le mot *Mez-*
quitullu; c'est à dire os delicat, comme composé qu'il
est de *Mezqui*, qui est le mesme que *doux* ou *delicat*, &
de *Tullu*, qui signifie vn ossement.

*Du tribut qu'ils souloient donner à l'Ynca; & du
soing qu'ils auoient de leurs greniers.*

C H A P. V.



Pres auoir dit de quelle façon les Yncas
auoient accoustumé de partager leurs
terres, & de gratifier leurs subiets, il sera
fort à propos, ce me semble, de monstrier
quelle sorte de tribut ils souloient donner à leurs
Rois. Le principal estoit de labourer les terres du So-
leil & de l'Ynca, de les défricher le mieux qu'ils pou-
uoient, de faire la recolte des grains, & de les ferrer
dans les greniers, ou dans les magasins du Roy, dont
il y en auoit vn exprés en châce ville: où il faut re-
marquer que le fruiet ou le grain, que ceux du pays
nomment *Vehu*, & les Espagnols *Axi*, n'estoit pas
des moins considerables.

Ils appellent *Pirua* leurs greniers ordinaires, l'en-

enclos desquels est d'argile, où ils entremeslét du chaume. Au temps de leurs Roys ils y fouloient trauailler avec beaucoup de soin & de curiosité, & de les faisoient longs, ou plus ou moins, selon la hauteur des murailles; Ils estoient estroits & quarrez, les vns grands & les autres petits, suiuant la quantité des grains qu'ils y vouloient mettre. Dans le quarré que faisoient les quatre murs, il y auoit des separations differentes, en forme de ruës, ou pour mieux dire de galleries, pour les remplir, ou les vuider quand il en estoit tēps. Ils laissoient pour cet effet ouuertes par le deuant du grenier certaines fenestres en quarré, par où se vuidoit le grain à boisseaux, dont ils sçauoient à peu près le compte sans le mesurer; & selon que la cloison estoit ou large ou estroite, ils iugeoient par coniecture, combien de mayz il y pouuoit auoit dedans. Le me souuiens d'auoir veu quelques vns de ces greniers faits au temps des Yncas, & qui deuoient estre des principaux, pource qu'on les auoit bastis dans la maison des Vierges esleües, & destinées au service du Soleil. Mais comme le temps apporte de la reuolution à toutes choses, il auoit changé les hostes de cette maison, où demeuroient lors que ie la vy, les fils de Pedro de Barco, qui auoient esté mes compagnons d'eschole.

L'on souloit faire & ferrer aussi separement la recolte des grains du Soleil, & de l'Ynca, bien que toutesfois ce ne fust qu'un mesme enclos; & lors qu'il falloit semer leurs terres, ceux qui en estoient maistres, à sçauoir le Soleil mesme & le Roy fournissoient

518 LE COMMENTAIRE ROYAL;
de quoy le faire. Cestoit à leurs despens encore
que les Indiens, qu'on y faisoit trauailler, estoient
nourris & entretenus; tellement que ces manœu-
res n'y apportoitent que le trauail de leur corps.
Quand la saison de la recolte estoit venuë, les subiets
de l'Ynca la faisoient, sans estre obligez de luy en
donner aucune chose par maniere de tribut, comme
le confirme le R. P. Ioseph Acosta par ces paroles,
tirées du quinziésme Chapitre de son sixiésme Liure,
où parlant de cette matiere; l'Ynca, dit-il, donnoit à la
Communauté la troisiésme partie des terres. Or bien qu'on ne
puisse pas dire au vray si cette portion estoit ou moindre ou plus
grande que celle de l'Ynca, & des Gacas, si est-ce qu'il est cer-
tain qu'on prenoit garde qu'elle peust suffire abondamment à
la nourriture des habitans de châce ville. Pas vn des particu-
liers ne possédoit en propre aucune chose de ce tiers, ou de cette
troisiésme partie, si ce n'estoit par vne grace spéciale de l'Ynca;
encor ne la pouuoit on pas aliener, ny la faire passer aux heri-
tiers. L'on partageoit tous les ans ces terres de la Communauté,
& en donnoit-on à chacun telle part que l'on iugeoit nécessaire
pour l'entretienement de ceux qui auoient vne femme & des en-
fans; & ainsi on les partageoit ou plus ou moins, selon la charge
de leur famille, y ayant pour cet effet des portions & des mesures
reiglées. Ceux qui receuoient ce partage n'en payoient point d'au-
tre tribut, sinon qu'ils labouroient & faisoient valoir les terres
tant de l'Ynca que des Gacas, se donnant le soing d'en serrer les
grains. Voila ce qu'en dit le P. Acosta, qui appelle
terres des Guacas celles du Soleil, pource qu'elles luy
estoient consacrées.

En toute la Prouince des Collas, à plus de cent

cinquante lieuës de longueur on ne cueille aucun mayz, à cause de la froideur du climat, mais bien quantité de *Quinna* qui est comme du ris, & d'autres semences & legumes, qui croissent dans la terre, entre lesquelles est remarquable celle qu'ils appellent *Papa*, qui est ronde, & fort suiette à se corrompre, à cause de son humidité. Pour empêcher que cela n'arriue, ils la mettent sur de la paille, dont il y en a de fort bonne en cette contrée, & l'exposent à la gelée durant plusieurs nuits, car cette Prouince est si froide qu'il y gele toute l'année: en suite de quoy ils couurent ces legumes avec de la paille, & les escachent doucement, afin d'en faire sortir l'humidité, qui leur est naturelle, ou que la gelée leur cause. Apres cela ils la mettent au Soleil, pour la faire seicher entierement, & prennent garde sur tout que le ferein ne donne dessus. Cette maniere de legume ainsi preparée changeoit de nom. Car en lieu de *Papa* ils l'appelloient *Channu*, & la conseruoient vn assez long temps, ioint qu'ils en faisoient de mesme de toutes celles qu'ils cueilloiët dans les terres du Soleil & de l'ync, aqu'on souloit garder dans les magasins publics avec les autres legumes, & semences.

Des habillemens, des armes, & de la chaussure qu'ils souloient faire pour l'usage des gens de guerre.

CHAPITRE. VI.



Vire le principal tribut, qui consistoit à semer les terres, à recueillir les grains & à faire valoir les revenus du Soleil, & de l'Ynca, ils en souloient donner vn autre, qui estoit de faire les habits, les armes & la chaussure des soldats, & des pauvres gens, que la vieillesse ou la maladie rendoit inhabiles au travail. Quand il estoit question de partager, ou de payer ce tribut, on y obseruoit le mesme ordre qu'aux autres choses. Les habillemens qui se faisoient en toute cette contree estoient de laine, que l'Ynca souloit fournir de ce nombre infiny de troupeaux qui luy appartenoient, & à son Pere le Soleil. Au pays plat, c'est à dire en toute la coste de la mer, où la chaleur du clymat empeschoit que les habitans ne portassent des robbes de laine, ils en faisoient de cotton, & l'estoffe en estoit aussi tirée du domaine du Soleil, & de l'ynca, sans que les Indiens y contribuassent autre chose que le travail de leurs mains. Ils faisoient trois sortes de vestemens de laine, dont la premiere appelée *Anasca*, ne seruoit qu'aux petites gens, la

seconde, qu'on nommoit *Campi*, estoit de fine laine, & reserüée à l'usage des Gentilshommes, & des Officiers de l'Ynca, à tels qu'estoient les Capitaines & les Curacas, ioint qu'elle estoit de toutes couleurs, & trauaillée auecque soing, comme sont les draps qui viennent de Flandres; La troisieme, qui s'appelloit aussi *Compo*, se faisoit de la plus fine laine qui fust, pour le commun usage de ceux du Sang Royal, tant soldats que Capitaines, & Officiers du Roy, en temps de paix & de guerre. Les vestemens les plus fins estoient faits dans les Prouinces, dont les habitans auoient le plus d'adresse à s'en aquitter; & les plus grossiers, dans les autres contrées, où ils n'estoient pas si habiles. Les femmes filoient la laine, de laquelle estoient tissües les plus grossieres estoifes nommées *Amsca*; & quant aux fines, elles estoient de l'ouvrage des hommes. Or ce n'estoient pas les Yncas, mais bien leurs subiets qui trauailloient à cecy. Ce que i'ay bien voulu rapporter, pource qu'il s'en est trouué qui ont voulu faire accroire que les Yncas se mesloient eux mesmes de filer; ce qui doit s'entendre de la ceremonie qu'ils obseruoient quand ils armoient des Cheualiers, comme il sera dit en vn autre endroit, où nous monstrerons comment & pourquoy ils le pratiquoient. Quant à leur chaussure, elle se faisoit ordinairement par ceux des Prouinces, où il y auoit grande abondance de chanvre, qui se tiroit de la tige & des racines d'vn certain arbre appelé *Magney*. Pour le regard de leurs armes, on les faisoit dans le pays qui auoit le plus de materiaux pour y

522 LE COMMENTAIRE ROYAL,
travailler. Ainsi certaines contrées furnissoient
d'arcs & de flesches, les autres de lances, de iavelots
& de haches d'armes, les autres de frondes, &
les autres de pavois ou de rondaches; & voila
toutes les armes deffensives qui leur estoient or-
dinaires. En vn mot toutes les Prouinces ou les
nations donnoient en particulier les choses que leur
terroir produisoit, sans se mettre en peine d'aller
chercher chez autrui ce qui ne se trouuoit point dās
leur pays, comme n'y estant pas obligées. Que s'il fal-
loit payer le tribut, tous le pouuoient faire sans sortir
de leurs maisons, cette Loy estant vniuerselle dans
tout l'Empire du Peru, qu'aucun Indien ne sortist
hors de la Prouince, pour s'en aller chercher ailleurs
le tribut qu'il estoit obligé de payer; ce que les Yncas
fondoient sur cette raison, qu'il n'estoit pas iuste de
demander à leurs suiets vne chose que leur terroir ne
portoit point, & que cela s'appelloit proprement
leur donner suiet de faire les vagabonds de Prouin-
ce en Prouince, & autoriser leur faineantise d'vn
specieux pretexte d'aller chercher le tribut. De
tout ce que i'ay dit cy deuant lon peut inferer ce
me semble, que les Vassaux estoient obligez de four-
nir quatre choses à l'Ynca, à sçauoir des prouisions,
qui se prenoient dans les terres mesmes du Roy, de
la laine, qui venoit de ses troupeaux, pour en faire
des habillemens, ensemble la chaussure, & les armes
conuenables aux gens de guerre, selon les Prouinces
qui auoient les materiaux propres pour en fournir.
Toutes ces choses se distribuoient avec beaucoup
d'ordre

d'ordre & de bonne correspondance. Car les pays qui fournilloient d'habillemens pour la commodité qu'ils auoient d'en faire, estoient exempts de donner aucune chaussure, ny mesme des armes, comme pareillement, si vne Prouince donnoit plus d'une chose, ils la deschargeoient d'une autre; & ainsi ils obseruoient tousiours le mesme ordre en matiere de contribution, sans qu'il y eust aucun de foulé ny en general ny en particulier. Aussi à dire le vray, la douceur de ces Loix produisoit de si merueilleux effets, qu'il n'est pas à croire combien les Vassaux de l'Ynca estoient habiles à le seruir. Dequoy ils s'acquittoient avec tant de zele & de franchise, qu'un fameux Historien Espagnol a bien raison ce me semble, lors que parlant à ce propos; *Ces Roys Barbares, dit-il, n'auoient point de plus grandes richesses que les affections & les bonnes volontez de leurs subiets; des travaux desquels ils iouyssoient à souhait & à leur contentement. Or ce qu'il y auoit en cela de plus admirable, estoit de voir qu'ils n'appelloient pas seruitude mais felicité le deuoir qu'ils leurs rendoient. Voila ce qu'en dit cet Historien, qui est le R. P. Ioseph Acosta, de l'autorité duquel & de celle des autres Autheurs Espagnols, ie me fers tres-volontiers, pour donner plus de credit à mon dire, de peur que les médians ne m'accusent d'auoir feint des fables & des comptes à plaisir, en faueur de mon pays & de mes parens.*

Outre ce tribut que receuoient de leurs subiets ces Roys idolatres, les impotens ou les pauures en payoient vn autre qui ne pouoit pas beaucoup en-

524 LE COMMENTAIRE ROYAL,
richir leur maistre. Car ils estoient obligez de temps
en temps de donner aux Gouverneurs de leurs villes
certains cornets pleins de poux. Les Yncas le vou-
loient ainsi, à ce qu'ils disoient, afin que pas vn de
leurs subiets, pour pauvre qu'il fust, ne se vantast
d'estre exempt du tribut. Or la principale intention
pour laquelle les Yncas en exigeoient vn si estrange
des pauvres, estoit pour les obliger à se despoüiller,
& se nettoyer de cette vermine, afin qu'ils n'en fus-
sent mangez: Ce qui procedoit d'un pur zele qu'ils
témoignoient auoir enuers ces infortunez, pour
lequel on les appelloit ordinairement *Amateurs des*
pauvres. Les Decurions ou les Dixainiers, dont il a
esté parlé cy deuant, auoient charge expresse de fai-
re payer ce tribut, sans que ceux du Sang Royal, ny
les Prestres, non plus que les Ministres des Temples,
ny les Curacas, Seigneurs de plusieurs Vassaux, ny
tous les Maistres de Camp, non pas mesme les Ca-
pitaines, ny les Centeniers, bien qu'ils ne fussent pas
de Sang Royal, ny tous les Gouverneurs, les Iuges,
& les Officiers du Roy, fussent obligez en aucune
sorte aux droits dont nous venons de parler, durant
tout le temps de leur administration. L'on exem-
ptoit encore de ce tribut tous les soldats, qui estoient
actuellement occupez aux fonctions de la guerre,
ensemble les ieunes garçons au dessous de vingt-
cinq ans, d'autant que iusques alors il falloit que
chacun d'eux rendist seruire à son pere, ioint qu'ils
ne pouuoient se marier, & que durant la premiere
année de leur mariage ils estoient libres de toute

sorte d'impôts. De ce mesme priuilege iouyssoient encore les vieillards de cinquante ans en haut, comme aussi les filles, les veufues, & les mariées, bien que certains Autheurs Espagnols tiennent le contraire, s'imaginant qu'elles payoient le tribut, pour ce, disoient ils, qu'elles trauailloient toutes: mais ils ne considerent pas qu'elles le faisoient de leur bon gré, pour ayder à leurs maris, & à leurs plus proches parens; afin qu'ils eussent moins de peine à faire leur tache, sans qu'aucune chose les obligeast à cela. L'on exemptoit de mesme de ces impôts & de tous ces droits du Roy, les aucugles, les estropiez, les blessez, & les malades, iusques à ce qu'ils fussent entierement gueris; Comme au contraire, ny les muets, ny les sourds n'en estoient pas exempts, pour ce qu'ils pouuoient trauailler. Et ainsi le tout bien considéré, le trauail du corps estoit le tribut ordinaire qu'un chascun souloit payer. Ce que le R. P. Blas Valera, comme nous verrons ailleurs, confirme en termes exprés, si approchans de ceux du R. P. Ioseph Acoſta, qu'ils semblent l'auoir tiré l'un de l'autre, ioint que nous trouuerons cette mesme conformité en tous les endroits où il sera parlé de ces tributs.

Que l'Or, l'Argent, la Pierrerie, & telles autres choses de prix, tenoient lieu de present parmy eux, & non pas de tribut.

CHAP. VII.

L'Or, l'argent, & la pierrerie dont les Yncas, comme chacun sçait, auoient vne quantité merueilleuse, n'estoient point des choses qui leur fussent données par maniere de tribut. Car ny les Indiens n'estoient point obligez à cela, ny leurs Roys non plus n'auoient pas accoustumé d'exiger d'eux ces richesses. Car ils ne les estimoient necessaires ny pour la guerre ny pour la paix, estant certain qu'ils ne vendoyent ny n'acheproient aucune chose à prix d'or & d'argent, & qu'ils n'vsoient point de ces metaux pour la paye de leurs soldats, ny pour aucune necessité qui se presentast, à raison dequoy ils tenoient ces choses pour superflües, pource qu'elles n'estoient ny bonnes à manger, ny l'vsage introduit parmy eux de s'en seruir pour auoir des viures. Que s'ils les auoient en quelque consideration, c'estoit seulement à cause de leur esclat, & de leur beauté: aussi les employoient ils ordinairement pour le seruice, & l'embellissement des Palais du Roy, des Temples du Soleil, & des maisons de leurs Religieuses, ainsi qu'il

a esté dit en son lieu, & comme nous le verrons cy apres. Les Yncas auoient aussi cognoissance des mines du Mercure, ou de l'argent vif : mais ils ne daignoient s'en seruir, pource qu'il leur sembloit plus dommageable qu'utile ; ce qui fut cause qu'enfin ils deffendirent à leurs subiets de le tirer hors de terre, comme il sera dit plus particulièrement en son lieu.

Or ce que les Indiens donnoient à leur Roy de l'or, de l'argent, & d'autres choses de prix, ils le faisoient, comme i'ay dit n'aguere, non pas pour y estre obligez par contrainte, mais pour ne violer la coustume qu'ils obseruent encore aujourdhuy, qui est de ne visiter iamais leur superieur, sans luy apporter quelque present, quand ce ne seroit qu'un petit panier de fruct verd ou sec. Comme c'estoit donc la coustume des Curacas Seigneurs de plusieurs vassaux, de visiter l'ynca aux principales festes de l'année, & particulièrement en la plus remarquable de toutes, qui estoit celle du Soleil appelée *Raymi* ; en leurs triomphes, qu'ils solemnisoient apres leurs victoires ; aux iours qu'ils couppoient le premier poil au Prince heritier, & qu'ils luy donnoient vn nom, & pour le dire en vn mot en toutes les autres occasions qui s'offroient durant l'année ; comme aussi quand ils auoient à parler au Roy pour leurs affaires particulieres, ou pour celles de leur Prouince, ou mesme aux visites que les Roys faisoient de leur Royaume ; En toutes ces occasions dis-je, ils ne baisoient iamais la main au Prince, qu'ils ne luy appor-

rassent tout ce que les Indiens leurs subiets auoient tiré d'or, d'argent, & de pierrerie à leurs heures de loisir. Car comme ils n'estimoient point ces choses nécessaires à la vie humaine; ils ne s'amusoient pas aussi à les tirer de leurs mines, quand ils auoient d'autres affaires plus pressées. Mais enfin comme ils virent qu'on employoit ces richesses à l'embellissement des maisons Royales, & des Temples du Soleil; ce qu'ils estimoient par dessus tout, ils tindrent pour bien employé le temps qui leur restoit, s'ils le passoient à chercher de l'or, de l'argent, & des pierres de prix; pour en faire présent à l'Ynca & au Soleil, qui estoient leurs Dieux,

Outre ces richesses les Curacas souloient presenter au Roy du bois de plusieurs façons, & qu'ils prioient fort, pour l'employer au bastiment de ses maisons. Ils luy offroient par mesme moyen les meilleurs ouuriers qu'ils pouuoient trouuer en quelque mestier que ce fust, tels qu'estoient des Orfèvres, des Paintres, des Maçons, & des Charpentiers, dont il y auoit dans le pays d'excellés Maistres, que l'on presentoit à l'Ynca, pource qu'on les iugeoit dignes de le seruir: aussi est il vray que ceux du commun n'en auoient aucunement besoing, comme gens qui n'ignoroient rien de ce qui leur estoit nécessaire pour leur famille, comme de faire leurs habillemens & leur chaussure, ou mesme de pauvres cabannes, pour s'y mettre à couuert; bien que pour lors le Conseil leur en donnast de toutes faites, au lieu que maintenant chacun trouue moyen de ba-

stir, avec l'assistance de ses parens ou de ses amys. Par où l'on peut voir que les plus habiles artisans qui fussent entre eux ne seruoient de rien aux pauvres, pource qu'ils se contentoient de passer leur vie sans aucun luxe, & sans s'arrester aux superfluités dont les grands ont accoustumé d'vser.

De plus, ils faisoient present à l'Ynca de diuers animaux apriuoisés ou farouches; comme de tygres, de Lions, d'Ours, de Singes, de Guenuches, de Loups ceruiers, de Perroquets, d'Austruches, & de l'Oyseau appellé *Cuntur*, qui est le plus grand de tous ceux qui se voyent. Ils luy presentoient encore des couleuvres de toutes façons, dont les plus grandes qu'on nomme *Amaru*, passent trente pieds de longueur; & pareillement des monstrueux crapaux, & des lesards furieux, qu'ils nommoient *Caymanes*, qui ont aussi trente pieds de long. Bref tout ce qu'ils trouuoient en leur pays, ou de monstrueux, ou de farouche, ou de beau, ils le donnoient à leur Roy, de mesme que l'or & l'argent, comme s'ils eussent voulu dire par là, qu'il estoit souuerain Seigneur de toutes les choses qui luy estoient présentées; & luy tesmoigner par consequent la grande inclination qu'ils auoient à son seruice.

*Comment ils gardoient les prouisions, & à quoy
ils les employoient.*

CHAP. VIII.

A Pres auoir parlé du tribut que les Indiens
souloient donner à l'Ynca, il est à propos
que nous disions comment ils le gar-
doient, & à quoy principalement ils le
souloient employer. Il faut sçauoir pour cet effet,
qu'il y auoit en tout le Royaume trois sortes de ma-
gazins, où ils serroient le tribut & la recolte; & qu'en
châque ville, ou grande ou petite il y en auoit deux.
en l'un desquels on mettoit les prouisions reseruées
pour en assister ceux du pays en temps de famine, &
en l'autre celles qui prouenoient des reuenus du So-
leil, & de l'Ynca. Aquoy i'adiouste qu'aux grands
chemins se voyoient de trois en trois lieues, d'autres
magazins, qui seruent maintenant d'hostelleries
aux Espagnols.

L'on portoit à Cozco pour l'entretienement de la
Cour, toute la recolte qui se faisoit à cinquante lieues
à l'entour dans les terres du Soleil, & de l'Ynca, qui
en gratifioient les Capiraines & les Curacas. Il est
vray qu'en châque ville, qui estoit dans cette esten-
due de pays, on mettoit au magasin ordinaire des
habitans certaine portion de ces prouisions, que
l'on tiroit des reuenus du Soleil.

La

La recolte des autres villes hors de l'estenduë de la Cour, estoit gardée dans le magasin du Roy, qu'on y auoit fait exprés, d'où l'on auoit accoustumé de la transporter aux autres magasins, qui estoient sur les grands chemins, & d'y serrer les prouisions de bouche, ensemble les armes, la chaussure & les habillemens necessaires aux gens de guerre, qui passoient par là, pour s'en aller aux quatre parties du monde, qu'ils appelloient *Tanantinsuyu*. Ces magasins estoient si bien fournis de ces choses, qu'il y en auoit tousiours de reste, pour grandes que fussent les compagnies des soldats, qui tenoient la campagne. Car il faut sçauoir que les Yncas ne leur permettoient iamais de se loger dans les villes aux despens des habitans. Ils alleguoient pour raison, qu'il suffisoit que chaque ville eust desja payé le tribut, sans qu'il fust raisonnable de la charger dauantage, ce que l'on ne pouuoit faire iustement. Pour cela mesme, il y auoit vne Loy qui deffendoit aux soldats de ne prendre sur les habitans aucune chose, pour petite qu'elle fust, sur peine aux contreuenans d'estre executez à mort. A quoy se rapporte ce que remarque Pedro de Cieça de Leon, Chapitre 60. où parlant des grands chemins du Peru; Il y auoit là, dit-il, de vastes corps de logis, bastis exprés pour les Yncas; & des magasins aussi pour y serrer les prouisions des gens de guerre. Car l'Ynca se sçauoit si bien faire craindre, que s'il aduenoit que son armée marchant en campagne, il y eust quelque soldat qui fust si hardy que de prendre la moindre chose, il estoit incontinent chastié. Par mesme moyen si quelqu'un de ceux qui le suiuoient

532 LE COMMENTAIRE ROYAL,
à la guerre entroit dans les champs, ou dans les maisons des Indiens, & qu'il y fist le moindre domnage, il commandoit ausst tost qu'on le fist mourir; & voilà ce qu'en dit Pedro de Cieça. Les Indiens alleguoient là dessus, que cette discipline estoit iuste, puisque pour empescher que les soldats ne foulassent personne, ny à la campagne, ny dans les villes, on leur donnoit tout ce qui leur estoit necessaire. Aussi du bon ordre qu'on mettoit à distribuer aux gens de guerre les munitions & les viures, que l'on serroit pour cela dans les magazins des grands chemins, & qu'on transportoit de ceux des villes, il s'ensuiuoit vne telle vtilité, qu'on n'y trouuoit iamais de faute.

Augustin de Carate, apres auoir remarqué combien estoient longs les grands chemins dont nous parlerons cy apres, dit ce qui s'ensuit au 14. Chapitre de son premier Liure. Outre la despense qui se fit aux reparations de ces chemins, Guaynacaua commanda qu'à chaque iournée de celuy de la montaigne on eust à bastir plusieurs grands logemens, qui fussent capables de le loger avec toute son armée. Il en fit faire d'autres ausst dans le chemin du plat pays, bien qu'on ne les peust bastir si près l'un de l'autre qu'à la montaigne, horsmis à costé des riuieres, qui en sont esloignées de huit à dix lieues; & mesme de quinze, & de vingt en quelques endroits. Dans ces logemens, qu'on appelle Tambos, les Indiens de leur iurisdiction serroient ordinairement les prouisions qu'ils auoient faites de toutes les choses necessaires à l'entretienement de leur armée; comme par exemple, de viures, d'armes, & d'habillemens. De maniere qu'en chacun de ces Tambos l'Ynca en pouuoit trouuer assez pour esquipper insques à trente mille

hommes, sans sortir de son Palais. Il auoit à sa suite vn grand nombre d'hommes de guerre armés de picques, de halebardes, de massuës & de haches, dont il y en auoit d'argent & de cuiure, & quelques-vns d'or; & pareillement des frondes, faites de feüilles de palmier bruslées par le bout, &c. C'est ce que dit Augustin de Carate, parlant des munitions & des viures qu'auoient les Roys du Peru, dans les magazins bastis exprés sur les grands chemins, pour l'entretènement de leur armée. Que si de hazard les rentes du Roy ne pouuoient fournir à l'excessiue despenſe qui se faisoit à la guerre, il se seruoit en tel cas du reuenu du Soleil, duquel il se disoit estre fils legitime, & son heritier vniuersel. Que s'il restoit quelques prouisions de l'entretènement des gens de Cour, & de guerre, on les feroit incontinent dans ces trois sortes de magazins, dont nous auons parlé cy deuant, afin qu'en cas de neceſſité on les peût distribuer aux subiets, au bien desquels les Yncas souloient tourner leurs principales pensées.

Ils entretenoient en tout le Royaume les Prestres & les Ministres de leur idolatrie aux despens des reuenus du Soleil; ce qu'ils ne faisoient toutesfois que durant le temps qu'ils estoient en charge dans les Temples, où ils seruoient par semaines chacun à son tour. Mais quand ils estoient en leurs magazins, ils se nourrissoient à leurs propres despens. Car on leur donnoit à eux comme à tout le reste du peuple, ce qu'on iugeoit à peu près qu'il leur falloit de terres pour y semer. Et toutesfois ce qui se prenoit sur les reuenus du Soleil, estoit si peu de chose à compa-

534 LE COMMENTAIRE ROYAL;
raison de ces grands biens, qu'il y en auoit tousiours
de reste pour l'Ynca.

*Qu'il n'y auoit entre eux aucuns Mendians, &
qu'ils donnoient aux subiets dequoy s'habiller.*

CHAPITRE. IX.

LE mesme soing qu'ils prenoient à pour-
voir abondamment d'habits les hom-
mes de guerre, ils l'employoient à faire
en sorte que de deux en deux ans, il y
eust de la laine distribuée à tous les Vassaux, & aux
Curacas en general; afin qu'ils s'en habillassent, en-
semble leurs femmes & leurs enfans; à quoy les De-
curions ou les Dizainiers estoient obligez de pren-
dre soigneusement garde. Il faut remarquer icy que
les Indiens, parlant generalement, estoient si des-
pourueus de bestail, que les Curacas en auoient à
peine pour eux, & pour leur famille; Comme au
contraire le Soleil, & l'Ynca, en auoient vne quan-
tité du tout incroyable. Les Indiens souloient dire
qu'au temps que les Espagnols entrerent dans leur
pays, ils n'auoient pas ce qui leur falloit de pastura-
rages pour faire paistre leurs troupeaux. Ce que ie
me souuiens d'auoir ouy souuét asseurer à mon pere,
& à ceux de son temps, lors qu'ils se mettoient à par-
ler des grands rauages de bestail qu'auoit fait dans
le Peru la nation Espagnolle; comme il sera demon-

estré en son lieu. Dans les pays chauds ils donnoient aux Indiens du cotton, qu'ils tiroient du reuenu du Roy, afin qu'ils s'en habillassent & toute leur famille. De cette façon ils auoient abondammét de quoy se vestir, sans que pas vn d'eux eust faute des choses qui sont necessaires à la vie humaine, ny qu'il peust par consequent estre appellé pauvre, ny reduit à demander l'aumosme. Il est vray qu'en matiere de luxe & de superfluité, ils se pouuoient dire fort necessiteux, comme n'ayant iustement que ce qu'il leur falloit pour s'entretenir. Aquoy se rend conforme le R. P. Ioseph Acosta, lors que parlant du Peru, il reduit en peu de mots ce que nous auons demonstté au long. Voicy ses mesmes paroles, qui sont à la fin du quinziesme Chapitre de son liure. *Ceux du Peru*, dit-il, *tontoient leurs troupeaux, quand la saison en estoit venue, & donnoient à chèque mesnage autant de laine qu'il luy en falloit pour s'habiller. Cela fait, ils s'en alloient de maison en maison pour voir si les hommes, les femmes, & les enfans n'estoient point lasches à ce travail; & s'ils remarquoient qu'ils y apportassent de la nonchalance, en tel cas ils chastioient les coupables. Que s'il y auoit de la laine de reste, ils la serroient dans leurs magazins: de quoy sceurent fort bien profiter les Espagnols; qui les trouuerent pleins de ces choses, & de toutes les autres provisions necessaires à la vie humaine. A bien considerer maintenant cette maniere de viure des Indiens; ie m'assure qu'il n'y aura point d'homme d'esprit, qui ne s'estonne d'un si bon gouuernement & de cette merueilleuse preuoyance qu'ils tesmoignoient auoir entre eux; puis que sans estre Chrestiens, ils obseruoient cette haute perfection de n'auoir rien de propre, de se contenter*

du necessaire, & de pouruoir abondamment à tout ce qui regardoit leur Religion, & le seruice de leur Roy. C'est par ces mots que le R. P. Acoſta, finit son quinziesme Chapitre, qu'il intitule. *Des reuenus de l'Ynca & des tributs que ses ſubiets luy payoient.*

Le meſme Autheur dans le ſeiziesme Chapitre de son liure, parlant des meſtiers des Indiens, où il rapporte pluſieurs choſes que nous auons deſ-ja dittes, & que nous dirons cy apres, en fait mention en ces termes, que i'ay tirez mot à mot. *Les Indiens du Peru auoient encore vn aduantage particulier par deſſus les autres nations, qui eſtoit de s'inſtruire quand ils eſtoient ieunes en toutes les choſes qui leur ſembloient neceſſaires à l'entretienement de la vie humaine. Car il n'y auoit entre eux aucuns ouuriers qui excellaffent en leur meſtier, tels que peuuent eſtre parmy nous les tailleurs, les cordonniers, & les tiffarans, tellement qu'ils ſe contentoient d'apprendre tout ce qui leur faiſoit beſoing, ou pour leur perſonne en particulier, ou pour leur meſnage, à quoy ils ne manquoient de mettre bon ordre. Il ſe trouuoit par ce moyen qu'ils ſçauoient tous, bien que groſſierement le meſtier de tiffarant, & de tailleur, dont ils ſe ſeruoient à ſe faire des habillemens, de la laine que leur donnoit l'Ynca. Ils n'ignoroient non plus ny l'art de cultiuer la terre, ny les moyens de la faire valoir, ſans que pour cet effet ils euſſent beſoing d'autres laboureurs que d'eux meſmes. Ils veilloient tous au commun bien de leurs familles, & les femmes eſtoient les perſonnes qui s'y eſtudioient le plus, ſe tenant pour contentes d'une honneſte mediocrité, & de ſeruir leurs maris avec le reſpect qu'elles leur deuoient, ſans eſleuer leurs enfans ny dans la delicatèſſe ny dans le luxe; Cela n'empeſchoit pas toutesfois, qu'oultre cette cognoiſſance qu'ils auoient*

des choses du mesnage, & qui sont ordinaires à la vie humaine, ils n'eussent en particulier des gens de mestier, & des artisans, comme par exemple des Orfevres, des Peintres, des Potiers, des Bateliers, des Menestriers, & des Maistres de leurs Comptes; & qu'en matiere de tistre la laine, & de bastir des maisons, il n'y eust parmy eux de bons ouuriers; que les grands Seigneurs employoient. Mais quant aux petites gens, chacun auoit soing de son mesnage, & y traualloit selon qu'il l'auoit appris comme il s'observe encore à present, sans que les vns eussent besoing des autres en ce qui concernoit leur maison, & le soing de leur personne comme pouuoient estre la chaussure, le vestement, l'industrie à bastir vn logis, à semer, & à faire la recolte, & les prouisions necessaires. De maniere qu'apres tout on trouuera qu'il s'en falloit bien peu qu'en cecy la façon de viure des Indiens ne fust semblable à celle des anciens Hermites rapportée dans les vies des Saints Peres. Aussi à dire le vray, ces peuples sont si peu d'estat du luxe, & de la delicatesse, à laquelle ils preferent la mediocrité, qu'il est hors de doute que s'ils suiuoient aussi bien ce train de vie par eslection, comme ils le suiuient pour y estre accoustumez & enclins naturellement, l'on pourroit à fort bon droit appeller par faite cette habitude, & asseurer veritablement que des gens si fort ennemis de l'orgueil, de l'ambition, & des mondanitez sont grandement susceptibles de la doctrine du saint Euangile; à quoy les Predicateurs qui la leur preschent se doiuent rendre conformes. Voila ce qu'en dit le R. P. Acofta, qui adiouste vn peu plus bas; Que c'estoit vne Loy inuiolable entre eux de n'alterer iamais la mode, ny la Coustume de leur Prouince, quand mesme l'exemple d'autruy les y portoit. Comme en effet l'Ynca tenoit cette maxime pour tres importante au Gouvernement de son Estat, tellement qu'elle

s'observe encore à present, bien que ce ne soit pas avec le mesme soing qu'on y souloit apporter autrefois De là vient aussi que les Indiens estants si accoustumez à se tenir dans leurs anciennes coustumes, s'estonnent extrêmement de voir que les Espagnols changent presque tous les ans de façon de viure, & l'attribuent à vn excez d'orgueil, & de presumption.

Il n'y auoit point de mendiens parmy eux, & cela s'obseruoit si bien de mon temps, que ie ne pense pas y en auoir iamais veu dans le Peru, si ce n'est qu'au temps que i'en sortis, qui fut en l'an 1560. ie pris garde qu'une vieille femme qu'on appelloit Isabelle, que i'auois cognüe à Cozco, s'en alloit gueusant de porte en porte, non pas tant par necessité, que pour faire la Charlatane dans les maisons, comme font les Ægiptiennes; ce que les Indiens, & les Indiennes auoient si fort en horreur, qu'à chaque fois qu'ils la voyoient, ils la querelloient, & crachoïent à terre, en signe d'abomination, & d'infamie. Ce qui fut cause qu'en fin cette vieille perdit la coustume de leur demander l'aumosne, & ne s'adressa plus qu'aux Espagnols. Or comme il n'y auoit point encore en mon pays d'argent monnoyé, on luy donnoit du mayz, qui estoit ce quelle desiroit. Que si elle remarquoit qu'on luy fist l'aumosne de bon cœur, elle demandoit vn peu de chair, & à boire ensuite, iusqu'à ce qu'enfin elle passoit au dernier point de friandise; qui estoit d'obtenir d'eux par sa charlatannerie vn peu de ceste herbe precieuse appelée Cuca, que les Indiens ont accoustumé de mas-

cher,

cher, & ainsi elle s'entretenoit dans son vice, & dans la gueuserie ordinaire.

Les Yncas eurent soing encore de pourvoir aux voyageurs en leur Republique. Car ils mirent ordre, qu'en tous les chemins generalement il y eust des hospitaux, qu'ils appelloient *Corpahuaschi*, où ils donnoient à manger aux passans, & leur fournissoient tout ce qui leur estoit necessaire, tirant toutes ces provisions des magazins que le Prince avoit en chaque ville. Que si de hazard ils tomboient malades en leur voyage; ils les traittoient avec vn merueilleux soing, sans les laisser manquer d'aucune chose; iusques là mesme qu'ils leur en donnoient de reste. Il est vray qu'ils se croyoient particulierement obligez de les assister, sçachant bien qu'ils ne voyagoiét ny pour leur plaisir, ny pour leurs propres affaires, mais pour celles du Roy, ou des Curacas, qui les enuoyoit d'un costé, & d'autre, ou bien par l'ordre des Capitaines, ou des autres Officiers, qui estoient en charge, en temps de paix & de guerre. C'estoit dont pour cela qu'ils traittoient si bien cette maniere de voyageurs; car quant aux autres, qui se mettoient en chemin sans cause legitime, ils les chassioient comme vagabonds.

La diuision & l'ordre de leur bestail ; & des autres animaux qu'ils nourrissoient.

C H A P. X.

A Fin que les Yncas peussent plus facilement tenir compte de ce grand nombre de bestail qu'ils nourrissoient, ils le souloient diuiser par les couleurs qui luy estoient naturelles. Car il auoit plusieurs taches diuersement colorées comme les cheuaux d'Espagne, si bien que ceux du pays donnoient vn nom particulier à chèque couleur. Mais sur tout ils appelloient *Murmuru*, & les Espagnols *Mormoro* les animaux tachetez. Que si de hazard il naissoit quelque Aigneau qui fust d'autre couleur que la brebis qui l'auoit porté, ils le mettoient aussi-tost avec le troupeau qui estoit marqué de mesme, & ainsi ils pouuoient facilement rendre compte de leur bestail par le moyen de leurs neuds, pource que les fils estoient de la mesme couleur de leurs troupeaux.

Pour transporter les prouisions de part & d'autre, ils se seruoient de cette sorte d'animaux que les Espagnols appellent *Carneros*, bien que toutesfois ils ressemblent plustost à des Chameaux, que non pas à des moutons, horsmis qu'ils n'ont point de bosse sur l'eschine. Or quoy que les Indiens s'en seruissent pour l'ordinaire comme de bestes de charge,

si est-ce qu'en matiere des choses qui regardoient le service de l'Ynca, il vouloit qu'on les espargnast le plus qu'il estoit possible, & qu'ils fussent reseruez pour le trauail le plus necessaire, tel qu'estoit celuy de faire des fortresses, des maisons Royales, des ponts, des grands chemins, des canaux, & autres choses semblables, à quoy les Indiens estoient sans cesse occupez.

Nous auons dit cy-deuant que l'or & l'argent que les Vassaux presentoient à l'Ynca, s'employoient pour l'ordinaire à l'embellissement des Temples du Soleil, & des maisons Royales: Dequoy nous touchons encore quelque chose, quand nous parlerons de cette sorte de Religieuses, qu'ils appelloient *Les Vierges esleuës*.

Pour le regard des Oyseaux, des Quadrupedes, & des Reptiles, que les Curacas souloient presenter au Roy, ils les nourrissoient en certaines Prouinces, qui retiennent encore aujourd'huy les noms de ces animaux, ou bons ou mauuais, ou des grandes, & des petites coulevres qu'on y gardoit. Lon en nourrissoit aussi vn bon nombre à la Cour, tant pour vne marque de grandeur, que pour donner à cognoistre aux Vassaux qui en auoient fait present au Roy, qu'il falloit bien que ces animaux luy fussent tres-agreables, puis qu'il les faisoit nourrir, & garder à sa Cour: ce qui plaisoit grandement aux Indiens.

Lors que ie sortis de Cozco, il s'y parloit encore des lieux qui seruoient de repaire à ces animaux. Ils appelloient *Amarucancha*, c'est à dire, *l'enclos des Ama-*

rus, qui sont les grandes couleuvres, cet endroit de la ville où est à présent la maison des Peres Iesuites, & pour la mesme raison ils nommoient aussi *Pumacurca*, & *Pumapchupan* (mot tiré de *Puma*, qui signifie *Lion*) les deux cartiers de la ville où ils nourrissoient des Lions, des Ours, & des Tygres, dont l'un est au bas du mont de la Citadelle, & l'autre derriere le Conuent de Saint Dominique

Or afin que les oyseaux qu'ils gardoient se portassent mieux, ils les tenoient hors de la ville, en un clos qu'on appelloit *Surihwalla*, c'est à dire, *le pré aux Austruches*, qui est à une lieue de Cozco deuers le midy, lieu qui appartint autresfois à Jean d'Alcobaça, mon Gouverneur, qui le laissa hereditaire à son fils Diego d'Alcobaça, qui fut homme d'Eglise, & mon compagnon d'eschole. Quant aux animaux cruels & sauvages, tels que sont les Tygres, les Lions, les prodigieux crapaux, & les monstrueuses couleuvres; outre qu'ils les gardoient dans cette Cour, pour une marque de grandeur, ils s'en seruoient pareillement pour la punition des Criminels, comme nous le monstrerons en une autre, endroit où il sera parlé des Loix qu'ils auoient pour les condamner au dernier supplice.

Voilà ce que j'auois à dire touchant le tribut que ces Indiens souloient payer aux Roys Yncas, & à quoy ils les employoient. Ce que ie diray au Chapitre suiuant, ie l'ay tiré des memoires du curieux & docte Pere Blas Valera, pour faire voir la grande conformité qu'il y a entre les choses qu'il a rappor-

tées, & ce que j'ay dit touchant l'origine, les Loix, les Coustumes, & le Gouuernement de ce grand Empire. Et d'autant que cet excellent homme a descrit tout cecy plus succinctement que moy, & avec vn meilleur ordre, & qu'en ses escrits il a des graces & des beautez qui luy sont particulieres, j'ay iugé qu'il ne seroit pas hors de propos de rapporter icy ce qu'il en a dit, tant pour faire voir la conformité de son Histoire avecque la mienne, que pour suppleer à mes deffauts par les ouurages d'autrui.

Des Loix & des Ordonnances faittes par les Yncas, pour le commun bien de leurs subiets.

CHAP. XI.



LE R. P. Blas Valera, parlant du Gouuernement des Yncas en a dit ce qui s'ensuit, que j'ay traduit de son beau Latin, & l'ay mis icy, pour m'en servir, comme d'une autorité irreprochable. Les Indiens du Peru commencerent de s'establiir en forme de Republique, au temps de l'Ynca Manco Capac, & de l'Ynca Roca, qui fut vn de leurs Roys. Ils auoient vescu iusques alors, c'est à dire plusieurs siecles auparauant, dans vne brutalité desreiglée, & pleine de barbarie, sans auoir aucune cognoissance des Loix, ny de la Politique, tellement qu'ils commencerent depuis d'esleuer leurs enfans dans les bonnes mœurs, de les instruire aux sciences, de communiquer les vns

avec les autres, de couvrir leur nudité par les vestemens qu'ils firent, où ils garderent quelque maniere de bien-seance & d'honesteté, de cultiuer la terre avec industrie, de se rendre sociables entre eux; d'observer quelques formalitez de Justice; de parler civilement, de faire des bastimens particuliers, & publics, & quantité d'autres choses dignes de grandes loüanges. Avecque cela ils se porterent tres-volontiers à l'observation des Loix, que leurs Princes leur enseignèrent, guidez par la seule lumiere de la nature. En quoy certes ces Yncas du Peru me semblent preferables non seulement au peuple de la Chine, du Iapon, & des Indes Orientales, mais encore aux anciens Gentils d'Asie, & de Grece. Car à bien considerer l'establissement des vns & des autres, ie trouue pour moy que Numa Pompilius, Solon & Lycurgue ne meritent pas tant de gloire qu'on leur en donne, pour auoir imposé des Loix aux Romains, aux Atheniens & aux Lacedemoniens, puis qu'il leur estoit bien ayisé d'en faire, veu la grande connoissance qu'ils auoient des belles lettres, & des sciences humaines. Aussi fust-ce d'elles, qu'à leur grand contentement, ils tirerent les iustes Loix, & les loüables coustumes qu'ils laisserent escrites à ceux de leur temps, & à leur Posterité. Mais ce qui passe au delà de toute merueille, est à mon aduis de dire que ces Indiens, qui n'auoient aucune de ces cognoissances, pour s'en ayder au besoing, sceurent si bien fonder leurs Loix, & en faire de si raisonnables, laissant à part celles qui regardēt leurs abus, & leur idolatrie, qu'aujourd'huy mesme nous en voyons vne infinité que ces peuples obseruent fort exactement, pour estre toutes conformes à la

raison , & aux plus belles ordonnances que les sçauans hommes puissent auoir establies. L'extreme desir qu'ils ont tousiours eu d'en conseruer la memoire, a fait que par le moyen de leurs neuds , & de leurs filets de diuerses couleurs , qui leur seruoient à compter , ils l'ont transmise à leurs descendans. Comme en effet , bien qu'il y ait plus de six cens ans que leurs premiers Roys les ont establies , si ne laissent-ils pas d'en auoir la memoire aussi fresche que si elles venoient d'estre faites. Ils eurent la Loy *Municipale*, traitant des interets particuliers de chaque ville , ou de chaque peuple dans sa propre iurisdiction. I'obmets celle que les Latins appellent *Agraria*, qui ne leur fut pas moins naturelle , qu'aux Romains , puis qu'ils sçauoient aussi bien qu'eux comment il falloit mesurer les terres , & les partager entre les habitans des villes : à quoy certes ils s'employoient avec beaucoup de soing & de probité. Car ils auoient des hommes exprés , qui se seruoient pour cet effet de certaines mesures par eux appellées *Tupu*, & qui donnoient à chacun d'eux la part qui luy estoit conuenable. Ils nommoient Loy *commune* celle qui ordonnoit aux Indiens (du nombre desquels on exemptoit les enfans , les vieillards , & les malades) de s'employer aux œuures publiques , comme par exemple d'ayder au bastiment des Temples , & des maisons de leurs Roys , ou des grands Seigneurs ; de labourer leurs terres , de faire des ponts , de nettoyer les chemins , & ainsi des autres choses. Par la Loy qu'ils appelloient *Fraternelle* , ils entendoient

546 LE COMMENTAIRE ROYAL,
celle qui enioignoit expressement à tous les habitants des villes de se donner vne mutuelle assistance, quand il estoit question de labourer la terre, de semer, de faire la recolte, & de travailler aux bastimés, ou aux reparations des maisons, sans que pour cela on fust obligé de leur donner aucune chose. Ils obseruoient aussi fort exactement la Loy par eux nommée, *Mitachanacuy*, mot qui signifie changer par lignées, & chacun à son tour. Elle vouloit, qu'en toutes les œuvres, & en tous les bastimens qui s'acheuoient aux despens de la peine du public, on y apportast les mesmes considerations qu'au partage de leurs terres, si bien que châce Prouince, châce ville, châce famille, ou châce personne, ne fist que la tasche qui luy estoit imposée, & que ce travail fust alternatif entre ceux qu'on y mettoit tour à tour, afin de les deslasser. Ils auoient vne Loy touchant leur despense ordinaire, par où il leur estoit deffendu de ne profaner en leurs habits l'usage de l'or, de l'argent, ny de la pierrerie. Cette mesme Loy retranchoit toutes les superfluitez des festins, & vouloit que les habitans des villes s'assemblassent deux ou trois fois le mois, pour manger en compagnie deuant leurs Curacas; & qu'avec cela ils s'exercassent à des ieux militaires, & à d'autres passe-temps honnestes; Ce qu'ils faisoient à dessein, afin de donner quelque relasche à leurs esprits, & de se maintenir en bonne paix; comme pareillement pour diuertir ceux qui trauailloient à la campagne, & les diuertir vn peu de leur fatigue par cette resiouissance

fance publique. La Loy par eux faite en faueur des pauvres, ordonnoit que les aueugles, les muets, les boisteux, les estropiez, les vieillards, les malades, & autres semblables, qui pour estre incommodez de leur personne ne pouuoient vacquer au labourage de leurs terres, ny se pouruoir d'habillemens, fussent nourris & entretenus des prouisions que l'on tiroit des magasins publics. C'estoit là mesme que suivant vne autre ordonnance qu'ils auoient, ils souloient prendre dequoy assister les nouueaux hostes qui leur venoient, soit qu'ils fussent estrangers, ou du pays, & qu'ils voyageassent en quelque part. Or afin de les mieux receuoir ils auoient des maisons publiques, ou des hospitaux, par eux appelez *Corpahuaci*, où ils leur donnoient abondamment tout ce qui leur estoit necessaire. Outre tout cecy, par la mesme Loy estoit expressement ordonné aux habitants de châce ville, d'appeller aux festins publics les pauvres dont i'ay parlé cy dessus, afin de leur faire oublier vne partie de leur misere par cette commune resiouissance. Ils auoient encore vne autre Loy touchant le mesnage, par laquelle deux choses principalement leur estoient recommandées. La premiere, qu'aucun d'eux ne fust oyssif; comme en effet ils y mettoient si bon ordre, comme il a esté desja dit, qu'ils occupoient iusques aux enfans de cinq ans, aux choses qu'ils iugeoient estre conformes à leur âge. Les aueugles mesmes, non-plus que les boisteux; & les muets, n'estoient pas exempts de travailler diuersement, s'ils n'auoient quelqu'autre in-

disposition qui les en empeschast; & ainsi tous ceux qui auoient assez de force, & de santé pour mettre la main à l'œuvre, s'y employoient de tout leur possible, tant pour s'acquitter de ce qu'il leur falloit faire, que pour n'encourir le blasme des faineants, qu'ôchastioit en public. Avec tout cela il estoit enioint par la mesme Loy, que les Indiens eussent à laisser leurs portes ouuertes, lors qu'ils prendroient leur pas; afin que les Officiers de la Iustice eussent vne entree publique en leur logis, en s'y en allant faire leurs visites: Car il y auoit parmy eux certains Iuges appelez *Llaſtacamayn*, qui auoient charge de visiter les Temples, & les maisons, ou particulieres, ou publiques; Ce qu'ils faisoient ponctuellement, ou en personne, ou par leurs Commis, afin de voir si l'homme & la femme apportoit le soing necessaire à leur mesnage, & à l'instruction de leurs enfans. Dequoy ils tiroient des consequences selon la netteté qu'ils remarquoient plus ou moins dans chaque maison, aux habillemens, aux meubles, & aux vases mesmes. Ils louioient publiquement ceux qu'ils trouuoient les plus propres & les meilleurs mesnagers: comme au contraire ils chastioient les nonchalans à coups de fouet qu'ils leur donnoient aux bras & aux cuisses, les soubmettant aux autres peines qui estoient portées par la Loy, Cependant d'une si bonne police il s'ensuiuoit qu'il y auoit parmy eux vne si grande abondance des choses necessaires à la vie, qu'on donnoit presque pour rien celles qui sont aujourd'huy les plus estimées. Quant aux autres

Loix, & aux Ordonnances morales, qu'ils obseruoient tous en general, & en particulier, sans s'esloigner des bornes de la raison, on pourra les recueillir de ce que nous dirons en d'autres endroits, de leurs coustumes, & de leurs vies. Mais il est aduenu depuis qu'on a perdu la plus part de ces Loix, & qu'un gouvernement si politique & si digne de loüange s'est aboly, tellement qu'on peut bien dire qu'en matiere de viure moralement, la barbarie est aujourdhuy plus fort introduitte parmy les Indiens, qu'elle ne l'estoit alors, & qu'ils ont plus de fautes qu'en ce temps là, des choses necessaires à la vie.

*De quelle façon ils se comportoient enuers leurs
nouveaux sujets, apres les auoir conquis.*

C H A P. XII.

L seroit dommage sans doute, de ne point rapporter icy l'ordre qu'obseruoient les Yncas à conquerir de nouveaux pays, & la methode ordinaire dont ils vsoient à instruire leurs suiets en la vie ciuile, & en la politesse des mœurs. Car il est certain que depuis le temps des premiers Rois du Peru, leurs successeurs les imiterent si exactement, qu'ils ne firent iamais la guerre, s'ils ne s'y creurent obligez par quelque raison, qui leur semblast de grande importance; comme pouuoit estre l'extreme besoin qu'auoies

550 LE COMMENTAIRE ROYAL;
ces Barbares d'estre ciuilifez , & rangez à vne façon
de viure qui fût ensemble , & politique , & ciuile. A
quoy ils se portoiẽt encore , pour estouffer les trou-
bles & les outrages que faisoient à leurs vassaux les
peuples de leur frontiere ; sans que iamais ils entre-
prissent aucune guerre , qu'auparauant ils n'en ad-
uertissent leurs ennemis , & ne se declarassent deux
ou trois fois. Apres auoir assuiety quelque Prouin-
ce , la premiere chose que faisoit l'Ynca , estoit de
prendre la principale Idole du pays , & de la trans-
porter à Cozco , où il commandoit qu'elle fust mise
dans vn Temple , iusques à ce que le Cacique , & les
Indiens de cette contrée , se desabusans de la creance
de leurs Dieux , tournassent leurs affections à l'Idola-
trie des Yncas , qui adoroient le Soleil. Quand ils
conqueroient quelque Prouince , pour tesmoigner
le respect qu'ils luy portoiẽt , ils n'abbatoient point
les Idoles du pays ; de peur que les habitans ne se
mutinassent , s'ils voyoient que l'on mesprisât leurs
Dieux ; & n'en abolissoient l'vsage qu'apres qu'ils les
auoient cultiuez & instruits en leur vaine Religion.
Parmesme moyen , ils menoient à Cozco le princi-
pal Cacique , & tous ses enfans , pour les y traiter
splendidement , & leur faire voir la Cour ; afin que
par la conuersation des honnestes gens , ils apprif-
sent non seulement les Loix , les mœurs , & la langue
de ceux du pays , mais aussi leurs ceremonies , leurs
coustumes , & leurs vaines superstitions. En suite
de tout cela , l'Ynca remettoit incontinent le Cura-
ca , en sa premiere dignité , & commandoit à ses vas-

faux qu'ils eussent à le servir, & à luy obeyr comme à leur Seigneur. De plus, afin que les soldats vainqueurs, ou vaincus se recôciliaissent à l'aduenir les vns avecque les autres, & qu'ils vescuissent en bonne paix, perdant à iamais la memoire des animositez qu'ils pouuoient auoir eues durant la guerre, il ordonnoit pour eux avec toute sorte de magnificence & de bonne chere, des festins solennels & publics, où se trouuoient pesse-messe les aueugles, les boiteux, les muets, & tous les autres pauvres estropiez, qui participoient tous ensemble aux liberalitez de leur Roy. En ces festes les ieunes gens du pays dansoient à leur mode avecque les filles, & ceux d'un aage plus meur faisoient l'exercice militaire. La mesme on leur faisoit quantité de presens, d'or, d'argent, & de belles plumes, pour en parer leurs habits en leurs principales festes, ioinct qu'on leur donnoit des vestemens, & plusieurs autres galanteries, qu'ils estimoient grandement entr'eux. Voyla de quelles amorces se seruoit l'ynca, pour gagner à soy les volontez des Indiens, qu'il auoit nouuellement conquis; Comme en effet, quelques barbares & brutaux qu'ils fussent, si ne laissoient-ils pas à la fin de se soubmettre à son ioug, & de le servir avec tant de zele & d'obeissance, qu'il n'arriuoit iamais qu'aucune Prouince se mutinast. Avecque cela, pour couper chemin aux plaintes, & empescher que les mescontentemens publics ne fussent vn acheminement aux rebellions, il confirmoit de nouveau, & faisoit publier toutes les anciennes Loix, & les Ordonnan-

ces du pays, afin de les mettre plus en credit, hormis celles qui se trouuoient cōtraires à l'Idolatrie, & aux establissemens del'Empire. Quand l'ynca le iugeoit necessaire, il changeoit les habitans des Prouinces, ausquels il donnoit abondamment les possessions, les maisons, les seruiteurs, & les troupeaux de bestail, qui leur estoient necessaires. A la place de ceux-cy il enuoyoit aux Prouinces dépeuplées, des bourgeois de Cozco, ou des autres villes, qu'il scauoit luy estre fidelles, afin que faisant la charge de soldats dans les garnisons, ils enseignassent à ceux de la frontiere, les Loix, les Ceremonies, les Coustumes, & la langue generale du Royaume.

Que s'il est question de voir par des preuues manifestes, combien estoit doux le reste du Gouuernement des Roys Yncas, en quoy certes ils surpassoient tous les autres Roys, & tous les peuples du nouveau monde cela se; pourra verifier à mon aduis, non seulement par les nœuds, & les comptes des Indiens, qui sont Foy de leurs Annales, mais encore par les cahiers escrits à la main, & dignes de foy, que le Vice-Roy Dom François de Toledo, enuoya aux Visiteurs generaux, aux Iuges, & aux Grefriers, pour en faire des cōppies, apres s'estre amplement instruit par la bouche des Indiens de l'estat de châceune de ses Prouinces. De ces papiers, qui sont encore auiourd'huy aux archiues publiques, l'on en peut tirer des tesmoignages irreprochables du bon traitement que les Yncas Rois du Peru souloient faire à leurs subiets. Car comme nous auons dit n'a-

guere, si l'on excepte certaines choses, qui regardoient la seureté de ce grand Empire, l'on trouuera qu'ils conseruoient inuiolables toutes les autres Loix, & tous les droits des vassaux. Les yncas prenoient garde encore qu'on laissast en leur entier les biens, ou communs, ou particuliers, sans en diminuer aucune chose. Quant à la discipline militaire, ils la faisoient obseruer avec tant d'integrité, qu'ils ne donnoient iamais au pillage les Prouinces ny les Royaumes qu'ils conqueroient à force d'armes, & ne vouloient en façon quelconque que leurs soldats enuahissent le bien d'autrui. Que si les habitans de quelque pays se rendoient volontairement, on esleuoit bien tost apres les plus capables d'entre-eux aux Gouuernemens de paix, & aux charges de la guerre, comme si les vns eussent esté de long temps vieux soldats de l'Ynca, & les autres ses fidelles subiets. Pour le regard des tributs que ces Roys imposoient à leurs vassaux, ils consistoient en si peu de chose, que ce que nous en dirons cy apres semblera tout à fait ridicule à ceux qui le liront. Dequoy neantmoins les yncas n'estans pas satisfaits, ils distribuoient liberalement & en abondance des provisions de bouche, des vestemens, & des dons, non seulement aux Seigneurs & aux autres Gentilshommes du pays, mais encore aux roturiers & aux pauvres; tellement que de la façon qu'ils se comportoient enuers tous, on les pouuoit plustost appeller de bons peres de famille, ou de soigneux pouruoyeurs, que non pas des Roys. Aussi fut-ce pour

354 LE COMMENTAIRE ROYAL,
cela que les Indiens leur donnerent le furnom de
Capac Titu, dont l'un, à sçauoir *Capac* signifie vn
Roy puissant en richesses & en grandeurs, & *Titu* vn
Prince liberal, & magnanime; ou si voulez, vn se-
cond Auguste., & vn Demydieu. Pour de si rares
vertus & des qualitez si eminentes, ces Roys du Peru
furent de leur temps si chers de leurs subiets, qu'au-
iourd'huy mesme les Indiens, qu'il a pleu à Dieu es-
clairer de la lumiere de la Foy, n'en peuuent perdre
le souuenir; si bien qu'en leurs traux, & en leurs
necessitez, ils les appellent par leurs noms l'un apres
l'autre, avec des gemissemens, & des plaintes dignes
de compassion; Et certainement s'il en faut dire le
vray, il ne se lit point dans l'Histoire qu'aucun des
anciens Roys d'Afrique, d'Asie, & d'Europe ait esté
si doux, si courtois, si vtile, si franc, & si liberal en-
uers ses subiets, que le furent autrefois les Roys Yn-
cas, dont nous descriuons icy les vies. De toutes
lesquelles choses, & de celles que nous dirons cy-
apres, le Lecteur pourra iuger combien ont esté con-
formes à la raison les Loix, les Coustumes, les Sta-
tuts, les Offices, & la maniere de viure des Indiens
du Peru. Dequoy ce me semble on peut profiter
beaucoup, pour les conuertir plus aysément, & avec
moins de rudesse à la Religion Chrestienne.

De la

De la methode qu'on obseruoit à pouruoir aux charges, & à toute sorte d'Officiers.

CHAPITRE. XIII.

LE R. P. Blas Valera continuant son Histoire, donne ce tiltre à ce qui s'ensuit; *De la methode obseruée par les Yncas à créer des Ministres, & des Gouverneurs en temps de paix. Du partage qu'ils faisoient des Ingenieurs, & des Maneæures, De quelle sorte ils dispoient des biens, tant en commun qu'en particulier; & comment ils impoient le tribut.*

L'Ynca n'auoit pas plustost assuiety quelque nouvelle Prouince, & fait transporter à Cozco la principale Idole de tout le pays, qu'apres le calme où il auoit mis l'esprit des Seigneurs & des Vassaux, il ordonnoit que tous les Indiens, tant les Prestres & les Deuins, que tout le reste du peuple adorassent le Dieu *Ticci Viracocha*, qu'on appelloit autrement le *Pachacamac*, comme le plus puissant de tous les Dieux, desquels il triomphoit hautement. Apres cela il leur commandoit de tenir l'Ynca pour leur Roy, & leur souuerain Seigneur, afin de le seruir en cette qualité, & de luy rendre obeyssance. Quant aux Caciques, il leur estoit expressement enioint de s'en aller à la Cour à chèque année, ou du moins de deux en deux ans, selon la distance des Prouinces. D'où ils ensuiuoit que la ville de Cozco estoit la plus

fréquétée, & la mieux peuplée de toutes les villes du nouveau mode. Auecque cela il donoit ordre qu'on eust à enrouller & mettre par cõpte tous les habitãs de la Prouince nouuellement conquise; mesme iusques aux enfans, y specifiant l'âge, l'extraction, la charge, les biens, la famille, les mestiers, & les coustumes de tous generalement, afin de les marquer en lieu descrit par les filets & les neuds de diuerfes couleurs, dont ils vsoient d'ordinaire; Ce que les Yncas faisoient exprés, afin d'imposer le tribut, conformement à la condition d'un chacun, & ainsi pouruoir aux autres choses, à quoy ils se croyoient obligez pour le bien de tout le public. Ayant mis ordre à cela, ils nommoient diuers Ministres pour les fonctions de la guerre, comme les Generaux d'armée, les Maistres de Camp, les Capitaines en chef, & les subalternes; les Enseignes, les Sergents, & les Chefs d'esquadre, dont les vns commandoient à dix soldats, & les autres à cinquante. Les moindres Capitaines auoient cent soldats sous leur charge, & les autres ou plus ou moins, iusques à mille hommes. Les Maistres de Camp en auoient quatre ou cinq mille, & les Generaux, qu'ils appelloient *Hatun Apa*, c'est à dire *Grands Capitaines*, commandoient iusques à dix mille hommes de guerre. Ils appelloiẽt Curacas, les Seigneurs de plusieurs Vassaux, comme par exemple les Ducs, les Comtes, & les Marquis. Ceux-cy, cõme vrays, & legitimes Seigneurs, commandoient à leurs subiets en temps de paix & de guerre; outre qu'ils auoient vn plein pouuoir de

faire des Loix particulieres, d'ordonner des tributs, d'assister châce famille, & de pourvoir en general au bien des Vassaux en temps de necessité, conformément aux statuts, & aux ordonnances de l'Ynca. Touchant les Capitaines en chef, & leurs subalternes, bien qu'ils n'eussent ny l'autorité de faire des Loix, ny de mettre des imposts, si est-ce qu'ils auoient cet aduantage de laisser hereditaires leurs Offices, de mesme qu'ils les auoient receuz; ioint qu'en téps de paix ils ne payoient iamais de tribut, & qu'on leur fournissoit des magazins du Roy, & non pas des particuliers, les choses qui leur estoient necessaires. Leurs inferieurs, comme les chefs d'esquadre de dix à cinquante, payoient le tribut, pource qu'ils n'estoient pas Gentilshommes. Les generaux & les Maistres de Camp les creoint par election, & ne pouuoient leur oster leurs charges, depuis qu'ils les y auoient mis vne fois. Ce qu'ils payoient de tribut n'estoit autre chose que d'exercer l'Office de Dizainiers, auxquels il appartenoit encore de faire la visite des champs, des possessions, & des maisons Royales; comme aussi de pourvoir aux vestemens, & aux prouisions de bouche du commun peuple. L'Ynca souloit nommer par mesme moyé plusieurs autres Ministres & Gouverneurs subalternes les vns aux autres, pour s'en seruir à donner ordre à toutes les choses qui touchoient le gouvernement & le tribut de l'Empire, afin que par ce moyen chacun pût sçauoir son compte, & qu'aucun ne fust trompé. Tous les troupeaux du paystant ceux du Roy que du

558 LE COMMENTAIRE ROYAL,
peuple auoient des Bergers, qui dependoient les vns
des autres, & gardoient avec tant de fidelité le be-
tail, qui leur estoit commis, qu'il n'en venoit ia-
mais faute, non pas mesme d'une seule brebis, veu
le bon ordre qu'ils y mettoient; Ce qui leur estoit
d'autant plus facile, qu'il n'y auoit aucuns larrons en
tout le pays, & qu'ainsi pour empescher le degast
qui se pouuoit faire de leurs troupeaux, il n'estoit
question que de chasser les bestes sauuages. Dauan-
tage il y auoit des Commissaires de toutes les sortes,
expressement establis à la garde des possessions, ou
des biens de la terre; & pareillement des Intendans,
des Administrateurs, des Visiteurs, & des Iuges, le
devoir desquels estoit de prendre garde qu'en leur
ville il n'y eust faute d'aucune chose, ny en general,
ny en particulier. Que s'il s'en trouuoit quelques
vns qui fussent dans l'incommodité, ces Officiers en
donnoient aduis tout aussi tost aux Gouverneurs,
aux Curacas, & au Roy mesme, afin d'y pouruoir:
comme en effet les vns & les autres s'en acquittoient
dignement; mais par dessus tous l'Ynca s'y portoit
avec tant de zele & de charité, que par ses actions il
tesmoignoient veritablement qu'il n'estoit pas seule-
ment Roy, mais tuteur de ses subiets, & vray pere,
de famille. La charge des Iuges & des Visiteurs
consistoit à faire en sorte par leur diligence que tous
les hommes fissent leur devoir & leur charge, pour
s'empescher d'estre oysifs: Que les femmes eussent
le soing de leur mesnage, des meubles, des veste-
mens, des provisions, de filer, de tistre & d'esleuer

leurs enfans; Que les ieunes filles obeissent à leurs meres, & à leurs maistresses, sans vser de nonchalance en ce qui touchoit le meſnage & l'exercice des femmes; Que les personnes âgées, & pareillement les impotens, qui n'estoient pas propres au grand trauail s'employassent à quelque chose qui fust vtile pour eux, comme à ramasser de la paille, & des buchettes de bois, à se despoüiller pour se nettoyer de leur vermine, & porter leurs poux à leurs Decurions, ou au Chef d'esquadre. L'ordinaire employ des aveugles estoit d'oster les ordures du cotton, & d'engrener le mayz hors des espics où il s'engendre. Les gens de mestier auoient leurs Iurés, & releuoient la plus part les vns des autres. Tels estoient tous les ouuriers qui trauailloient en or, en argent, en cuivre, en letton, ensemble les Charpentiers, les Massons, les Potiers, les Lapidaires, & ainsi des autres mestiers, necessaires à la Republique. Que si leurs enfans les eussent tous exercez, conformément aux ordonnances des Yncas, & au reglement qu'en fit depuis Charles Cinquiesme, asseurement le pays des Indes seroit plus fleurissant qu'il n'est auourd'huy, & aussi abundant qu'il estoit alors en toute sorte de prouisions, ioint qu'on y prescheroit l'Euangile avec bien plus de fruiet qu'on ne fait. Tous ces inconueniens n'estans arriuez que par nostre nonchalance, sont cause que les Curacas, & les autres Indiens des principaux du pays, se pleignent à tout moment en leurs assemblées du gouuernement present; & qu'ils n'y trouuent pas

560 LE COMMENTAIRE ROYAL,
leur compte, lors qu'ils le veulent comparer à celui
des Yncas, comme nous le monsturons cy-apres au
neufiesme Chapitre du second liure. Tout ce que ie
viens de dire est tiré du R. P. Blas Valera, & ce qu'il
promet de nous donner est perdu.

Le mesme Autheur continuant cette matiere, dit
ce qui s'ensuit. Outre les choses que i'ay cy-deuant rappor-
tées, les Indiens auoient des Commissaires deputez à la visite des
champs, comme pareillement des Giboyeurs, des Pescheurs, des
Tisserans, & des Cordonniers, ensemble des Buscherons, qui
trauailloient à couper du bois pour les maifens Royales, ou
mesme pour les bastimens publics, & des gens de forge qui fai-
soient de cuivre les outils qui leur estoient necessaires. Outre tout
cecy, il y auoit quantité d'autres Artisans, qui trauailloient
tous avec vne diligence incroyable. Mais au temps où nous som-
mes il y a dequoy s'estonner de voir de quelle façon les Indiens
ont oublié l'ancien ordre qui s'obseruoit en l'exercice de ces me-
stiers, & avec combien d'obstination ils obseruoient les autres
Coustumes, dont ils ne se desistent qu'à leur grand regret, & le
plus tard qu'il leur est possible, s'il aduient que nos Gouverneurs
en retranchent quelque chose.

*De l'Ordre & des Reiglemens de l'Ynca,
touchant les biens du public , & des
particuliers.*

CHAP. XIII.



Pres que l'Ynca s'estoit fait maistre d'une Prouince , & qu'ayant rendu les habitans tributaires, il leur auoit donné des Gouverneurs , & des Maistres pour les instruire en leur Idolatrie , il ne tournoit ses pensées qu'à pourvoir à tout l'estat du pays. Il commandoit pour cet effet qu'ils eussent à compter par leurs neuds les pasturages , les collines , & les montagnes, les terres labourables , les possessions , les mines des metaux , les salines , les fontaines, les lacs , les riuieres , les terres qui portoient du cotton , les arbres fructiers , & les troupeaux de bestail. Ces choses & plusieurs autres estoient, comme l'on dit, mises en ligne de compte, chacune à par soy ; premierement celles de toute la Prouince , puis de chaque ville , & finalement de chaque habitant. Apres cela il falloit sçauoir ce que les terres labourables auoient d'estenduë tant en longueur qu'en largeur , & par consequent le reuenue qu'elles rapportoient. Comme on s'en estoit bien esclaircy, & de toutes les particularitez qui en dépendoient, l'on en faisoit le rapport à l'Ynca , qui estoit

562 LE COMMENTAIRE ROYAL,
bien ayse de s'en instruire nettement, & d'en prendre connoissance, non pas pour ses interests particuliers, ny pour accroistre son domaine des terres de ses subiets, mais pour le soulagement du public. Car apres qu'il s'estoit bien informé de l'abondance, ou de la pauvreté de tout le pays; selon qu'il estoit ou fertile ou sterile, il donnoit ordre à l'entretienement des habitans: ce qui luy seruoit encore pour preuenir les necessitez publiques, & faire des prouisions, pour en assister les pauvres subiets en temps de famine, de peste, ou de guerre. Bref il faisoit en sorte qu'il ne se passast aucune chose qui regardast son seruice particulier, ou celuy des Curacas ou de l'Estat, de laquelle tous ses Vassaux n'eussent aduis par vne declaration publique. De cette façon ny les subiets ne pouuoient rien retrancher de ce qu'ils estoient obligez de faire, ny les Curacas non plus que les autres Officiers du Roy, les troubler, ny les fouler en aucune sorte. Outre tout cecy, apres qu'on auoit fait le denombrement de châque Prouince, l'on y mettoit des limites, afin de la separer d'avec les autres terres qui luy estoient frontieres. Or afin qu'à l'aduenir il n'y eust point de confusion en cela, l'Yncaposoit de nouueaux noms aux montagnes, aux collines, aux champs, aux prez, aux fontaines, & aux autres lieux, châcun à part soy. Que s'ils en auoient desja de particuliers, il les confirmoit, en y adioustant quelque chose de nouueau, pour en faire distinction avec les autres Contrées; Ce qu'il est bien necessaire de remarquer, afin que nous allions
iusques

iufques à la fource de la veneration & du refpect que les Indiens portēt encore auiourd'huy à tous ces lieux, comme il fera dit en fuitte. Apres que l'Ynca auoit mis ordre à ces chofes, il partageoit les terres entre les villes de la Prouince, donnant particulièrement à chācune ce qui luy deuoit appartenir. Auecque cela il faisoit des inhibitiōs tres-expreſſes qu'on n'eust aucunemēt à confondre les bornes des chāps, depuis qu'il les auoit marquées à chāque ville; voulāt que le meſme s'obſeruaſt en matiere des paſtura- ges & des montagnes, ſelon le partage qui en eſtoit fait en faueur des habitās d'vne Prouince. Quant aux anciennes mines, d'or, & d'argent, & meſme aux nouuelles, il en permettoit l'vſage au Curaca, iufques à ſouffrir, que luy meſme, & pareillement ſes pa- rens, & ſes Vaſſaux en priſſent ce qu'ils vouloient, non pas pour en faire des threſors, dequoy ils ſe ſoucioient fort peu, mais pour en parer & enrichir leurs habillemens aux iours de leurs feſtes principa- les, comme auſſi pour en faire des vases à l'vſage du Cacique, encore falloit-il que le nombre en fuſt li- mité. Comme ils auoient à ſuffiſance, de ces me- taux, ils ne penſoient plus aux mines, & meſme ils les laiſſoient perdre, ce qui eſtoit cauſe qu'ils a- uoient fort peu d'ouuriers qui ſceuſſent l'art d'y tra- uailer, & de fondre les metaux, ayant quant au reſte vn grand nombre d'Artiſans. Tels fondeurs de metaux, & autres ouuriers que l'on employoit aux mines, ne payoient pour tout tribut que le traual de leur corps. Ils eſtoient entretenuz d'outils, de ve-

stemens, & de prouisions de bouche aux despens du Roy, ou du Seigneur de la terre, qui leur en fournissoit abondamment, & il falloit de plus que pour s'acquiter de leur tribut, ils trauaillassent deux mois, estant permis à chacun d'employer le reste de l'année à ce que bon luy sembloit; A quoy l'on n'occupoit point tous les Indiens de la Prouince, mais ceux là tant seulement qui en sçauoient le mestier. En lieu de fer, ils se seruoient ordinairement du cuivre, qu'ils nommoient *Anta*, l'accommodant à l'usage de leurs armes. Ils en faisoient aussi des couteaux, & ce peu d'outils qu'ils auoient pour leur charpenterie, ensemble les grandes espingles dont les femmes attachoient leurs robbes; comme pareillement des miroirs, des hoyaux à remuer la terre, & des marteaux pour les forgerons; à cause dequoy ils estimoient ce metal plus que l'or ny que l'argent, & en tiroient vne plus grande quantité que de tous les autres.

Leur sel ordinaire, qui se faisoit de l'eau de quelques Fontaines, & de celle de la mer, ensemble le poisson des riuieres & des lacs; les fructs des arbres, le cotton, le chanvre & ainsi du reste, estoient des choses que l'Ynca vouloit estre communes à tous ceux du pays, qui les produisoit, encore que chacun n'en prist que pour son usage. Et quant aux arbres fructiers, ceux qui en vouloient planter, le pouuoient faire à leur volonté, afin d'en auoir les fructs.

L'Ynca faisoit trois diuers partages des pieces de

terre qui produisoïent du mayz, ou d'autres legumes, que les Indiens souloient semer. Le premier partage estoit pour l'entretienement des Temples du Soleil, de ses Prestres, & de ses autres Ministres. Le second, pour le domaine du Roy, des reuenuz duquel l'on entretenoit ses Lieutenans, & ses Officiers, quand ils estoient en voyage, ioint qu'on en mettoit vne partie dans les magazins publics. Le troisieme, pour les habitans des villes, chacun desquels en auoit vne portion pour la nourriture de sa famille. l'Ynca faisoit ce partage en toutes les Prouinces de son Empire, où nul ne pouuoit demander le tribut aux habitans; qui n'estoient point aussi obligez d'en fournir aucun, ny à leurs Caciques ny aux magazins publics, qui estoient dans leurs villes, ny aux Lieutenans du Roy, ny à luy mesme, non plus qu'au Temple du Soleil, ny à ses Prestres, ny aux sacrifices ordinaires; Et la raison estoit, pour ce qu'on auoit desja pourueu abondamment à ces choses, par le moyen de tous ces partages. Ce qui restoit de la portion du Roy estoit mis dans le magazin de chaque ville, & le surplus des terres du Soleil, seruoit à l'entretienement des impotens, tels qu'estoient les boiteux, les aueugles, les estroppiez, & ainsi des autres, que les deffectuositez de leur personne rendoient inhabiles au travail, ce qu'on ne faisoit toutesfois qu'apres auoir pourueu amplement aux choses requises à ce grand nombre de Sacrifices qu'ils souloient faire, & à la nourriture des Prestres, & des Ministres des Temples, qui estoient en fort grand nombre.

*Des formalitez & des Loix qu'ils obseruoient
au payement du tribut.*

C H A P. XV.



LE tribut que les Roys Yncas du Peru souloient imposer à leurs subiets estoit si modéré, qu'à bien considérer en quoy il consistoit, l'on trouuera veritablement que pas vn des anciens Roys ny de ces grands Empereurs qui se flattoient de diuers surnoms, comme de celuy d'Auguste & de Debonnaire, n'est comparable à ceux du Peru. Car de la façon qu'ils se comportoient enuers leurs Vassaux en matiere de tribut, ils sembloient plustost leur en donner, qu'en receuoir d'eux, ou du moins ne rien faire, qui ne se rapportast directement au bien de tout le public. Que s'il le faut supputer à raison du temps, de la iournée des ouuriers, de la valeur des choses, & de la despense des yncas, il se trouuera que ces contributions n'estoient presque rien, & qu'à peine plusieurs Indiens payoient quatre reales de tribut. Au reste si pour s'acquitter de ce deuoir, ou du seruice du Roy, ou bien des Curacas, il leur falloit prendre de la peine, ils l'enduroient tres-volontiers, pource qu'elle consistoit en peu de chose, & que d'un si petit traual ils entiroient vn grand bien. Les formalitez & les

Loix faittes en faueur des tributaires, qui s'obseruoient si religieusement, que ny les Iuges, ny les Gouverneurs, ny les Generaux d'armée, ny mesme les Yncas ne les pouuoient corrompre au preiudice de leurs subiets, estoient celles qui s'ensuiuent. La premiere & la principale; Qu'on n'eust à troubler ny à trauailler en façon quelconque ceux qu'on auoit exemptés du tribut pour des raisons particulieres. Tels estoient generalement les Princes du Sang, les Generaux d'armée, les Capitaines, iusques aux Centeniers, ensemble leurs nepueux, & leurs enfans, comme aussi tous les Curacas, & ceux de leur parenté. Durant que les moindres Officiers du Roy faisoient leur charge, ils ne payoient aucun tribut non plus que les soldats, lors qu'ils estoient à la guerre, ny les ieunes gens au dessous de vingt cinq ans, pour ce qu'ils estoient obligez de seruir iusques à cet âge là leurs plus proches parens, qui les auoient mis au monde. Les vieillards en estoient aussi exempts, depuis cinquante ans en haut, & pareillement tout le sexe des femmes, ou veufues, ou mariées. De ce priuilege iouissoient encore avec beaucoup de raison tous ceux qui se trouuoient indisposez, & par consequent les impotens, comme les aueugles, les boiteux, les estropiez, & ainsi des autres; bien que toutesfois les muets & les sourds ne laissassent pas d'estre employez à des choses que l'on pouuoit faire sans ouïr ny sans parler. La seconde Loy vouloit que tous les autres Indiens, qui n'estoient pas du nombre de ceux que nous venons de nommer, fussent obli-

368 LE COMMENTAIRE ROYAL,
gez à ce tribut, horsmis toutesfois les Prestres, ou
les Ministres du Temple du Soleil, ou bien les Vier-
ges esleuës. La troisiësme, que pour quelque suiet
que ce fût, aucun Indien n'eust à payer de son bien
aucune chose qui luy tint lieu de tribut, mais qu'il
s'en acquittast ou par le trauail de sa personne, ou
par le deuoir de sa charge, ou par le temps qu'il em-
ployoit au seruice du Roy ou de son Estat; En quoy
certes les pauvres & les riches se trouuoient esgaux,
pource que l'un ne payoit pas dauantage, ny l'autre
moins. L'on appelloit riche celuy qui auoit vne fa-
mille & des enfans, pource qu'ils luy aydoient à tra-
uailer, & qu'ainsi il acheuoit plus facilement la tasche
qu'il luy falloit faire en lieu de tribut, si bien de cet-
te sorte celuy qui n'auoit aucuns enfans se trouuoit
pauvre, bien qu'il fust riche d'ailleurs. La quatriës-
me Loy estoit, Que chacun eust à se tenir à son me-
stier, sans se mesler de celuy d'autrui, horsmis au
fait du labourage; & de le Milice, qui estoient
deux choses toutes communes. La cinquiesme, Que
le payement du tribut se feroit des denrées qui nais-
soient dans chaque Prouince, sans les emprunter des
autres. Ce que l'Ynca ne vouloit pas sans raison, iu-
geant bien qu'il fouleroit ses subiets, s'il falloit qu'ils
luy donnassent des fruiçts que leurs terres ne pro-
duisoient point. La sixiësme ordonnoit, que tous les
Ouuriers qu'on employoit au seruice de l'Ynca, ou
de ses Curacas, seroient abondamment pourueuz de
toutes les choses qui leur estoient necessaires pour
l'exercice de leur mestier, comme par exemple qu'o

donneroit à l'Orfevre de l'or, de l'argent, ou du cuivre, pour le mettre en œuvre; au Tisseran de la laine, ou du coton, au Peintre des couleurs, & ainsi du reste. En toutes lesquelles choses l'on procedoit de telle sorte, qu'un Ouurier n'estoit obligé que de donner pour le plus, afin de s'acquitter du tribut, trois mois de son temps, lesquels expirez il pouvoit quitter le travail à sa volonté, si ce n'estoit qu'il le voulust acheuer pour son plaisir, & en tel cas le téps qu'il y employoit de plus estoit en deduction du tribut de l'an à venir; dequoy ils tenoient compte en leurs nœuds, afin de n'en perdre la memoire. La septiesme Loy vouloit que tous les ouuriers, de quelque mestier & proffession qu'ils fussent, qui payoient le tribut aux despens de leur peine, fussent pourueuz de toutes les choses qui leur estoient necessaires, comme des prouisions de bouche, d'habits & mesme de medicamens, s'ils tomboient malades durant leur travail, & qu'on en fist de mesme à leurs femmes & à leurs enfans, afin qu'ils les soulageassent en leur ouurage, & leur aydassent à l'acheuer; Car en ce partage du travail, qu'ils faisoient par tasche; ils ne se soucioient aucunement du temps qu'on y pouuoit employer, pourueu que l'on acheuast; de maniere que si un ouurier aydé par ses gens, acheuoit en vne semaine un travail de deux mois, cela luy tenoit lieu du tribut de toute l'année, sans qu'on luy en pust demander un autre. Cette seule raison suffira pour respondre à quelques-vns, qui disent qu'anciennement les garçons, les filles, & les meres, de

570 LE COMMENTAIRE ROYAL;
quelque condition qu'elles fussent, estoient tribu-
taires ; Ce qui est tout à fait hors d'apparence , veu
que ces personnes ne trauailloient point, pour estre
obligées à ce tribut, mais bien pour ayder leurs pe-
res, ou leurs maris, ou leurs maistres. Car si vn ou-
urier vouloit trauailler tout seul, sa femme, & ses
enfans estoient exempts de cette peine, & pouuoient
demeurer à la maison, pour s'y employer aux af-
faires du mesnage, sans que le Decurion ny les Ju-
ges eussent droit de les contraindre à aucune chose,
pourueu qu'en leur particulier ils ne fussent point
oyfifs. Pour cette mesme raison au temps des Yn-
cas l'on estimoit extremement riches ceux qui au-
oient vne grande famille, ou quantité d'enfans,
pourcequ'il arriuoit souuent que les Ouuriers qui
n'en auoient aucuns tomboient malades, durant
le temps destiné à leur trauail, pour s'acquitter du
tribut. Pour remedier à cela, il y auoit encore vne
autre Loy, qui ordonnoit que les riches, c'est à
dire ceux qui auoient des enfans, & les autres qui
auroient acheué leur tasche, leur aydassent vn iour
ou deux ; ce qui plaisoit fort à tous les Indiens,
pourcequ'ils en estoient beaucoup soulagez.

De l'ordre

De l'Ordre obserué au Tribut , & de la generosité de l'Ynca, qui donnoit aux Curacas la pluspart des choses qui luy estoient présentées.

CHAPITRE. XVI.

A huitiesme Loy , estoit touchant la maniere qui s'obseruoit au payement de ces tributs, qui se faisoit avec beaucoup d'ordre & de raison , de la façon qui s'ensuit. A certain temps prefix s'assembloient dans la capitale de châce Prouince , les Iuges, les Receueurs, & les Maistres des Comptes, ou ceux qui en lieu de Registre auoient les neuds du tribut. Alors en la presence du Curaca , & du Gouverneur Ynca ils faisoient leurs partitions , & leurs comptes , par les neuds de leurs filets, & avec de petits caillous, selon le nombre des habitans de châce Prouince, Dequoy ils venoient à bout avecque tant de iustesse, que sans d'autres reigles d'Arithmetique, que celles qu'ils scauoient par habitude , ils aiustoient les choses au dernier point, & plus nettement que ne scauroient faire les meilleurs Arithemeticiens que nous ayons parmy nous. De maniere que leur Gouverneur & les Officiers du Roy comprenoient leurs comptes incontinent, & les entendoient avec vne facilité merueilleuse.

Ces nœuds faisoient foy du mestier ou de l'employ d'un chacun, & des voyages qu'il auoit faits par l'express commandement du Prince ou des Superieurs; Et ainsi toute cette occupation luy tenoit lieu de tribut. Apres tout cela l'on monstroit aux Iuges, aux Receueurs, & au Gouverneur, chèque chose separément, de celles qui estoient dans le magazin public, comme pouuoient estre les prouisions de bouche, les habillemens, la chaussure, les armes, & ainsi du reste que les Indiens souloient donner pour tribut, iusques à l'or, à l'argent, à la pierrerie, & au cuiure qui appartenoit au Roy. Par mesme moyen ils rendoient compte de tout ce qu'il y auoit de biens dans les magazins de chèque ville; de toutes lesquelles choses la Loy commandoit que l'Ynca Gouverneur de la Prouince eust vn memoire, par deuers luy, afin qu'il ne se fust aucune tromperie ny du costé des Receueurs, ny des Indiens tributaires. La neufiesme Loy, portoit express que tout ce qui resteroit de ces tributs apres la despence du Roy, seroit appliqué au commun bien des subiets, & mis dans des magazins publics, pour s'en seruir au besoing. Quant aux choses de prix, comme l'or, l'argent, la pierrerie, les plumes fines, les diuerses couleurs, pour en vser à peindre & à la teinture, & pareillement le cuiure, & les autres singularitez que les Curacas presentent à l'Ynca vne fois l'année, elles tournoient aussi tost à leur proffit qu'à celuy du Roy. Car apres qu'il en auoit fait tirer ce qu'il falloit à peu près pour le seruice de sa maison, & de ceux du sang Royal, il

partageoit tout le reste entre les Capitaines, & les Seigneurs, qui luy auoient fait ces presens. Car bien qu'ils eussent ces choses en leur pays, si est-ce qu'ils ne pouuoient s'en seruir que par la permission de l'Ynca, & sans en auoir de luy vn priuilege particulier. De tout ce que i'ay dit cy deuant l'on peut conclure que les Roys yncas prenoient pour eux la moindre partie du tribut qu'on leur dōnoit, & qu'ils conuertissoient l'autre au commun proffit de leurs Vassaux. La dixiesme Loy contenoit vne expresse declaration des choses où les Indiens se deuoient occuper, tant pour le seruice de leur Roy, que pour le commun proffit de leurs Republicques & de leurs villes, ce qu'on leur imposoit en lieu de tribut; Comme par exemple, on leur donnoit pour tasche d'aplanir les chemins, & de les pauer; de rebastir les Temples du Soleil, ou d'y faire les reparations necessaires, & de pouruoir à toutes les autres choses qui appartennoient à leur Idolatrie: On les obligeoit par mesme moyen de trauailler aux maisons du public, comme par exemple aux magazins, & aux Palais des Gouverneurs, & des Iuges; de redresser les ponts, de faire l'office de Messagers ou de Courriers, qu'ils appelloient *Casqui*, de labourer les terres, de ferrer les fruiçts, de mener paistre les troupeaux, de garder les biens de la terre, de faire des Hospitaux pour y receuoir les voyageurs, & d'y estre en personne pour les seruir, & leur fournir aux despens du Roy tout ce qui leur seroit necessaire. Outre cela ils estoient tenez de faire ponctuellement quantité

d'autres choses, pour leur commun proffit, ou de leurs Curacas, ou pour le seruice de l'Ynca. Mais d'autant qu'en ce temps là cette partie des Indes estoit grandement peuplée, il aduenoit que ceux du pays auoient si peu à faire en cecy, qu'ils ne se resentoient presque pas de ce trauail; ioint que chacun seruoit à son tour, & que cela se faisoit avec tant d'équité, que jamais les vns n'estoient plus foulez que les autres. Par ceste mesme Loy il estoit ordonné qu'une fois l'année les chemins fussent applanis, les ponts renouvellez, & les canaux nettoyez, afin qu'on pût plus facilement arroser les terres, ce que la Loy commandoit qu'ils fissent volontairement, à cause que ce trauail se rapportoit generalement au commun bien de chaque Royaume, de chaque Province, & de tout l'Empire.

Je laisse à part plusieurs autres petites Loix, qu'ils obseruoient, pource qu'elles pourroient ennuier le Lecteur, & qu'en matiere de tribut ie pense auoir rapporté les principales. Tout ce que ie viens de dire est tiré du R. P. Blas Valera: surquoy, ie voudrois bien demander à vn certain Historien, d'où vient qu'il dit que les Yncas faisoient des Loix iniustes & tyrâniques, pour tirer de leurs subiets de trop grands subsides, & des imposts extraordinaires. Ce que ie n'ay iamais reconnu pour moy, ioint qu'il faut bien croire que toutes ces Loix, & celles que nous rapporterons cy-apres, estoient equitables, puis que les Roys d'Espagne les ont depuis confirmées de leur bon gré, comme le remarque le mes-

me P. Blas Valera. Reuenons maintenant au Prince Viracocha , & voyons comment il se tirera de la peine , où nous l'auons laissé , pour deffendre son honneur, & celui de ses Predecesseurs.

L'Ynca Viracocha est aduertý que les ennemis s'approchent , & il luy vient un secours de vingt mille hommes.

CHAP. XVII.



Es memorables faicts d'armes de l'Ynca Viracocha nous obligent de laisser à part toute autre chose , pour ne parler que de ses hauts faicts. Nous auons dit à la fin de l'Histoire de son pere , que l'ayant laissé à *Muyna* , il s'en retourna droit à Cozco , ramassant par les chemins tout ce qu'il trouuoit de gens espars à la campagne. Ce qu'il n'eut pas plustost fait , qu'il sortit hors de la ville , pour s'en aller audeuant des ennemis , en intention de les combattre vaillamment , aymât beaucoup mieux mourir les armes à la main , que voir les insolences & les vilenies qui s'en alloiēt estre faittes apparemment dans le temple du Soleil , en la maison des Vierges esleües , & en toute la ville de Cozco , qu'ils croyoient estre sacrée. Il faut scauoir maintenant qu'à demye lieuë de la ville tirant vers le Nord , se void vne grande plaine , où s'arresta

le Prince Ynca Viracocha, pour y attendre les gens de guerre, qui sortoient de Cozco apres luy, & ramasser tous ceux qui s'en estoient fuis qui çà, qui là par la campagne. Les vns & les autres estans ioints à ceux qu'il auoit amenez avec soy, il en fit vn corps d'armée, de plus de huit mille hommes, tous resolu de mourir pour la defense de leur Prince. Comme il estoit là campé, il eust aduis que les ennemis estoient à neuf ou dix lieuës de la ville, & que desia mesme ils passioient la grande riuere d'Apurimac. A cette mauuaise nouuelle en succeda le lendemain vne autre fort bonne en faueur des Yncas, qui fut, que de la Prouincede *Cuntisuyu* luy venoit vn secours de quelques vingt mille hommes de guerre, des Nations *Quechua*, *Cotapampa*, *Cotanera*, *Aymara*, & des autres peuples de la frontiere des Prouinces reuoltees.

Quelque peine que prissent les ennemis pour cacher leur trahison, les *Quechuas* ne laisserent pas de la descouurir, pour estre voisins des *Chancas*. Ce qui fut cause que le temps d'en donner aduis à l'Ynca leur semblant trop court, ils ne le voulurent point faire, si bien que sans attendre son mandement, ils mirent sur pied tout ce qu'ils pûrent auoir de gens, y employant toute la diligence en tel cas requise. Avecque ces troupes, ils s'en allerent droit à la ville de Cozco, en intention de la seconrir, s'il estoit possible, ou de mourir au seruice de leur Roy. Car ces nations s'estoient desia volontairement reduites à l'Empire de l'ynca Capac Yupanqui, comme il a esté

dit cy-deuant. Pour tesmoigner donc l'ardent zele qu'auoient ceux de leur pays au bien du public, ils vindrent exprés pour les secourir, s'y laissant porter encore par la consideration de leurs propres interests. Car il y auoit plusieurs années que les *Chancas*, & les *Quechuas* estoient ennemis mortels, de maniere que les derniers firent ces leuées, pour ne tomber sous la tyrannie des *Chancas*. Or pour empescher que les ennemis n'entraissent les premiers dans la ville, ils prirent leur chemin du costé du Nord, afin de leur gagner le deuant; comme en effet les vns & les autres se rencontrèrent presque en mesme temps.

Cependant le Prince *Ynca Viracocha* & tous ses soldats prirent courage, quand ils sceurent qu'en ces extremitez où ils se trouuoient reduits, il leur venoit vn si grand secours. Ce que le Prince reconnut estre vn effet de la promesse de son oncle *Ynca Viracocha*, lequel, comme nous auons dit, s'estant apparu à luy en songe, l'auoit asseuré qu'en toutes ses neccesitez il luy seroit fauorable, comme à sa chair, & à son propre sang, & qu'il luy donneroit toute l'assistance dont il auroit besoin. En effet le Prince se voyant secouru si à propos, se souuint de ces paroles de son oncle, & les repeta souuent, inuitant ses gens à prendre courage, puis qu'ils auoient pour eux leur Dieu *Viracocha*, & qu'ils voyoient sa promesse accomplie. Aussi arriua-t'il que par ces paroles les *Yncas* s'animerent de telle sorte, qu'ils tindrent la victoire pour gagnée. Ils changerent donc le dessein qu'ils auoient ait de combattre les ennemis dans les mauuais pas-

578 LE COMMENTAIRE ROYAL,
sages que l'on trouue depuis la riuere d'*Apurimac* ius-
ques aux costaux de *Villacunca*, pour les empescher
de se preualoir de l'aduantage qu'ils auoient sur eux,
pource qu'ils tenoient le haut. Et d'autant qu'ils
estoient bien asseurez qu'il leur venoit du secours,
ils se resolurent de l'attendre de pied ferme, & de se
desflasser vn peu, en attendant la venue des ennemis.
D'ailleurs l'ynca *Viracocha* & ses Conseillers de guer-
re, qui estoient tous ses parens, furent d'aduis que
puis qu'il leur venoit du secours, il ne falloit pas
qu'ils s'esloignassent de la ville, tant pour la pouuoir
deffendre plus promptement en cas de necessité,
que pour se preualoir des prouisions qui estoient de-
dans, afin d'en assister les gens de guerre. Ce conseil
sembla fort bon à l'ynca *Viracocha*, qui ne bougea
de la plaine, iusques à ce que le secours qu'il atten-
doit avec tant d'impatience se vint ioindre à son ar-
mée. Il estoit de douze mille hommes de guerre,
que le Prince receut avec de grandes demonstra-
tions de bienueillance. Mais sut tout il fit beaucoup
de caresses & de bon accueil aux Curacas de chaque
nation, & à tous les autres Capitaines, dont il loüa
la fidelité, promettant aux soldats qu'il reconnoi-
stroit à l'aduenir les signalés seruices qu'ils luy ren-
doient à ce besoing.

Après que les Curacas eurent adoré leur Ynca *Vi-
racocha*, ils luy dirent qu'à deux iournées de là mar-
choient cinq autres mille hommes de guerre, qu'ils
auoient laissez derriere, pour venir plus promptement
au secours. Le Prince les remercia derechef de l'a-
cheminement

cheminement des vns & des autres ; puis ayant tenu le conseil avec ses parens , il aduifa les Curacas, qu'ils enuoyassent des hommes exprés pour faire aduertir les gens de secours qui estoient derriere , de toutes les choses qui se passoient. Qu'au reste ils eussent à leur dire que le Prince les attendoit à la campagne avec son armée; & qu'ils se hastassent de marcher iusques à ce qu'ils arriueroyent en certains costaux qui estoient proches de là, où ils se mettroient en embuscade, & s'y tiendroient clos & couuers , pour y voir la contenance des ennemis. Le dernier ordre qu'ils eurent, fût que s'ils voyoiét qu'ils fissent mine de vouloir combattre, ils les chargeassent d'un costé, pour en venir à bout plus facilement : Sinon qu'ils se tinssent tousiours sur leurs gardes , afin de faire le deuoir de bons soldats. Deux iours apres que le secours fut venu , l'Ynca descouurit sur le haut de la coste de *Rimac tampu* l'auantgarde des ennemis, lesquels scachant que l'Ynca Viracocha estoit à cinq lieuës de là, firent passer la parole de l'un à l'autre, afin que l'arrieregarde s'auançast, & se vint ioindre à l'auantgarde. De cette façon les vns & les autres marcherent tout ce iour là, & se rencontrerent à *Sacsahuana*, à trois lieuës & demy du lieu où estoit le Prince Viracocha, & où se donna depuis la bataille de Gasca & de Gonçalo Piçarro.

*De la sanglante bataille qui fut donnée par
l'Ynca Viracocha , & de la deffaitte
des Chancas.*

CHAP. XVIII.



Ynca Viracocha enuoya à *Sacsahuana* des hommes exprés aux ennemis, pour leur dire qu'ils s'offroit à leur donner vne abolition du passé , s'ils vouloient à l'aduenir viure en bonne paix , & en amitié. Mais quoy que les Chancas, qui sçauoient des-ja que l'Ynca *Yahuarhuacac* s'estoit retiré , & qu'il auoit abandonné la ville de *Cozco* , fussent bien certains d'un autre costé, que le Prince son fils estoit resolu de la deffendre; si est-ce qu'ils ne s'estonnerent pas pour cela, & ne voulurent point donner audience à ses gens. Ce qu'ils ne iugerent pas à propos , pource qu'estans d'un naturel grandement altier, ils se flattoient de l'esperance de la victoire, se faisant acroire qu'il ne falloit point craindre le fils, puis que le pere auoit des-ja pris la fuite. Sur cette esperance ils renuoyerent les deputez, sans les daigner escouter. Le lendemain ils sortirent de *Sacsahuana* de fort grand matin & cheminerent iusques à *Cozco*. Mais quelquediligence qu'ils fissent, pource qu'il leur falloit marcher en esquadron formé, selon l'ordre de la guerre, ils ne peurent arriuer auant la nuit au lieu

où estoit le Prince : Luy cependant leur enuoya de-
 rechef des hommes exprés, pour leur faire les mes-
 mes offres d'amitié qu'auparauant il leur auoit fait-
 tes, avecque promesse de leur pardonner leur rebel-
 lion. Mais les Chancas, qui estoient des ja campez,
 ne les voulurent point escouter non plus qu'aupara-
 uant, & les traitant avecque mespris ; *Demain*, leur
 dirent ils, *nous verrons à qui il appartient d'estre Roy, &*
de pardonner. Les deputez se retirerent avec cette mau-
 uaise responce, & ceux de l'un & de l'autre party po-
 serent leurs sentinelles. Le lendemain, si tost qu'il
 fut iour, ils s'armerent tous, & se mirent à marcher
 avec de grands cris au son des hautbois, des cornets,
 des atabales, & des trôpettes. l'Ynca Viracocha vou-
 lut paroistre à la teste de ses gens, & fut le premier
 à charger les ennemis, qui de leur costé s'obstine-
 rent au combat, pour essayer de gagner la victoire
 qu'ils s'estoient promise. Les Yncas en firent de
 mesme, pour deliurer leur Prince du danger pre-
 sent, & de la honte d'estre vaincu. Il fut combattu
 vaillamment en cette iournée, où il se fit vn sanglant
 massacre iusques à midy, sans que la victoire pen-
 chast plus d'un costé que de l'autre. Cependant voi-
 la suruenir les cinq mille Indîes de l'embuscade que
 nous auons ditte ; qui chargerent vistement les
 ennemis du costé droit de leur esquadron. Comme
 ils estoient frais, avec l'impetuosité dont ils se iet-
 terent sur eux, ils les traiterent fort mal, si bien
 qu'ils furent contrains de se retirer quelques pas en
 arriere. Mais enfin s'encourageant les vns les autres,

ils regagnerent le terrain qu'ils auoient perdu , & combattirent obstinément. Ce ne fut pas toutesfois sans auoir vn grand desplaisir en eux mesmes, d'estre si long temps, sans gagner la victoire qu'ils se promettoient , & qu'ils tenoient mesme comme assurée.

Après cette seconde charge ils combattirent plus de deux heures avec vn esgal aduantage des deux costez; Mais enfin les Chancas s'affoiblirent peu à peu, pource qu'à tout moment il venoit vn nouveau renfort de gens au party de l'Ynca. Car ceux qui s'en estoient fuis de Cozco, & les habitans des villes prochaines, sçachant que le Prince Viracocha ynca combattoit pour la deffense de la maison du Soleil, se r'allierent incontinent par troupes de cinquante & de cent hommes, tant dû plus que du moins, selon qu'ils se rencontroient; Tellement qu'ainsi ramassez on les voyoit se ietter courageusement dans la mellée, où pour les haut cris qu'ils faisoient, il sembloit que leur nombre fust beaucoup plus grand qu'il n'estoit. Ce nouveau secours fit que les Chancas se deffierent de la victoire, & que faisant courage de desespoir, ils ne combattirent pas tant pour vaincre que pour mourir. Durant que cela se passoit ainsi, les Yncas qui faisoient coustume de rendre illustre l'Histoire de leurs beaux faits par des comptes fabuleux, & par de faux tesmoignages tirez de leur pere le Soleil, voyant qu'il leur venoit tousiours du renfort, ne voulurent point laisser perdre cette occasion, & s'aduiserent de s'en seruir comme ils

souloient faire en semblables choses. Ils publierent donc hautement, & firent courir le bruit, que les pierres de ces campagnes se transformoiēt en hommes, qui par l'expres commandement du Soleil, & du Dieu Viracocha qui le vouloient ainsi, combattoient pour le service du Prince. Cependant les *Chancas*, chez qui les fables se debitoient pour des veritez, s'estonnerent si fort de ceste nouuelle, & se l'imprimerent si bien dans l'ame, qu'il ne fut pas possible de l'en effacer depuis. Mais sur tout le menu peuple de tout le Royaume y adiousta foy comme à vne chose asseurée, & la tint pour vn miracle, comme le remarque le R. P. F. Ierosme Roman, au second liure de sa Republique des Indes Occidentales, Chapitre vnzième; Où parlant de cette bataille il en dit ce qu'il ensuit, que j'ay tiré de luy mot à mot. *l'Ynca s'estant fait maistre du champ de bataille, cette victoire sembla si extraordinaire aux Indiens, qu'aujourd'huy mesme, quand ils en parlent, ils asseurent que lors qu'il fut question d'en venir aux mains, toutes les pierres de la campagne se transformerent en hommes, & s'armerent pour leur deffense; Ce que le Soleil permit ainsi, pour s'acquitter de la parole qu'il auoit donnée au valeureux Pachacuti Ynca Yupanqui, car c'estoit ainsi que s'appelloit ce vaillant jeune homme.* Voila ce qu'en dit l'Autheur de ces Republiques, lequel au Chapitre allegué, & au suiuant, rapporte plus succinctement plusieurs choses, de celles que nous auons dites, & que nous dirons des Roys du Peru. Le R. P. Ioseph Acosta fait aussi mention du Fantosme qui s'apparut à Viracocha, changeant les

584 LE COMMENTAIRE ROYAL;
noms des Roys de ce temps, & décrit la bataille des
Chancas, comme aussi plusieurs autres choses du nô-
bre de celles que nous dirons de ce Prince. Dequoy
neantmoins il ne parle qu'en abrégé & confusément.
Aussi est il vray que presque toutes les relations que
les Indiens donnent aux Espagnols, sont obscures &
sans ordre, tant pour les difficultez de ceste langue,
que pour auoir perdu les memoires des traditions
de leurs Histoires. De maniere qu'ils ne parlent que
confusement de la substance des choses, sans y ob-
server aucune Chronologie. Mais de quelque façon
qu'en ayt escrit cet Autheur, ie ne laisseray pas de le
rapporter icy, afin de faire voir aux Lecteurs, que ie
ne feins point des fables, si ce n'est que mes parens
les ayent inuentées, & que ie ne dis rien qui ne soit
venu dans la connoissance des Espagnols, qui ne
l'ont pas appris dans le berceau comme moy.

Il en parle donc ainsi au vingt-vniesme Chapitre
du fixiesme liure. *Pachacuti Ynca Tupanqui* regna
soixante ans, & fit de grandes conquestes. Ses victoires prirent
naissance du mal'heur de son aîné, qui du viuât de son pere tenoit
le Sceptre de l'Empire. Il arriva donc que faisant la guerre en son
nô il fut deffait en vne bataille qu'il eut cõtre les *Changas*, nation
qui tenoit alors la vallée d'*Andaguayllas*, qui est à trente lieues de
Cozco, tirant vers *Lima*: Apres cette desroutte, il se retira avec
fort peu de gens: Ce que son cadet *Ynca Tupanqui* n'eust pas
plustost apperceu, que pour se rendre souuerain il s'aduisa de cer-
te inuention. Il fit accroire, qu'un iour comme il estoit seul, &
fort ennuyé, le *Viracocha* s'apparoissant à luy, s'estoit plaint ex-
trement de n'estre ny seruy ny obey comme il falloit par les

hommes, bien que toutesfois ils déppendissent de son Empire, & qu'il eust créé le Ciel, le Soleil, les Estoilles, & toutes les choses du monde; Qu'au reste il luy desplaisoit fort de voir la grande veneration qu'ils portoient au Soleil, au Tonnerre, à la Foudre, & aux autres choses, qui n'auoient qu'autant de vertu qu'il leur en donnoit; Et qu'il les aduisoit tous, qu'au Ciel où il estoit on l'appelloit ordinairement Viracocha Pachayachachic, c'est à dire, Createur vniuersel. En suite de tout cecy le ieune Prince dit, que le mesme Viracocha l'auoit aduertty, qu'encore qu'il fust tout seul, qu'il ne laissast point pour cela de leuer des troupes; Que les Changas quelques victorieux qu'ils fussent seroient à la fin vaincus par luy; Qu'il les assuiettiroit à son Empire, & que pour cet effet il luy enuoyeroit des gens qui l'assisteroient, sans qu'ils fussent veus. Aussi arriva til ainsi, & que le Prince ayant mis sur pied quantité d'hommes de guerre gagna la victoire, si bien qu'il osta l'Empire à son pere, & à son frere pareillement. Depuis qu'il eust gagné cette victoire, il ordonna qu'on eust à tenir le Viracocha pour Seigneur Vniuersel, & que les statnès du Soleil, du Tonnerre, & des autres Guacas luy fussent soubmises; Comme en effet on les mit tousiours depuis au dessoubs de celles du Viracocha. Or bien que cet Ynga Yupanqui annexast quantité de terres & de troupeaux au domaine du Soleil, & mesme qu'il en donnast au Tonnerre & aux Guacas, si est-ce qu'il ne donna rien de semblable au Viracocha, alleguant pour raison, qu'il n'auoit aucunement besoin des choses du monde, puis qu'il les possedoit toutes.

Après qu'il eut remporté cette victoire des Changas, il fit sçauoir à ses soldats; Que ce n'estoit pas eux qui auoient vaincu, mais bien certains hommes barbus que l'Ynca luy auoit enuoyez: Qu'ils ne s'estoient rendus visibles qu'à luy seulement;

Qu'après cette deffaite ils s'estoient changez en pierres, & que si on les cherchoit, il les sçauroit bien cognoistre. En effet ayant amoncelé quantité de pierres de la montagne, qu'il choisit luy mesme, elles furent mises au lieu des Guacas, que l'on adora depuis, & mesme on leur fit des sacrifices. Ces Barbares les nommoient ordinairement Pururaukas, & les souloient porter à la guerre avec vne grande deuotion, tenant pour certain, que fauorisez de leur ayde, ils ne pouuoient manquer de venir à bout de leurs ennemis; Et voila comme la feinte, ou l'imagination de cet Ynca eust tant de pouuoir, que par son moyen il gagna plusieurs victoires fort remarquables. Tout ce que ie viens d'alléguer est du R. P. Acosta, & se rapporte à peu près à la fable que i'ay declarée ailleurs. De dire maintenant qu'ils mirent la statuë du Viracocha plus haut que celle du Soleil, cela me semble hors d'apparence dans la verité des choses, & se doit proprement appeller vne nouuelle inuention des Indiens, qui l'ont voulu faire accroire aux Espagnols pour les flatter, comme s'ils eussent donné la preference au Dieu qu'ils estimoient le plus grand de tous: Ce qui n'estoit pas ainsi neantmoins. Car il ne se trouue point qu'ils eussent plus de deux Dieux, à sçauoir le Pachacamac qu'ils nommoient le Dieu, qui n'estoit ny veu ny connu, & le Soleil, qui estoit visible à tous. Mais quât au Viracacha, & aux autres Yncas, ils les tenoient seulement pour fils du Soleil.

Des actions genereuses que fit le Prince Ynca Viracocha , apres qu'il eut gaigné la bataille.

CHAP. XIX.



Es Yncas voyant que les forces des ennemis s'affoiblissoient, ayant tous à la bouche le nom de *Surio* (c'est ainsi que le Prince voulut qu'on appellast le Fantosme Ynca Viracocha) les furent ioindre de prés, & les poursuivirent avec tant de violence, qu'ils les mirent hors de leurs rangs, en tuerent vn grand nombre, & firent prendre la fuitte aux autres. Le Prince ayant esté quelque temps à s'eschauffer apres la victoire, fit à la fin sonner la retraite, ne voulant pas que ses gens fissent vn plus grád massacre des ennemis, puis qu'ils se rendoient à eux, & se confessoient vaincus. Apres qu'il eut fait cela, il parcourut tout le champ de bataille, fit penser les blessez, enseuelir les morts, & desliurer les prisonniers, qu'il renuoya en leur pays, apres leur auoir pardonné à tous. En ce combat, où les vns & les autres s'obstinerent tellement, qu'il dura plus de huit heures, il y eut tant de sang respandu à la campagne, qu'à ce que disent les Indiens, vne petite riuiera qui passoit à trauers en fut toute rouge, & se grossit merueilleusement, au lieu qu'elle estoit auparauant tarie; à raison de quoy tou-

388 LE COMMENTAIRE ROYAL;
te cette plaine fut appellée depuis *Tahuar Pempa*, c'est
à dire, *Campagne de Sang*. Il y demeura sur la place plus
de trente mille Indiens, dont il y en eut huit mille
du costé de l'Ynca Viracocha, & le reste des nations
Chanca, *Hancohuallu*, *Vramarca*, *Villca*, *Vtunsulla*, &
ainsi des autres. Les deux Maistres du Camp des
ennemis y furent faits prisonniers, comme aussi le
General *Hancohuallu*, que le Prince fit pèser avecque
beaucoup de soing, pource qu'il auoit esté blessé; son
intention estant de les retenir tous trois pour le
triomphe qu'il pretendoit faire. Quelques iours
apres la deffaitte, vn oncle du Prince les tança gran-
dement d'auoir esté si hardis que de s'attaquer aux
fils du Soleil, disant qu'il falloit bien que le Ciel leur
fust fauorable, puis que par l'expres mandement de
leur Pere, les pierres mesmes combattoient pour
eux, & les arbres se changeoient en hommes, com-
me ils l'auoient veu en ce combat, & comme ils le
verroient en tous les autres, s'ils estoient si temerai-
res que de le vouloir esprouuer. Il leur raconta plu-
sieurs autres fables en faueur des Yncas, & leur dit
finalement, Qu'ils eussent à rendre graces au Soleil,
qui vouloit que ses enfans traitassent humainement
les Indiens; Que pour cette raison le Prince leur dó-
noit la vie; Qu'il les remettoit dans leurs Estats, &
tous les autres Curacas qui s'estoient rebellez contre
luy, bien qu'ils meritassent d'estre cruellement mis
à mort; & qu'à l'aduenir ils fissent le deuoir de bons
subiets, s'ils ne vouloient que le Soleil les punist, &
qu'il commandast à la terre de les engloutir tous en

vic. Cette remonſtrance donna de l'apprehenſion aux Curacas, qui ſ'humilians deuant luy, le remercierent de la grace qu'il leur auoit faite, & promirent de luy eſtre à l'aduenir bons & fidelles ſubiets.

Après le ſuccèz d'une ſi grande victoire, l'Ynca Viracocha deſpeſcha trois Courriers pour en dire la nouuelle. Le premier fut enuoyé à la maiſon du Soleil, pour le remercier de ce que par ſon moyen, il eſtoit heureuſement venu à bout de ſes ennemis. Où il eſt à remarquer qu'il l'aduertiſſoit de cette deffaire, comme ſi le Soleil, qui eſt tout clairvoyant, ne l'eust pas luy meſme veü. Ce qui monſtre aſſez qu'encore que les Yncas tinſſent le Soleil pour leur Dieu, ils le traitoient neantmoins auſſi corporellement que ſ'il eust eſté vn homme comme eux. Car entre les autres teſmoignages qu'ils en donnoient, ils beuuoient à luy, comme à vne perſonne mortelle, puis ce que le Soleil deuoit boire, ils le iettoient dans vn grand vaſe d'or, qu'ils mettoient au milieu de la place, où ils ſe reſiouiſſoient enſemble, ou bien dans ſon Temple. Et d'autant que ſa chaleur en conſommoit vne partie, ils eſtoient ſi ſols que de dire qu'il l'auoit beü. Ils luy preſentoient auſſi des plats tous chargés de viande, pour l'inviter à manger; Et quand quelque affaire de conſequence eſtoit aduenü, comme la victoire paſſée, ils deſpeſchoient vn Courier particulier, pour luy en donner aduiſ, & l'en remercier. Pour ne deſroger à cette ancienne couſtume, le Prince *Ynca Viracocha* enuoya vn homme exprés au Soleil, afin de luy dire des nouuelles

590 LE COMMENTAIRE ROYAL,
de cette victoire, & par mesme moyen il fit sçauoir
à ses Prestres, que ceux d'entre eux qui s'en estoient
fuis, eussent tous à reuenir le remercier des biens-
faits receus, & à luy faire de nouueaux Sacrifices. Il
en aduertit pareillement les Vierges qu'on nom-
moit *esleuës*, consacrées au Soleil pour estre ses fem-
mes, leur faisant sçauoir ponctuellement les nou-
uelles de cette victoire; comme si le Soleil l'eust don-
née par le merite de leurs prieres. Quant au dernier
Courrier, par eux nommé *Chasqui*, il l'enuoya à l'yn-
ca son pere, auquel il rendit compte de tout ce qui
s'estoit passé iusques alors, le suppliant instamment
de ne point bouger du lieu où il estoit, qu'il ne fust
de retour auparauant.

*Retour du Prince en la ville de Cozco, & son
entreueüe avecque son pere; auquel il
oste l'Empire.*

C H A P. XX.



Pres que le Prince eut despesché ces
trois Courriers, il choisit dans son ar-
mée quelques six mille hommes de
guerre, & renuoya tous les autres en
leurs maisons, avec promesse aux Cu-
racas de recognoistre, quand il en seroit temps, les
bons seruices qu'ils luy auoient rendus. Il nomma
pour Maistres de Camp deux de ses oncles, & vou-

lut qu'ils le suiussent ; puis deux iours apres la victoire, il se mit en Campagne avecque ses gens, en intention de poursuiure ses ennemis. Ce qu'il ne fit pas toutesfois pour les traiter mal, mais bié pour les rassurer, & les mettre à couuert de l'apprehension que leur pourroit causer la faute par eux commise. Aussi arriua-t-il qu'en ayant trouué plusieurs le long du chemin, dont les vns estoient blessez, & les autres ne l'estoient pas, il leur donna des gens pour penser leurs playes ; & quant aux Indiens qui s'estoient desja renduz, il leur fit dire par des hommes enuoyez exprés, qu'ils eussent à se retirer en leurs villes, & en leurs Prouinces, & que par mesme moyen ils assourassent les autres, que l'Ynca ne les alloit voir qu'en intention de leur pardonner, & de les consoler ; Et partant qu'ils n'eussent aucune crainte. Ayant usé de ces precautions, il continua son voyage ; & marcha en diligence. A son arriuée en la Prouince d'Antahuaylla, qui est celle des Chancas, les femmes & les enfans, qui s'estoient ioints ensemble furent au deuant de luy avec des rameaux en main s'escriant d'une commune voix, *Vnique Seigneur, fils du Soleil, & Amateur des pauvres, ayez pitié de nous, s'il vous plaist, & nous pardonnez.*

Le Prince les receut avec beaucoup de clemence, & leur fit dire, que leurs peres & leurs maris auoient esté cause de tous les malheurs qui leur estoient arriuez ; Qu'au reste il pardonnoit de bon cœur à tous les rebelles, & qu'il n'estoit là venu, que pour leur donner vne abolition generale de tout le passé ; afin

qu'en estants asseurez par sa propre bouche, ils en fussent plus satisfaits à l'aduenir, & perdissent toute l'apprehension où leur faute les pouuoit mettre. En suite de cela il commanda qu'on leur donnast tout ce dequoy ils auroient besoing, & que par mesme moyen on fust soigneux de les traiter avec toute sorte d'amour & de charité; Recommandant sur tout la nourriture des veufues, & des orphelins, fils de ceux qui estoient morts en la bataille de *Yahuar-pampa*.

Il parcourut ainsi en peu de temps, toutes les Provinces qui s'estoient reuoltées, où il laissa de bons Gouverneurs, & y mit en garnison tout ce qu'il falloit de gens pour la deffense des places gaignées; puis ils'en retourna droit à la ville, où il entra vne lune apres en estre party, selon la supuration des Indiens, qui comptent les mois par lunes. Les rebelles, & ceux qui ne l'auoient pas esté, furent esgallement estonnez de voir tant de marques de douceur & de clemence en ce nouveau Prince; de l'inclination duquel ils se promettoient vn si mauuais traitement, qu'ils s'asseuroient presque, qu'incontinent apres la victoire, il feroit quelque massacre sanglant. Toutesfois, comme ils virent depuis tout le contraire, ils en attribuerent la cause au Soleil, disant qu'il luy auoit commandé de changer de vie, & d'imiter ses Predecesseurs. Mais il est certain que ce changement ne proceda que d'un ardent desir de gloire, qui fait ordinairement que les genereux courages se violentent eux mesmes, pour vaincre leurs mauuaises

habitudes, & en prendre de bonnes, comme il aduint à ce Prince, qui en vſa de cette ſorte, pour laiſſer à ſes ſubiets vne loüable memoire de ſoy.

L'Ynca Viracocha voulut entrer à pied dans Cozco, pour monſtrer aux habitans qu'il ſe picquoit plus du nom de ſoldat que du tiltre de Roy. Il descendit par le tertre au bas de *Carmenſa*, enuironné de ſes gens de guerre. Il tenoit le milieu entre les deux Maîtres de Camp ſes oncles, & les priſonniers marchoiſent apres luy. Tout le peuple le receut avec de grands applaudiſſemens, & de publiques demonſtrations de joye. Les vieux Yncas le furent accueillir ſolennellement, & l'adorerent pour fils du Soleil; Ce qu'ils n'eurent pas pluſtoſt fait, avec de grands teſmoignages de reſpect, & d'obeiſſance, qu'ils ſe meſlerent parmy ſes ſoldats, pour prendre part au triomphe de cette victoire, diſant tout haut, qu'il leur falchoit fort de n'eſtre point ieunes, pour pouoir combattre ſous vn ſi braue Capitaine. La *Coya Mama Chicſa*, & ſes plus proches parentes, comme ſes ſœurs, ſes tantes & ſes couſines, accompagnées d'un grand nombre de Pallas, le furent receuoir d'un autre coſté, avec des chants d'allegreſſe, & des teſmoignages d'un contentement extraordinaire. Les vnes l'embraiſſoient avec tendreſſe, les autres luy eſſuioyent la ſueur du viſage, les autres oſtoient la poudre qui eſtoit deſſus ſon corps, & les autres ſemoiét de fleurs & d'herbes odorantes les lieux par où il deuoit paſſer. Il s'en alla de cette façon en la maiſon du Soleil, où ſelon la couſtume de ceux du pays

594 LE COMMENTAIRE ROYAL,
il entra pied nud, & remercia son Pere de la victoire
qu'il luy auoit donnée. Apres cela il fut visiter les
Vierges esleuës, & consacrées au Soleil, pour estre
ses femmes; puis il sortit de la ville, & s'en alla voir
son pere, qui estoit encore dans le détroit de *Muyna*,
où il l'auoit laissé.

L'Ynca *Yabuarhuacac* accueillit le Prince son fils,
non pas avec l'allegresse & le contentement qu'il
deuoit tesmoigner apparemment apres vne si gran-
de victoire, mais bien avec vne contenance graue,
& vn visage plus triste, que ioyeux. Aquoy certes
l'on ne sçauoit s'il estoit porté ou pour le desplaisir
qu'il auoit d'vne si grande victoire que son fils auoit
gagnée; ou par la hôte de sa propre lascheté, ou par
l'allarme qu'il se donnoit, que le Prince ne luy ostast
son Royaume, pour auoir abandonné la maison du
Soleil, comme aussi les Vierges ses femmes, & la
Capitale de l'Empire. Quoy qu'il en fust, l'on ne
pouuoit dire au vray quelle de ces choses causoit son
mal, ou s'il ne procedoit point de toutes les trois
iointes ensemble.

En cette entreueüe, qui se fit publiquement de
l'vn & de l'autre, ils n'eurent pas beaucoup de dis-
cours. Mais apres qu'ils se furent retirez en particu-
lier, ils parlerent fort long temps, sans que les In-
diens peussent sçauoir au vray quel auoit esté le sub-
iet de leur conference, si ce n'est que par coniecture,
ils iugerent apparemment qu'ils auoient mis en que-
stion lequel des deux deuoit estre Roy, ou le Pere,
ou le Fils. De quoy fut vne preuue assez euidente la
resolution

resolution que prit le Prince apres cette conference, qui fut de ne point permettre à son pere de retourner en la ville de Cozco , puis qu'il l'auoit si laschement abandonnée. Comme l'ambition des Princes, qui ne demandent qu'à regner, s'autorise ordinairement par le moyen du pretexte qu'ils en ont, il n'en fallut point d'autre à celuy-cy pour oster le Royaume à son pere; qui ne pût s'opposer à cette resolution, voyāt bien que tous ceux de la Capitale de son Empire fauorisoient les desseins de son fils. De maniere que pour couper chemin aux scandales, & aux guerres ciuiles, ioint qu'il ne pouuoit faire autrement, il fut contraint de consentir à tout ce que le Prince desira de luy. Cēt accord ne fut pas plustost passé entre eux que dans le détroit de *Muyna* & de *Quiespicancha*, dont la situation est fort agreable, cōme toute cette vallée l'est aussi, fut bastie vne maison magnifique, avec toutes les delices, & tous les embellissemens qu'on sçauroit s'imaginer. Car là se voyoient des parcs, des iardins, des boys, des estangs pour le plaisir de la chasse, & de la pesche; outre que la riuiere de *Yucay*, où s'engolfoient plusieurs autres petits ruisseaux, estant assez proche de ce lieu, y apportoit beaucoup d'ornement & de commodité.

Le Prince *Viracocha Ynca* ayant ietté le plan de ce Palais, les mazures duquel sont encore belles, & se voyent aujourd'huy, s'en retourna à la ville de Cozco, où il quitta la bordure iaune, & en prit vne rouge, sans vouloir permettre neantmoins

que son pere posast la sienne, tenant pour indifférent, comme c'est l'ordinaire, qu'il portast cette marque d'honneur de l'Empire pourueu que pour son regard, il en fust maistre en effet. Apres que ce bastiment fut acheué; il pourueut abondamment son pere de toutes les choses qui luy estoient nécessaires, luy donnant vn train digne de luy, & quantité de seruiteurs domestiques; de sorte qu'apres la Royauté que son fils luy auoit ostée, il sembloit n'auoir rien à desirer. Cependant l'Ynca *Yahuarhuacac* n'eust pas beaucoup de plaisir en cette solitude, où il passa le reste de ses iours, depossédé de son Royaume, & reduit à viure parmy les bestes dans vn miserable exil, tel que celuy où quelque temps auparavant il auoit confiné le Prince son fils.

Les Indiens disoient plusieurs choses là dessus, dont les principales estoient; Que dès le moment de sa naissance, les larmes de sang par luy respanduës auoient esté des presages de ce malheur; Qu'à bien considerer les choses passées, puis que cet Ynca apprehendoit si fort le mauuais naturel de son fils, il en deuoit preuenir le mal-encontre en luy donnant du poison, comme c'estoit la coustume des tyrans, & des forciers de quelques Prouinces de son Empire, & que s'il s'en fust deffait de cette sorte, il n'eust pas receu l'affront d'estre ietté de son throsne en bas. Les autres, qui parloient en faueur du Prince, duquel ils soustenoient le party, alloient publiant; Qu'il auoit en effet osté l'Empire à son pere, mais qu'un mal encore pire luy seroit possible encore arriué, si

la mauuaise fortune l'eust fait tomber en la puissance de ses ennemis; Et que leur ayant tourné le dos, & abandonné la ville, ils luy eussent osté la vie, & le Royaume, ou mesme la succession à ses enfans; à quoy le Prince auoit mis bon ordre par les merueilles de son courage. Il y en auoit d'autres encore, qui disoient à la commune loüange de leurs Roys; Que cet Ynca infortuné eust mieux aimé bannir du monde le pernicieux vsage du poison, que s'en seruir comme d'un present remede; Et quelques-vns, qui encherissoient encore plus fort sur la noblesse & la generosité de leurs Yncas, asseuroient pour certain; Qu'il n'eust pas voulu pour rien du monde en venir à ces extremitéz, sçachant bien que c'estoit vne chose indigne des Yncas, fils du Soleil, de pratiquer enuers leurs propres enfans vne supercherie, dont ils ne vouloient pas que leurs Vassaux mesme vsassent contre les estrangers. Voila les contes qu'ils en faisoient en leur conuersation ordinaire, auxquels ils en adioustoient plusieurs autres, selon qu'ils le iugeoient à propos; Et c'est où nous laisserons l'Ynca pleure-sang, pour ne parler iamais plus de luy.

*Du nom Viracocha , & pourquoy les Indiens le
donnerent aux Espagnols.*

CHAPITRE. XXI.

POur reuenir à ce nouveau Prince , il faut
ſçauoir qu'à cauſe du ſonge qu'il auoit
fait , ou de l'apparition qu'il croyoit auoir
eüe , les Indiens l'appellerent touſiours
depuis *Viracocha Ynca* , ou *Ynca Viracocha* , ce qui ſi-
gnifie vne meſme choſe , ſoit que le mot *Ynca* pre-
cede , ou qu'il ſuiue le nom de *Viracocha*. On l'appel-
la ainſi , pource que le Fantome qui ſ'apparut à luy
ſe donna ce nom. Et d'autant que le Prince leur dit,
que ce meſme Fantome auoit de la barbe , au con-
traire des Indiens qui n'en ont point , & que ſon ha-
billement luy traſnoit iuſques à terre , en cela dif-
ferent de celuy des Indiens , qui ne leur va que iuſ-
qu'aux genoux ; Cela fut cauſé qu'ils appellerent
Viracocha. Les premiers Eſpagnols qui entrerent
dans le Peru , pource qu'ils les virent barbus , & ha-
billez par tout le corps : Or pource qu'à leur abbord
en ces Contrées , ils prirent le tyran *Atahuallpa* , & le
mirent à mort , apres que par vne extreme iniuſtice
il euſt tué luy meſme *Huaſcar Ynca* , legitime heritier
de cette Couronne , & en ſuitte de cela exercé ſur la
famille Royale , ſans reſpecter ny âge , ny ſexe , des
cruautez innoüies , dont il ſera parlé en ſon lieu ; ils

confirmerent aux Espagnols ce mesme nom de *Viracocha*, disant qu'ils estoient fils de leur Dieu, ainsi appellé, & qu'il les auoit enuoyez du Ciel pour tirer les Yncas de seruitude, & deliurer la ville de Cozco avecque tout son Empire, des cruautéz & des tyrannies d'Atahuailla, côme le fit autrefois Viracocha, lors qu'il s'apparut au Prince Ynca Viracocha, pour l'affranchir de la rebellion des Chancas. Ils adioustoient à cecy, que les Espagnols tuant le tyran, auoient vengé les Yncas par l'expres commandement du Dieu Viracocha, pere de ces estrangers; à raison dequoy ils donnerent ce nom aux premiers d'entre eux qui aborderent leurs terres. Aussi est il vray que les croyant fils de leur Dieu, ils les respecterent iusques au point de les adorer, & n'oserent pas mesme se deffendre d'eux, lors qu'ils en furent attaquez, comme nous verrôs en la conqueste qu'ils firent de ce Royaume; Ce qui parût assez visible en ce que six Espagnols seulement, du nombre desquels estoit Hernando de Soto, & Pedro de Barco, furent bien si hardis, que d'aller depuis Caçamarca iusques à Cozco, & de faire en d'autres endroits deux & trois cens lieuës de chemin, pour voir les richesses de ces villes, les Indiens les portant sur des chaires à bras, afin qu'ils fussent mieux à leur aysé: ioint qu'ils leur donnoient le mesme tiltre qu'à leurs Roys, les appellant *Yncas fils du Soleil*. Que si les Espagnols eussent pris leur temps là dessus, ou s'ils se fussent accommodés à cette vaine creance des Indiens, en leur disant, Que le vray Dieu les auoit là enuoyez,

pour les deliurer des tyrannies du diable , qui estoient plus grandes que celles d'Atahualpa, & s'ils leur eussent presché le Sainct Euangile, en y adioustât l'exemple que la doctrine requiert; il n'y a point de doute qu'ils eussent fait vn merueilleux fruit en tout cet Empire. Mais il s'en fallut beaucoup qu'ils ne le fissent, côme il est remarqué dans leurs propres Histoires, où ie renuoye le Lectur, pource qu'il ne m'est pas seant de le dire, & qu'estant Indien côme ie suis, on me pourroit obiecter que i'é parle par passion. Il est vray neantmoins qu'ils ne furent pas tous blasmables, & que la plus-part se cōporterēt en vray Chrestieés. Mais tout le mal fût, que parmy des ignorans tels que ces Gentils, vn seul meschant fût plus nuisible, que cent hommes de bien ne furent vtiles.

Les Historiens Espagnols disent que les Indiens les appellerent ainsi, pour auoir passé la mer. Car le mot *Viracocha* signifie *enfleur de mer*, comme composé qu'il est de *Vira*, & de *Cocha*, qui denote l'un & l'autre. Mais ils me pardonneront, s'il leur plaist; si ie dis qu'ils ne se trompent pas moins en la signification qu'en la composition, conformément à laquelle de la façon que les Espagnols se la figurent, le mot *Viracocha* est le mesme que si l'on disoit *une mer de suif*, d'autant que *Vira* en sa propre signification veut dire *du suif*; & *Cocha* signifie *Mer*; Où il faut remarquer qu'en de semblables compositions du nominatif & du genitif, les Indiens font toujours precéder ce dernier. Par où l'on peut voir clairement, que ce mot n'est point composé, mais

que c'est le nom propre de ce Fantosme, qui dit qu'il se nommoit *Viracocha*, & qu'il estoit fils du Soleil; Ce que j'ay bien voulu rapporter icy, pour le contentement des curieux, qui seront bien-aysez d'apprendre l'explication d'un nom si commun; & pour faire voir par mesme moyen, combien s'abusét en l'interpretation des mots du Peru, ceux qui n'ont pas appris la langue de Cozco, combien qu'ils soient Indiens. La raison est, pource que ceux qui n'en sont pas natifs, ne sçauent pas dauantage de cette langue que les Castillans, & les autres estrangers. A la raison que j'ay cy-deuant alleguée, pour monstrier pourquoy les Indiens appelloient les Espagnols du nom de *Viracocha*, l'on en peut adiouster vne autre, à sçauoir l'effet de l'artillerie, & des harquebuzes, qui leur estant inconnu iusques alors, passa chez eux pour vne chose miraculeuse, comme nous le montrerons cy-apres. Le R.P. Blas Valera declare la signification de ce nom par cette diction *Numen*, qui est le mesme que la volonté & la puissance de Dieu, non qu'il veuille montrer par là que telle fust la signification du mot *Viracocha*, mais pour vne marque de la Diuinité que les Indiens attribuoient à ce Fantosme, qu'ils adorerent pour Dieu apres le Soleil, & pareillement leurs Yncas & leurs Roys, qui estoient tous les Dieux qu'ils auoient.

L'Ynca Viracocha fût en si grande reputation parmy ses parens & ses vassaux, tant pour le songe qu'il auoit fait, que pour la victoire qu'il gagna depuis, qu'il fut adoré durant sa vie comme vn nouveau

Dieu, qu'ils disoient auoir esté enuoyé par le Soleil, pour la defense de leur maison, afin que la famille en fust immortelle, & que les ennemis ne pussent iamais destruire ny la ville de Cozco capitale de cet Empire, ny la maison du Soleil & de ses Vierges esleuës. A raison de toutes ces choses, ils le reueroient avec de plus grandes marques d'adoration qu'ils n'en auoient iamais tesmoigné à leurs Predecesseurs, pource qu'ils le croyoient plus grand Dieu qu'eux, à cause des choses estranges & merueilleuses, qui estoient aduenues par son moyen. Aussi quelque peine que prist l'Ynca, pour empescher que les Indiens n'adorassent que son oncle, qui s'estoit apparu à luy, il n'en pust iamais venir à bout; de maniere qu'à la fin il souffrit qu'ils les adorassent tous deux également, & que le mesme nom s'entendist de l'un & de l'autre, iusques là mesme que pour vn plus grand honneur de son oncle le Fantosme, & de soy-mesme pareillement, l'Ynca s'aduisa de bastir vn Temple comme il sera dit cy-apres.

Cette vision fut apparemment vn effect du diable, comme ingenieux qu'il est à forger des meschancetez; soit qu'il s'apparust à luy en songe, ou visiblement, comme il estoit au creux d'un rocher, ainsi que nous auons dit cy-deuant; à quoy principalement s'accommodoit la croyance des Indiens. Il n'est pas incompatible aussi que l'ennemy du genre humain ne fist cela, pour mettre plus fort en credit l'idolatrie des Yncas. Car voyant que leur Empire s'establissoit, & qu'ils deuoient eux-mesmes autoriser par
leurs

leurs loix les vaines superstitions de ces Gentils, il s'aduisa de se montrer en cette figure & en plusieurs autres, comme le racontent les Indiens, afin que les Yncas fussent adorez, & cónus pour Dieux. Mais pas vn de ces Fantosmes, ou de ces Spectres ne les estonna si fort que l'Ynca Viracocha, d'autant qu'il se dit estre fils du Soleil, & frere des yncas; de sorte que la rebellion des Chancas estant aduenuë, il n'est pas à croire combien acquit de reputation à l'Ynca la victoire qu'il gaigna contre eux, si bien que tous les commandemens qu'il fit depuis aux Indiens, & toutes ses ordonnances passerent pour des Oracles. Ce Viracocha est ce Dieu fantastique que ceux du pays ont tenu pour le principal de tous leurs Dieux, au rapport de quelques Historiens Espagnols, & qu'ils ont plus estimé que le Soleil. Mais c'est vne fausse relation que les Indiens leur ont faite par vne maniere de flatterie, leur faisant accroire qu'ils leur auoient donné le nom du plus grand Dieu qu'ils adorassent, qui estoit le Soleil, ou possible le *Pachacamac*, qu'ils appelloient le *Dieu inconnu*; Où il est à remarquer, que leur flatterie alla iusques à ce poinct, que pour honorer les Espagnols du tiltre de diuins, à leur arriué ils les appellerent fils du Soleil; ce qui fut le mesme nom qu'ils donnerent au Fantosme Viracocha.

*L'Ynca Viracocha fait bastir vn Temple à la
memoire du Fantosme qui s'estoit apparu à luy.
Et qui se disoit son Oncle.*

C H A P. XXII.



Fin que la memoire de l'apparition qu'auoit euë l'Ynca Viracocha fust transmise à la posterité, & qu'on l'estimast dauantage, il voulut qu'en vne ville appellée *Cacha*, qui est à seize lieues de *Cozco*, tirant vers le Sud, fust basti vn Temple à l'honneur du Fantosme son oncle. Il commanda pour cét effet qu'on imitast le mieux qu'il seroit possible la nature du lieu, où il s'estoit apparu à luy, & qu'il fust à descouuert, & sans toit, horsmis vne petite Chapelle qu'il voulut estre couuerte de pierre, & semblable à la grotte où il estoit quand il eust ceste vision, ordonnant au reste qu'il y eust vn estage avec vn plancher; ce qu'on n'auoit iamais veu iusques alors aux bastimens des Indiens. Ce Temple, dont la pierre estoit fort bien taillée, comme celle dont les Indiens ont accoustumé d'vser, auoit six vingts pieds en logueur, & quatre vingts en largeur. Ces quatre portes regardoient les quatre principales parties du Ciel, n'y en ayant qu'une d'ouuerte, si bien que les autres trois n'y estoient mises que pour l'embellissement des murailles. Celle qui regardoit, l'Orient seruoit

pour entrer au Temple & pour en sortir. Et d'autant que ces Indiens ne sçauoient point vser de voutes pour y faire vn plancher & vn estage au dessus, ils s'aduiferent d'y bastir des murailles de la mesme maçonnerie, afin qu'elles seruissent de soliuës, qui durassent plus que si elles eussent esté de boys. D'une muraille à l'autre ils laisserent sept pieds de distance, chacun en ayant trois de massif, si bien qu'elle formoit ainsi douze petites ruës en façon de galerie. En lieu de plancher, elles estoient pauées de grandes pierres, qui auoient dix pieds de longueur. De la porte du Temple on tournoit à main droite par la premiere ruë, d'où l'on abordoit la muraille qui estoit à la mesme main, de laquelle tournant à gauche on alloit ioindre la seconde ruë, iusques à l'autre muraille. De ce lieu l'on tournoit derechef à main droite vers la troisiësme ruë, & de cette façon suiuant tout l'allignement de ruë en ruë l'on arriuoit à la derniere, qui estoit la douziësme, où l'on trouuoit vn escalier pour monter au haut du Temple. En châce ruë allant d'une main à l'autre se voyoient des fenestres en façon de canonnières, par où le iour entroit; & au bas de châce fenestre, il y auoit vne niche dans la muraille, où vn portier se tenoit assis, sans occuper le passage; L'escalier estoit fait à deux vis, par où l'on pouuoit monter & descendre, le haut duquel regardoit de front le grand Autel. Le plancher de l'estage estoit paué de quarreaux de pierre noire, qu'on auoit fait venir de fort loing, & qui reluysoit comme du jayet. Du costé du grad

autel il y auoit vne Chapelle de douze pieds en quar-
ré, couuerte de la mesme pierre noire en façon d'es-
cailles, enchassées les vnes dans les autres en forme
de chapiteau, ce qui estoit le plus beau de tout l'ou-
rage. Dans cette mesme Chapelle, en l'endroit le
plus massif de la muraille du Temple se voyoit vn
Tabernacle, où estoit l'image du Fantosme Vir-
cocha ; Et aux deux costez il y auoit deux autres
pauillons fort beaux & tous vuides, qui ne seruoient
que d'embellissement à la principale Chapelle. Les
murailles du Temple s'esleuoient au dessus du plan-
cher de trois aulnes de hauteur, sans qu'il y eust au-
cunes fenestres, avec des corniches faites de pierre
ouuragée en toutes les quatre faces. Au Taberna-
cle de la Chapelle estoit remarquable vn grand pie-
destail, sur lequel fut mise vne statuë de pierre, que
l'Ynca Viracocha fit faire, de la mesme forme en la-
quelle il disoit que le fantosme s'estoit apparu à luy.

Cette statuë representoit vn grand homme ayant
vne barbe de la longueur d'vn pied, & vne robbe en
façon de soutanne, qui luy trainoit iusques à terre.
Il menoit en lesse avec vne chaisne vn animal tout à
fait estrange, de figure inconnüe, & qui auoit les
griffes d'vn lion. Tout cet ouurage estoit fait de
pierre, à la fantasie de l'Ynca, qui voyant que les ou-
riers qui trauailloient à cette figure ne la pouuoient
si bien faire qu'ils eussent voulu, pour n'en auoir
veul'original, leur en faisoit la description le mieux
qu'il pouuoit, iusques à s'habiller plusieurs fois com-
me ce Fantosme, & à se mettre deuant eux en la po-

sture qu'il disoit l'auoir veu. Ce qu'il faisoit avec tant de respect, qu'il ne voulut iamais permettre qu'autre que luy l'imitast, pour ne sembler mespriser l'image de son Dieu Viracocha, si grande estoit l'estime qu'ils faisoient tous de leurs Dieux.

Cette statuë, si toutesfois il est permis de comparer les choses profanes aux sacrées, ressembloit à peu près aux images de nos bien-heureux Apostres, & particulièrement à celle de saint Barthelemy, qu'on peint d'ordinaire foulant aux pieds le maling esprit, tout de mesme que l'Ynca Viracocha tenoit attaché vn animal inconnu. Les Espagnols ayant veu ce Temple, & cette statuë, voulurent dire qu'il se pouuoit faire que l'Apostre saint Barthelemy eust esté iusques au Peru prescher l'Euangile à ces Gentils, & que cela eust donné subiet aux Indiens d'eriger à sa memoire, & cette figure & ce bastimēt. Mais il y a bien trente ans, qu'en vne Confrairie que firent les Mestis natifs de Cozco, qu'ils solemnisent tous seuls avec beaucoup de dépense, & où ils ne veulent admettre aucuns Espagnols, ils prirent pour Patron ce bien heureux Apostre, disant qu'ils le reconnoissoient pour tel, soit que ce fust vne feinte ou vne verité qu'il eust presché l'Euágile au Peru, d'où toutesfois il s'est ensuiuy qu'être les Espagnols, il s'est trouué quelques mesdisās, qui voyans les magnificences que ceux de cette Confrairie souloient faire ce iour là, ont voulu dire qu'ils ne les faisoient pas pour aucune deuotion qu'ils eussent enuers cet Apostre, mais seulement pour l'amour de l'Ynca Viracocha.

Les Indiens ne ſçauoient point r  dre raiſon pour quoy l'Ynca Viracocha fit baſtir ce Temple   Cachas, & non pas   Chita, o  ce Fantome ſ'apparut   luy, ou bien   Yahuarpampa, qui fut l'endroit o  il gagna la victoire ſur les Chancas, l'un de ces deux lieux leur ſemblant plus propre   ce deſſein que n'  toit Cachas. Tellement qu'apreſy auoir bien penſ  , ils conclu  t que l'Ynca le voulut ainſi, pour quelque raiſon qui luy   toit particuli  re. Or bien que ce t  ple fuſt conſiderable, pour   tre baſty d'une   trange ſorte, ſi   ſt-ce que les Eſpagnols n'ont pas la  ſ   de le deſmolir: de quoy toutesfois il ne faut pas ſ'eſtonner puis qu'ils en ont fait de meſme des plus beaux baſtim  s qu'ils ont trouu   dans le Peru, au lieu qu'ils deuoie  t pluſtoſt les entretenir    leurs deſpens, afin que la poſterit   p  t voir les grandes choſes qu'ils auoient gagn  es par leur travaux, & par leur bonne fortune. Mais il ſemble que par ie ne ſ  ay quelle enuie, ils les ayent expreſſemenrabbatus, & razez    fleur de terre, de telle ſorte que les fondemens de ces edifices ny de tous les autres, ſont    peine reſtez auiourd'huy, au grand regret des plus aduiſez, & de ceux qui ſont curieux de la conſeruati  n de ces chefs-d'  uvre d'antiquit  . Mais la principale choſe qui les eſm  t    deſmolir ainſi ces baſtimens, fut vne certaine imagination qu'ils eurent, qu'il y auoit l   deſſous pluſieurs grands threſors cachez. Pour cette meſme raiſon ils abbatirent la premi  re, la ſtatue que nous auons deſcrite, & en firent de meſme du Temple, qu'ils ſaperent iuſques au profond de ſes fondem  s,

& ainſi ils le ruinerent de fonds en comble. Il eſt vray neantmoins qu'il n'y a que fort peu d'années que cette ſtatue de pierre eſtoit encore debout, bien que toute deſfigurée, à cauſe des coups de caillou qu'on luy tiroit contre.

D'un plaiſant ouurage que fit faire l'Ynca Viracocha, & des recompensés par luy données à ceux qui l'auoient ſecouru.

C H A P. XXIII.



Ynca Viracocha eſtoit ſi ayſé & ſi glorieux de ſes beaux exploits, & de ſe voir nouuellement adoré par les Indiens, que ne ſe contentant pas d'auoir fait baſtir le Temple dont nous venons de parler, il fit faire vn autre chef-d'œuvre, non moins ingenieux qu'agréable à voir, mais autant adantageux pour luy, qu'il eſtoit ſatyrique contre ſon pere. Les Indiens diſent qu'auant que le faire, il attendit que le vieux Roy ſon pere fut mort. Quoy qu'il en ſoit, parmy pluſieurs rochers qui ſe voyent en ce parage, on ſon pere s'arreſta, lors qu'au ſortir de Cozco il euita la pourſuite des Chancas, il fit repreſenter en relief deux de ces oyſeaux, que les Indiens appellent *Cuntur*, dont il y en a de ſi grands, qu'il s'en eſt trouué pluſieurs qui auoient cinq aulnes de long, à le meſurer de la

pointe d'une aile à l'autre. Ces oyseaux, comme accoustumez à la proye, sont extremement farouches; & le seroient bien plus encore, si la nature nostre commune mère, ne leur auoit osté les serres. Car ils ont les pieds comme les poulles, mais le bec si fort, que d'un seul coup qu'ils donnent à une vache, ils luy percent le cuir, tellement que deux de ces oyseaux suffisét pour la combattre; Ce qu'ils font ordinaiement, & la deuorent cōme des loups affamez apres l'auoir tuée. Ils sont noirs & blancs, comme des pies, & font d'estranges desgats. l'Ynca voulut donc qu'on en representast deux, dont l'un auoit les ailles retirées, & la teste basse & resserrée, comme la portent ordinaiement les oyseaux, quelques farouches qu'ils soient, lors qu'ils se veulent cacher. Il auoit le bec tourné vers *Collasuyu*, & la queue du costé de *Cozco*. Comme au contraire le second oiseau la tournoit vers la ville, & paroissoit estre fort farouche, ayant les ailles ouuertes, comme s'il eust voulu prendre son vol, & aller fondre sur quelque proye. Les Indiens disoient là dessus, que par l'un de ces *Cunturs*, l'Ynca Viracocha vouloit donner à entendre son pere, qui estoit fort de *Cozco*, pour s'aller cacher au pays des *Collas*; & que par l'autre il se representoit soy mesme, comme s'il eust voulu dire qu'il auoit promptement pris son vol du costé de *Cozco*, pour deffendre cette ville, & tout son Empire.

Ces deux figures estoient encore sur pied, l'an mil cinq cens quatre-vingts, & il me souuient que l'an 95. ie demanday à un Prestre qui s'en vint du

Peru

Peru en Espagne, s'il ne les auoit point veuës ; surquoy il me dit qu'elles estoient presque mesconnoissables, tant pour le peu de soing qu'on auoit eu de les conseruer, qu'à cause de l'iniure du temps, qui les auoit gastées, & plusieurs autres antiquitez semblables.

L'ynca Viracocha se voyant souuerain dans son Empire, & si fort aymé des siens, que le respect qu'ils luy portoient, comme i'ay dit cy-deuant, passoit iusques à l'adoratiõ, tascha de tout son possible à son aduenement à la Couronne, de mettre ses affaires en tel estat, que par son bon gouuernement son Royaume s'establist en vne pleine tranquillité, pour le commun bien de ses subiets.

La premiere chose qu'il fit, fût de reconnoistre les seruices de ceux qui luy auoient donné du secours durant les troubles passez. Il leur fit donc beaucoup de faueurs & de graces signalées, & particulieremēt aux *Quechuas* de *Cotapampa*, & de *Cotanera*. Car pour auoir eulté les principaux Autheurs du secours, il leur permit de porter les cheueux par eschellons, ensemble la bande appelée *Llantu*, & les oreilles percées comme les Yncas, à condition neantmoins que la largeur du trou seroit limitée, & conforme au reiglement qu'en fit le premier ynca *Manco Capac* en faueur de ses Vassaux.

Il donna de mesme plusieurs priuileges aux autres nations, qui en furent grandement contentes & satisfaites. Auecque cela il visita ses Estats, ce que tous ces peuples tindrent à singulière faueur, pour

les grandes choses qu'on racontoit de luy ; Aquoy il employa quelques années, à la fin desquelles, il s'en retourna droit à Cozco. Y estant arriué, il assembla son Conseil, par l'aduis duquel il fit dessein de conquerir les grandes Prouinces qu'on nomme *Caranca*, *Vllaca*, *Lilpi*, & *Chicha*, la conqueste desquelles auoit esté negligée par son pere, pource que son fils, qui estoit d'un naturel fort remuant, le tenoit tousiours en apprehension, comme il sera dit en son lieu. Pour hastier donc l'execution de cette entreprise, l'Ynca Viracocha ordonna qu'aux Prouinces de *Collasuyu* & de *Cuntisuyu*, on fist leuée de trente mille hommes de guerre, qui se tinssent prests pour le printemps suiuant. Il choisit pour Capitaine General vn de ses freres appellé *Pahuac mayta Ynca*, c'est à dire *Celuy qui vole*, pource que ce Prince fut vn des hommes de son temps le plus adroit, & le plus dispos.

Il donna pour Conseillers & pour Maistres de Camp à son frere quatre des principaux Yncas, avec lesquels ce Prince sortit de Cozco ; & des gens de guerre qu'il trouua prests en passant chemin, il en fit vn corps d'armée avecque ses troupes. Luy & ses gens s'en allerent droit aux Prouinces que nous venons de nommer, deux desquelles, à sçauoir *Chicha*, & *Ampara*, adoroient toute la vaste estenduë de la môtagne neigeuse, tant pour sa beauté, qu'à cause de ses belles sources, d'où se formoient plusieurs riuieres qui arrousoient leurs campagnes. Quelques escarmouches de peu d'importance se passerent entre

eux, & les ennemis, qui pour aguerris qu'ils fussent, ne voulurent pas hazarder leurs forces ouvertement contre celles des Yncas, de qui la puissance estoit grande: mais sur tout ce qui leur donnoit plus fort l'allarme, estoit la reputation quel'Ynca Viracocha auoit depuis peu acquise par ses beaux faits; qui estoit si grande, que les ennemis ne se sentoient point assez forts pour luy resister; Ce qui fut cause qu'enfin ces grandes Prouinces se rengerent à l'obeissance des Yncas, avec moins de danger & plus de facilité. Et toutesfois, pource qu'elles estoient fort aguerries, & grandement bien peuplées, il fallut plus de trois ans, pour les reduire, & les conquerir.

L'Ynca conqueste d'autres Prouinces, & fait faire un Canal pour arroser les pasturages.

CHAPITRE. XXIV.

L'Ynca Pahuac Mayta, & ses oncles, ayant conquis ces Prouinces, y laisserent les Gouverneurs & les Officiers, qu'ils iugerent necessaires, pour instruire ces nouueaux subiets, & les mettre à la raison. Cela fait, ils s'en retournerent à Cozco, où l'Ynca les receut avec toutes les faueurs, & toutes les demonstrations d'allegresse, qui luy semblerent dignes d'une si grande conqueste, qu'estoit celle qu'ils venoient de faire. De cette façon l'Ynca Viracocha estendist aussi auant

614 LE COMMENTAIRE ROYAL,
qu'il se pût les bornes de son Empire. Car du costé
du Leuant il auoit pour frontiere la grande monta-
gne neigeuse, du Ponant la mer, & du Midy la der-
niere Prouince des Charcas, à plus de deux cens
lieuës de la ville. Ainsi en ces trois endroits il n'y
auoit plus rien à conquerir, pource que la mer l'en
empeschoit d'un costé, & de l'autre la hauteur des
grandes montagnes des *Antis*, tousiours couuertes
de neige, ioint qu'il auoit pour dernier obstacle le
desert qui est entre le Peru, & le Royaume de *Chili*.
Mais comme la conuoitise de s'assuierir plusieurs
peuples estoit insatiable en luy, elle fit naistre en son
ame de nouueaux desseins, si bien que tournant ses
pensées vers la Prouince de *Chinchafuyu*, qui est du
costé du Nord, il se resolut d'y porter les armes, pour
augmenter son Empire. Apres qu'il eut donc com-
muniqué ce dessein à ceux de son Conseil, il fit leuer
trente mille hommes de guerre, auxquels il donna
pour Chefs six yncas, des plus experimentez qui fus-
sent avecque luy. Ainsi ayant pourueu à toutes les
choses qui luy pouuoient estre necessaires en ce vo-
yage; il se mit en campagne avec son armée, & prit
le chemin de *Chinchafuyu*, laissant dans la ville pour
Gouuerneur l'ynca *Pahuac Mayta* son frere. La pre-
miere Prouince où il aborda, fut celle d'*Antahuilla*,
qui est de la nation des Chancas, ainsi appelée pour
la rebellion de ses habitans contre l'Ynca *Tahuarhua-*
cac, nom qui luy est demeuré iusques à present. Car
les Indiens n'vsent iamais du mot *Chanca*, qu'ils n'y
adioustant en mesme temps la diction *Auca*, c'est à

dire *traistre*. Par cet adiectif est encore denoté vn tyran infidelle, & pariure, à qui sont ordinaires toutes les actions les plus infames, & les plus noires des vsurpateurs, & des mauuais Princes. A quoy i'adiouste que ce mesme mot signifie combattre, & donner vne bataille; Par où l'on peut voir combien de choses comprennent ceux du Peru par vne seule parole.

L'Ynca Viracocha fut receu des Chancas avec tout le bon accueil que luy pûrent faire des personnes affligées. Luy cependant se monstra fort bening envers tous, & obligea les principaux par des paroles de courtoisie, & pareillement par des presens qu'il leur fit d'habillemens & d'autres choses, afin qu'à l'aduenir ils perdissent toute apprehension du chastiment dont les menassoit la faute commise par le passé. Car se sentans coupables, ils se donnoient eux mesme l'allarme, & auoient peur qu'on ne les punist. Outre ce bon traitement, que l'Ynca leur fit, il visita toutes ces Prouinces, & y mit l'ordre qui luy sembla le plus conuenable. En suite de cela il rallia les gens de guerre, qui estoient espars en diuers endroits, & s'en alla avec eux aux Prouinces qu'il desiroit assuiettir. La plus proche de toutes estoit celle qu'on nomme *Huaytara*, grandement bien peuplée, & dont les habitans fort riches & aguerris auoient esté du nombre des rebelles. A la premiere semonce que l'Ynca Viracocha leur fit par ses deputez, elle se rendit, si bien que ceux du pays luy obeirent incontinent, & le furent receuoir avec beaucoup d'hô-

neur & d'humilité , pource que les grandes choses qu'ils auoient ouyes de la bataille de *Yahuarpampa*, les estonnoient d'une estrange sorte. L'ynca les receut courtoisement , & leur fit dire qu'ils ne se souciaffent que de viure contents, & en bonne paix.

De *Huaytara* il tira droit en vne autre Prouince, que l'on nommoit *Pocica*, ou bien *Huamanca*, & s'en alla voir par mesme moyen *Sancaru*, *Parco*, *Picuy*, *Acos*, & la plus part des lieux d'alentour , dont les habitans se rendirent à luy tout aussi tost , & furent bien aysez d'estre ses subiets , pource qu'il n'y auoit point de lieu où il ne fust desiré passionnément , pour les grandes merueilles qu'il auoit faites. Ayant conquis toutes ces Prouinces, il congedia son armée, & pourueut au commun bien de ses nouueaux subiets. Mais entre les autres choses dont il s'aduifa pour la commodité publique , il fit faire vn grand Canal d'environ douze pieds de profond, & qui auoit plus de six vingts lieuës de longueur. Il en tira l'eau des fameuses sources qui sont sur le haut des montagnes, qui se voyent entre *Parcu* & *Picuy*, d'où ce Canal s'estendoit iusques à la frontiere de *Rucana*, & seruoit pour arrouser les pasturages de ces solitudes, qui n'ont que dixhuiët lieuës de largeur, mais dont la longueur s'estend presque partout le Peru.

A cet aqueduc est semblable vn autre Canal qui trauerse presque tout le Pays de *Cuntisuyu*, & s'estend à plus de cent cinquante lieuës du Sud au Nord par les plus hautes montagnes de ces Prouinces, d'où il aboutit aux *Quechuas*, & sert seulement pour arrou-

fer les pasturages , quand ils manquent d'eau en la saison del'Automne. Dans tout l'Empire des Yncas il y a plusieurs de ces Canaux , qui sont autant de chefs-d'œuvre , dignes, à dire le vray, de la grandeur, & du gouuernement de ces Princes. Aussi i'oseray bien dire qu'ils sont comparables aux plus merueilleux ouurages qu'on ayt iamais veus au monde , & mesme qu'ils les surpassent. En quoy certes, ce qu'il y a de plus admirable est de cōsiderer , comme quoy sans aucuns instruments de fer ny d'acier , mais seulement à force de bras & de grosses pierres , les Indiens pouuoient mener ce trauail à trauers de hautes montagnes , où il falloit de necessité qu'ils rompissent de grandes masses de rocher , ioint qu'ils n'auoient pas encore l'inuention d'vser d'arcboutans pour faire des voutes & des arcades , propres à soutenir le terrain , & l'impetuosité de l'eau. Que si quelque riuiera trop profonde, & qu'il fallust trauerser, les incommodoit en leur dessein, ils l'alloyent chercher iusques dans sa source , & tournoyent pour cet effet tout ce qu'ils trouuoient de montagneux. En ces Canaux, qui auoiēt dix ou douze pieds de profond , s'il se récontroit quelque rocher qui les empeschast d'auancer leur trauail, ils le rompoient aussi tost pour donner passage à l'eau , & par le dehors ils fortifioient cet œuvre de grandes pierres de taille, qui auoient iusques à deux aulnes de lōgueur, qu'ils cimentoient les vnes contre les autres ; puis pour empescher que le bestail qui passeroit par dessus n'y gastaſt quelque chose avecque le temps , ils

couuroient le dessus du paué de grandes mottes de terre, amoncellées les vnes dessus les autres.

Je me souuiens d'auoir veu en la Prouince appelée *Quechua*, le canal qui trauerse tout le détroit de *Cuntisuyia*. Apres l'auoir considéré attentiuement, i'en trouuay la structure au delà de toute merueille; Comme en effet il faut aduoüer que ces chefs-d'œuvre sont si admirables, qu'il n'est pas possible de les représenter comme il faut, quelque peine que l'on prenne d'y encherir par dessus; Et toutesfois les Espagnols, comme estrangers en ce pays là, les ont si fort negligez, qu'ils n'ont daigné ny en empescher la ruine, ny monstrier qu'ils les estimoient, ny en faire tant soit peu mention en leurs Histoires. Au contraire il semble qu'ils les aient laissé perdre à dessein, ou plustost par nonchalance. Il en est arriué de mesme des canaux que les Indiens souloient faire pour arrouser les champs, où ils semoient du mayz. Car il s'en est perdu plus des deux tiers, qui ne seruent plus il y a long temps. Que s'il en est resté quelques vns, aux reparations desquels on apporte au iourd'huy quelque soing, c'est pource qu'on ne scauroit s'en passer. Pour tous les autres qui ont esté autresfois, ou grâds, ou petits, l'on n'en voit plus que les marques, que le temps n'a pas encore effacées.

L'Ynca visite son Empire, & reçoit des Ambassadeurs, qui luy font hommage de la part de quelques peuples.

C H A P. XXV.



Pres que l'Ynca *Viracocha* eut pourueu au dessein de l'aqueduc, dont nous venons de parler, & aux choses necessaires à ce trauail, afin d'arroser les pasturages, de la Prouince de *Chinchasuyu*, il s'en alla droit à celle de *Cuntisuyu*, avec dessein de faire en ce voyage vne visite generale de ses Royaumes. Les premieres Prouinces où il s'en alla, furent celles qu'ils appellent *Quechuas*, les principales desquelles sont deux, dont l'une se nomme *Cotapampa*, & l'autre *Cotanera*. Il fit des faueurs particulieres à les habitans, pour reconnoissance du secours qu'il auoit receu d'eux contre les *Chancas*. Apres cela il fut visiter toutes les autres Prouinces de *Cuntisuyu*, ensemble celles de la montagne, du plat pays, & de la coste maritime, afin qu'estant desiré en toutes ces contrées, il n'y eust point de Prouince qu'il n'honorast de sa presence.

A son arriuée en chaque lieu il fit de grandes enquestes, pour scauoir si ses Lieutenans & les Officiers faisoient le deuoir de leur charge. Que s'il se trouuoit quelqu'un qui ne s'en fust point acquitté

en homme de bien, il le faisoit punir à toute rigueur. Car il fouloit dire, que les mauuais Ministres estoient beaucoup plus punissables que les voleurs, pource qu'ils abusoient de l'autorité Royale, qui leur estoit donnée pour rendre la Iustice; & qu'au lieu de soulager les subiets du Roy, ils les opprimoient par leurs concussions faites contre la volonté de l'Ynca, les Ordonnances duquel estoient par eux mesprisées. Comme il eut fait la visite de *Cuntisuyu*, il entra dans les Prouinces de *Collasuyu*, où il visita de mesme les principales villes l'une apres l'autre, & y fit plusieurs graces tant aux Indiens en general, qu'aux Curacas en particulier; puis il s'en alla le long de la coste de cette mer iusques à *Taracapa*.

L'Ynca estoit en la Prouince de *Charca*, quand des Ambassadeurs luy vindrent exprés du Royaume de *Tuema*, que les Espagnols appellent *Tueuman*, qui du costé du Sud-Oest, est à deux cens lieuës des *Charcas*. Comme ils eurent abordé le Roy; *Capac Ynca Viracocha*, luy dirent ils, le bruit que la renommée a semé des beaux faits des *Yncas* tes predecesseurs, leur probité merueilleuse, leur Iustice tousiours égale, la sincerité de leurs Loix, leur Gouvernement fauorable à leurs subiets, l'excellence de leur Religion, leur pieté, leur clemence, leur mansuetude, & les grandes merueilles que ton pere le Soleil a nouvellement faites en ta faueur, sont paruenues iusques aux derniers confins de nostre pays; & mesme elles ont passé beaucoup plus loing. Des choses si grandes & si extraordinaires ont tellement gagné les volontez & les affections des Curacas de tout le Royaume de *Tuema*, qu'ils t'enuoyent prier d'auoir agreable de les recevoir sous ton Empire,

Et de leur permettre de se dire tes Vassaux, afin qu'ils iouyssent du bon-heur d'auoir part à tes bien-faits. C'est pour cela mesme que tout ce que nous sommes d'habitans te prions tres-instamment de nous donner des Incas de ton sang, qui s'en viennent avec nous pour desraciner nos Loix & nos Coustumes barbares, nous instruisant en la Religion que nous deuons suiure, & aux Ordonnances qu'il faut que nous obseruions. Pour reconnoissance de toutes ces choses, nous t'adorons comme fils du Soleil, au nom de tout nostre Royaume, & te receuons pour souuerain Seigneur, t'offrant nos personnes, & les biens que nostre pays produit, pour vn tesmoignage de ce que nous sommes entierement à toy. Ayant fait cette harangue, ils estallèrent quantité de cotton, de miel, de bled, qu'ils appellent çara, & de legumes de leur pays, qu'ils presenterent à l'Ynca, pour l'asseurer qu'ils le mettoiét en pleine possession de tous les biens que leurs terres produisoient. Ils n'apporterent ny or ny argent, pource que les Indiens de cette contrée n'en auoient point, & que mesme on n'a peu iusques icy descouurir aucune mine de ces metaux, quelque diligence qu'on y ayt apportée.

Après que les Ambassadeurs eurent fait ce present à l'Ynca, ils se mirent à genoux deuant luy, selon la coustume du pays, & l'adorerent comme leur Dieu, & leur Roy. Il les accueillit d'abord avec beaucoup de douceur & de courtoisie; Puis ayant receu leur present, pour monstrier qu'il entroit en possession de tout ce Royaume, il enuoya dire à leurs Parens qu'ils leurs fissent bonne chere, & beussent à sa santé, ce qu'ils imputoient à singuliere faueur.

S'estant ainsi resiouïs, on les asseura de la part du Roy, qu'il estoit fort ayse de voir que de leur bon gré ils s'estoient soubmis à l'obeyssance & à l'Empire des Yncas, & que le traitement qu'il leur feroit, seroit d'autant plus preferable à celuy des autres, que par leur affection & leur bonne volonté, ils s'en estoient rendus dignes, bien plus que ceux qu'il auoit fallu auoir par la force. Il commanda là dessus qu'on eust à leur donner pour leurs Curacas quantité d'habillemens de la plus fine laine qui se trouueroit, & de ceux là mesme que les Vierges esleuës faisoient pour la personne du Roy, qui estoient tenus entre eux pour des choses diuines & sacrées. En suite de ces presens, que les Ambassadeurs receurent en grand nombre, il deputa quelques Yncas de ses parens, pour s'en aller instruire en son Idolatrie ces Indiens nouuellement soubmis à luy; leur recommandant sur tout de leur faire perdre les abus & les infames coustumes qu'ils auoient entre eux, & de les instruire aux Loix & aux Ordonnances des Yncas, afin qu'ils les tinssent pour inuiolables. Il voulut aussi que des Ingenieurs s'y en allassent, & des Artisans qui s'entendissent à faire des canaux & des aqueducs, & à cultiuer la terre, pour augmenter les reuenus du Soleil & du Roy.

Après que les Ambassadeurs eurent esté quelques iours à la Cour de l'Ynca, grandement contens de voir les belles qualitez qui estoient en luy, & les bonnes Loix qui s'obseruoient dans son pays, lesquelles faisant vn parallele avec les leurs propres, ils

disoient que celles de l'Ynca estoient asseuremēt les loix du fils du Soleil, au lieu que les leurs passoient pour brutales; Ils conceurent vne si grande opinion de l'Ynca, & de tout ce qui le touchoit, que prenant congé de luy auant que partir, *Vnique Seigneur*, luy dirent ils, *afin qu'il n'y ayt point de peuple dans le monde qui n'ayt le bon-heur d'embrasser ta Religion, tes Loix, & ton Gouvernement, nous t'aduisons que loing de nostre contrée, il y a entre le Sud & le Ponent vn grand Royaume qu'on nomme Chili: Quoy qu'il soit peuplé d'un merueilleux nombre d'habitans, si est-ce que nous n'auons aucun commerce avec eux, à cause de la grande estenduë de la Montagne neigense, qui nous separe les vns des autres. Mais d'autant que nous en auons eu la relation de nos peres & de nos ayeuls, nous auons creu que le deuoir nous obligeoit de t'en aduertir, afin que tu fisses en sorte de conquerir ce pays, & de le ranger à ton Empire, ce qui sera vn grand bien pour ces peuples, lesquels instruits en ta Religion adoreront le Soleil, & prendront part à tes biens-faits.*

L'Ynca fit prendre vn memoire de cet aduis, & congedia les Ambassadeurs, qui s'en retournerent en leur pays. Luy cependant continua son voyage, comme nous auons dit, & visita toutes les Prouinces de *Collasuyu*, obligeant de ses faueurs & de ses biens-faits les Curacas, les Capitaines, les Communautez, & le menu peuple; de maniere qu'il n'y eut celuy d'entre eux qui ne fust extremement ayse de l'auoir pour Roy. Aussi tous les habitans de ces Prouinces l'accueillirent avec des demóstrations d'allegresse, & des acclamations qu'on n'auoit iamais ouyes; Ce qui procedoit, comme nous auons dit,

624 LE COMMENTAIRE ROYAL;
plusieurs fois, de la vision qu'il auoit eue du Fantôme Viracocha, & de la grande victoire de *Yabuar-pampa*, toutes lesquelles choses faisoient que ces Indiens auoient l'Ynca en vne si grande veneration, qu'ils l'adoroient comme vn nouveau Dieu, tellement qu'aujourd'huy mesme ils reuerent le rocher, dans la grotte duquel ils disent qu'il estoit caché, quand le mesme Fantôme s'apparut à luy. Ce qu'ils ne font pas toutesfois par vne maniere d'Idolatrie, veu que par vne particuliere grace de Dieu, ils sont à present desabusez de leur fausse Religion, mais bien par vn certain respect qu'ils portent à la memoire de leur Roy, pour leur auoir esté si bon en temps de paix & de guerre.

Ayant acheué la visite de *Collasuyu*, il entra dans *Cuntisuyu*, & bien qu'il y fust receu avec moins d'applaudissement & de pompe qu'ailleurs, à cause que ces contrées ne sont pas si bien peuplées que les autres, les habitans neantmoins ne laisserent pas de luy faire tout le bon traitement qui leur fut possible. Pour luy donner des preuues bien euidentés de leur volonté en tous les lieux par où il passa, ils firent des arcs de triomphe couuerts de ionc & de fleurs, dont ils couurirent aussi les chemins, chose commune aux Indiens, toutes les fois qu'il est question de receuoir vn grand, & de luy faire en quelque ville vne entrée solennelle; Et pour le dire en vn mot, ils se mirent en tous les deuoirs imaginables, pour luy donner à entendre qu'ils ne desiroient rien tant que de l'adorer. Ainsi l'Ynca Viracocha employa trois ans

entiers en la visite generale de ces trois parties de son Empire , durant lequel temps il ne laissa pas de faire les festes du Soleil , par eux appelées *Raimy* , & pareillement celle qu'on nomme *Citua* , les solemnisant toutes au lieu où il se trouvoit , bien qu'avec moins de magnificence que dans la ville de Cozco ; sans que toutesfois il laissast de s'en acquitter le mieux qu'il pouuoit , pour ne desroger à la vanité de sa Religion. Cette visite acheuée il s'en retourna en la Capitale de son Empire , où il ne fut pas moins bien receu qu'il auoit esté ardemment desiré. Car les plus nobles de Cozco , qui le consideroient comme le soustien , le deffenseur , & le nouveau fondateur de leur ville , s'en allerent tous au deuant de luy , & le receurent ioyeusement avec de nouueaux chants , & des hymnes qu'ils composerent à sa louange.

La fuitte du courageux Hancobuallu , hors de l'Empire des Incas.

CHAP. XXVI.



L'Ynca visita deux fois encore de la façon que nous auons ditte , tous ses Royaumes & ses Prouinces. En la seconde visite qu'il fit , comme ils s'en alloit en la Prouince des Chichas , qui du costé du midy est la derniere du Peru , des nouuelles luy vindrent d'un estrange eue-

nement qui le mit bien fort en peine. Il arriva par vn genereux despit du braue Hancohuallu , dont il a esté parlé cy-deuant. Combien que ce Prince , qui estoit Roy des Chancas , eust esprouué neuf ou dix ans durant le paisible gouuernement des Yncas , qui l'auoient laissé dans vne pleine iurisdiction , sans luy oster vn pouce de terre , de maniere qu'il estoit aussi grand Seigneur qu'auparaurnt , si ne laissa-t'il pas à la fin de s'ennuyer , de ce qu'ayât accoustumé d'estre libre , il se voyoit assuietty à l'Empire d'autrui. Ainsi quelque bon traitement que luy fist l'Ynca , cela n'ostarien au iuste ressentiment de son courage altier & genereux. Car il ne pouuoit souffrir le ioug de personne , apres auoir commandé à tant de vassaux , dont ses glorieux predecesseurs auoient conquis les Estats , & particulièrement les terres des Quechuas , qui furent les premiers à secourir l'Ynca Viracocha , pour l'empescher de gagner vne victoire qu'il se promettoit d'emporter à force d'armes. Comme il se voyoit donc simplement esgal à tous ceux qu'il auoit auparavant tenus au dessus de luy , il s'alla mettre dans l'esprit avec beaucoup de raison , que ses ennemis estoient en plus grande consideration que luy près de la personne de l'Ynca , pour le bon seruice qu'ils luy auoient rendu , & partant , que sa condition en seroit moindre de iour en iour. Emporté par ces imaginations , qui de moment en moment luy troubloient la fantasie , & par cette consideration vray-semblable , qu'à la fin les Yncas soubmettroient à leur Empire tous les Estats du pays , & toutes les Republiques,

ques, il aima mieux ceder à la puissance d'autrui, & abandonner tout ce qu'il auoit, pour se conseruer la liberté, que sans elle la perdre indignement, & posseder d'autres pays de plus grande estenduë que n'estoient ses terres. Ayant donc fait ce dessein, il le communiqua secrettement à quelques vns de ses subiets, & leur declara que son intention estoit de quitter son propre pays & le lieu de sa naissance, pour secoüer le ioug des Yncas; qu'il vouloit resoluement aller peupler de nouuelles terres, pour se rendre Seigneur absolu, ou mourir glorieusement en cette entreprise; Et partant que pour en venir à bout, ils eussent à parler les vns aux autres, & qu'avec toutes les precautions qui leur seroient possibles, ils sortissent petit à petit des terres de la iurisdiction de l'Ynca, menans avec eux leurs femmes & leurs enfans; qu'au reste il leur donneroit pour cet effet de bons passe-ports, afin qu'ils ne treuuaissent aucuns obstacles en leur voyage; Et qu'ils l'attendissent en la frontiere, pource qu'il ne leur seroit pas possible d'en sortir tous ensemble, sans que les nouuelles en vinssent à l'Ynca, qui les empescheroit sans doute de passer outre; Qu'il viendroit incontinent apres eux le plus promptemēt qu'il pourroit, & que c'estoit le chemin le plus asseuré de tous pour regagner la liberté qu'ils auoient perduë; qu'au surplus ce seroit folie & temerité d'en venir à vne rebellion manifeste, pource qu'ils auoient trop peu de forces pour resister à l'Ynca; Ioint qu'en son particulier il ne le deuroit pas faire, quād mesme il en auroit le moyen,


pour ne se monſtrer ingrat & méconnoiſſant, de tant de biens-faits qu'il auoit receus de luy, ny pour uſer d'infidélité enuers ſon Prince, qui l'auoit traité genereuſement; Et partant qu'il ſe contentoit d'aller chercher à ſe mettre en liberté, avecque le moins d'offence qu'il en pourroit faire à vn ſi bon Roy qu'eſtoit l'Ynca Viracoſha.

Par ces paroles, le braue & genereux *Ancohuallo* perſuada cette commune retraite à ſes ſubiets; ſi bien que les premiers qui en furent aduertis, firent paſſer cet aduis des vns aux autres, & ainſi l'ardante inclination que tous les Indiens en general ont pour leur Seigneur legitime, obligea les Chancas à ſuiure le leur part tout où il les voudroit mener. Cette reſolution priſe; il arriua qu'en fort peu de temps, il ſortit de ce pays là plus de vingt mille hommes de guerre, ſans y comprendre les femmes ny les enfans. Avecque tous ces gens le valeureux *Ancohuallo* ſe mit en campagne, s'ouurant vn paſſage dans le pays d'autruy par la terreur de ſes armes, & par le nom de *Chanca* redoutable à toutes les natiôs de cette côtrée. Par cette grâde opinion qu'on auoit de ſon courage, il ſe fiſt touſiours fournir des prouiſiôs & des viures, iuſques à ſon arriuée aux Prouinces de *Tarma*, & de *Pompu*, qui ſont à ſoixante lieuës de ſon pays, où il fiſt quelques rencontres. Or bien qu'il luy fut facile de ſ'afſuietir ces nations, & de les peupler, il n'en voulut rien faire pourtant, pource qu'elles luy ſembloient trop proches de l'Empire de l'Ynca, l'ambition duquel luy fiſt croire qu'il ne tarderoit pas long

temps à s'en faire maistre , & qu'il tomberoit ainsi dans le mesme defastre qu'il auoit essayé de fuir avec tant de soing pour la conseruation de sa liberté. Il se resolut doncques de passer outre , & de s'en aller en quelque lieu loing de là , affin que l'ynca n'y pût si promptement arriuer pour le conquerir. Pour cet effet, il prit son chemin à main droite , & ne cessa de marcher iusques à ce qu'il arriua aux grandes Montagnes des Antis, avecque dessein de se donner vne entrée par là , & de peupler le premier pays où il iugeroit de le pouuoir faire commodement : aussi ny manqua t'il pas , à ce que disent ceux de sa nation ; & se treuua esloigné d'environ deux cens lieues de son pays ; mais l'on ne sçait pas au vray ny par où il entra, ny quelle de ces contrées il peupla. Il est vray que la commune opinion est, qu'ils s'establirent tous en vn pays où il y auoit quātité de lacs & de fort belles riuieres , & là mesme , à ce que l'on tient, ils firent de si memorables exploits , qu'ils sont au de là de toute croyance , & peuuent passer pour des fables inuentées à la loüange des Chancas leurs parens , plustost que pour des Histoires veritables. Ce n'est pas pourtant qu'on doie douter de la haute valeur du grand Hancohuallu , qui fit des choses extraordinaires , que nous laisserons à part , pource qu'elles n'ont rien de commun avec nostre Histoire ; & qu'il nous doit suffire d'en auoir dit ce qui nous a semblé à propos d'estre mis icy.

L'Ynca Viracocha enuoye des Colonies au pays de Hancohuallu , & embellit la vallée d'Yncay de plusieurs beaux bastiments.

CHAP. XXVII.



A fuitte de *Hancohuallu* mit extremement en peinel'Ynca Viracocha , qui eust bien voulu qu'elle ne fut point aduenüe. Mais ne sçachant quel remede y mettre , il se consola sur ce qu'il ne luy auoit point donné subiet de faire cette retraite. Les Indiens neantmoins considerant les interests de plus près , disoient qu'il estoit bien ayse de son partement , suiuant en cela l'ordinaire maxime des grands Princes , qui s'offencent la pluspart du temps de l'excessiue valeur de leurs subiets , principalement quand leur naissance iointe à leur courage les peut rendre redoutables. Apres qu'il se fut doncques bien informé de cette fuitte de *Hancohuallu* , & qu'il eust sceu qu'en ces Prouinces il n'y auoit aucun desordre , afin que cela ne l'empeschât d'aller faire sa visite , il commanda que son frere *Pahuac Mayta* , qui estoit demeuré pour Gouverneur à *Cozco* , & quelques autres de son Conseil assistés d'une bonne garde de gens , s'en allassent visiter les villes des *Chancas* , & qu'avec toute la douceur qui leur seroit possible , ils calmassent les courages que le partement de *Hancohuallu* auoit esmeus.

Les Yncas s'en allerent donc à la vifite de ces villes, & des Prouinces d'alentour, qu'ils laifferent pacifiques le mieux qu'ils peurent. Ils vifiterent par mefme moyen deux fortes places, qu'on appelloit *Challcumarca* & *Suramarca*, qui par le foing des predeceffeurs de *Hancohuallu* auoient esté de long-temps basties; où il eft à remarquer, que *Marca* fignifie fortereffe en la langue de ces Prouinces. Ce fût d'où partit *Hancohuallu*, quand il s'exila volontairement de fon pays; & il luy fut plus fenfible, à ce que difent les Indiens de quitter ces deux Chasteaux, que tout fon pays enfemble. Apres que l'ynca eust fait appaifer l'efmotion que la fuitte de *Hancohuallu* auoit caufée, & qu'il eust acheué de vifiter fon Empire, il s'en retourna tout droit à *Cozco*, avecque deffein d'y paffer quelques années, & de les employer au Gouuernement de fes fubiets, pour leur commun bien, en attendant que les Chancas fuflent entierement r'affeurez. La premiere chofe qu'il fift à fon arriuée à *Cozco*, fut de faire publier quelques Loix, qui luy femblerent les plus conuenables, pour empeschier que d'autres troubles ne furuiffent cômme par le paffé. Il enuoya aux Prouinces des Chancas de nouuelles Colonies pour les peupler, iufques au nombre de dix mille habitans, pour fuppleer au deffaut de ceux qui eftoient morts en la bataille de *Yahuarpampa*, & pareillement de ces autres qui s'en eftoient allez avec *Hancohuallu*. Il leur donna pour conducteurs ou pour Chefs, des yncas priuilegez, qui peuplerent tous les lieux deferts de cõte

Contrée. Ayant mis ordre à tout cela, il fit faire de grands & superbes bastiments par tout son Empire, principalement en la vallée de Yucay, & à Tampu, qui est vn peu plus bas. Cette vallée est la plus fertile & la plus agreable de toutes celles qui sont au Peru; à raison dequoy tous les Roys Yncas depuis *Manco Capac*, qui fut le premier, iusques au dernier, la tindrent en leur temps comme pour le iardin de leur Empire, & pour vn lieu de plaissance, où ils s'alloieēt descharger du pesant fardeau des affaires de la paix & de la guerre, d'auec qui les inquietudes, & les ennuis sont inseparables en matiere de Royauté. Cette vallée est à quatre petites lieues de Cozco du costé de Nordouïest. La situation en est agreable, l'air extrêmement bon, & l'eau en abondance, sans qu'il y fasse ny chaud, ny froid, tant le temperament en est doux, ny sans qu'il y ayt aucunes mouches, ny autres insectes importuns. Elle est située entre deux vastes montagnes, dont l'vne, à sçauoir celle du costé du Leuant, est la grande montagne neigeuse, d'où se precipitent dans la vallée plusieurs torrens, qui seruent en bas d'autant de canaux pour arroser la campagne. Comme le haut de cette montagne a plusieurs rochers qui s'auoisinent des nuës, ainsi au bas elle abonde en riches pasturages, qui sont pleins de toute sorte de venaison, comme de cerfs, de daims, de cheureuls, de chamois, de chevres sauvages, & de Huanacus, sans y comprendre le gibier, & particulièrement les perdris, dont y en a quantité; & y en auroit bien encore plus, n'estoit que les Es-

pagnols ont desolé tout ce pays de chaffe. Cette vallée est abondante en possessions, qui sont pleines de vignes, d'arbres fructiers, & de cannes de sucre, qui par le soing des Espagnols y croissent abondamment.

L'autre montagne, qui regarde le Ponent, est basse à comparaison de la precedente, bien que toutesfois elle ayt plus d'une lieüe de hauteur. Au bas de celle-cy coule la belle riuere de *Yucay*, dont le courant est fort doux, & où il y a quantité de herons, & de canars, & d'autres oyseaux de riuere. Tous les malades de Cozco se font porter en cette vallée, pour y recouurer leur santé, à cause du bon temperament de son air, pource que la ville estant plus froide, est par consequent moins propre à la guérison de ceux qui se trouuent indisposez. Aussi est-ce pour cela principalement, qu'aujourdhuy il n'y a presque point d'Espagnol dans Cozco qui n'ayt quelque possession dans cette vallée. Mais sur tout l'*Ynca Viracocha* ayma ce lieu plus que pas vn autre, à cause dequoy il y fit faire plusieurs bastimens, les vns par recreation, & les autres par vne marque de grandeur & de maiesté. Luy mesme augmenta beaucoup l'estat de la maison du Soleil en richesses, en bastimens, & en seruiteurs, le tout suiuant le respect & la grande veneration que les Yncas portoient à cette maison, & particulièrement l'*Ynca Viracocha*, en memoire du Fantosme qui luy estoit apparu, comme nous auons dit cy-deuant.

*L'Ynca Viracocha donne vn nom à son fils aîné,
& predit l'arriuée des Espagnols.*

CHAPITRE. XXVIII.



Ynca Viracocha employa quelques années aux choses dont il a esté parlé cy-deuant ; & par son bon gouuernement il mit son Empire dans vne pleine tranquillité. Par le testament qu'il fit il voulut que son aîné, qu'il eut de *Coya Mama Runtu*, sa sœur, & sa femme legitime, fust appellé *Pachacutu*, au lieu qu'auparauant on le nommoit *Titu Manco Capac*. Ce mot, qui est vn participe du present, signifie *Celuy qui bouleuerse le monde*. Aquoy se rapporte vn prouerbe qu'ils ont entre eux, lors qu'ils vsent de la diction *Pachamcutin*, quand ils veulent dire *que le monde se change*, qui est vn terme dont ils vsent ordinairement, lors que les grandes choses vont de bien en mal ; & en vsent rarement quand elles se changent de mal en bien, pource, disent ils, que ce dernier n'est pas si ordinaire que l'autre. Conformement à cecy l'Ynca Viracocha pouuoit bien estre appellé *Pachacutec*, pource qu'ayant trouué sur pied son Empire, qui par la rebellion des Chancas, & par la fuitte de son Pere se changeoit de bien en mal, il le changea tout au contraire de mal en bien. Or pource que l'Ynca ne pouuoit

pouuoit porter ce nom, à cause que dès aussi tost que le Fantosme se fut apparu à luy tous ses subiets l'appellerent *Viracocha* ; Ce fut pour cela qu'il voulut que son premier nom, à sçauoir *Pachacutec*, demeurast à son heritier, afin qu'en ce fils se conseruast la memoire des beaux faits du pere. Le R. P. Acoſta, parlant de cecy au vingtiesme Chapitre de son fixieme liure; Cet *Ynca*, dit-il, se doutant bien qu'on trouueroit mauvais qu'il s'appellast *Viracocha*, d'autant que ce nom n'appartenoit qu'à Dieu, allegua pour excuse, que le mesme *Viracocha* s'estoit apparu à luy en songe, & luy auoit commandé de prendre son nom. A celuy-cy succeda *Pachacutec Ynca Yupamqui*, qui fut vn valeureux Conquerant, grand homme d'Estat, & comme ie diray cy-apres, inuenteur de la plus part des costumes, & des ceremonies de leur superstitieuse Idolatrie. Il conclud ce Chapitre par ces paroles, qui se rapportent à ce que i'ay dit cy-deuant, à sçauoir que le Fantosme s'apparut à luy, & qu'il prit son nom depuis; & fit appeller son fils *Pachacutec*. Auecque cela ce que le mesme Acoſta au vingt-vniesme Chapitre dit, que *Pachacutec* osta le Royaume à son pere, est conforme à ce qui a esté déclaré par nous, qui est, Que l'*Ynca Viracocha* osta son Estat à son pere *Yabuarhuacac*, & non pas *Pachacutec* à *Viracocha*, estant vray semblable qu'il y a eu de la faute en cette relation. Mais quoy qu'il en soit, ie suis bien ayse qu'ils l'ayent ainsi donnée, pource qu'elle est fauorable à mon dire.

Le nô de la Royne, femme de l'*Ynca Viracocha*, fut *Mama Runtu*, c'est à dire mere auef, nom qu'ils luy don-

nerent, pource que cette *Coya* eut le teint plus blanc que ne l'ont pour l'ordinaire les Indiennes ; tellement que par comparaison ils l'appelerent *mere œuf* ou *mere blanche comme vn œuf*, qui est vne façon de parler dont ils vsent par galanterie ; Ce que i'ay bien voulu rapporter, en faueur de ceux qui sont curieux des langues, à qui, ie m'asseure, ces choses ne seront pas ennuieuses : Que si elles le sont aux autres, ie les prieray de m'excuser.

Les Peruuïens parlans de l'*Ynca Viracocha*, le faisoient Autheur de cette prediçtion dont l'experience leur donna depuis à connoistre la verité, à sçauoir, qu'apres qu'il y auroit eu dans le pays vn certain nombre de Roys, il y arriueroit des hommes qu'on n'auoit iamais veus, qui leur osteroyent l'Idolatrie & l'Empire. Voila quelle estoit cette prediçtion, qui fut ditte en termes confus, & qui se pouuoient prendre en deux sens. Les Indiens disent qu'apres que le Fantosme se fut apparu à l'*Ynca*, les *Amantas*, qui estoient les Philosophes du pays, le souuerain Prestre, & les plus anciens du Temple du Soleil, qui passoyent pour deuins parmy eux, luy firēt de temps en temps plusieurs questions touchant le songe qu'il auoit fait ; duquel & des Cometes du Ciel, comme aussi des Augures, qu'ils tiroient des oyseaux, de leurs superstitions, & de leurs vains Sacrifices, ils esfayerent d'apprendre ce que vouloit dire vne apparition si extraordinaire ; Mais qu'en cette consultation l'*Ynca Viracocha* se monstra plus grand Deuin qu'eux par la prediçtion que nous venons d'alleguer, qu'il

voulut estre transmise par tradition à la memoire de ses descendans. Il deffendit par mesme moyen qu'o n'eust à la diuulguer parmy les petites gens, pource qu'il n'estoit ny permis de profaner ce qu'ils scauoient par reuelation diuine, ny de la bien-seance non plus de dire; *Qu'il viendrait vn temps, auxquelles Yncas perdant leur Idolatrie, & leur Empire, se verroient descheuz de leur plus haute grandeur, & de la diuinité qu'on leur souloit deferer.* A raison de ces choses, il ne se parla plus de cette prediçtion iusques au regne de l'Ynca Huayna Capac, qui la declara ouuertement vn peu auant que mourir, comme il sera dit en son lieu. Quelques Historiens neantmoins rapportant succinctement les relations que nous en auons faites au long, attribuént cette prediçtion de la reuolution de ce grand Empire à vn certain Dieu que les Indiens appelloient *Ticcoi Viracocha*; comme en effect ie me souuiens d'auoir ouy dire quelque chose de semblable à vn vieux Ynca, qui deuisant avecque ma mere l'entretenoit de l'antiquité & des fables des Roys du Peru.

Cette prediçtion de l'Ynca *Viracocha* s'estant depuis accomplie par la venuë des Espagnols au Peru, & par la conqueste qu'ils firent de ce pays, où ils abolirent l'Idolatrie des Yncas, & y prescherent la foy de la vraye Eglise, fut cause que les Indiens attribuerent aux Espagnols le nom de *Viracocha*. La seconde raison qui les y obligea, l'adioustant à la premiere, fût de dire qu'ils estoient fils du Dieu fantastique *Viracocha*, qui les auoit enuoyez en leur pays, comme nous auons dit ailleurs, pour la deliurance

630 LE COMMENTAIRE ROYAL,
des Yncas, & le chastiment du tyran. Ce qui m'a sem-
blé assez à propos d'estre icy rapporté, bien que hors
de son lieu, sur le suiet d'une prediſtion si merueil-
leuse, que les Rois Yncas auoient eu plusieurs années
auparauant, qui s'accomplit au temps de *Huascar*, &
d'*Atahualpa*, qui furent petits nepeux de cet Ynca
Viracocha.

*La mort de l'Ynca Viracocha, le corps duquel
fut veu par l'Auth eur.*

CHAP. XXIX.



Ynca Viracocha rendit l'esprit, apres
auoir vescu dans la pompe & dans la ma-
iesté dont nous auons parlé cy-deuant.
Il fut pleuré generalement de tous ses
subiets, qui l'adorerent pour Dieu fils du Soleil, &
luy offrirent plusieurs Sacrifices. Il laissa pour son
heritier l'Ynca *Pachacutec*, & eust quantité d'autres
enfans, les vns legitimement sortis de sang Royal,
& les autres bastards. Il conquist vnze Prouinces,
à sçauoir sept du costé du Septentrion, & quatre vers
le midy de Cozco. L'on ne sçait pas au vray com-
bien il vescut d'années, ny combien il en regna. Mais
la commune opinion est, qu'il tint le Sceptre plus de
cinquante ans durant, comme il paroissoit assez à
voir son corps, qui me fut monstré à Cozco, au com-
mencement de l'an 1560. lors qu'ayant à m'en aller
en Espagne, ie fus à la maison du Licentié Paul On-

degardo, natif de Salemanque, & Iuge de cette ville. Comme ie fûs pour le voir, & luy dire adieu, auant mon partement, entre les autres faueurs qu'il me fit; Puis qu'il est ainsi, me dit-il, que vous vous en allez en Espagne, entrez vn peu dás cette salle, & vous y verrez quelques-vns des vostres, que i'ay voulu estre exposez à la veüe du public; dequoy vous serez bien ayse de rendre raison à ceux du pays où vous allez. Là dessus il me fit entrer dans vne salle, où ie trouuay cinq corps Yncas d'extraction, à sçauoir trois d'hommes, & deux de femmes. Le premier, à ce que disoient les Indiens, estoit celuy de l'*Ynca Viracocha*, qui par sa teste, qu'il auoit blanche comme la neige, monstroït bien qu'il auoit vescu long temps. Le second estoit le grand *Tupac Ynca Yupanqui*, arriere nepueu de l'*Ynca Viracocha*, & le troisieme *Huayna Capac*, fils de *Tupac Ynca Yupanqui*, & petit nepueu du mesme Ynca *Viracocha*. Quant aux deux derniers corps, ils me paroïssent point auoir vescu si long temps que les autres, du moins ils n'auoiët pas la teste si blanche qu'eux. L'vn estoit celuy de la Roïne *Mama Runu*, femme de ce mesme Ynca *Viracocha*, & l'autre de la *Coya Mama Oello*, mere de *Huayna Capac*; Et il est vray-semblable qu'apres leur mort, les Indiens s'aduiferët de ioindre ensemble les femmes à leurs maris, comme ils l'auoient esté durant leur vie. Les corps estoient si entiers, qu'il ne leur manquoit pas vn cheueu, ny vn seul poil du sourcil. Ils estoient vestus comme durant leur vie, & n'auoient pour tout ornement, ou pour toute mar-

que de Royauté que la bordure, ou le *Llautu* sur la
 teste. Ils estoient assis à la façon des Indiens, & des
 Indiennes, ayant les mains croisées sur l'estomach,
 & les yeux panchez en terre. Le R. P. Acoſta parlant
 de l'un de ces corps au vingtyviensme Chapitre de son
 sixiesme liure, dit, *Qu'il estoit si entier, & si bien emban-*
mé, avec vn certain bithume, qu'il paroissoit estre en vie; &
qu'avec cela il auoit les yeux approchant du naturel, & faits
avecque de l'or, &c. Aquoy ie confesse n'auoir pris
 garde, pource que ie ne m'y arrestay point de si près,
 ne croyant pas que ie deusse à l'aduenir escrire cecy.
 Que si i'y eusse pensé; asseurement ie me fusse en-
 quis de ces choses plus exactement que ie ne fis; Mais
 sur tout i'eusse voulu sçauoir comme quoy ils en-
 baumoient ces corps; ce qu'on n'eust point refusé
 de me dire estant du pays, comme l'on a fait aux Es-
 pagnols, qui ne l'ont iamais peu apprendre des In-
 diens, quelque diligence qu'ils y ayent apportée;
 Possible aussi en ont ils perdu la tradition, comme
 de plusieurs autres choses que nous auons dites, &
 dont nous parlerons cy-apres. Je n'apperceu non-
 plus qu'il y eust aucun bithume, & n'en puis dire au-
 tre chose, sinon, comme le remarque le mesme
 Acoſta, qu'ils paroissoient estre en vie. Et certaine-
 ment il n'y a pas d'apparence, que des corps qui
 estoient là depuis tant d'années, fussent si entiers, &
 si charnus, s'il n'y auoit quelque secrette drogue
 qu'ils conseruât, quoy qu'elle fust si bien appliquée
 qu'il estoit impossible de le descouurir. Le mesme
Autheur parlant de ces corps au 16. Chapitre de son

cinquiesme liure, en dit ce qui s'ensuit. Ils auoient soing sur toutes choses de conseruer les corps de leurs Roys & de leurs Seigneurs; Ce qu'ils faisoient avecque tant d'art, qu'ils se gardoient plus de deux cens ans en leur entier, sans corruption, & sans puanteur. Cela se voyoit dans Cozco, où les Roys yncas ainsi enbaumez estoient placez chacun dans vne Chapelle où les Indiens les adoroient. Pour desraciner cette Idolatrie le Marquis de Canete, lors Viceroy du Peru fit tirer & transporter à la ville des Roys trois ou quatre de ces corps, au grand estonnement de tous ceux qui les virent si entiers apres tant d'années. Voila ce qu'en dit le R. P. Acosta. Où il est à remarquer que la ville des Roys, où il y auoit bien prés de vingt ans que ces corps estoient, quand ce bon Religieux les vit, est scituée en vn país fort chaud & humide, & par consequent fort corrosif, principalement en ce qui est de la chair, qui ne s'y garde que d'un iour à l'autre, tellement qu'on ne s'estonnoit point sans raison de voir des corps ainsi conseruez, depuis tant de temps. Cela estant, il n'y a pas de doute qu'ils se fussent incomparablemēt mieux conseruez à Cozco, où l'on tient que la chair deuient seiche comme du bois, au lieu de se corrompre, pource que le país est froid & sec. Pour moy c'est mon opinion que leur principal secret, en matiere d'embaumer ces corps, estoit de les enseuelir dans la neige, pour les y faire seicher; puis d'y appliquer le bithume dont fait mention le R. P. Acosta, afin de suppleer par ce moyen au deffaut de la chair, qui s'estoit ainsi deseichée; d'où il s'ensuiuoit que les corps estoient aussi entiers que s'ils eussent esté en vie, si bien qu'à les voir, il sem-

642 LE COMMENTAIRE ROYAL;
bloit, comme l'on dit d'ordinaire, qu'il ne leur man-
quaſt que la parole. J'ay tiré cette coniecture, de
voir qu'en toutes les contrées froides qui ſont aux
Indes, ceux du païs qui veulent conſerver de la chair,
ne ſont que la mettre à l'air, où ils la laiſſent iuſques
à ce qu'elle ait perdu toute ſon humidité, & la gar-
dent autant de temps qu'ils veulent, ſans y ietter ny
ſel, ny autre preſervatif; Et c'eſtoit ainſi qu'on en
uſoit durant le regne des Yncas, quand on en faiſoit
prouiſion pour la nourriture des gens de guerre.

Ie me ſouviens que voyant ces corps, il me prit
fantasie de toucher vn des doigts de la main de *Hu-
ayna Capac*, qui me ſembla eſtre d'vne ſtatue de bois,
tant il eſtoit dur & fort. Ces corps peſoient ſi peu,
que le moindre Indien en pouuoit porter vn entre
ſes bras, ou ſur ſes eſpaules, lors qu'il en eſtoit requis
par quelque Cauallier Eſpagnol, qui auoit la curio-
ſité de le voir. Quand les Indiens les vouloient por-
ter, ils les couuroient de draps blancs, & ainſi ils les
monſtroient dans les ruës, & dans les Places publi-
ques: où tous ceux qui les voyoient paſſer, ſe met-
toient incontinant à genoux, & les adoroient avec
les larmes aux yeux. Et d'autant que les Eſpagnols
meſmes leurs oſtoient le chapeau, à cauſe du tiltre
de Roy, que ces corps auoient porté durant leur vie;
Il n'eſt pas à croire combien eſtoit agreable aux
Indiens cette maniere de ſubmiſſion. Voila toute la
relation qu'on a pû auoir des faits memorables de
l'Ynca Viracocha. Quant aux autres particularitez
de ſa

de savié, & à ses bons mots, l'on ne les sçait point ponctuellement, & il est dommage qu'à faute d'avoir connoissance des lettres, les actions particulieres de la plus part de ces Princes soient demeurées ensevelies.

Le R. P. Blas Valera ne rapporte qu'une seule chose, touchant les paroles les plus ordinaires à cet Ynca Viracocha (qu'il dit avoir apprises de trois Yncas, qui luy en donnerent la tradition) & de plusieurs dicts memorables de quelques autres Rois, dont il fera parlé cy-aprés. Cet Ynca se souvenant avec cōbien de rigueur, & de mauvais traitement son pere l'avoit fait esleuer, souloit remonstrer à ses subiets de quelle sorte ils deuoient instruire leurs enfans, pour les faire honnestes gens. Les peres, disoit-il, sont bien souvent cause de la perte de leurs enfans, & de la corruption de leurs mœurs, par les mauvaises habitudes qu'ils leur laissent prendre en leur bas age. Car les vns font gloire de les nourrir dans les delicatesses & les delices, & leur souffrent de faire tout ce qu'ils veulent, comme s'ils estoient enchantez des merueilles imaginaires de leur esprit & de leur beauté, sans se mettre en peine de ce qui en arriuera quand ils seront grands. Les autres tout au contraire les esleuent avec trop de rigueur, & ceux-cy les perdent encore. Car comme par vne excessiue delicatesse, les forces du corps & de l'esprit s'affoiblissent, ainsi par vn chastiment trop rude, ils deuiennent si hebetez, qu'ils perdent toute esperance d'apprendre, & sont en des

644 LE COMMENTAIRE ROYAL;
apprehensions continuelles, qui les empeschent de
faire rien de viril, de maniere que pour les rendre
tels qu'ils doiuent estre, il n'est rien de meilleur que
de tenir vn milieu entre la douceur & la seuerité, afin
qu'aux occasions de la guerre, ils ne soient pas moins
courageux & vaillans, qu'ils deuoient estre discrets,
& sages en temps de paix; Et c'est par ces paroles
que le R. P. Blas Valera conclud la vie de cet Ynca
Viracocha.

Fin du cinquiesme Liure.



